

Ekwo

Jieremaya

Onye Mpfuchiru Chileke

1 ¹Qwaa bu opfu Jieremaya nwa Hilikaya. O tso le ndu-uke Chileke, shi le mkpukpu Anatotu, no l'ali ndu Benjiaminu. ²Q numaru opfu Chipfu l'apha k'iri l'eto, Jiosaya nwa Amonu bu eze ndu Jiuda; ³bya anmakwa iya pho teke Jiehoyakimu nwa Jiosaya bu eze ndu Jiuda; gbiriri jasu lonwa k'ise l'apha k'iri le nanu l'abubu, Zedekaya nwa Jiosaya bu eze ndu Jiuda, bu teke a kpuru ndu Jierusalemu le ndzu laa aka ozo.

Chileke eku Jieremaya

⁴Opfu Chipfu rwuru mu nchi su: ⁵“Mu byaru akpu ngu ye l'epho ne ngu; mu vuhawaru uzo maru ngu. Mbụ la byaru anwu ngu; mu vuhawaru uzo ho-ta ngu dobe iche; bya emee ngu onye epfuchiru Chileke l'ohamoha.”

⁶Tobudu iya bu; mu su: “Aa! Gube Nnajiuphu, bu Chipfu; mu ta amakwa g'eepfuje opfu; kele mu bunukaru nwata!”

⁷Chipfu su mu: “Ta asujeshi li bunukaru nwata. Iphe, bukpo onyemoye mu suru g'i jepfu be ii-jepfukota je epfuaru iya iphe, mu karu ngu su g'i pfua. ⁸Ta tsujekwa phe ebvu; kele mu nokwa swiru ngu eswiru; teme mu je l'anafutaje ngu l'eka phe. Nokwa iphe, mube Chipfu epfu bu ono.”

⁹Tobudu iya bu; Chipfu bya amachia aka iya bya edenyi mu lonu bya asu mu: “Nta be mu yewaru opfu mu lonu nkengu. ¹⁰Lekwa le-a; ntau-a be mu hotaru ngu dongoo ohamoha l'ophu; bya edobe ngu dongoo iphe, bukpo ali-eze l'ophu; g'i pheshia epheshi; lakashia alakashi; g'i mebyishia emebyishi; kwatsua iphe, du k'akwatsu; li kpa iphe, du k'akpukpu; bya adzaa iphe, du k'adzada.”

Iphe-ohumalenya labo

¹¹Noo ya bu; opfu Chipfu bya erwua mu nchi su: “?Bu gunu be i humaru; Jieremaya?”

Mu sù: “Ọ kwa iphe, mu hùmaru bụ ẹkali-oshi alùmondu.”

¹²Chipfu sù mu: “Ọ bụ-a iphe, ị hùmaru bẹ ọ bụ; kele mu nwụ ẹnya kwaberu opfu mu; mu je l'e-me iya gẹ mu pfuru iya.”

¹³Opfu Chipfu rwukwaa mu lẹ nchị ọzo. Ọ sù mu: “?Bụ gụnu bẹ ị hùmaru?”

Mu sù iya: “Mu hùmaru ite, phùhuru uphu; o gberu egberu kpolia ike l'uzo isheli.”

¹⁴Chipfu sù mu: “Ọo l'uzo isheli ono bẹ mkpurupyata e-shi dapfu iphe, bukpo ndu bu l'alì-a l'ophu. ¹⁵Mu abyakwa ekukọbe ndu alì-eze ndu isheli l'ophu. Nokwa iphe, mụbe Chipfu epfu bụ ono. Ndu eze phẹ a-bya bya eworu aba-eze phẹ sùbe l'onu-abata mkpukpu Jierúsalem. Ẹphe a-dapfu igbulọ iya gbaa mgburugburu; bya adapfu iphe, bukpo mkpukpu, nọ l'alì ndu Jiuda. ¹⁶Mu e-kpe phẹ ikpe; opfu l'ẹphe meru ejo-iphe; l'ẹphe jikaru mu je awata akporu agwa ọzo ùnwù-isensu ọku. Tẹme ẹphe wata abaru iphe, ẹphe gude ẹka phẹ mee ẹja. ¹⁷Ọo ya bụ lẹ-a; gụbedua l'onwongu; rikobe onwongu. Gbalihu je epfuaru phẹ iphemiphe, bụ iphe, mu sùru g'i pfuaru phẹ. G'ẹphe be yekwa ngu ebvu; ọdumeka bẹ mu e-yekwa ngu ebvu l'iphu phẹ. ¹⁸Ntanu-a bẹ mu mewaru ngu; ị buri mkpukpu, a kpushiru ike; bya aburu itso, a wuru l'ígwè; bya aburu igbulọ, a kpuru l'onwirubvu. Mu mewaru ngu g'i pfuru pfushia ike l'iphu ndu alì-a l'ophu; mbu l'iphu ndu eze ndu Jiuda l'ophu; mẹ ndu-ishi phẹ; mẹ ndu-uke phẹ; mẹ ndu alì-a l'ophu. ¹⁹Ẹphe e-tso ngu ọgu; ọle ẹphe taa lwu-kpedu ngu; kele mu nọ swiru ngu eswiru; tẹme mu je l'a-nodu adzo ngu l'eka phẹ. Nokwa iphe, mụbe Chipfu epfu bụ ono.”

Ndu Ízurelu atunwa Chileke

2 ¹Mu byakwa anuma olu Chipfu, sùru mu: ²“Je je araa ya arara gẹ ndu Jierúsalem numa-dzuru; sù phẹ-a:

“Mu nyatakwaru g'o shi
evubeje ngu evuvu
eme iphe,
dù mu ree teke ị bukwa
okoro bya.

I shi yee mu obu gẹ nwanyi,
a luru k'òphúú.

I shi etsojeru mu je aghakota
echiegu;
mbu je aghaa alì ono,
adudu iphe,
aakoje iya ono.

³ Ndu Ízurelu shi duru Chipfu
nsọ.

Ọ bụru phẹ bụ akpuru mbụ,
mu vuru ụzo kpata l'iphe,
mu kọru l'opfu mu.

Iphe, bụkpoo ndu mekparu
phẹ ẹhu bẹ ọ nmaru
ikpe.

Tẹme ẹjo mmekpa-ẹhu
dapfukwa phẹ phọ.

Noo iphe, Chipfu epfu bụ ono.”

4 Unu nūmakwa opfu Chipfu;
unubẹ ọnu-ulo Jiékọpu;
unubẹ ipfu l'ipfu ọnu-ulo
Ízurelu!

5 Wakwa iphe, Chipfu epfu
baa:

“?Bụ gūnu bẹ ndiche unu phẹ
sụkporu lẹ mu mejeru
phẹ, meru g'o gude
ẹphe haa mu jemihu?

Ephe je awata etso ntẹkpe,
adudu urwu, ọ baru
phẹ shi nno bụru ndu
adudu iphe,
ẹphe baru urwu iya
l'onwophe;

6 ọphu ẹphe ajiduru sụ:
‘?Bụ awe bẹ ọ nọ;
mbụ Chipfu,
bụ iya dufutaru anyi
l'alị Ijiputu;
bya edua anyi dughaa
echiegu, adudu iphe,
dabyiru iya nū;
mbụ dughaa alị ono,
bụ evevee dū iya;
yẹe iduma iduma;
alị, dū chakiri chakiri
bya agbahukota tsukiribaa;
alị, adudu onye eshije iya
eshishi;
ọphu ọ dudu onye bu iya
ebubu?’

- 7 Sụ-a; mu duru unu dubata
 l'ali emehu iphe,
 e meberu iya g'unu rije
 akpuru-iphe, ami iya nu;
 yee eku, kuru iya nu.
 Obenu l'unu bataru iya bya
 aturwua ali mu;
 bya emee okiphe mu ono;
 o kpoo idzu.
- 8 Ophu ndu-uke mu ajiduru su:
 "Bu awe be o no; mbu Chipfu?"
 Ndu eme k'ekemu ta amadu
 onye mu bu;
 ndu-ishi kwefuru mu ike;
 ndu mpfuchiru buru Balu
 be ephe epfufe iphe,
 o pfuru; buru iphe,
 ephe etso bu nteke,
 adudu urwu, o baru."
- 9 Wakwa iphe, Chipfu epfu
 baa:
 "Oo ya bu le mu e-pfunupho
 iphe, unu meru mu
 ozo.
 Mu a-odu efunupho ozo
 iphe, unwu nwanwa
 unu meru mu.
- 10 Mbu-a; unu ghabunaa
 eze-enyimu bahu l'ali
 ndu Sayipurosu je
 elekpodapho enya!
 Unu yenu nemadzu g'e
 jerwua ali ndu Keda
 je egbua ya igo
 rengurengu!
 Maeshikwaru ?O nweru
 eka egube iphe ono
 mejeru?
- 11 Mbu-a; ?O duru oha,
 gbajeru agwa phe inwe;
 l'ebe abu l'iphe obu,
 ephe agwa obu bu Chi?

- Obenu ị ndibe mu gbanweru
 mụbe onye ụ
 akpabiri je anata iphe,
 adudu urwu, ọ baru.
- 12 Gube igwe; g'iphe-a nyikwaa
 ngu ishi edzu!
 G'i kpọ-yiaru iya ukuvu!
 Nokwa iphe, Chipfu eepfu.
- 13 Ndibe mu mewaru uzi iphe-eji
 labo.
 Ephe gbadowaru mu;
 mbu mube ọgbà mini,
 doru risaa;
 aso gborogboro;
 bya ebvaru onwophe
 iduma-nnakobe-mini;
 teme o buru
 iduma-nnakobe-mini,
 gbawashihuru agbawashihu;
 ophu mini adojeduru iya.”
- 14 “Izurelu ?o bu ohu to?
 ?O bu onye a byaru anwu;
 o buwaru ohu to?
 ?Denukwanu g'o gude a
 kwaahaa ya okwata?
- 15 Oduma, du igwerigwe
 suakwaru ekiri;
 bya abawaru iya
 hanyihanyi.
 Ephe tukowaru iphe,
 du l'ali iya mebyishichaa.
 Mkpukpu, dugbaa ya nu be
 a tuakwaru oku;
 oku tsufukota iya;
 ophu o duedu onye bu iya
 nu.
- 16 Ozo bu le ndu mkpukpu
 Memufisu;
 yee ndu mkpukpu
 Tahupanahesu kpuwaru
 ngu ishi.
- 17 ?Tobudu ngu meru iya

onwongu;
 eshinu i jikaru Chipfu,
 bu Chileke ngu teke o
 du ngu eje le gbororo?

18 Nta-a; ?bu gunu kparu iphe,
 iije ali Ijiputu eje angu mini,
 shi l'enyimu Shihō?

Ozokwanu; ?bu gunu bu k'eje
 ali Asiriya je angu mini,
 shi l'enyimu Yufurétisu?

19 Ejo-iphe, iime bukwa
 iya e-mechaa h̄a ngu
 ah̄h̄h̄.

O buru azu ono, iila ono
 a-gb̄oru ngu uja.

R̄inaa ya ar̄iri maru g'̄o
 du-beru ngu eji waa
 g'̄otsu-beru ngu l'ehu
 g'i jikaru Chipfu,
 bu Chileke ngu;
 ophu ītsudu iya ebvu
 ililekp̄o.

Nokwa iphe, Nnaj̄uphu epfu
 bu ono;
 mbu Nnaj̄uphu,
 bu Okalibe-Kak̄ota-Ike.”

20 O buro teke d̄uhawaa enya
 be i nyakafuru ishi iphe,
 shi segbabe mu le ngu;
 mbu l'i nyakafuru egbirigba,
 e shi gude tugbabe mu le ngu;
 bya epfua su l'i tii jēeduru
 mu ozi!

G'e lekeberu enya epfu;
 i wata aze-phe l'eli iphe,
 bu ubv̄u, ha l'eli;
 me l'iphe, buk̄poo mkpula
 eze-oshi, jaru āj̄āj̄ā;
 ge nwanȳi-ukpara.

21 Mu k̄owaru ngu g'onye k̄oru
 opfu okpobe vayinu,
 karu upfu bya ad̄ebe ree.

- ?Dɛnukwanu g'o gude ì
ghakɔ̀beep̄ho bya awɔ̀eru
mu phɔ̀ ohu vayìnu?
- 22 Ọ̀ tɔ̀ dukwa m'obeta i gude
ncha-ɔ̀kanwa saa
onwongu;
bya ekwokp̄o ncha
kwogharu iya ẹ̀ka;
ikpe ono, nmaru ngu
ono rakɔ̀eru ngu phɔ̀ l'ẹ̀hu
g'ọ̀ rakuru l'ip̄hu mu.
Nokwa ip̄he, Nnajiup̄hu,
bù Chipfu ep̄fu.
- 23 ?Dɛnu g'ii-shi sù l'a ta
tɔ̀rwukwaru ngu;
ɔ̀phu ì gwɔ̀kwaru ɔ̀bvu
ono, bù Balu?
- Lewarɔ̀ ẹn̄ya l'ẹ̀gube umere,
i meru lẹ̀ nsuda ono!
Gbunaa igo l'ẹ̀gube umere,
i meru l'ẹ̀ka ono.
Ip̄he, ì bù bẹ̀ bukwa nyee
ìnya-kamẹ̀lu, ebu
nggada karagidimu
karagidimu.
- O -buru nggada ono shia
ɔ̀wa-a;
l'ò buru iya shia ɔ̀phuu.
- 24 Nyee nkafu-ìgara-ɔ̀swa,
echiẹ̀gu kwɔ̀waru ẹ̀hu,
akp̄o phẹ̀rephere furumu;
ẹ̀ka ọ̀ duru ip̄he,
agù iya ememe.
- Mbù l'ò -nɔ̀du ana okee;
ta adudu onye alophuje
iya azu.
- Okee ya -nɔ̀du achi iya;
ike taa bvudu okee
ya ɔ̀bu.
- Ọ̀ -bya eshi nyee ya ono
okee;
bẹ̀ ọ̀ hùmaanaru-a ẹ̀ka

ọ nọ.

25 Sụ-a; ta agbashị ọso gbiriri
 jasụ g'ọkpa swachafu
 ngu;
 ẹkpiri akpọ ngu jegirijegiri.
 Obenu l'i pfururọ sụ:
 ?Kẹ gụnuhunu?
 Agwa ndu ọhozo bẹ mu
 yeru obu.
 Ọ buru pẹ bẹ mu a-nọdu
 agba etso.

Ndu Ízurelu gbaru g'aa-nụ pẹ aphu

26 “Ọ kwa g'eekepuje onye-oshi iphu lẹ ntụ mẹ e -gude iya-a; bụ g'e kpuru ọnu-ulo Ízurelu iphu lẹ ntụ. Ẹphebdua; ẹpẹ lẹ ndu eze pẹ; yẹ ndu-ishi pẹ; mẹ ndu-uke pẹ; mẹ ndu mpfuchiru Chileke pẹ; 27 tuko-ru sụ ntekpe, a pyiru lẹ mkpukuruku oshi l'ọ kwa iya bụ nna pẹ. Bya asụ iphe, a pyiru lẹ mkpuma l'ọ kwa iya bụ ne, nwuru pẹ nụ. Nta-a bẹ ẹpẹ ghawarụ mu azụ; ẹpẹ ta aghaduru mu iphu. Ọle ọobujekwanuru; ẹpẹ -daba l'iphe-ẹhuka; ẹpẹ asukwa-a gẹ mu bya adzọo pẹ!

28 “?Denuhunu agwa ọbu, unu gwoshiru onwunu ọbu? G'ẹpẹ bya-nụ mẹ ọ -buru l'ẹpẹ a-dzọta unu mẹ unu -nọdu eje iphe-ẹhuka; kẹle ọo g'unubẹ ndu Jiuda nweberu mkpukpu igwerigwe bụ g'agwa unu dū-be igwerigwe. 29 ?Denu g'o gude unu nọdu epfu l'o nweru iphe, mu meru unu? Ee! Unu tukoakwaru g'unu ha kwefukotaru mu ike! Nokwa iphe, Chipfu eepfu. 30 Iphe, mu chiru ndibe unu bukwa iphe-mmanụ; g'ọ tọ bụ-du l'ẹpẹ eye ọnu k'emezi iphe, ẹpẹ mesweru-a. Ogu-echi ngu sūwaru ndu mpfuchiru unu pyaapyaa g'oduma, alajashị iphe o guderu alajashị. 31 Unubẹ ọgbo nta; unu lenaa ẹnya ree l'opfu Chipfu, sūru: ?Mu bụjeru ndu Ízurelu echięu; tọo alị, gbahuru tsukiribaa? ?Denu g'o gude ndibe mu nọdu epfufe sụ: 'Anyi nwekwaru onwanyi aghaphe g'ọ dū anyi. Ọphu anyi abyapfutabaedu ngu ọzo?' 32 Nwamgboko ?oosohaje iyagba iya? Tọo nwanyi, ala ji; ?oosohaje iphe, e gude kwaa ya akwa ala ji? Obenu lẹ ndibe mu zohawaru mu ujiku olemole, ete nweedu aguta. 33 Lewarọ g'i gude achọ n-yemobu achọ iya k'erengete! Mbụ l'unwanyi, kachakpoo adu njo bẹ i zichawaru iphe, iime. 34 Ọo l'uwe ngu bẹ ndiphe humaru mee-ndzụ ndu ukpa, adudu iphe, ẹpẹ meru; l'ẹbe abụ l'i guderu pẹ l'ẹka ẹpẹ etsuka ọlo ngu.

“I mechakpoo iphemiphe ono; 35 i nọdu epfukwaro sụ l'ọ tọ dukwa iphe, i mejeru. L'ẹhu tee ghukwa mu egbu l'opfu ẹhu ngu. Ọle mu e-kpekwanu ngu ikpe; eshinu i sūru l'ọ tọ dudu iphe, i mejeru. 36 ?Denu g'o gude i tsoru aghaphe achọ g'i gbanwee ọzo ngu. Ọ kwa g'ọ tọ dudu iphe,

ndu Asiriya dūru ike meeru ngu bụ ọ́ ọ́ ndu Ijiputu adūdu iphe, ephe a-du ike emeru ngu. ³⁷Ii-mechakwa shikwapho l'ẹka ono vuru ẹka l'ishi lwaje; kele mu tūkowaru ndu ono, i kpọru obu yeru ono jika; ophu ephe e-yekwaru ọ́ ẹka.”

Ndu Ízurelu, e te gudedu ire phe ẹka

3 ¹“Ọ -buru lẹ nwoke chifuru nyee ya; nwanyi ono -paru iya haa je aluru nwoke ozo; nwoke ono; ?o-chokwarupho nwanyi ono eje to? Ono ?to budu aturuw alı l'ophu l'ophu? Obenu lẹ gubedua gbawaru ukpara l'ẹka ndu du igwerigwe, unu l'ephe eshi onya. ?i-du ike lwaphuta azu lwaphuta mu to? Nokwa iphe, Chipfu eepfu bu ono.” ²Palia enya huma ngeregede ẹka aagwaje iphe. ?O nwekpọru ẹka ono g'o ha a noda phaa ngu kutukutu? Laguga gbororo be inodujecha ele enya onya; mbu noduchaa g'eka ndu Arabu no l'echiegu. I merwuakwaru alı l'ukpara ono, igba ono; yee ejo-iphe ono, iime ono. ³Nokwa g'o gude e sephu mini azu g'o to dzeshi. Ophu mini ishi-apha edzejeedu ililekpoo. Ole iimele-a umele nwanyi-ukpara. Ophu i kwedu haa g'iphere gude ngu.

⁴“Ọ kwa l'i wataru mu eku oku su: 'Nnana mu-e! Ọ kwa ngu bu onye shi lẹ teke mu bu nwata ehe mu! ⁵?Ehu a-nodu eghuwa ngu ro eghu teke teke to? Oke-ehu-eghu ngu; ?o-no jası l'ojejeje to?’ Ọo egube ono be inoduje eepfu opfu; ole iphe, bukpuo ejo-ememe, i-du ike mee; be i mekotawaru.”

Ndu Ízurelu me ndu Jiuda gbaru g'izimanu lwa phe azu

⁶No iya; o buru teke Jiosaya shi buru eze be Chipfu suru mu-a: “?I humawaru iphe, Ízurelu ono, e te gudedu ire iya ẹka ono meru? Ọ tuko-kpoo ru ubvu, ha l'eli; mekpoo oshi, jaru ajaja jekota je anodu ria ogori. ⁷Mu dobesu l'o -mecha iphemiphe ono be o-lwaphuta azu lwaphuta mu; obenu l'o to meduru iya nno. Temenwune iya nwanyi, e te egudekwapho ire iya ẹka bu Jiuda tuko iphemiphe ono, oome ono humakota. ⁸Mu bya ederu ekwo achifu nu onye ono, e gudedu ire iya ẹka ono, bu Ízurelu chifu iya; opfu l'o rinukaru ogori. Mu byakwaro ahuma lẹ nwune iya nwanyi, e gudedu ire iya ẹka kwapho, bu Jiuda be ndu aguduru. Yebedua tugbukwapho lufu je eriahaa ogori. ⁹Ọ buru l'oo l'urwuali, Ízurelu shi arwu ta adudu iphe, Jiuda guberu iya meru g'o gude o merwushia alı; mbu yele iphe, e meru lẹ mkpuma; yee ophu e meru l'oshi nodu eri ogori. ¹⁰Iphemiphe-a mekotakpo Ízurelu; ophu o meduru nwune iya nwanyi, e gudedu ire iya ẹka bu Jiuda g'o gude obu iya g'o ha lwaphuta mu; o bulelu-a eregede be o gude lwa. Nokwa iphe, Chipfu eepfu.”

¹¹Chipfu bya asukwa mu pho: “Ízurelu ono, ekwedu nkemu ilile ono kakwa apfubekoto eme lẹ Jiuda, e gudedu ire iya ẹka. ¹²Woru ozi-a je ezia ndu isheli; su phe-a: 'Lwadupho; gube Ízurelu ono, ekwedu nkemu

ono! Ọ kwa Chipfu epfu opfu ono. Mu taa gbanwụbeekwaru ngu iphu ọzo; ọkele mu phụnukakwaru obu-imemini. Nokwa iphe, Chipfu eepfu. Ehu taa ọdukwaro egbu mu egbu l'opfu ehu ngu. ¹³Ọo epho g'i kweta l'ikpe nmaru ngu. Li kwefuru Chipfu, bu Chileke ngu ike; bya eworu eme iphe-oma ngu je atukaaru agwa ndu ohozo nanunanu l'iphe, bukpuo mkpula oshi, jaru aja; ophu iimejeedu iphe, mu suru g'i meje. Nokwa olu Chipfu.

¹⁴“Unu lwadupho; unube ndu ono, ekweedu nkemu ono! Nokwa iphe, Chipfu eepfu; kele o kwa mbedua bu ji, alu unu. Mu a-hokwa unu nanunanu le mkpuku le mkpuku; ho unu ebo ebo l'ipfu l'ipfu gude lwa Zayonu. ¹⁵Noo teke mu a-nu unu ndu a-nduje eche unu g'onye eche aturu ophu e-shi mu l'obu, bu ndu e-gude mmamiphe yee nkwananya dua unu. ¹⁶O -rwua mboku ono, bu teke unu a-kawa igwe buru l'ali-a; be ephete pfubaekwa k'okpoko oghandu ke Chipfu. Mbụ l'o to bahuada phe legomunggo; ophu ephete abyadu anyatabaa ya. Ophu oghoroko iya adubadu phe; teme ophu ephete emebaedu okpoko oghandu ọzo. Nokwa iphe, Chipfu eepfu bu ono. ¹⁷Teke ono be ee-ku Jierusalemu “aba-eze Chipfu.” O buru le Jierusalemu be ohamoha e-dzukoje bya akwabe epha Chipfu ubvu. Ephete mebaedu iphe, shi phe l'ejo okpoma mgbashi phe ono. ¹⁸O -rwua mboku ono be ndu onu-ulo Jiuda a-tugbabe l'onu-ulo Izuru; ephete eshi l'ali, du l'uzo isheli tuko bya bya eburu l'ali ono, mu nuru ndiche unu phe g'o buru okiphe phe ono.”

Ndu ke Chileke abaru agwa ozo aja

¹⁹Mube Chipfu l'onwomu su:

“Lenu le mu gege
egudekpopho ehu-utso
emekpoe ngu pho ge
nwa; woru eguru ali,
du ree nu ngu;
mbu aka kachaa
ree l'okiphe,
ndu oha l'ophu enweje
enwenwe.

Mu shi dobesu l'ii-ku
mu nna;
ophu ii-hadu mu etsotso.

²⁰Obenu l'oo ge nwanyi,
ji iya egudedu ire iya
eka adujeru ji iya
ghelleghele
bu g'unu duru mbedua;

unubẹ onu-ulo Ízurelu.
Nokwa iphe, Chipfu eepfu
bụ ono.”

21 A nūmaru olu, ada lẹ
nggeregede ẹka aagwajẹ
iphe.

Ọ buru ẹkwa, ẹphe ara;
tẹme ẹphe nọdu arwo
arworwo;
mbụ unwu Ízurelu;
kele ẹphe shiswewaru
uzo phẹ bya azohawa
Chipfu, bụ Chileke phẹ.

22 “Unu lwadupho;
unubẹ ndu ono,
ekweedu kẹ Chileke ono!
Mu e-me g'unu ta abuheru
ndu laphuru azu.”

“Ao; anyi abyapfuta ngu-a; kele ọo ngu bụ Chipfu bya aburu Chileke anyi. 23 Tororo bụ l'onye ele ẹnya gẹ nggeregede ẹka aagwajẹ iphe dzọọ ya; ele ẹnya iphe iphoro; ophu ụzù, aatù l'eli úbvù adudu onye ọo-dzo. Hoo haa bụ l'ọo Chipfu, bụ Chileke anyi bẹ bụ onye ndzọta kẹ ndu Ízurelu. 24 E -shikpo teke anyi bụ okoro bya bẹ agwa agwa ono, bugbaa iphe-iphere ono tukoakwaru nwakanya, nna anyi oche phẹ setaru ripyaa; mbụ aturu yee egbu phẹ; yee eswi phẹ; yee unwu phẹ nwoke; mẹ unwu phẹ nwanyi. 25 G'anyi zenu azee l'eli iphere anyi obu; anyi anodunu g'e kpua anyi iphu lẹ ntụ. L'anyi lẹ nna anyi oche phẹ meakwaru Chipfu, bụ Chileke anyi iphe-ẹji. Noo kele anyi te emejeduru iphe, Chipfu bụ Chileke anyi suru g'anyi mee; e -shi teke anyi bụ okoro bya byasu nta-a.”

Oku izimanu alwa azu

4 1 Wakwa iphe, Chipfu epfu baa: “Ọ -buru l'ii-lwa; gube Ízurelu; g'i lwapfutanu mu! Ọ -buru l'ii-tso agwa ono, bu mu ebyi ono ogu ge mu ta ahumajehe iya; ophu i kpa-phuhueduru akpaphuhu; 2 tẹme ọ -buru l'ii-noduje egude ire-lanu; waa ikpe, pfuru oto; waa apfubekoto ribua angu su: ‘Eshinu Chipfu no ndzu g'ọ no iya-a’ bẹ Chileke e-gude iswi ehu iya kebe ohamoha l'oma; tẹme ohamoha ono egude iswi ehu iya riaha ubvu.”

3 Su-a; wakwa iphe, Chipfu epfu anu ndu Jiuda waa ndu Jierusalemu: “Unu kopyashinaa ẹka a koduru akoko! Unu ta akushinu iphe legbudu! 4 Unu bunaa onwunu ubvu; buaru iya Chipfu! Unu bunaa onwunu ubvu ime-obu; unubẹ ndu Jiuda yee ndu Jierusalemu. Odumeka bẹ oke

ẹhu-eghu yẹbe Chileke a-gbanwuhukwa tsuaha g'òku. Ọ bọru iphe, a-kpa iya nù bọ ẹjo-ememe, unu mewaru. Ọ -wata etsutsu; ta adúkwa onye a-gbanyị iya nù.”

Ọla-l'iswi, e-shi l'isheli

5 “Unu raa ya arara l'alì ndu
Jiuda!

Unu echia ya ẹ mkpu ẹ
Jierúsalemú sù:

‘Unu gbua opu-ọgu tsoru
alì ndu Ízurẹlu l'ophu!’

Unu rashia ọrà ike sù:

‘Unu dzukọbe l'ẹka lanù!
G'anyi gbala laa mkpukpu,
a kpù-pheru igbulọ
mgburugburu!’

6 Unu palia ẹkwa-ọhubama
g'e jeshia úbvú Zayọnu!
Unu gbalaa je anọdu ndzù!
Be ejekpọkwa anmarwùbe;
kẹle mu shikwa l'uzo
isheli gude ọla-l'iswi abya;
mbù mgbu-ọnwu, a-dù ẹjo
ẹji.”

7 Oduma shiakwa
l'ẹpfukala iya wafùta.
Ọla-iphe-l'iswi k'ọha l'ophu bẹ
gbalihuakwaru nù.
O shiakwa l'ẹka ọ nọ tųgbua
eje g'o mee alì unu ono
g'ọ bọru ochobu.
Mkpukpu unu a-tųko
bùchaaru ikpọzu;
ọphu ọ dọdu onye bya
l'ebubaru l'ime iya.

8 Ọo ya bọ ẹ-a;
unu yee uwe-aphù;
raa ẹkwa;
chia mkpu-ẹkwa;
kẹle o-re-phuruphuru,
bọ ẹhu-eghu Chipfu
teke alaphukwa azù

l'èhu anyi.

⁹Chipfu sùru-a: “O -rwua mbòku ono bẹ meji a-tòfukwa ndu eze ẹphe lẹ ndu-ishi. Ndzụ-agùgu egude ndu-uke Chileke; ndu mpfuchiru Chileke agbachihuchaa nchi.”

¹⁰Ọ bụru iya bụ; mu sù: “Haa; gùbe Nnajiuphu, bụ Chipfu; ndu-a ẹphe lẹ ndu Jierúsalemụ bẹ i dusweakwaru ụzọ rengurengu kpọ; kele ị sùru phẹ lẹ nchi a-dùkpokwaa phẹ doo. Ọle ogu-echi bẹ a dabẹkwanuru anyi l'ẹkpiri!”

¹¹O -rwua teke ono bẹ aa-karụ ndu-a ẹphe lẹ ndu Jierúsalemụ sù phẹ-a: “Ejo pherephere, erebushi anụ l'èhu, e-shi lẹ nggeregede, nọ l'echiègu ono; l'e-zi zipfuta ndibe mu; ọphu ọ bụkwa g'ọ phụchaa phẹ aphụcha ọzọ g'ọ mechaa phẹ emecha. ¹²Pherephere ọphu a-ka ono njọ, bẹ l'e-shikwapphọ mụbe Chipfu l'ẹka. Nta-a bụ gẹ mu bya anmaa phẹ ikpe.”

¹³Lenu! Ọhogu ọbu l'asọkwa pulapula g'urwukpu abya. Ụgbo-inya phẹ nọdu ezi phaaphaaphaa g'oke-pherephere abya. Inya phẹ kakwa ugo eme ẹgwa. Nshio anyi! Anyi laakwaru l'iswi! ¹⁴Gùbe Jierúsalemụ; sashinaa ejo-ememe, nọ ngu l'obu hụma l'aa-dzọta ngu! ?Bụ jasụ teke ole bẹ ịi-ha g'ejo ọriri kwaa ngu l'obu?

¹⁵Ọ duru onye-ozì, shi lẹ mkpukpu Danu ara iya arara epfu l'ejo-iphe byapfutaru alì úbvú úbvú Ifuremu. ¹⁶“Woru iphe-a pfuaru ọhamoha! Raarụ iya ndu Jierúsalemụ arara; sù phẹ lẹ ndu ọhogu phẹ shikwa l'alì ẹka dọ ẹnya abya. Ẹphe nọdu echi mkpu-ọgu ekpu mkpukpu lẹ mkpukpu, nọgbaa l'alì Jiuda. ¹⁷Ẹphe nọ-pee ya mgburugburu gẹ ndu eche nche l'egu; opfu l'ọ kwefuru mu ike. Nokwa iphe, Chipfu eepfu.

¹⁸“O kwa umere ngu; yee iphe, i gude ẹka ngu meta bẹ lotaru iphe-a kobe ngu. Ọwaa bụkwa iphe, bẹ eechi ngu. Oomeshikwa ẹhuka ike; teme ọ nọdu alọ ẹka lẹ meji!”

Jieremaya agu aphụ ndibe iya

¹⁹Ẹpho mu-o! Ẹpho mu-o!

Ọolokwa mu ẹka lẹ meji.

Meji edekwa mu kukuku

l'ime mu.

Mu ta adukwa ike edobe

onu doo;

kele mu nūmawaru

opu-ọgu.

Mu nūmawaru mkpu,

eechi l'iphu ọgu.

²⁰Ọla-l'iswi tsopyabẹ ọla-l'iswi.

Alì ono l'ọphu bụakwaa

ikpọzu.

Ibe mu g'ọ ha bẹ a
 tukoerupho mebyia
 lẹ buregedegengu;
 tuko ọlo mu
 mebyishia lẹ
 ntabu-ẹnya lanu.

21 ?Bụ jasụ teke ole bẹ mu
 a-nọdu ele ọgu ẹnya
 l'ooophuko;
 mu anukwapho ẹka
 eegbu opu-ọgu?

22 “Ndibe mu bukwa ndu eswe;
 kele ẹphe ta amadu onye
 mu bu.

Ephe bu unwegirima,
 enwedu egomunggo.
 Temẹ ophu iphe edojedu phe
 ẹnya.

Iphe, ephe maru ẹnya iya bu
 eme ẹjo-ememe;
 ophu ephe amadu eme iphe,
 du ree.”

23 Mu bya elee ẹnya l'eliphe
 mgburugburu;
 ophu o nwedu ugbugba;
 temẹ ophu o dudu iphe,
 du iya nu.

Mu bya elee l'imigwe;
 ophu o duedu iphóró,
 du iya nu.

24 Mu bya elee ẹnya l'eli úbvú
 úbvú;
 ephe tuko anmagbaa
 jiiijiii;
 obvu obvu nọdu angagbaa
 anganga.

25 Mu bya elee ẹnya;
 ophu o duedu nemadzu,
 mu humaru.

Iphe, bukpoọ ẹnu,
 ephe l'eli tukowaa
 phehuchaa.

- 26 Mu bya ejeshia ele ɛnya;
 ali, e shi emehujẹ iphe
 a kọru iya;
 buwaru mgbẹgu-evevee.
 Iphe, bu mkpukpu,
 nokota iya nu g'ọ ha
 bukotawaru ikpọzu
 l'iphu Chipfu; mbu l'iphu
 o-re-phuruphuru,
 bu ẹhu-eghu iya onoya.
- 27 Wakwa iphe, Chipfu epfu baa:
 "Ali ono l'ophu a-bukwaru
 ikpọzu;
 ọle mu tee mebyishibebedu
 iya ro l'ophu.
- 28 Oo ya bu l'eliphe a-gu aphu.
 Imigwe, no l'ephekerephe
 agbahu ochii;
 kele mu pfuakwaru iphe,
 mu pfuru;
 ophu mu alakwa azu azu.
 Mu pfuakwaru g'oo-du;
 ophu mu a-ghakwa ɛnya
 l'azu."
- 29 Ndu mkpukpu ono l'ophu
 -numaepho igiji ndu chi
 inya abya ọgu;
 yee ndu chi apfu abya ọgu;
 ephe agbalaa je edomigbaa
 onwophe l'egbudu;
 ndu awuba l'ogba,
 du l'ubvu je edomishia
 onwophe.
 Ephe atuko mkpukpu phe g'ọ
 ha gbadobua gbalaa.
 O to dudu ophu nemadzu
 eburu.
- 30 ?Bukwanu gunu be iime
 gube ochobu onoya?
 ?Denu g'o gude i yee uwe,
 eke meeme;
 teme i yee iyagba,

e meru
 lẹ mkpọla-ododo?
 ?Denu g'o gude i gude iphe
 techishia ẹnya?
 Akwa, i kwaru onwongu
 bukwa ke mmanu.
 Ndu gu l'ephe eshi onya
 be i dukwaa ashi.
 Ephe gbekwanu achowa
 ndzu ngu.

31 Mu numakwaru olu-ekwa
 onye du ge nwanyi,
 ime eme; mbu l'ude,
 ootsu du ge k'onye
 ime-odu l'eme.
 Olu ono bukwa ke Nwada
 Zayonu,
 l'eme goome tua unme;
 machiru aka iya epfu su:
 "Oowaa! Ike abvukwaa mu.
 Ndu mu be e woakwaru nu
 ndu mgbugbumadzu."

Ọ tọ dudu onye pfuru ọto

5 ¹ "Unu tsokpoerupho oma
 gbororo Jierusalemu jee
 iphu l'azu;
 lephee ẹnya maeshiduru;
 chochaa l'edupfu
 l'edupfu phe maru me
 unu a-huma nwonye
 lanu,
 bu onye eme ire-lanu;
 teme o nodu achoje iphe,
 bu okpobe opfu.
 Oo ya bu le mu aguaru
 mkpukpu ono nvu.
² A makwaru-a l'ephe
 egudeje epha Chipfu ria
 angu; ole angu ono,
 ephe eri ono bukwa
 uka be ephe adzu."

- 3 Gùbe Chipfu; ?tò bụdu iphe,
 bụ ire-lanụ bẹ ìinoduje
 ele ọnya iya?
 I chiru pẹ iphe;
 ọphu o meduru pẹ
 ẹhuka.
 I bya egwee pẹ arakabya;
 ọphu ẹphe ekwekwaphọ
 emezita iphe,
 ẹphe mesweru.
 Ẹphe mecha iphu pẹ;
 o shihugbaa
 dūngudungu gẹ mkpuma;
 bya ajika l'izimanu taa
 lwadu pẹ azu.
- 4 Mu bya ari sụ:
 “Ndu-a bukwa ndu ukpa;
 teme ẹphe buru ndu
 eme eswe.
 Noo kele ẹphe ta amadu ọzo
 ke Chipfu.
 Mbụ l'ẹphe ta amadu iphe,
 Chileke pẹ sūru
 g'ẹphe meje.
- 5 Ọo ya bụ l'ọo gẹ mu bya
 ejepfu ndu ọphu bụ
 ndu-ishi je epfuru
 yeru pẹ.
 Ẹphebedua a-kabekwa maru
 ọzo ke Chipfu;
 mbụ iphe,
 Chileke pẹ sūru g'ẹphe meje.”
 Ọle ọ bụle-a gẹ ndu ọphu dū
 bụ g'ẹphe dū.
 Ẹphebedua kwaphọ
 mebyiwaru iphe,
 shi segbabe mu l'ẹphe;
 bya agbabua ọdo,
 e shi gude kekota anyi
 l'ẹphe.
- 6 Ọo ya bụ l'oduma e-shi l'oswa
 bya afuaru pẹ.

Mbụ l'ejo-nkụta-ọswa
 e-shi l'echięgu bya
 atapyashĩa phe.
 Agụ e-domi l'oma mkpụkpu
 phe kwaberu phe;
 g'ọ lajashĩa phe iphiriba
 iphiriba;
 mbụ mę ọ -dụkpooru onye
 ọphu jeru afuta;
 kele ekwefu-ike ọphu ẹphe
 kwefuru pawaru ẹka;
 tẹme alaphu azụ,
 ẹphe laphuru pawaa
 igwerigwe.

7 “?Denu g'ọ gude mu je
 l'aguru unu nvu?
 Ụnwu unu gbadoakwaru mu;
 bya egude agwa,
 abudu Chileke riahaa
 angu.

Ọle ọ kwa mbędua
 emekotaru phe iphe,
 bu mkpa phe g'ọ ha.
 Ẹphe nọdu erikwaphọ ogori
 bya awu gbiigbiigbi eje
 l'ulo unwanyi-ukpara.

8 Ẹphe bu inya, a nu-jiru ẹpho ree,
 eshi okee agushi ike;
 kele g'ẹphe ha aragba
 mimimi agbapfu nyee
 nwoke ibe phe.

9 ?Bu ẹphe -mechaa nno;
 mu ahaa phe ge mu
 ta nu phe aphu iya too?
 ?Bu oha, du egube ono be
 mu ta agwatadu ugwo
 iphe, ẹphe eme?

Nokwa olu Chipfu.

10 Unu je atuko upho opfu-vayinu
 iya ono phokashichaa;
 ọle ọ to bukwa ke g'unu
 mebyishibebekota iya g'ọ ha.

Unu kwashichaa ya ekali;
 kele ndu-a ta aduedu
 ophu bu ke Chipfu.
 11 Ndu onu-ulo Izurelu yee ndu
 onu-ulo Jiuda
 be mewaru ophu mu
 eguedu ire phe aka
 ililekpoo.
 Nokwa iphe, Chipfu eepfu.”

Chipfu ajika ndu Izurelu

12 Ephe dzuwaru aka kpua Chipfu; kele ephe suru: “O to dukwa iphe, oo-me! Ophu o dukwa iphe, byaru eme anyi. Ogu taa dafukwa anyi; ophu okpa-nri abyapfutakwa anyi. 13 Ndu mpfuchiru Chileke ta aduekwa iphe ozo, ephe bu gbahaa pherephere. Ophu opfu Chileke angedu phe l’ime. Oo ya bu g’e mee phe iphe, ephe suru l’oo-me ndu ozo.” 14 Oo ya bu le-a; wakwa iphe, Chipfu, bu Chileke; bya aburu Okalibe-Kakota-Ike eepfu baa: “Eshinu ndu-a pfuru egube opfu-a be mu e-me g’opfu mu, du gube Jieremaya l’onu buru oku; ndu-a aburu nku, oo-nodu eke.” 15 Wakwa iphe, Chipfu eepfu baa: “Gube onu-ulo Izurelu; mu gudekwa ndu shi aka du enya abapfuta ngu. Oha obu bu oha, shi l’ichee; bya aburu oha, ike du; ndu i ti madu opfu-alì phe; ophu inudu iphe, ephe eepfu. 16 Ekpa-apfu phe dugbaa g’ilu, gheru onu. Teme g’ephe ha tukoru buru ndu du ike l’ogu. 17 Ephe a-tuko iphe, i gege akpata l’opfu ripyaa bya eripyaa nri, i nweru enweru. Ephe atapyaa unwu ngu unwoke me unwany; ephe atapyaa ikpoto eghe me aturu ngu; mekpoo eswi ngu; ephe eripyaa opfu-vayinu ngu; mekpoo oshi figu ngu; ephe egude ogu-echi mebyishia mkpukpu le mkpukpu ngu, bu ndu ophu a kpupheru igbulo mgburugburu, bu mkpukpu i kporu obu yeru.

18 “Obenu le-a; o -rwua mboku ono; be mu tee mebyishibebekwa unu rengurengu. Noo iphe, Chipfu eepfu bu ono. 19 Teke ndu Izurelu jiru su: ‘Bu gunu kparu iphe, Chipfu, bu Chileke anyi meru anyi egube owa-a?’ Unu asu phe le-a: ‘Eshinu unu gbadoru Chipfu bya eje agwota obvu ndu ohozo gwalaha l’ali unu; be nta-a be unu e-jeahaaru ndu ohozo ozi l’ali, abudu k’unu.’”

Okwa, Chipfu nmaru ndu nkiya

20 “Unu raa iphe-a arara g’onu-ulo Jiekoju numa! Unu ejekwapho echia ya le mkpu l’ali Jiuda su phe le-a: 21 Unu numakwa iphe-a; unube ndu eme eswe; teme ophu unu enwedu egomunggo; unube ndu nweru enya; ophu unu aphudu iya uzo. Unu nweru nchi; ophu unu anudu iya iphe. 22 Wakwa iphe, Chipfu eepfu baa: ?To gbaduru g’unu gege anodu atsù mu

ebvu? ?Tò gbàdùru g'unu a-nòdu mu l'iphu phà kpaakpaakpaa. Ọ kwa mbèdua gude ẹja-evevee kpaà oke alì yee eze-ẹnyimu. Tẹme mu tẹ-bua lẹ jàsù l'ojejoje bẹ ọ tọ byadu l'asoghata iya. Akpara-mini a-tùkpokwaa sọ gborogboro; ọle ọ tọ dakadù iya. Ọo-tùkpoo wọwoowoo; ọle ọ tọ soghatadu iya. ²³Obenu lẹ ndu-a buchaa ndu ẹjo-ọkpoma. Tẹme ekwefu ike dọ phẹ l'obu. Ẹphe ghakọbewaru; ọ buru phẹ atugbu. ²⁴Ẹphe ta asujedu onwophe: 'G'anyi tsuëshikwa Chipfu, bọ Chileke anyi ebvu; onye edzeje mini ishi-apha yee mini udzumini l'orwuberu iya; bya aburu iya doberu teke emetajẹ iphe e meberu l'alì.' ²⁵Ọo emeswe, unu emesweje bẹ meru g'ẹgube iphe ono ta adu. Ọ buru iphe-ẹji unu meru; ọphu iphe, dọ ree erwudu unu ẹka.

²⁶"A -bya l'ẹka ndibe mu dọru bẹ ndu eme ẹjo-iphe nọkwa iya; ndu ege-pajeru gẹ ndu agba ọnyà-enu; mękpoo gẹ ndu agba ọnyà, ẹphe e-gude nmata nemadzu. ²⁷Ọo g'unwu-enu ejije ẹpfune iya-a bọ g'ẹregede ẹregede jiru ọlo phẹ pyimu. Ẹphe byawaru bya enweru iphe bya aburu ndu ike dọ. ²⁸Ẹphe bya adachaa okporokpo dọ kẹ ẹpfurepfu. Ọphu iphe-ẹji, ẹphe eme enweedu ókè. Ẹphe ta ahajẹduru ndu enwedu nna enge; ọphu ẹphe agbajẹduru ndu akpa nri ọdzeni.

²⁹"Wakwa iphe, Chipfu epfu baa: ?Tò gbàdùru kẹ gẹ mu nua phẹ aphu iphe-a, ẹphe eme-a tọ? ?Tò gbàdùru gẹ mu melata ẹgube ọha, dọ ẹgube ọwa-a iphe, ẹphe eme mu tọ? ³⁰Iphe, aasọ oyi; mę iphe, anyi ishi ẹdzu meakwaru l'alì-a: ³¹Lẹ ndu mpfuchiru epfukwa iphe, abudu eviya. Ndu uke buru ike-ọkpu bẹ ẹphe gude buru ishi. Ọ buru ẹgube ono bọ g'ọ dọ ndibe mu ree. Obenu lẹ-a; ?bọ gunu bẹ unu e-me mę o -rwua l'ikpazu iya?"

Ndu ọhogu anọ-phe Jierúsalemú mgburugburu

6 ¹"Unubẹ oshilọkpa Benjiaminu; unu gbadaaphọ ọso ndzọ unu! Unu shidupho lẹ Jierúsalemú gbafu! Unu jedupho egbua opu-ọgu lẹ mkpukpu Tekowa! Unu nwube ọku agba ama lẹ mkpukpu Bẹtu-Hakere-mu; kele ejo-iphe shikwa l'uzo isheli achafuta; mbu ejo-iphe, a-tuko iphe mebyishikota! ²Mu e-mebyishikwa nwada Zayonu, bu onye ono, ama ntumatu ono bya aduchaa nwa tekuteku ono. ³Ndu eche aturu a-chiru aturu phẹ bya afuru iya. Ẹphe abya eworu ọlo-ọgu phẹ kpuphee ya mgburugburu. Onyemonye ekebuta uswe iya nkiya." ⁴"Unu kwakọbekwa g'unu l'ẹphe lwua ọgu! Unu gbalihu g'anyi jee ọgu l'echi eswe! Obenu lẹ-a; lewaro ya; iphoro, dọ leswe anyihuakwa. Tẹme onyonyo ọzenyashi hawa ogologo. ⁵Ọo ya bu lẹ-a; unu gbalihu g'anyi lwua ọgu l'enyashi je emebyishia ibe phẹ ẹka nguru anguru!"

⁶Wakwa iphe, Chipfu, bọ Okalibe-Kakota-Ike eepfu baa: "Unu gbutsushia oshi gude je akpo ọkpo-kuu kpo-pee Jierúsalemú mgburugburu! Mkpukpu-a bẹ e chifutajekwa iphe; kele iphe, jiru iya nu bu eme

nemadzū ewere. ⁷Ọ kwa egube ono, mini anọduje asoshi l'enyā-mini ono bu g'ẹjo-iphe shi iya aso asoshihu. Mkpawere yee emebyishi iphe bu ebu-bu l'ime iya. Iphe-ememe, eme iya nū; yee iphe, e mekarū iya dukota l'iphe mu mkpūrumpkuru. ⁸Nūmakwa alọ ẹka lẹ nchi-a; gūbe Jierúsalemu; ọdumeka bẹ mu a-ghakwaru ngu azū; bya emee ngu g'ị bụru ochobu; k'ọphu bụ l'ọ tọ dudu onye byaru eburu l'ime iya."

⁹Wakwa iphe, Chipfu, bụ Ọkalibe-Kakọta-Ike eepfu baa: "Ephe a-tutu nwa ndu Ízurelu, phoduru nū egube ono, aatoje nwehu tutua akpuru vayinu nwa ndu ọphu phoduru nū ono. Ephe abya atughaa ẹka ghọta phe g'onye aghọ vayinu."

¹⁰?Bū onye bẹ mu e-pfubaaru opfu nū lọ ya ẹka lẹ nchi? ?Bū onye angaberu mu nchi l'olu? A swọ-chishiakwaru phe nchi; k'ọphu bụ l'ephe ta anọdu iphe lẹ nchi. Opfu Chipfu anọdujewa eghe phe eghe. Ọ tọ dūjee-du phe ree anuma. ¹¹Obenu lẹ mbedua bẹ oke-ẹhu eghe, Chipfu eme g'ọ tūkoshi phe jiru mu obu; k'ọphu bụ lẹ mu taa dudu ike atagbu iya lẹ nshi.

"Woru iya kpua unwegirima, nọ l'oma gbororo! Kpukwaa ya pho unwo-korobyā, kuru l'ẹka lanu. Nwoke yee nyee ya bẹ ọo-tukocha nmata; mbu ephenebo; mechakpoo ndu bu ogerenya; mbu ndu akahu tutsuwaru. ¹²Ulo phe ulo phe bẹ ee-wocharu nū ndu ọzo; mekpoo ali phe; me unyomu phe; me mu -machiepho ẹka byia ndu bu l'ali ono. Nokwa iphe, Chipfu eepfu. ¹³E -shikpo l'onye ọphu kachaa nwanshi; jasū l'onye ọphu kachaa shi; g'ephe ha emekotaephe ughoro urwu; mekpoo ndu mpfuchiru Chileke phe; me ndu-uke Chileke phe nno pho; g'ephe ha agbakotaephe ẹregede. ¹⁴Onwo, aba ndibe mu bẹ ephe anọduje eme enyiru enyiru g'ọ bụ l'ọ tọ dudu iphe, ọ bụ. 'Nchi dukwa doo! Nchi dukwa doo!' Noo iphe, ephe anọduje epfu bu ono; l'ebe abu lẹ nchi du doo. ¹⁵?Bū iphere ahuma, ephe meshiru du phe tọ? Waawakwa. Iphere ta adukpodaa phe ilile-kpoo! Ephe ta makpodanu g'aasoje enya. Noo g'ọ gude ephe je l'etsoru ndu daru iko daa. Ephe e-rwu ali teke mu a-wata phe ahū ahūhū. Nokwa iphe, Chipfu eepfu."

¹⁶Wakwa iphe, Chipfu epfu baa: Unu pfukpodarupho lẹ mgbakata-uzo lee enya! Unu jieshikwa aji uzo, shi l'ichee! Unu jia aji ẹka uzo, du ree du! Unu awata eshi uzo ono! Noo teke meji a-nmapfuru unu.

"Obenu l'ephe suleru-a l'ephe te eshidu iya. ¹⁷Mu hotaru ndu nche dobe g'ephe chee unu nche bya epfu sū g'unu ngabeje nchi l'oda opu-ogu phe; unu jika sū l'unu taa ngabedu!

¹⁸"Oo ya bu lẹ-a; unu nūmakwa ọwa-a; unube ohamoha! Unu lerweta-kwa enya ree; unube ndu ekebe; g'unu ahuma iphe, e-me phe nū. ¹⁹Gube mgboko; nūmakwa: Mu gudeakwa ọla-l'iswi abapfuta ndu-a; mbu mebyi iphe, ẹjo-oriri phe mitaru. Noo kele ephe ta ngabeduru nchi l'opfu mu. Teme ephe jika ekemu, mu turu dobe. ²⁰Unwū-isensu, shi l'ali Sheba, aakporu mu oku; ?mu gude iya eme gunu; je akpachakpoo l'omanko, shi l'ali, du enya?

Ngweja-akpo-oku unu be mu ta anatajekwa; ophu anu, unu anoduje egburu mu aduekwa mu ree.”²¹ Oo ya bu le-a; wakwa iphe, Chipfu epfu baa: “Mu e-dobe iphe, a-du ndu-a upfu l’okpa. Nna me unwu a-tuko vukota iya daa iko. Ndu obutobu me ndu eshi onya atuko gude iya laa l’iswi.”

²² Wakwa iphe, Chipfu epfu baa: “Unu lenu; o nwekwaru ndu ojogu, a kpatsuru ephe shi l’ali uzo isheli, awu abya. Oha obu bu oha, paru eka. Eka ephe shi bu l’eka igwe beru ali beru.”²³ Iphe, ephe chi abya bu apfu yee arwa. Ephe du ejo ehuka; teme ophu ephe aphudu obu-imemini. Ephe phe aduje g’eka eze-enyimu aso gborogboro l’eka ephe agba l’inya phe eje abya. Ephe doru onwophe ge ndu no l’ogu eje abyapfuta ngu; abya ngu etso ogo; gube Nwada Zayonu!”

²⁴ A kqakwaru anyi ako phe. Eka nwukotachaepho anyi lwaalwaa. Meji tofuwaru anyi. Mbui iphe-ehuka, byaru anyi duepho ge ke nwanji, ime eme.²⁵ Unu ta alufukwa l’egu! Ophu o dukwa onye a-nodu aghaphe le gbororo; kele ndu ohogu ono chikwa ogu-echi. Teme iphe, eye ebvu tukuru uzo ekameka.

²⁶ “Unube ndibe mu; unu yee uwe-aphu; gwoo onwunu le ntu! Unu raa ekwa; ejo-ekwa, du ge k’onye nwa iya lanu nwuhuru; kele o kwa: a -bya l’amaru; ola-l’iswi ono abya afuaru anyi.²⁷ Mu meakwaru ngu onye a-hu ndibe mu ama. Ii-noduje elerweta phe enya; hua uzo phe ama.²⁸ G’ephe ha bukota ndu kwefuru ike, obu kporu gbengu, buepho iphe, ephe tso-ru aghaphe eme bu eye mgbamu. G’ephe ha tukoeppo arwu ali. Ephe bu onyirubvu yee igwe.²⁹ Ekod, aanma be oku iya ata pfupfupfu; k’ophu ee-gude oku kepyashia otanjele. Obenu l’onye-uzu eme ke mmanu; kele ndu ejo-iphe ta abudu l’e mewaru; ephe buchaa.³⁰ Iphe, e kuru phe bu; mkpola-ochaa, a jikaru ajika; noo kele Chipfu jikawaru phe.”

Abu ke Chileke l’eregede

7¹ Wakwa ozi, Chipfu ziru Jieremaya: ² “Je apfuru l’onu-abata eze-ulo Chipfu raa ozi-a arara l’eka ono: Unu numakwa opfu ke Chipfu; unube ndu Jiuda l’ophu, bu ndu eshije l’onu-abata-a eje abaru Chipfu eja.³ Wakwa iphe, Chipfu epfu; mbui Okalibe-Kakota-Ike, bu Chileke ndu Izu-relu: Unu mezia uzo unu; yee umere unu; ge mu e-kwe g’unu buru l’eka-a.⁴ Unu ta akpokwaru obu ye l’opfu ndephu ono su: ‘Wakwa eze-ulo Chipfu; eze-ulo Chipfu; eze-ulo Chipfu!’

⁵ “O -buru l’unu gbanweru uzo unu okpobe agbanwe; bya agbanwee umere unu; bya ekpeaharu nwibe unu ikpe, pfuru oto; ⁶ o -buru l’unu te emeedu ndu lwaru alwalwa ewere; me ndu enwedu nna; me unwanji, ji phe anodedu; ophu unu egbuedu ndu adudu iphe, ephe meru l’eka-a; teme o -buru l’unu ta agbadu etso agwa l’agwa ozo, buhukwaa onwunu be unu emeka iphe; ⁷ noo teke mu a-ha unu g’unu buru l’eka-a; mbui ali ono, mu nuru ndiche unu phe go buru nkephe jasui l’ojejeje.

8“Obenu lẹ-a; unu lenu; iphe, unu kpọru obu yeru bukwa opfu ndepfu, adudu iphe, ọ bu. 9?Unu a-nọdu ezi iphuru; egbu ọchi; eri ogori; eri angu ẹregede; akpọru Balu ụnwù-isensu ọku; agba etso agwa l'agwa, unu amadu; 10e mechakwa; unu abya apfuru l'iphu mu l'ulo-a, bu ulo ọphu eeku ẹpha mu alaru-a; pfuru sụ: 'A nafutawaru anyi k'ọphu anyi a-nọdu eme ahuma ahuma-a?' 11?Ọ du g'ulo-a, eeku ẹpha mu alaru-a be unu mewaru; ọ buru ẹka ndu ana nfu edomije onwophe? Ọle mu elekpọenupho unu ẹnya! Nokwa iphe, Chipfu eepfu. 12Unu tugbunaa nta-a je l'eka mu vuru ọzo hota g'ọ buru ẹka mu e-buru eburu lẹ mkpukpu Shilo; je ahumawaro iphe, mu meru iya; ọ buru iphe, kparu iya nu bu ẹjo-iphe ndibe mu, bu ndu Ịzuru ẹme gbabe. 13Teke ono, unu emekotakpoo iphemiphe ono; mu pfukwaru yeru unu. Mu -pfuchaa; mu epfubaa; ọphu unu angaduru mu nchi. Mu kua unu oku; ọphu unu azaduru mu ẹnu. Noo iphe, Chipfu epfu. 14Ọo ya bu l'ọo iphe ono, mu meru Shilo ono be mu e-mekwapho ọlo-a, eeku ẹpha mu alaru-a; mbu eze-ulo Chileke ono, bu ulo ono, unu kpọru obu yeru ono; mbu ẹka ono, mu nuru unu; bya anukwa iya pho nna unu oche phe ono. 15Mu a-chifu unu l'ataphu mu ẹgube ono, mu chifuru unwune unu g'ẹphe ha, bu ndu Ifuremu.

16“Ọo ya bu lẹ-a; ge gube Jieremaya te epfukwa nu mu l'iswi ẹhu ndu-a. Te echikwaru phe mkpu; ọphu ịirwokwaru phe arworwo; kele mu taa ngakwaru ngu nchi. 17?Ọ du g'i ti humaduru iphe, ẹphe eme l'oma mkpukpu lẹ mkpukpu, nọgbaa l'alị ndu Jiuda; mekpoo l'onu gbororo Jierusalemu? 18Unwegirima akpa nku; ndu nna nọdu aphu-nwu oku; unwanyi nọdu agwophube ukpokutu witi, koru ekoko g'ẹphe gude meuru eze-nwanyi igwe akara. Ẹphe nọdu agbaru agwa ọzo mee gude agwa iya k'ọphu ẹphe a-kpatsu mu ẹhu-eghu. 19Obenu lẹ-a; ?bu mbedua be ẹphe akpatsu ẹhu-eghu? ?Tọ buchidu-a onwophe be ẹphe emekata; shi nno eme onwophe iphe-iphere? Nokwa iphe, Chipfu eepfu. 20Ọo ya bu lẹ-a; wakwa iphe, Nnajiuphu, bu Chipfu epfu baa: Oke-ẹhu-eghu mu be aa-wukwa l'eka-a; me l'ẹhu nemadzu; mekpoo l'ẹhu anu; me l'eli oshi, no l'egu; mekpoo lẹ mebyi iphe, eemeta l'alị; l'o tsua ntsulanu; ọ to dudu onye a-du ike agbanyị iya.

21“Wakwa iphe, Chipfu, bu Okalibe-Kakota-Ike eepfu; mbu Chileke ndu Ịzuru: Unu gururo ngweja-akpo-oku unu yekobe lẹ ngweja mmanu ọzo; unu ataro anu iphe obu l'onwunu; 22kele teke mu dufutaru ndiche unu phe l'alị Ijiputu pfuru opfu nu phe; be ọ to bulekwapo ekemu k'egwe ngweja-akpo-oku; yee ke ngweja mmanu ọzo be mu turu nu phe. 23Obenu lẹ mu tukwarupho ekemu-a nu phe sụ phe: Unu meje iphe, mu suru g'unu meje; g'unu ahuma lẹ mu a-buru Chileke unu; unu aburu ndibe mu. Unu tsojekpọepho ọzo iphe, mu karu unu sụ g'unu tsoje g'ọ hakpoo; k'ọphu ọo-duru unu lẹ ree. 24Obenu l'ẹphe ta angabeduru nchi; ọphu ẹphe eyeduru onu; ọchia iphe, ẹphe meru bu l'ẹphe tsoru iphe, ẹphe ritaru l'ejo

òkpoma phẹ. Obeta òphu ẹphe a-nòdu eje l'iphu l'iphu; ẹphe nòdu ala azu azu. ²⁵E -shi teke ono, ndiche unu phẹ fùtaru l'alì Ijiputu ono byasù nta-a; mbòku-mbòku kpò; bẹ mu anòdujeepho ezi ndu-ozì mu, bụ ndu mpfuchiru mu g'ẹphe byapfuta unu; mu -zichaa; mu ezibaa. ²⁶Obenu l'ẹphe ta ngaduru mu nchi; òphu ẹphe eyeduru mu ònu. Ẹphe wolèrua olu dobe gbòrojii; mee ẹjo-ìphe, ka kẹ nna phẹ oche shii.

²⁷“Gùbe Jieremaya; i -pfuchakpòoru phẹ nù iphemiphe-a bẹ ẹphe taa ngakwaru ngu nchi. I -kua phẹ oku bẹ ẹphe taa zakwa ngu ẹnu. ²⁸Ọo ya bụ lẹ-a; waa iphe, ii-pfuru phẹ baa: Wakwa òha, te emeduru iphe, Chipfu, bụ Chileke iya pfuru; òphu ẹphe emezijedu iphe, ẹphe mesweru. Ire-lanù laakwaru l'iswi; ò gbawaru ọso gbafu; òphu ò nòhedu phẹ l'ogbogboromnu.

Nsùda Tẹterii

²⁹Kpùshia ẹgbushi ngu woru je etuphakpòepho etupha.

Li jekpòoru lẹ nggeregede ẹka aagwajẹ iphe je anòdu gua aphù; kẹle Chipfu jìkakwaru ọgbo ono, ò tų-koshiru oke-ẹhu-eghu iya ono;

mbù l'ọ gwòbèwaru phẹ agwòbẹ ophu.”

³⁰Wakwa iphe, Chipfu epfu baa: “Ndu Jiuda meakwaru ẹjo-ememe l'ẹnya mu. Ẹphe dobeakwaru ahùma phẹ ono l'ùlo ono, eeku ẹpha mu alaru ono; woru iya tųrwua. ³¹Ẹphe kpùchawaru ẹnya ẹka aagwajẹ iphe lẹ nsùda Hìnomu gùá ya Tofẹtu; g'ọ bụru ẹka ẹphe a-kpòje unwu phẹ unwoke mẹ unwanyi ọku. Iphe ono bụru iphe, mu asùduru g'ẹphe meje; òphu ò batajẹkpodarù mu nù l'uche abata ophu. ³²Ọo ya bụ lẹ-a; wakwa iphe, Chipfu epfu baa: Lekwa; mbòku abyakwa teke ee-mechaa; e tee kuẹdu iya Tofẹtu; ọzoo nsùda Hìnomu. Ọchia iphe, ee-kuje iya bụ nsùda Tẹterii; kẹle ẹphe e-mechaa lia odzu lẹ Tofẹtu jasù a taa hùmabaedu ẹka ee-lije odzu l'ẹka ono. ³³Noo teke odzu ndu-a l'a-bùru nri ẹnu, ẹphe l'eli; yee anù, bu l'eliphe. Ọ tọ dudu onye a-chì phẹ chia k'achìfu phẹ. ³⁴Mu emee g'ẹhu-utso; yee ete ẹswa mee bugemu. Olu onye alù nwanyi; yee nwanyi, aachọ alùlu taa duedu lẹ mkpùkpu, nogbaa l'alì ndu Jiuda l'ophu; yele ọma gbororo Jierúsalemù; kẹle alì-a a-bùru ochobu.”

8 ¹“Wakwa iphe, Chipfu epfu baa. O -rwua teke ono bẹ ọkpù ndu shi bụru eze l'alì ndu Jiuda; yee ọkpù kẹ ndu-ishi phẹ; waa ọkpù ndu-uke yee ndu mpfuchiru Chileke; yee ọkpù ndu Jierúsalemù l'ophu bẹ aa-chìshichaa l'ilu phẹ. ²La chìru phẹ bya awùshi jakpata; anwù echi iya; ọnwà echi iya; iphe, bụkpoo kpokpode, nọ l'igwe echikọta iya; mbù iphe ono, ẹphe shi yee obu; shi ejeru iya ozi; mbù iphe ono, ẹphe shi etso ono; ejeru iya l'aji; abarù iya ẹja ono. A taa tųtùkobedu phẹ; òphu eelidu phẹ elili; ọchia iphe, e-me nù bụ l'ẹphe a-dù g'ẹkiriko nshì, wùshiru l'alì. ³Teke ono, mu a-chìkashi phẹ ono bẹ nwa ndu òphu a-nòdu ndzù l'iphe,

bukpoo alì ẹka mu a-chìru phẹ laa a-hata anwùhu eme l'anọdu ndzù. No-kwa iphe, Chipfu, bụ Okalibe-Kakọta-Ike eepfu.”

Iphe-ẹji yẹe eje iphe-ẹhuka

4 “Wafukwaa iphe, ii-pfuru phẹ baa: Wakwa iphe, Chipfu epfu baa: Amadù -daa iko; ?tọo gbeshijeedu tọo? Onye laphuru azu; ?tọo lwajẹ-edu azu tọo? 5?Denukwanu g'o gude ndu-a nọdu alaephọ azu azu? Mbụ-a; ?denu g'o gude ndu Jierúsalemù nọdu alaephọ azu azu? O bụru ẹregede bẹ ẹphe jeru je agbakwa ẹka; jìka l'ẹphe taa lwadù. 6 Mu ngabekpooru nchì rengurengu; obenu l'ẹphe te epfujedu iphe, pfuru nhamunha. Ophu o dudu g'ẹphe ha ophu izimanu ejo-iphe phẹ alwajẹ azu; kẹ g'o sù: ‘?Bunaa gunu bẹ mu meru ẹgube-a?’ Onyemonye emeephọ iphe, guru iya nù; g'ẹka inya eme ẹna l'iphe oghu. 7 Mbukponu oku-eswi-uda, mẹ kerekete; mepkoo agbeta; yee orokiriro; g'ẹphe ha makotaerupho teke ẹphe afutaje. Obenu l'unube ndibe mu ta amadu ekemu mu.

8 “?Denu g'unu e-shi sù l'unu maru iphe; l'unu nweru ekemu kẹ Chipfu l'ẹka ndu ede ekwo gude ẹregede gbanwee ya; o bụru iphe-ẹregede? 9 Ndu maru iphe bẹ ee-mekwa iphe-iphere. Ee-ye phẹ ebvu; nmata phẹ l'onyà. Eshinu ẹphe jikawaru opfu kẹ Chipfu; ?bụ ẹgube mmamiphe gunu bẹ ẹphe nweru? 10 Oo ya bụ lẹ mu e-duru unyomu phẹ nù unwoke ozo. Mu eworu alì phẹ nù ndu ophu l'e-nweru iya nù. L'e shikpoo l'onye kachaa nwanshii jasù l'onye ophu kachaa shii; g'ẹphe ha emekotaephọ ughoro enweru iphe. Ndu mpfuchiru mẹ ndu-uke Chileke tukoerupho bụru iphe lanu. G'ẹphe ha agbakotaephọ ẹregede. 11 Onwo, aba ndibe mu bẹ ẹphe anọduje eme obvu ẹnyiru ẹnyiru g'o bụ l'o tọ dudu iphe, o bụ. ‘Nchì dukwa doo; nchì dukwa doo!’ Noo iphe, ẹphe anọduje epfu bụ ono; l'ẹbe abụ lẹ nchì dudu doo. 12 ?Bụ iphere ahuma ahuma, ẹphe meshiru dudu phẹ tọo? Waawakwa. Iphere ta adukpodaa phẹ ililekpoo. Ẹphe ta makpodanu g'aasoje ẹnya. Noo g'o gude ẹphe je l'etsoru ndu daru iko daa. Mbụ l'ẹphe e-rwu alì teke mu a-wata phẹ echi iphe. Nokwa iphe, Chipfu eepfu.

13 “Wakwa iphe, Chipfu epfu baa: Mu e-mekwa g'o tọ dudu iphe, ẹphe anọdu akpata l'opfu phẹ. Vayinu phẹ taa miekwa amimi. Ophu oshi figu phẹ amiekwa mebyi. Oo-lakota ekwo. Iphe, mu shi nù phẹ bẹ mu a-natakota phẹ.”

14 “?Bunaa gunu kparu iphe, anyi nọ l'ẹka-a nggujungguji owa-a? Unu dzukobenu g'anyi tuko gbalaa gbaru lagbaa lẹ mkpukpu ono, a kpupheru igbulọ mgburugburu ono je anọdu l'ẹka ono laa l'iswi; kẹle Chipfu, bụ Chileke anyi tū-buwaru l'anyi a-la l'iswi; bya eworu mini, e yeru iphe, egbu egbugbu woru chee anyi. O bụru iphe, kparu iya nù bụ l'anyi meru iya iphe-ẹji. 15 Anyi leri ẹnya nchì-adu-doo; ophu o dudu iphe-oma, byaru anyi. Anyi lee ẹnya teke e-me g'ẹhu dudu ike; o buerupho ebvu bẹ eeye anyi. 16 Unme, inya ndu ohogu anyi, nọ lẹ mkpukpu Danu ezi bẹ a -gbe

l'eka-a anu. Teke oke-inya phe raaharu mijimiimii; ndu ali-a l'opfu awa-ta anma pyaapyaapya; kele ephe byaru g'ephe lwekota ali-a l'opfu; yee iphemiphe, no iya nu; mebyia mkpukpu le mkpukpu; yee ndu bu iya nu.”

17“Lekwa le-a; mu a-chiru ejo agwo ejo agwo yeru unu; mbu ogiji ogiji, adudu iphe, a-suru iya ederitaru. O buru agwo ono a-bya atagbushia unu. Nokwa iphe, Chipfu eepfu.”

18 Aphu-a, byaru mu nu-a ta
adukwa onye suru
mu aduta.

Meji tofuakwaru mu l'ime
onwomu.

19 Ngabekpodapho nchi numa
mkpu, ndibe mu echi;
mkpu, ephe gb'e l'ali,
du enya enya echi su:

“?O du ge Chipfu ta anedu
le Zayonu to?”

?Onye Eze phe ono ta anedu
iya to?”

“?Bu gunu meru g'o gude
ephe gude nteke phe
kpatsu mu iwe;
mbu nshi ono,
ephe
gwotaru l'ohozo ono,
adudu iphe, o bu ono?”

20 “Teke akpataje iphe e meberu
l'ali bvukwaru;
Onanwu bvua;
opfu a dzoduru anyi.”

21 Eshinu e gwewaru ndibe mu
arakabya bukwa mu be
e gwepyashiru.
Mu agukwa aphu;
teme ndzu-agugu nodu
agushi mu ike.

22 ?To dukpoda obvu-etete,
du l'ali Giladu?

?O du g'o to dukpoda onye
eme obvu l'eka ono?

?Bukwanu gunu meru g'o gude
opfu onwo ono,

- aba ndibe mu ono akadu
phe mma?
- 9 ¹ O du g'a su l'ishi mu bu
nggele, mini shi asoshihu.
Enya mu buru eka enya-mini
futaru!
- Mu gege anoduepho ara
ekwa eswe lenyashi
kegbushi,
eegbushi ndibe anyi.
- ² O du g'a su le mu nweru
eka ndu ije akwaje
lechiegu;
me mu ahaepho ndibe
anyi;
mbu tugbukpoepho lufuru
phe;
kele ephe erikota ogori
g'ephe ha;
ndu kuru l'eka ono
bukota ndu egudedu
ire phe eka.
- ³ Ephe ekweje ire phe g'onye
kweru apfu gude agba
uka agbagba.
O to budu ire-lanu be ephe
gude atu okoo l'ali-a.
“Ephe eshije l'eme iphe-eji
owa-a daba l'eme ozo;
ophu ephe amadu onye
mu bu.”
Nokwa iphe, Chipfu eepfu
bu ono.
- ⁴ Su-a; onyenonu kpakwaru
ndu ephe l'iya eshi
onyà l'aphara!
Ophu unu akpokwaru obu
yeru unwune unu
unwoke; kele nwoke,
yele nwibe iya bu
nwune agbakwaru
iya eregede.

- Teme iphe, bukpo onye
 unu l'iya eshi ònyà
 buru onye mgbamu.
- 5 Ònyà nòdu agbaru
 onye yèle iya eshi
 ẹregede.
- Ọphu ọ duedu onye
 epfuje ire-lanu.
- Ephe tukowaru zia ire
 phe adzu uka.
- Ephe mewaru iphe-eji
 jasụ ephe tuhu
 onwophe ayi.
- 6 Ọ buepho l'unu bu
 l'echilabọ ẹregede.
- “Ephe gude agba
 ẹregede ono jika
 amaru onye mu bu.”
- Nokwa iphe, Chipfu eepfu.
- 7 Ọo ya bu ẹ-a; wakwa iphe,
 Chipfu, bu
 Ọkalibe-Kakota-Ike
 eepfu baa:
- “Lekwa; mu a-hukwa phe
 ama; nuchaa phe anucha;
 kele-a; ?bubaa gunu ozo
 be mu e-meba ẹ k'iphe-eji,
 ndibe mu eme?”
- 8 Ire phe bu apfu, egbu
 egbugbu.
- Ephe anoduje epfu opfu
 l'ẹregede.
- Onyemonye nodu
 egudeje ire
 mecha-mecha epfu
 eyeru nwibe iya;
 o bekwanu l'o gude
 obu iya agbaru iya
 ònyà.
- 9 ?Mu ta ahushi phe ahuhù
 iphe ono,
 ephe eme ono to?

?Mu te emelatashi phe iphe,
 ephe meru mu;
 mbu ndu ali-a to?"
 Nokwa iphe, Chipfu eepfu
 bu ono.

10 "Mu a-kwashi enya-mini;
 kpoo mkpu-ekwa
 l'opfu-ehu ubvu ubvu.
 Mu abya agwa aphu irwu
 eswa, du l'echiegu;
 kele o kposhihuwaru nku;
 ophu o dudu ndu
 eshiswetajekwadu iya nu;
 ophu o duedu onye
 anumaje ora eswi l'eka
 ono.

Unwenu, ephe l'eli
 phekishihuwaru;
 unwanu gbakashihu."

11 Wakwa iphe, Chipfu epfu
 baa:
 "Jierusalemu be mu e-me
 g'o buru ikpozu;
 eka nkuta-oswa e-buru.
 Mu jekwa e-mekwapho ge
 mkpukpu le mkpukpu,
 nogbaa l'ali ndu Jiuda
 buru ochobu;
 k'ophu bu lo to dudu onye
 ebu iya ebubu."

12?Deni onye bu nwoke, maru iphe ke g'iphe-a doo ya enya? ?Bu onye
 be Chipfu ziru iphe k'ophu bu l'oo-du ike koo ya g'o doo enya? ?Bu gunu
 meru g'o gude e mebyishia ali-a woru iya togbo ophorokpo g'echiegu, a ta
 adudu onye aghaje iya aghagha?

13 Wakwa iphe, Chipfu epfu baa: "O kwa iphe, kparu iya nu bu l'ephe
 gbadoru eme iphe, mu turu l'ekemu, bu ophu mu turu doberu phe. Ephe
 te emeduru iphe, mu suru g'ephe meje; ophu ephe angaduru nchi l'ekemu
 mu. 14 O bu-chiaru iphe, ephe jeru etsoru bu ejo okpoma phe. Ephe jeru
 awata agwo nshi, bu Balu, bu iphe, ndiche phe ziru phe. 15 Oo ya bu le-a;
 wakwa iphe, Chipfu, bu Okalibe-Kakota-Ike eepfu baa; mbu Chileke ke
 ndu Izurelu: Lekwa; mu e-me ndu-a g'ephe ria nri, atso ilu. Mu emee phe;
 ephe angwa mini, e yeru iphe, egbu egbugbu. 16 Mu a-chikashi phe g'ephe

dzuru ohamoha, bu eka ephe ta majeduru; ophu ndiche phe amajeduru iya. Ozo bu l'oo ogu-echi be mu e-gude chia phe jasụ mu emebyishibebe phe.”

- 17 Wakwa iphe, Chipfu,
 bu Okalibe-Kakota-Ike
 eepfu baa:
 “Unu rinaa ya ariri nta!
 Unu kunaa unwanyi,
 akàjé akàkà ekwa
 g'ephe bya!
 Unu zikwaa g'e kua ndu
 ophu kachaa ara
 ekwa erengete
 g'ephe byakwapho!”
- 18 “G'ephe bya ewegwa bya
 akarụ anyi akàkà ekwa
 jasụ enya-mini awata anyi
 aso gborogboro l'enya;
 mbu g'enya-mini nodu
 awu anyi gbukugbuku
 l'ishishi enya.”
- 19 Aanukwa akàkà-ekwa,
 aaka le Zayonu eka
 ephe ara su:
 “Waa g'e mebyishiru anyi!
 Waa g'iphere anyi habe shii!
 Anyi hafutajekwa ali anyi-a
 kele ulo anyi be e
 mebyishichawaru.”
- 20 Nta-a bu le-a; unube
 unwanyi;
 unu numakwa
 Opfu Chipfu!
 Unu saa nchi numa opfu,
 shi iya l'onu!
 Unu zikwa unwada unu
 g'aakaje akàkà ekwa!
 G'onyenonu zia nwibe iya
 g'eechije mkpu ekwa!
- 21 Onwu shiwaa le windo-ulo
 anyi pyobata
 bya abahu l'eka anyi meru;

- ọ nguru anguru.
 Ọ bapfu unwegirima l'etsuzo;
 bya emee ophu
 unwokoroby
 edzukọedu
 l'edupfu-ọha.
- 22 Pfu sū: “Wakwa iphe,
 Chipfu epfu:
 Odzu unwu-eliphe l'a-daka
 ge nshi l'oma-egu;
 g'eka e gburu ereshi;
 eswa iya wushiru;
 ophu ọ dudu onye
 achikobe iya nu.”
- 23 Wakwa iphe, Chipfu epfu
 baa:
 “G'onye maru iphe te
 egudekwa mmamiphe
 iya kua onwiya!
 Ophu onye okpehu du
 egudekwa okpehu iya
 kua onwiya!
 Ophu onye nweru iphe
 egudekwa iphe,
 o nweru kua onwiya!”
- 24 Ochia l'onye achọ aba abaa;
 bu iphe, oo-gude aba
 abaa bu;
 le mu doru iya enya;
 teme o maru mu ree;
 mbu maru le mu bu Chipfu;
 le mu emeje iphe-oma;
 bya ekpe ikpe,
 pfuru oto;
 bya egoshi le mu
 pfuberekoto.
 O buru l'eliphe be mu
 emekota iphe ono;
 kele o bukota iphe,
 ememe iya aduje
 mu ree.
 Nokwa iphe, Chipfu eepfu.

²⁵Wakwa iphe, Chipfu epfu baa: “Lekwa; mbòku abyakwa, bù mbòku, mu a-nù phẹ aphụ; mbụ ndu e buru úbvú l'èhu kpoloko; ²⁶mbụ ndu Ijiputu; yẹe ndu Jíuda; waa ndu Edòmú; waa ndu Amònu; waa ndu Mówabu; məkpoo iphe, bukpuo ndu bukòta l'echiègu; mbụ ndu akpuje ishi dabunuka iya adabu. Kẹle òhamoha ono g'èphe ha te ebuduru úbvù ililekpoo; tẹme je akpaa lẹ ndu Ízuru l'òphu te ebukwarupho úbvù l'ime obu phẹ.”

Chileke yẹe nshi

10 ¹Unu nùmakwa iphe, Chipfu epfu anụ unubẹ ọnu-ulo Ízuru!

²Wakwa iphe, Chipfu epfu baa:

“Unu ta anwukwa iphe,
ndu òhamoha eme;
òphu iphe-òhubama,
emeshi l'akpaminigwe
eyekwa unu ebvu.

A makwaru-a l'udu iphe ono
eyekwa ndu òhamoha
ono ebvu;

³ kẹle omelali ndu ono bù
iphe, adudu iphe, ọ bù.
Èphe egbutajẹ oshi l'oswa;
ndu eme ọna abya egude
ayoo phẹ pyia ya.

⁴ Èphe abya egude
mkpola-ochaa mẹ
mkpola-ododo gude
mee ya ọna.
Èphe abya egude ọngu;
yẹe nggu kpobe iya
g'ọ tọ mịnga amịnga.

⁵ Nshi phẹ ono dù gẹ
nwanggiri-utobo,
e keberu l'ẹka a kọru
iphe;
mbụ l'o too pfudu opfu.
Ọ buru apata bẹ aapatajẹ iya;
kẹle o to jedu ije.
Unu ta atsujekwa iya ebvu;
kẹle o to mekajekwa iphe;
òphu ọ dukwa iphe, dù ree,
oomeje.”

⁶ Ọ tọ dukwa onye dù gẹ gube

Chipfu.

I parụ ẹka; ẹme ẹpha ngu bẹ
ike dụ.

7?Bụ onye bụ onye tege
anọdudu atsụ ngu
ebvu;
gụbe eze ọhamoha?

Ono bụkwa iphe,
rwuberu ngu nụ.

L'iphe, bụkpoo ndu
mmamiphe,
nọkota l'ọhamoha;
mẹkpoo l'iphe,
bụkpoo alị-eze pẹ
l'ophu bẹ ọ tọ
dụkwa onye dụ gẹ ngu.

8 Ẹphe bụkota ndu enwedu
egomunggo bya aburu
ndu eswe.

Iphe, ezi pẹ iphe bụ ntekpe,
a pyiru l'oshi,
adudu urwu, ọ baru.

9 Ọo mkpọla-ọchaa, e tsuru
ongu bẹ e jeru eshi lẹ
mkpukpu Tashishi
wota bya;
yẹe mkpọla-ododo,
e jeru ewota lẹ mkpukpu
Ufazu, bụcha iphe,
ndu eme ọna;
yẹe ndu akpuzu kpuru.

Nshi ono bẹ a chitaru uwe,
dụ urwukpu-urwukpu;
yẹe ọphu dụ uswe-uswe
woru yee.

Iphe ono bụkotaru iphe,
ndu maru eme ọna
meru dobe.

10 Obenu lẹ Chipfu bụ iya bụ
ọkpobe Chileke.
Ọ bụ iya bụ Chileke,
dzụ ndzụ.

Teme ọ buru iya bu Eze,
a-ṅo jasụ l'ojejeje.

Ehu -ṅodu egbu iya egbu;
eliphe l'ophu anmahụ
pyaapyaapya;

ophu ndu ọhamoha adudu ike ata nshi anata oke-ẹhu-egbu iya.

11 “Wakwa iphe, ii-pfuru phe baa: Agwa-a, abudu l'oo phe meru igwe;
ophu ọ budu phe meru eliphe-a be e-mechakwaa laa l'iswi l'eliphe-a; laa
l'iswi l'imigwe.”

12 Ọo Chileke be gude ike ẹka
iya mee eliphe.

Ọ buru yebedua gude
mmamiphe iya tụa
okpa mgboko-a.

Ọ buru yebedua gude
nkwamenya iya
phushi akpaminigwe.

13 Ọobujeru; o -dee edede
l'igwe; igwe ara ọrà.

Ọ ṅodu emeje g'urwukpu
shi l'ẹka igwe beru ali
beru wata afuta.

Ọotuje egbigwe me igwe
ṅodu edze mini.

Teme ọ buru l'oba iya be
ooshije ezi pherephere.

14 Onyemonye te nwedu
egomunggo;
ophu ọ dudu onye kwaru
enya.

Iphe, bu ndu akpu uzu
mkpola-ododo g'ephe ha
be iphere nshi phe
gudeakwaru.

Ntekepe, ephe meru tukoru
buru ughoshi;
g'ọ to budu l'ootu unme
l'onwiya.

15 Ọo iphe, adudu urwu, ọ baru;
bya aburu iphe,
e gude agba mgbonu.

O -rwua teke Chileke e-kpe

ikpe bẹ nshi ono
 a-bụkotaru ọla-l'iswi.
 16 Obenu l'onye ono,
 bụ okiphe oshilọkpa
 Jiéọpu ono bẹ ta
 abụdu nno bụ g'ọ dụ;
 kele ọo ya bụ onye
 meru iphemiphe dobe;
 mechaa mee ndu Ízurẹlu;
 mbụ ọkpa-ipfu ono,
 bụ okiphe iya ono.
 Onye ono bẹ ẹpha iya bụ
 Chipfu;
 bya aburu
 Ọkalibe-Kakọta-Ike.

Mgbu-ọnwu, e-mechaa bya nụ

17Unu kwakọbekwa iphe unu g'unu alụfu l'alị-a; unubẹ ndu ono, ndu ọhogu unu nọ-pheru mgburugburu ono; 18kele-a; wakwa iphe, Chipfu epfu baa: “Nta-a bẹ mu a-gba ndu bu l'alị-a kẹ swaramụ gbafụ mgbala lanụ. Mu emee pẹ ewere k'ọphu aa-kpụ pẹ lẹ ndzụ.”

19 “Nshio mu; kele e mekaru
 mu iphe!
 Onwo, aba mu nụ bụru
 emeta emeta!
 Ọle iphe, mu epfujelẹru-a
 onwomu bụ
 l'ọ bụwaa iphe-ememe,
 nọ swiru mu nụ;
 mu je l'ataru iya nshi.
 20 Ụlo-ẹkwa mu bẹ e
 mebyishiakwaru.
 Eri iya bẹ a tukoakwaru
 gbabushichaa.
 Ụnwu mu shiakwa mu l'ẹka
 gbakashihu;
 ọphu mu l'ẹphe anọedu.
 Ọ tọ duedu onye ọphu
 phoduru nụ kẹ
 g'ọo-kpọberu mu
 ụlo-ẹkwa ọbu ọzo;
 ọzokpoonu g'ọ tọaru mu

nwamkpu.”

21 Ndu eche anyi gę ndu eche
aturu te nwedu
egomunggo;
ophu ephe akpajędu
Chipfu ishi.

Ọ buru iya meru g'o gude
ophu upete agbaęduru
phe;
a chĩa aturu phe nanunanu.

22 Unu lekwa! Nzi obru
abyakwaa.
Mbụ oke utsú, e-shi l'uzo
isheli etsu abya.
Oo-me ali ndu Jiuda l'ọ
buru ochobu;
ęka nkuta-oswa e-buru.

Epfupfu, Jieremaya pfuru nu Chileke

23 Gube Chipfu; mu makwaru-a
le ndzu amadu ta
abudu nkiya;
l'ọ to budu amadu a-nodu
atu-ziru onwiya ęka
oo-zo okpa.

24 Jiko Chipfu; baaru mu mba!
Ọ kwa g'i gude ikpe,
pfuru oto mee ya.
G'ọ to bukwa teke ęhu eghu
ngu eghu; a nonyakwa;
i mee mu;
ophu o dudu iphe,
mu bu.

25 Tu-koshi ohamoha ono
oke-ęhu-eghu ngu;
mbu ndu ono,
ekwedu nkengu ono.
Tu-koshi iya ndu ono,
te ekujedu epha ngu ono;
kele ephe riwaru oshilokpa
Jiékopu ripyaa.
Ephe kewaru iya gburugburu

gbeshi;
 bya emebyishia alì iya,
 bụ ibe iya l'ophu.

Ogbandzu ono bẹ e mebyiru

11 ¹Wakwa opfu, Chipfu pfuru nụ Jieremaya. O sụru iya: ²“Nụma-kwa iphe, e pfuru gude gbaa ndzụ ono; l'i wokwaru iya phọ je epfuaru ndu Jiuda; yee ndu bu lẹ Jierúsalemụ. ³Pfuaru phez sụ phez l'owa-a iphe, Chipfu, bụ Chileke ndu Ízurelu epfu baa: Onye a tũru onu bẹ o bụ; mbụ onye te emedu iphe, ogbandzu-a pfuru; ⁴mbụ opfu ogbandzu, mu tũrũro l'ekemu nũ ndiche unu phez teke mu dufutaru phez l'alì Ijiputu; mbụ teke mu dufutaru phez lẹ phoophoophoo oku, agbazeje ígwè. Iphe, mu pfuru bụ: Unu meje iphemiphe, mu sũru g'unu meje; oo ya bụ g'unu abũru ndibe mu; mbèdua abũru Chileke unu. ⁵Noo teke mu e-mekota iphe, mu riburu ndiche unu phez nte lẹ mu e-me; sũ lẹ mu a-nũ phez alì, ẹra-eswi; yee manũ-ẹnwu jiru pyĩmu pyĩmu, bụ iya bụ alì-a, unu bu nta-a.”

Mu sũ iya: “Oo g'ọ dũ; gũbe Chipfu.”

⁶Chipfu bya asũ mu: “Raa ya arara l'alì ndu Jiuda; yele oma gbororo Jierúsalemụ: Unu ngabẹ nchì l'opfu, dũ l'ogbandzu-a tsoo ya g'ọ dũ. ⁷Eshi teke ono, mu dufutaru ndiche unu phez l'alì Ijiputu ono jasũ ntanũ-a bẹ mu shiẽkwapho lota phez ẹka lẹ nchì; mu -lọchaa; mu alobaa sũ phez: ‘Unu meje iphe, mu pfuru!’ ⁸Obenu l'ephẹ ta angabeduru nchì; ophu ephẹ eyeduru onu; o chia iphe, ephẹ meru bụ l'ephẹ tsoru okpoma-mgbashi, shi phez l'ejo okpoma phez ono. O bũru iya bụ lẹ mu atũko otu-onu, dukota l'ogbandzu ono, mu sũru g'ephẹ tsoru; ephẹ jĩka l'ephẹ tee tsodu ono tũkota phez.”

⁹Tobudu iya bụ lẹ Chipfu asũ mu: “Ndu Jiuda yee ndu bu lẹ Jierúsalemụ nokobeakwa achĩru mu ejo idzu. ¹⁰Ephẹ laphuakwaru azũ je emeahaa iphe-ẹjĩ, ndiche phez meru, bũ ndu jĩkaru l'ephẹ taa ngadũ nchì l'opfu, mu pfuru. Ephẹ tũgbuakwaru je agwota obvu ozo, dugbanu jeahaaru iya ozi. Ndu onu-ulo Ízurelu ephẹ lẹ ndu onu-ulo Jiuda tũkoakwaru mebyia ogbandzu ono, mu lẹ ndiche phez gbaru ono. ¹¹Oo ya bụ lẹ-a; wakwa iphe, Chipfu epfu baa: Mu e-mekwa g'oke iphe-ẹhuka dapfuta phez; ophu ephẹ anahũkwa iya. O betakpoo ephẹ raku mu; mu taa ngakwaru phez nchì. ¹²Ndu bu lẹ mkpũkpũ, nogbaa l'alì ndu Jiuda; yee ndu Jierúsalemụ l'e-je je araku agwa ono, ephẹ shi anoduje akporu ùnwù-isensu oku ono; ole ephẹ tee yedũru phez ẹka ililekpoo; me oke iphe-ẹhuka ono dapfue phez pho. ¹³Oo g'unu nweberu mkpũkpũ igwerigwe bũkwapho g'unu nweru agwa igwerigwe; unubẹ ndu Jiuda. Unu nwekwarũpho ikpoto ẹnya ẹka unu doberu, unu a-nodu akpo ùnwù-isensu oku; mbũ akpo iya anũ agwa iphere ono, bũ Balũ; ẹnya ẹka ono dukwapho igwerigwe g'etsũzo, nọ lẹ Jierúsalemụ. ¹⁴Gẹ gũbe Jieremaya te epfukwa nũ mu l'iswi ẹhu ndu-a; ophu i chikwaru phez mkpu; ophu i rwokwaru phez arworo; kele mu

taa angakwaru phẹ nchi; m'ẹphe -kujee mu phọ oku; m'ẹphe -nọdu eje iphe-ehuka.”

¹⁵“?Bụ ọ́nụ bẹ ndu mu yeru obu eme leze-ulo mu; l'ẹka ẹphe l'ikpoto ndu ọ́zo achi ejo idzu eme g'ẹphe chi ru iya? ?Bụ anụ, dụ nsọ a-kpọshi g'a ta nụ unu aphụ ọ́o? Ọ kwa teke unu eme ejo-iphe bẹ ẹhu anọduje atso unu uto. ¹⁶Chipfu kuru ngu oshi olivu, abya pulapula; teme ọ́ nọdu ami mebyi, ama ntumatu l'ugbugba. Ọle ọ́ ọ́rà, igwe a-ra l'ẹka oke pherephe-re ezi bẹ oo-gude kpoo ya oku; teme ẹkali iya agbakwashihu.

¹⁷“Ọ kwa Chipfu, bụ Ọkalibe-Kakota-Ike, bụ onye dzaru ngu nụ bẹ tų-buru l'ii-mechaa buru ọ́la-l'iswi; noo kele ọ́nu-ulo ndu Izurelu; yele ọ́nu-ulo ndu Jiuda mewaru ejo-ememe; shi ẹgube ono kpatsu mu iwe; kele ẹphe jeru anọdu akpo ụ́nwù-isensu oku anụ Balu.”

Aachiru Jieremaya ejo idzu

¹⁸Eshinu Chipfu kpuharu ejo idzu, ẹphe aachiru mu goshi mu bẹ mu maerupho iphe, ẹphe achi; kele teke ono bẹ o goshi ru mu phọ iphe, ẹphe eme. ¹⁹Mu dọ́epho gẹ nwaruru, eme gelee, a kpọ eje egbugbu. Ọ́phu mu amakpodaro la chiwaru mu ejo idzu sụ: “Unu g'anyi mebyishia oshi ono yee mebyi iya. Unu g'anyi mee g'ọ́ chi hu l'ali ndu dzu ndzu; k'ọ́phu a ta abyadu anyatabaa ẹpha iya.”

²⁰Obenu le-a; gube Chipfu, bụ Ọkalibe-Kakota-Ike; gube onye ono, ekpeje ikpe, pfuru oto ono; teme i nọdu ahuje okpoma yee oriri ama; gẹ mu humanu ẹka iigwata ugwo iphe, ẹphe meru mu l'ishi phe; kele ọ́ gụ-bedua bẹ mu e-doru g'ọ́ duru mu.

²¹“Ọo ya bụ le-a; wakwa iphe, Chipfu epfu l'ehu ndu mkpukpu Anatotu, bụ ndu ono, achi ndzu ngu ono, bụ ndu asuje gi ti gudehekwa ẹpha Chipfu epfu mpfuchiru; odumeka bẹ i-nwuhukwa phe l'ẹka. ²²Ọo ya bụ l'owakwa iphe, Chipfu, bụ Ọkalibe-Kakota-Ike eepfu baa: Mu a-nukwa phe aphụ. Ụ́wokokorobyia phe bụ ogu-echi bẹ ee-gude gbushia phe. Ọ́ buru ẹgu e-gbushi unwu phe nwoke yee unwu phe nwanyi. ²³Ọ́phu ọ́ dudu g'ọ́ ka mma l'o nweru nwa ndu aa-ha g'ẹphe phoduru phe. Noo kele mu e-me gẹ ndu Anatotu l'ophu lakota l'iswi; me ọ́ -rwepho apha ono, aa-nu phe aphụ ono.”

Jieremaya agu aphu

12 ¹Gube Chipfu; ọ́ tọ́ dudu
teke i buedupho onye
pfuberekoto;
jasukpoo le gẹ mu echi
ngu opfu-a.
Ọle ọ́ bụ; mu e-pfukwaru ngu
phọ k'ikpe, pfuru oto,

- iikpeje.
 Sua; ?bụ ụnu kpara iphe,
 upete agbaru ndu
 ejo-iphe l'uzo phe?
 Mbụ-a; ?bụ ụnu kpara iphe,
 ehu aduje ndu e gudedu
 ire phe eka guu?
- 2 Oo ngu dzaru phe;
 ephe gbaa ogharabvu;
 bya evua mīahaa amīmi.
 Ephe akpūjeru ngu l'onu
 tekenteke.
 Obenu l'o to rwujedu phe l'obu.
- 3 Obenu le mbedua be gube
 Chipfu maru.
 Iihumaje mu; teme i nodu
 enyochaje oriri,
 mu ariru ngu enyocha.
 Kputanu phe kpufu g'aturu,
 a kpū eje egbugbu!
 Wonuru phe dobe iche
 kwaberu mboku,
 aa-phu phe!
- 4 ?Bụ jasū teke ole be ali a-gu
 aphu gu-beru; mbū eswa,
 nōgbaa l'ali
 akpōshihukota nkū?
 O buru iphe, kpara iya nu bu
 le ndu bu iya nu bu
 ndu eme ejo-iphe;
 o mee unwu anu me unwu
 enu; ephe lakota l'iswi.
 Ophu kachaakponu bu le
 ndu ono bu iphe,
 ephe epfu bu:
 "O to o humakwa iphe,
 e-mechaa mee anyi."

Oonu, Chileke yeru

- 5 "O -buru le gu le ndu gude
 okpa gbaru oso;
 ephe loo ngu phelephele;

bụ-chia ndu ọphu gude
 ịnya bẹ gu l'ephe sụru
 atutu?

Ọzo bụ ị-a; ọ -buru l'upfu
 adu ngu l'ali,
 adudu iphe du iya nu;
 ?denu g'ii-shi mekota
 iya l'oswa ono,
 no ị mgboru enyimu
 Jiordanu ono?

6 Mbụ-a; unwune ngu nwoke;
 mbụ ndu unu ephe shi
 l'unuphu lanu;
 ephebedua deru ngu
 ye g'e gbua.

Ephe woliru olu ara g'e mee
 ngu iphe,
 a-tsuru ngu nu.

Ba adakobekwa phe;
 m'obeta ephe nodu
 epfuru ngu opfu
 oma!"

7 "Mu gbadowaru ndu onu-ulo mu.

Mu gwobewaru ndu ono,
 bu okiphe mu ono.

Ndu ono, du mu l'obu ono
 be mu yeakwaru l'eka
 ndu ohogu phe.

8 Okiphe mube Chileke ono
 byaakwaru bya adu
 mu g'oduma, bu l'oswa.

Onoduje agboru mu uja.
 O buru iphe ono meru
 g'o gude o du mu ashị.

9 Ndu ono, bu okiphe mu ono;
 duwaa mu g'enu,
 voru kidikidi,
 bu enu, erije anu enu ozo;
 unwu-enu ozo
 erijekwapho anu ibiya
 no-pee ya mgburugburu
 abya iya etso ogu.

- Ɛphe je atũko iphe,
 bukpoo anũ,
 bu l'egbudu rwukoo
 g'ephe bya avũa anũ
 iya kpatakpata!
- 10 Ikpoto ndu eche atũru
 mebyishiwaru
 opfu-vayĩnu mu.
 Teme ephe gude okpa zoo
 opfu mu pyakapyaka.
 Eguru opfu mu ono be
 ephe meru;
 o buru echiegu,
 dabyiru ke mmanũ.
- 11 E meru iya; o buru
 okorobo-egu.
 Eshinu o bu okorobo-egu;
 o gũahaa aphũ
 rakuahaa mu.
 Mbũ l'alĩ ono l'ophu be
 e meru;
 o buru okorobo-egu;
 ophu o dudu onye
 akpa iya ishi.
- 12 Ndu mgbupya zeru
 gbiigbiigbi bya
 asopyabe nggeregede,
 nogbaa l'echiegu.
 Ogu-echi Chipfu e-shi l'ishi
 alĩ-a ishi lanũ sũa
 nemadzũ pyaapyaa
 jasũ l'ishi iya ophuu;
 ophu o dudu m'onye lanũ,
 ehu adũ guu.
- 13 Ephe kũru witi; ole iphe,
 ephe mechaarũ kpata
 bu obvu obvu.
 Ephe sekashiru onwophe
 l'akanya;
 ole o to dudu iphe,
 ephe setarũ.
 Iphere iphe, ephe kpatarũ

l'opfu phe ọdu
 aduje phe.
 Ọ buru ẹka ẹhu eghu Chipfu
 eghu.”

¹⁴Wakwa iphe, Chipfu epfu baa: “Ọ -buru ke ndu iwe ono, bu obuto-bu mu ono g'ẹphe ha; mbu ndu ono, denyiru ẹka l'okiphe, mu heru ndibe mu, bu ndu Ịzurelu g'ọ buru okiphe phe ono; lekwa le ndu ono be mu ephedu ephedu l'alị phe. Mu abyakwapho ephedu ndu Jiuda g'ẹphe ba nohe l'echilabo phe. ¹⁵Teke mu pefuchaeru phe pho; mu abya aphuaru phe obu-imemini; dughutachaa phe azu nanunanu g'ẹphe haa; g'ẹphe lwaphuta azu l'okiphe phe ono; ¹⁶gude epha mu riaha angu su: ‘Eshinu Chipfu ndu ndu g'ọ no iya-a’; egube ono, epe shiwaa zia ndibe mu epe shi egudeje agwa, bu Balu eri angu ono; be epe a-ngukwaru anguru l'echilabo ndibe mu. ¹⁷Obenu teke o bu l'o nweru oha, ete ekwedu ngabe nchi be mu ephedukpoe phe pho rengurengu woru phe mebyishia. Nokwa iphe, Chipfu eepfu.”

Akpo ocha, eke l'upfu

13 ¹Wakwa iphe, Chipfu epfu anu mu baa: “Tugbua je azua akpo-upfu, e meru l'ekwa ochaa kebe l'upfu; ole gi ba tsekwa iya le mini.” ²Mu byanu eje azua akpo-upfu ge Chipfu pfuru; bya ekebe iya l'upfu.

³Noo ya; Chipfu byakwa bya epfuru opfu yeru mu k'ugbo ebo su mu: ⁴“Wota akpo-upfu ono, i zuru ono, i we l'upfu ono; gude iya je l'enyimu Yufurētisu je edomia ya l'ogba, du l'eze mkpuma.” ⁵Mu tugbukwa je elibe iya le mgboru enyimu Yufurētisu ge Chipfu ziru mu.

⁶A noekwapho ujiku olemole; Chipfu su mu: “Tugbua je l'enyimu Yufurētisu je avota akpo-upfu-a, mu suru gi je edomia-a.” ⁷Noo ya; mu tugbunaa bya ejee l'enyimu Yufurētisu je avota akpo-upfu obu; mbu je ewofuta iya l'eka mu shi domia ya; obenu l'o mebyishihuwaru; ophu o dudu iphe, o du ree ememe m'ilile.

⁸Noo ya; Chipfu byakwa bya epfuru opfu yeru mu su mu: ⁹“Wakwa iphe, Chipfu epfu baa: Nokwa ge mu e-mebyishi eku-onwonye ke ndu Jiuda; yee oke eku-onwonye ke ndu Jierusalemu. ¹⁰Ndu-a, bu ndu ejo-iphe-a, bya aburu ndu jikaru l'ephe taa ngadu nchi l'opfu mu; ndu bu iphe, epe anoduje eme bu iphe, shi phe l'ejo okpoma phe ono. O buru agwa ozo be epe anoduje etso; ejeru phe ozi; abaru phe eja. Ndu ono bu g'akpo-upfu-a du-a bu g'ẹphe a-du; mbu l'o to dudu iphe, epe a-du ree ememe m'ilile; ¹¹kele oo g'akpo eke l'upfu ekejeru l'upfu nemadzu-a bu ge mu meru ndu Ịzurelu; yele ndu Jiuda l'ophu epe keru mu jimujimu l'ehu. Oo ya bu g'ẹphe a-buru ndibe mu; teme mu egude phe nweru epha; l'aaja mu ajaja akwabe mu ubvu. Obenu l'ephe ta angaduru nchi. Nokwa iphe, Chipfu eepfu.”

Akpo-mee

12 “Pfuaru phe su phe le-a: Wakwa iphe, Chipfu epfu; mbu Chileke ke ndu Izurelu: ‘Iphe, bukpo akpo-mee l’ophu be ee-yejikota mee.’ Teke ephe suru ngu: ‘?Anyi ta amahaada l’ee-yeji mee l’akpo-mee?’” 13 Li su phe-a: Wakwa iphe, Chipfu epfu baa: Mu e-me ge mee wata atsu iphe, bukpo ndu bu l’ali-a l’ophu; je akpachaa le ndu bu eze, bu ndu no l’aba-eze Dévidi; me ndu bu uke; me ndu mpfuchiru Chileke; mekpoo iphe, bu ndu bukota le Jierúsalemu l’ophu. 14 Mu e-nwuta phe je atupyabe nwibe phe; mbu ndu bu nna; me ndu bu nwa nwoke. Nokwa iphe, Chipfu eepfu. Mu taa yoduru phe oshi; ophu mu aphuduru phe obu-imemini; ophu mu emeduru phe eze-iphe-oma ke ge mu haa ge mu te emebyishi phe.”

Eye ebvu akpu le ndzu

- 15 Unu numakwa;
 unu ngabekwa nchi!
 Unu te ejekwa eku onwunu
 ekuku;
 kele Chipfu pfuakwaru iya
 g’o-du.
- 16 Unu kwabe Chipfu,
 bu Chileke unu ubvu!
 Odumeka be oo-mekwa
 g’ochii gbaa.
 Teme upfu akpo ngu l’okpa
 l’eli ubvu ono,
 agbakota ochii ono.
 Iphe, unu ele enya iya
 bu iphoro;
 ole oo-me iya l’ooburu
 onyonyo onwu.
 Teme l’oogbanwee ya;
 mee ya l’o gbahu tsukiribaa.
- 17 Obenu le teke o bu l’unu ta
 angadu nchi
 be mu a-ra ekwa le mpya;
 kele unu kunukaru
 onwunu.
 Mu e-gude enya mu raa ekwa
 raghee ya araghe.
 Enya-mini aso mu
 gborogboro l’anya;

kele unwu-aturu Chipfu be
aa-kpu le ndzu.

¹⁸ “Karū eze; yele nyee iya, bu eze-nwanyị sụ p̄e-a: Unu shikwa l'aba-eze unu nyizeta; kele okpu-eze unu ono, egbu nw̄inwii ono e-mechakwaa dafuchaa unu l'ishi! ¹⁹ Iphe, bu mkp̄ukpu, n̄okota l'echiēgu nd̄ohali be aa-gu-chishicha agu-chishi; ōphu ō dudu onye suru iya aḡuha. Ndu Jiuda l'ophu be aa-kp̄ukota laa al̄i ēka ozo; mb̄u kp̄ukota p̄e g'ēphe hak̄ota.”

²⁰ Palikp̄odapho ̄nya apali h̄uma ndu shi l'uzo isheli abya. ?D̄enu ikpo-to aturu ono, e yeru ngu l'ēka ono; mb̄u aturu ono, i shi gude eku onwunu ono? ²¹ ?Bu ḡunu be ii-pfu m̄e ō -ch̄itaep̄ho ndu ono, i shi dobes̄u l'ēphe bu ōkpobe ōnyà ngu ono bya ach̄iru dobe; ēphe buru ndu-ishi ngu p̄e? T̄oo watadu ngu eme ēhuka g'ime emeje nwanyị, d̄u ime-a? ²² Ozo bu; teke i j̄iru onwongu aji s̄u: “?B̄unaa ḡunu meru g'o gude iphe-a mee ngu?” Iphe, kparū iya n̄u bu l'iphe-ēji ngu parū ēka. Noo g'o gude a j̄ia ngu uwele; woru ngu agada pakaa. ²³ Onye Kushi; ?ōo-d̄u ike gbanwee akp̄o-ēhu iya? T̄oo aḡu; ?ōo-gbanwe mkp̄o ono, ō ch̄iru l'ēhu ono? Nokwaph̄o ḡe ḡube onye ējo-ememe kw̄owaru ēhu ta agbanwek̄otadu iya eme iphe, d̄u ree. ²⁴ Wakwa iphe, Chipfu epfu baa: “Mu e-mechaa p̄h̄ukashia ngu g'onye aph̄ukashi ēswa ereshi, p̄h̄erephere, shi l'echiēgu ezikashi ezikashi. ²⁵ Noo oke iya nkengu bu ono; mb̄u okiphe, mu t̄u-buhawaru doberu ngu. O buru iphe, kparū iya n̄u bu l'unu z̄oharu mu je akp̄oru obu yeru agwa, ata ab̄udu ire-lan̄u. ²⁶ Oo ya bu le-a; mu a-j̄i ngu uwele; p̄h̄uta uwe ngu kpube ngu l'ip̄hu; k'ophu aa-h̄umakwanu iphe ono, emeje g'iph̄ere d̄u ngu ono. ²⁷ Mu h̄umaru ogori, iiri; ȳe m̄imiimii, īinoduje ara agba ala l'eme ējo-ememe; mb̄u ukpara ono, īigba; ōphu iphere ad̄udu ngu ono! Mu h̄umakotaakwaru ah̄uma ah̄uma, īinoduje eme l'eli ūb̄v̄; m̄e ōphu īinoduje eme l'ēgu. Nsh̄io ḡube Jierúsalem̄u! ?Bu jas̄u teke ole be īi-d̄u-beru inyinyi?”

Anw̄u a-kp̄obe; unwu abya; ogu-echi etso iya

14 ¹ Wakwa opfu, Chipfu pfuru Jieremaya k'anw̄u-akp̄obe ono:
² “Ndu Jiuda aḡukwa aph̄u.

Mkp̄ukpu, n̄okota iya n̄u
gbaj̄oshihukota
agbaj̄oshihu.

Ep̄he n̄odu ara ēkwa l'opfu
ēhu al̄i-a.

T̄eme a n̄odu echikwaph̄o
mkpu le Jierúsalem̄u.

³ Ndu a maru ēpha p̄e ziru
ndu-oz̄i p̄e g'ēphe je
ekuta mini.

- Ephe je l'obvu-mini;
 ọphu ọ dudu mini,
 du iya nu.
 Ephe paru ite phe
 l'ophorokpo Iwa.
 Iphere du phe;
 teme meji tofuwa
 phe.
 Ephe woru iphe kpuchia ishi
 l'eka iphere du phe.
 4 Alì gbaakwaru ọru;
 kele igwe te edzeduru mini
 wushi iya.
 Iphere gude ndu akọ ofu.
 Ephe woru ẹka kpubegbaa
 l'iphu.
 5 Mbù je akpachaa lẹ ne ele,
 bu l'egu
 gbaghachaaru unwu,
 ọ nwuru k'òphúú;
 ẹka ọ tọ humaduru ẹswa,
 ọo-ta.
 6 Nkapfù-ìgara-ọswa pfùchaaru
 lẹ nggeregede
 atù phẹpfuphepfu gẹ
 nkuta-ọswa.
 Ẹnya gbahukota phe ọchii
 kele ọ tọ dudu ẹka ephe
 a-ọdu taa nri.”
 7 “A makwaru-a l'iphe-ẹji,
 anyi meru agba anyi ekebe;
 ọle gube Chipfu;
 menaa iphe;
 g'epha ngu apfuru;
 kele anyi lawaru azu lamihu;
 teme anyi mewaa ngu
 iphe-ẹji.
 8 Gube onye bu ngu bu ẹka
 ẹnya ndu ịzurelu du;
 onye adzọtaje phe
 nu m'ephe -ọdu
 eje iphe-ẹhuka.

lia phe elili; ozoo lia nyee phe; ozoo nwa phe nwoke me ke nwanyi. Aphu, rwuberu phe nu be mu a-wu phe l'ehu.”

17 Oo ya bu le-a; pfuru iphe-a yeru phe:

“G'anya-mini sokwa mu gborogboro l'anya eswe l'enyashi mkpurumkpuru.

Ndu mu a-odu araru ekwa ono buru nwada mu ono, adudu nwoke jepfujeru iya nu ono; mbu ndibe mu ono; kele onwo, aba phe nu du ejo eji.

O buru pyaapya a be e chiru iya.

18 Teke mu bamiru l'ime

oha ono; mu ahuma odzu ndu e gude ogu-echi gbua.

Teke mu bahuru le mkpukpu phe; mu ahuma iphe, okpa-nri mebyishiru.

Ndu uke me ndu mpfuchiru Chileke tukoakwaru lashia ali eka ephe amadu.”

19 ?O du g'i jikawaru Jiuda jikaghaa to?

?To duedu iphe, i guberu Zayonu to?

?Denu g'o gude i meka anyi iphe, ta akpohudu akpohu?

Anyi leri enya nchi-adu-doo; ophu o dudu iphe, du ree byaru anyi.

Anyi lee enya teke ee-me g'ehu du anyi ike.

O buerupho ebvu be a gbenu eye anyi.

20 Gùbe Chipfu; ejo-iphe,
 anyi emegbabẹ́ rwuakwaru
 anyi l'èhu; yẹe ikpe,
 nmaru nna anyi oche
 phẹ́.

Anyi meakwaru ngu iphe-eji
 eviya kpo.

21 Jiko ta agbadokwa anyi;
 g'ẹ́pha ngu apfuru!
 Te ewokwaru aba-eze ngu ono,
 du biribiri ono hua
 l'alì!

Nyatakwa oḡbandzu anyi
 lẹ́ ngu!

Te emebyikwa iya!

22 ?O nweru nshi nshi ono,
 noḡbaa l'ohamoha ono,
 adudu iphe, o buḡbaa ono;
 ?o nweru ophu aduje ike
 dzee mini?

Mbu-a ?bukponu igwe
 alwajẹ́ g'ọ́ ka mma l'oo
 yẹgeyege mini?

Waawakwa. Oo gùbedua;
 mbu gùbe Chipfu,
 bu Chileke anyi.

Oo ngu bu ẹ́ka ẹ́nya du anyi;
 kele oo ngu emekota
 iphemiphe ono.

15 ¹Tọ́budu iya bu; Chipfu bya asu mu: O to dukwa m'obeta Mosisu
 yẹe Sámẹ́lu bya apfuru mu l'iphu; uche mu taa lakubeekwa ndu-
 a. Chifukpoe phẹ́ pho achifu l'iphu mu! Haa phẹ́ g'ẹ́phe je! ²Teke ẹ́phe
 jiru ngu su: ?Bu awe be anyi a-la? Su phẹ́-a: Wakwa iphe, Chipfu epfu
 baa:

Ndu a tubuwaru l'oo anwuhu
 e-gbu phẹ́;

bu anwuhu e-gbu phẹ́.

Ndu a tubuwaru l'ee-gbu
 l'ogu-echi;

l'e gbua phẹ́ l'ogu-echi.

Ndu a tubuwaru l'oo ẹ́gu
 e-gbu phẹ́; ẹ́gu egbua

phẹ.

Ndu bu lẹ ndzụ bẹ aa-kpu

phẹ;

l'a kpua phẹ lẹ ndzụ.

³Wakwa iphe, Chipfu epfu baa: Mu e-zi uzi omeliwe ẹno g'o je emee phẹ l'iwe. Ogu-echi a-nodu egbu egbugbu; nkuta alọ phẹ wuruwuru; unwu-enu, ephe l'eli; yee unwu anu ke mgboko avukaa anu phẹ; mee phẹ omeliwe. ⁴Mu e-me phẹ g'ephe buru ndu ali-eze unwu-eliphe l'ophu a-nodu aso oyi. O buru iphe, kparu iya nu bu iphe, Manase meru lẹ Jierusalemu. Manase bu nwa Hezekaya; teme o buru eze ndu Jiuda.

⁵Gube Jierusalemu; ?bu onye

a-yokpooru ngu oshi?

?Bu onye a-guchiru ngu aphu?

?Bu onye a-dukpoo ike

pfucha jia su:

?Denu g'onwuru ngu?

⁶Wakwa iphe, Chipfu epfu baa:

"I gbadowaru mu; lahaa azu azu.

Oo ya bu lẹ mu a-zu ngu eka gburumu woru ngu mebyishia.

Ophu o duedu iphe, e-me ge mu phuru ngu obu-imemini.

⁷Mu e-gude ajakpa phuchaa

phẹ aphucha

l'onu-abata onu-abata

mkpukpu lẹ mkpukpu

ono.

Mu abya egbu phẹ

mgbu-onwu;

mbu l'e-me ndibe mu ephe

aburu mkpurupyata;

noo kele ephe ta

agbanweduru uzo phẹ.

⁸Unwanyi phẹ, ji phẹ anodedu

bẹ mu meru ephe ka eja,

no l'aguga eze-enyimu

igwerigwe.

Eswe kee ebo mu wobata

omeliwe gude dapfu ne,

nwuru unwokorobya
phe.

Mu bya emee iphe anọ yọkoo;
yẹ iphe ndzụ-agụgụ;
tụ phe l'uzorehu.”

⁹Wakwa iphe, Chipfu epfu baa:

“Ne nwanyi, nwutaru
unwegirima esaa
meerupho yereketeke
tụ-buhuepho unme
atụ-buhu.

Enyanwu nkiya riba le teke
bukwadu echi eswe.

E meru iya iphe-iphere;
kpua ya iphu le ntụ.

Nwa ndu phoduru nụ be mu
nwuru ye;
e gude ogu-echi gbushia
phe l'iphu ndu ohogu
phe.

Nokwa iphe, Chipfu eepfu.”

¹⁰Nshio mu; ne mu-e; ?bunaa gunu meru g'o gude i nwua mu? Ge mu byaru bya aburu nwoke ophu yele ndu ali-a l'ophu byaru eseahaa opfu dzohaa enya. Ophu mu ejitadu ugwo; ophu mu ejiedu ejiejie; ole onyemonye ephue mu pho iphu. ¹¹Chipfu sukwaru-a: “Ge mu gbukwaru ngu iya tororo. Mu a-nafutakwa ngu; g'o-duru ngu le ree. Mu e-me ndu ohogu ngu g'ephe wata ngu arwo arworwo; me o -rwua teke ee-je iphe-ehuka; yee teke ee-me ndiphe mkpawere. ¹²Nemadzụ; ?oo-du ike gbajia igwe? Mbụ igwe ono; ozoo onyirubvu ono, a zuru l'ali uzo isheli ono?

¹³“Eku, i kpataru; yele iphe, i nweru enweru be me e-nwuru ye g'a kwaa l'okwata. A taa pfudu ugwo iya. O buru iphe, kparu iya nu bu iphe-iji, imegbabe l'ali ngu mgburugburu. ¹⁴Mu e-me ngu g'i buru ohu l'eka ndu ohogu ngu l'ali, i mahaada; kele ehueghu mu gbanwuhwaru oku, e-tsu ngu phuruphuru.”

¹⁵“Gube Chipfu; o kwa ngu bu onye maru nu. Nyatanu mu! Letanu mu enya! Gbanaaru mu odzori l'eka ndu akpa mu ehue. G'ehu te eghujedu ngu ehue egwegwa-a; be wofushinu mu. Nyatanu ge mu gude jebe iphe-iphere l'opfu ehue ngu. ¹⁶Mu numaru opfu ngu; mu nata iya ria ge nri eriri. O mee mu; ehue nodu atso mu utso. Teme o dukwa mu pho ree l'okpoma. O buru kele eeku mu ala l'epha ngu; gube Chipfu, bu Chileke; bya aburu Okalibe-Kakota-Ike. ¹⁷Mu teke anodu-swekwaa l'eka ndu mgbonu doru; ophu mu l'ephe eke anodu-swekwa eme emereme. Mu anoduje anopho

nkinyi mu; kele mu maru l'eka ngu tu-koru mu l'ehu; teme i mewaa; ehu nodu eghushi mu egu ike. ¹⁸?Bu gunu meru g'o gude ophu iphe-a, l'eme mu ehuka-a emebuhudu emebuhu. Teme onwo, aba mu nu du ejo eji; teme ophu ookpohudu akpohu. ?Iime g'i bya aduru mu ge nggele, edeje nemadzu edede; mbu ge nggele, e jeru; ophu mini adudu iya."

¹⁹Mbu le-a; wakwa iphe, Chipfu epfu baa: "Izimanu -lwa ngu azu; mu edopfu ngu azu l'onodu ngu; k'opfu ii-wata mu ejeru ozi. I -wata epfu opfu, nweru ishi, ophu o buedu mkpokoro opfu; li buru onye a-wata epfu iphe, mu suru g'i pfua. Ge ndu a lwapfutanu ngu; o to bukwa ge gubedu lwapfuta phe. ²⁰Mu e-me ngu g'i buru igbulu noduru ndu-a. Igbulu, a kpushiru ike, e gude onyirubvu kpa. Epe e-tso ngu ogo; ole epe tee mekpedu ngu; noo kele mu no swiru ngu eswiru; k'opfu mu a-nafutaje ngu; dzoo ngu." Nokwa iphe, Chipfu eepfu bu ono. ²¹Mu a-dzo ngu l'eka ndu ejo-iphe; bya agbafuta ngu l'eka ndu njo ono, turu ngu swiswia ono.

Mboku eze iphe-ehuka

16 ¹Tobudu iya bu; Chipfu byakwa bya epfuru yeru mu su mu: ²"Ba alukwa nwanyi l'ali eka-a; ophu i nwutakwa iya nwoke; ophu i nwutakwa iya nwanyi; ³kele-a; wakwa iphe, Chipfu epfu baa l'ehu unwu nwoke yee ke nwanyi, a nwushiru l'ali-a; waa l'ehu unwanyi, bu ne phe; yeke ehu unwoke, bu nna phe: ⁴Iphe, e-gbushi phe nu bu ejo iphe-ememe; ophu aa-radu ekwa phe; ophu ee-lidu phe elili. O bu-chia iphe, e-me nu bu lephe a-du ge nshi, a nyiru togbo l'ali. O buru iphe, e-gbu phe nu bu ogu-echi; yee okpa-nri. Teme odzu phe aburu nri, unwu enu, epe l'eli; yee unwu anu, bu legbudu e-rije.

⁵"Le-a; wakwa iphe, Chipfu epfu baa: Te ejekwa l'ulo-ekwa. Be ejekwa akporu iphu l'eka ono; ophu i jekwa ara ekwa. Noo kele mu tee meedu g'ehu du ndu-a guu ozobaa. Ophu mu eyeheduru phe obu; ophu mu aphuheduru phe obu-imemini." Nokwa iphe, Chipfu eepfu bu ono. ⁶"Ndu ha shii me ndu ha nwanshi a-tuko nwushihu l'ali-a. E tee lidu phe elili; ophu a-radu ekwa phe; ophu o dudu onye a-ka onwiya iphe l'opfu ehu phe; ophu a-kpushiduru phe ishi. ⁷O to dudu onye a-turu phe nri ulo-ekwa. A taa tuduru iya nna; ophu a-tuduru iya ne m'ephe -nwuhu; ophu o dudu onye evuru mee abya akporu phe iphu.

⁸"Ophu ii-bahukwa l'ulo eka aabo Obo-iphe je anodu eri angu. ⁹Kele-a; wakwa iphe, Chipfu, bu Okalibe-Kakota-Ike eepfu; mbu Chileke ndu Izurelu: Unu e-gude enya unu huma le nta, unu no ndzu-a; teke mu e-me g'a ba numajehe kperekpere k'ehu-utso; me k'ete eswa; ophu aa-nuhedu olu unwumboko, alu ji; ozoo k'unwoke, alu nwanyi l'eka-a.

¹⁰"I -pfuaru ndu-a iphemiphe-a; epe -jia ngu su ngu: "?Bukwanu gunu meru g'o gude Chipfu tu-bua eme anyi egube ejo-iphe, ha egube ono? ?Bu gunu bu iphe-eji, anyi meru Chipfu, bu Chileke anyi? ?Bu awe be

anyi mesweru?’ ¹¹Noo teke ìi-sù phẹ lẹ Chipfu sùkwaru-a: Iphe, kparù iya nù bụ lẹ nna unu phẹ gbadoru mu. Ēphe gbadoru mu je agwaahaa agwa ozo; je ejeahaaru phẹ ozi; bya awata phẹ abarù ēja. Ēphe gbado mbedua; ōphu ēphe emēdu ekemu, mu t̄uru phẹ. ¹²O be l'unub̄dua; unu bya emekp̄ero ejo-iphe, kabaa kẹ nna unu phẹ ēji. Unu h̄umanu g'unu t̄ukoru g'unu hakp̄oo l'èhu l'èhu t̄uko etso ejo-òkpoma unu; haa eme iphe, mu s̄uru g'unu meje. ¹³Oo ya bụ lẹ mu a-ch̄ifu unu l'alì-a; ch̄iru unu ye l'alì, unu amadu; ōphu nna unu phẹ amaj̄eduru iya. Unu -rwuwarō ēka ono; unu awata ejeru agwa ozi eswe l'enyashi; kẹle mu tee mēkwanuru unu eze-iphe-oma.

¹⁴“Ole g'ò d̄uhabe; wakwa iphe, Chipfu epfu baa. Teke nemadzù e-mechaa; ēphe taa s̄ubaedu ‘Eshinu Chipfu nò ndzù g'ò nò iya-a; mbù onye dufutaru ndu Ízurelu l'alì l̄jiputu.’ ¹⁵O b̄waru iphe, ee-pfuje bụ: ‘Eshinu Chipfu nò ndzù g'ò nò iya-a; mbù onye dufutaru ndu Ízurelu l'alì ndu ishe-li; m̄e l'iphe, bụ alì ono l'ophu, bụ alì ēka o shi ch̄iru phẹ ye ono.’ Kẹle e-mechakp̄o bẹ mu a-ch̄ilatakwa phẹ l'alì ono, mu n̄uru nna phẹ oche ono.”

Aphù, Chileke a-nù ndibe iya

¹⁶Wakwa iphe, Chipfu epfu baa: “Lekwa lẹ nta bẹ mu e-je ekua ndu eseje ìkoro; ēphe adù igwerigwe. Ēphe eje esefuta phẹ. E -mechaa; mu eyekwaphō ndu achije nta; ēphe adùkwapho igwerigwe je achia nta phẹ l'iphe, b̄kpoo úbvú úbvú; m̄kpoo òbvú òbvú; m̄kpoo l'ogba, d̄u leze mkpuma. ¹⁷Kẹle mu gude ēnya mu ah̄umakota iphemiphe, ēphe eme; ō t̄o d̄udu ōphu eedomiru mu edomi; ōphu ēphe eemedu ejo-ememe gẹ mu ta ah̄uma iya. ¹⁸Mu a-pfù phẹ ùgwo ejo-ememe, ēphe eme; m̄e ùgwo iphe-ēji, ēphe eme; pfua phẹ iya mpf̄ukwase. Noo kẹle ēphe pharw̄shiwaru alì mu. Ēphe gudewaa agwa phẹ ono, adz̄udu ndzù t̄eme ō n̄odu asō oyi ono gude merwushia okiphe mu onoya.”

Jieremaya epfu anù Chileke

¹⁹Gube Chipfu, bụ ike mu; bya ab̄uru onye mu gude nguru anguru; bya ab̄uru onye mu agbabaj̄e l'ime je an̄odu eze ndzù m̄e mu -n̄odu eje iphe-ehuka. Ndu ab̄udu ndu Jiuda l'a-byapfuta ngu; shikp̄oro l'eka igwe beru alì beru bya byasu: “Tororo opfu bụ lẹ nna anyi phẹ bụ iphe, ēphe shi kw̄e ēka bụ iphe, ab̄udu iphe; mbù iphe, bụ iphe-mmanù; bya ab̄uru iphe, urwu ad̄udu. ²⁰Nemadzù; ?oo-gude ēka iya metaru onwiya chi l'èbe abù l'iphe ōbu bụ chi?

²¹“Oo ya bụ lẹ-a; lekwa-a; mu e-gudefua nwamgbo lanu-a mee g'ephe maru; mbù lẹ mu e-me g'ephe maru g'ike mu waa okpehu mu habe. Noo teke ēphe a-maru l'epha mu bụ Chipfu.”

17 ¹“Iphe-ēji, ndu Jiuda meru b̄ukwa iphe, e meru l'ígwe bẹ e gude kàá ya àkàkà; bya e gude iphe t̄upyiru z̄inguzingu dee iphe

l'okwekpu ono, bu obu phe; bya ede iphe le mpu iphe, nogbaa l'enya eka ephe agwaje iphe. ²Mbu l'unwu phe nyatachaaru enya eka ephe agwaje iphe; yee itso Ashera phe ono, e shi edobeje l'aguga iphe, bukpooshi, jaru ajaja; mekpoo l'eli ubvu ubvu, dugbaa l'eli; ³me l'eze ubvu, nogbaa l'egbudu. Eku eku, unu kpataru; mekpoo iphemiphe, unu nweru; be mu e-mekota g'a kwaa l'okwata. Ono buru aswa iphe-eji ono, dzuru ekameka l'ali unu ono. ⁴O buru unu be oo-shi l'eka; okiphe, mu nukpooru unu anunu etupahu. Mu e-woru unu mee ohu ndu ohogu unu l'ali eka unu amadu; kele unu kpatsuwaru mu iwe; ehu je l'e-ghu mu eghu jasu l'ojejoje."

⁵Wakwa iphe, Chipfu epfu baa:

Onu be a turu onye dakoberu
nemadzu;
onye bu eka ike du iya
bu l'ehu nemadzu
mmanu;
ofhu okpoma iya aduedu
l'eka Chipfu no.

⁶Onye ono a-du g'ishishi-irwu,
bvuru l'echiegu;
ofhu o-humadu teke iphe,
du ree abya.

O buru eka du kpokoro
kpokoro kpokoro
l'echiegu obu be oo-buru;
mbu ali unu,
adudu onye bu iya nu.

⁷Obenu l'onye dakoberu Chipfu
bu onye a goru onu-oma nu;
onye bu iya be o kporu
obu yeru.

⁸Onye ono a-du g'oshi,
e yeru l'aguga mini,
chiru ogharabvu iya ye le
nggele.

Ophu ndzu agujedu iya me
anwu nodu echi;
ekwo iya anodujeephe eji
hirihiri tekenteke.

Ophu ooyojedu oshi me
okpa-nri du;
ofhu o dudu teke o to

- 9 nɔɖujedu ami mebyi.
 9 “Obu nemadzɔ ta adɔdu iphe,
 ɔ kadɔ ɛregede.
 Tɛme ɛjo-iphe paa ya ɛka.
 ?Bɔ onye sɔru iya amaru?
 10 Oo mɔbe Chipfu enyoje obu;
 tɛme mu nɔdu eleje
 egomunggo ule;
 k'ɔphu mu a-pfɔ
 onyemonye ɔgwo
 g'umere iya gbaru;
 mbɔ g'iphe, o meru gbaru.”
 11 Onye akpa ɛku l'ɛregede dɔ
 g'ɔkwà, kpuru l'ɛkwa,
 ɔ tɔduru;
 keɛ ɛku onye ono a-gwɔbe
 iya mɛ ɔ kajahaɛpho
 nka ɛbo.
 O bɔru l'ikpazɔ iya ono bɛ
 ɔo-bɔru onye-eswe.
 12 ɔlo, anyi doberu nsɔ bɔ
 aba-eze, dɔ akpabiri,
 o shiɛpho lɛ mbɔ;
 bɔtaru ɛka eekutse
 ekutse.
 13 Gɔbe Chipfu, bɔ onye ndu
 Ízurelu ele ɛnya l'ɛka;
 iphe, bɔ onyemonye,
 gbadoru ngu nɔ
 bɛ ee-mechakwaa mee
 iphe-iphere.
 Ndu gharu ngu azɔ bɛ ee-de
 ɛpha phɛ l'urwuku;
 noo keɛ ɔo Chipfu bɛ
 ɛphe gbadoru;
 mbɔ ishi mini, doru rɔsaa;
 emeje g'a nɔdu ndzɔ.

Jieremaya epfu anɔ Chileke g'ɔ gbaa mkpu

14 Meta mu iphe, eme mu nɔ; gɔbe Chipfu; k'ɔphu mu a-bɔru onye iphe te emedu! Dzɔo mu rɔ; gɛ mu a-bɔru onye a dzɔtaru; noo keɛ ɔo ngu bɔ onye mu ajajɛ ajaja.

¹⁵Iphe, ephe anọdujeepho epfuru mu bu: “Denuhununu iphe obu, Chipfu pfuru opfu iya obu? G'o menaa g'o pfuru iya!”

¹⁶Mu ta agbakwaru oso su le mu tee cheheduru ngu aturu; ophu o dudu teke ejo mboke gujeru mu. Gubedua maru l'iphe, shi mu l'onu futadabyiru eba l'iphu ngu. ¹⁷Be yekwa mu ebvu! O kwa ngu bu eka mu agbabaje je anodu ezeru ndu me iphe-ehuka -bya. ¹⁸Kpuna ndu akpa mu ehu iphu le ntu! Ophu i kwekwa g'e kpua mbedua iphu le ntu! Menaa g'ephe buru ndu ee-ye ebvu! Ophu i kwekwa g'e yee mbedua ebvu! Mee g'iphe-ehuka dapfuta phe! Gude oke ola-l'iswi laa phe l'iswi!

Edobe eswe atuta unme nsọ

¹⁹Wakwa iphe, Chipfu pfuru nu mu baa: “Je apfuru l'onu-abata mkpukpu, bu uzo eka ndu eze ndu Jiuda eshije abata shikwa iya pho alufu. Tukokpoe-pho iphe, bu onu-abata, eeshije abata le Jierusalemu je apfuru; ²⁰su phe-a: ‘Unu numakwa Opfu Chipfu; unube ndu eze ndu Jiuda; mekpoo ndu Jiuda l'ophu; mekpoo onyemonye bu le Jierusalemu, bu ndu eshije onu-abata-abahu. ²¹Wakwa iphe, Chipfu epfu baa: Unu tonupho nwehu g'unu te vuje ivu l'eswe-atuta-unme; ophu unu evujekwaru iya shia onu-abata Jierusalemu-a. ²²Unu te shijekwa l'ibe unu vuru iphe futadetezi; ophu unu ejejekwa ozi ejeje ophu l'eswe-atuta-unme. O buchikwaa g'unu dobeje eswe-atuta-unme nsọ, bu iya bu iphe, mu suru ndiche unu phe g'ephe meje. ²³Obenu l'ephe te eyeduru onu; ophu ephe angaduru nchi. Ephe woru ishi ngakobe; jika l'ephe taa ngadu nchi; ophu ephe eyedu onu le mba, mu baru phe.’

²⁴“Obenu le-a; wakwa iphe, Chipfu epfu baa: ‘O -buru l'unubedua toru nwehu angaru mu nchi l'opfu; ophu unu evujeduru ivu abata l'onu-abata-a l'eswe-atuta-unme; unu -dobe eswe-atuta-unme nsọ; k'ophu bu l'o to dudu ozi, unu ejeje mboke ono; ²⁵noo teke eze ndu no l'okwa eze Dévidi; ephe le ndu ejeru phe ozi; a-wata eshi onu-abata mkpukpu-a abahu. Ephebedua ephe le ndu ejeru phe ozi a-nodu agba l'ugbo-inya; me l'eli inya abata le mkpukpu-a. Ndu Jiuda awu etso phe; mekpoo iphe, bu ndu bu le Jierusalemu. Noo teke ee-buru eburu le mkpukpu-a jasul'ojeje. ²⁶Ndiphe e-shi le mkpukpu, nogbaa l'alì ndu Jiuda abya; mekpoo le nwa mkpukpu, nogbaa Jierusalemu mgburugburu; mekpoo l'oke alì ndu Benjaminu; mekpoo ndu bu l'alì okpa ubvu, no l'uzo enyanwu-ariba; mekpoo ndu bu l'alì ubvu ubvu; mekpoo ndu bu l'echiegu ndohali. Ephe egudegbaa anu, ephe e-gude gwee ngweja-akpo-oku; waa ngweja mmanu ozo; mekpoo ngwejanri; mekpoo unwu-isensu; mekpoo ngweja-ekele; gude abya agwa Chipfu leze-ulo iya. ²⁷Obenu le teke o bu l'unu te emedu iphe, mu suru g'unu meje; k'ophu bu l'unu te edobejedu eswe-atuta-unme nsọ; unu -nodu evujeru iphe abata le Jierusalemu l'eswe atuta unme be mu a-phu-nwu oku, e tee menyidu emenyi l'onu-abata Jierusalemu. O buru oku ono a-tuko iphe, bu alì-eze, du le Jierusalemu ono kekota.’”

Okpu-ite; yee urwa iya

18 ¹Wakwa opfu, Jieremaya nūmaru l'ōnu Chipfu, sūru iya: ²“Tugbua jepfu onye akpū ite l'ibe iya. Noo ẹka mu e-me g'i nūma opfu mu.” ³No iya; mu tugbunaa jeshia ibe okpu-ite. Mu jeshia; o gude-waa iphe-wilu labo, okpuje ite akpū ite. ⁴O kpua ite urwa ono, o gude l'eka akpū ono kpū-byia ya akpū-byi. O bya egude urwa ono kpua ozo le g'o dū iya ree.

⁵Noo teke mu nūmaru Opfu Chipfu, sūru mu: ⁶Wakwa iphe, Chipfu epfu baa: “Gube onu-ulo Ízurelu; ?mu te emedu unu g'okpu-ite-a l'eme-a? Lekwa; o kwa g'urwa dū l'eka onye akpū ite bū g'unube onu-ulo Ízurelu dū l'eka mu. ⁷Mu -pfua sū l'owa-a g'ee-me oha baa; ozoo l'owa-a g'ee-me ali-eze baa; l'ee-pheshi iya epheshi; ozoo l'ee-nwukposhi iya; ozoo l'ee-me-byishi iya; ⁸o -buru l'oha ono, mu pfuru l'owa-a g'ee-me iya ono dakoberu haa eme ejo-iphe phe; mu ahaa phe eme ejo-iphe ono, mu shi rīa le mu e-me phe ono. ⁹Teke o nwekwanuru teke mu pfuru sū l'owa-a g'ee-me oha baa; ozoo l'owa-a g'ee-me ali-eze baa; l'a kwō-lita iya; mee ya g'o nguru anguru; ¹⁰o -wata eme ejo-iphe l'iphu mu; k'ophu bū l'o too mejedu iphe, mu sūru g'e mee; mu ahakwapho iphe, dū ree ono, mu shi rīa le mu e-me g'o rwu iya ẹka ono. ¹¹Oo ya bū le-a; nta-a bū g'i je epfuru yeru ndu Jiu-da; me ndu ono, bu le Jierúsalemu ono; sū phe-a: Wakwa iphe, Chipfu epfu baa: Unu lekwa; mu kwakobekwaru unu oia-l'iswi; teme mu nodu ariru unu ejo oriri. Unu dakobekwa lwaphuta azu; g'onyenonu hakwaa ejo-iphe, oome; unu mee uzō unu yee iphe, unu eme g'o dū ree. ¹²Ephe asukwaro: 'E tee mekotaekwa iya. Anyi a-nodukwa eme iphe, anyi ritaru loriri g'anyi eme iya; g'anyi ha l'onye l'onye a-nodu eme iphe, anyi ritaru loriri lejo okpoma anyi.' ”

Ndu Ízurelu ajika Chipfu

¹³ “Oo ya bū le-a; wakwa iphe,
Chipfu epfu baa:
Unu kpaeshikwa ishi
l'ohamoha;
?bū onye nūmajeru egube
owa?

Nwada mu yee nwoke
akwajeduru ono,
bū Ízurelu be meakwaru
iphe, anyi ishi edzu.

¹⁴ Aka-mini-sunoo k'ubvú ubvú
Lébanonu;
?o dūru teke oo-nonya l'o

- haa adu le kpokoro
 kpokoro kpokoro eka
 ono,
 du le mkpoze ubvu ono?
 To mini-oyi ono, shi leka du
 enya aso abya ono;
 ?oo-nonyi lo so-buhu to?
 15 Eshinu ndibe mu zohawaru
 mu;
 wata akpo unwu-isensu oku
 anu iphe, abudu iphe;
 ephe mewaa phe;
 ephe kpo garigari kpofo
 l'uzo phe ono, bu uzo,
 shi phe le ndiche ono;
 wata eshi uzo du werere;
 mbu uzo, a tuduru mkpoli;
 16 ephe mee ali phe;
 o buru ochobu;
 buru eka aa-nodu anmaru
 ota jasu l'ojejoje.
 Iphe, bukpo onyemonye,
 ghataru iya nu be oo-duje
 biribiri;
 lo phuphee ishi.
 17 Mu a-tuka phe nanunanu
 g'iphe, pherephere,
 shi l'uzo enyanwu-awawa
 zikashiru;
 ephe adakaa nanunanu
 leka ndu ohogu phe.
 Mu e-goshi phe azu mu;
 mu tee goshidu phe
 iphu mu
 m'ephe -nodu eje iphe-ehuka."

Aachiru Jieremaya ejo idzu

18 Tobudu iya bu; ephe su: "Unu bya g'anyi chiaru Jieremaya ejo idzu;
 kele anyi nweru-a ndu-uke, a-nodu ezi anyi iphe; anyi nweru ndu ma-
 ru iphe, bu ndu a-nodu atu-ziru anyi eka; bya enweru ndu mpfuchiru,
 a-nodu ezi anyi opfu Chileke. Unu bya g'anyi gude ire mee ya omeliwe;
 g'anyi ba ngakwa nchi l'iphe, oopfu me nanu."

¹⁹Ngabɛnuru mu nchi; jiko Chipfu; nɛma olu ndu achi mu opfu. ²⁰?Ee-gude ejo-iphe pɛɛ ɛgwo iphe-oma? Kele-a; epe tɛakwaru nsu doberu mu. Nyatakwa le mu pɛɛru l'iphu ngu pɛɛru phe opfu oma gude mee g'ehu ghubuhu ngu egu l'opfu ehu phe. ²¹Oo ya bu le-a; chinuru unwu phe ye l'okpa-nri; l'e gude ogu-echi gbua phe pyaapya; unyomu phe aburu ndu ume nwa a-nodu eme; teme epe aburu ndu ji phe nwushihuru. G'e gbushia unwoke phe egbushi; g'unwokorobyia phe buru ndu ee-gude ogu-echi gbushia l'iphu ogu. ²²G'iphe, a-nodu atu l'ulo phe buru uzu-ekwa teke ono, ii-chiru ndu ojogu sobata l'ibe phe bya atu phe l'upfu ono; kele epe tɛɛru nsu doberu mu ge mu dalahu; bya eworu onya gbaberu mu ge mu ye okpa. ²³Obenu le gube Chipfu macharu ejo idzu, epe achiru mu ke g'ephe gbua mu. Ta agukwaru phe nɛ l'ejo-iphe ono, epe eme ono. Ophu i hufukwa iphe-eji, epe eme l'iphu phe. Ochia g'ephe nodu ngu l'iphu buru ndu e mekperu emekpe. Noo iphe, ii-me phe bu ono teke ehu a-nodu egu ngu egu.

19 ¹Wakwa iphe, Chipfu epfu: “Je azuta ite-urwa l'eka okpu-ite. G'unu le ndu bu ogerenya mkpukpu yee ndu bu ogerenya uke Chileke hakwaru swiru. ²Je le nsuda Hinomu laguga eka eeshije abahu Jierusalemu, bu Onu-abata Agbagba-mbeji. I-rwuepho eka ono l'i raa iphe-a, mu ezi ngu-a arara; ³sɛ phe-a: Unu numakwa Opfu Chipfu; unube ndu eze ndu Jiuda; mekpoo ndu Jierusalemu. Wakwa iphe, oopfu; mbu Chipfu, bu Okalibe-Kakota-Ike; bya aburu Chileke ndu Izurelu. Unu ngabekpodapho nchi! Mu abyakwa egude ejo-iphe byapfuta ndu ali-a, bu iphe, a-gba onyemonye, numaru iya nu anwirinwa le nchi. ⁴Kele epe gbadowaru mu; bya eworu ali eka-a mee eka aanoduje agwa agwa ndu ohozo. Epe nowaa ya kpo ngweja oku nu agwa, epe amadu; ophu nna phe amadu iya; ophu ndu eze ndu Jiuda amajeduru iya. Epe noduwa iya gbushia ndu adudu iphe, epe meru; mee phe nodu aso gborogboro.

⁵“Epe kpɛɛru eka aagwaje iphe agwagwa, dugbaa iche iche doberu Balu; k'ophu epe a-nodu akpo unwu phe oku l'eka ono gude agwa Balu ono. Iphe ono buru iphe, mu asuduru g'e meje; ophu mu ephotajekpodaru iya nu ephota ophu; mbu l'o toko bahuswekpo mu nu l'egomunggo. ⁶Oo ya bu le-a; wakwa iphe, Chipfu epfu baa: G'enya dokwa unu. O nwekwaru mboku, e-mechaa du nu; mbu teke ee-mechaa; ndiphe tee kuedu eka-a Tofetu; ophu eekuedu iya nsuda Hinomu. Iphe, ee-mechaa kuahaa ya bu nsuda Teterii. ⁷O kwa l'eka-a be mu e-chikposhi idzu, epe achi; mbu ndu Jiuda yee ndu Jierusalemu. Mu e-me ge ndu ohogu phe gude ogu-echi gbushia phe; mbu l'eka ndu achi ndu phe. Mu eworu odzu phe tukaa g'o buru nri duru enu, epe l'eli; yee anu, bu legbudu. ⁸Mu e-me mkpukpu ono g'o buru ochobu; g'o buru eka aa-kpoyijeru ukuvu. Onyemonye, ghataru iya nu be ehu a-nwuje kpalaa; l'o kpoyiaru iya ukuvu ghata. O buru iphe, a-kpa iya nu bu g'e gude mebyishiberu iya. ⁹Mu e-me phe g'ephe taa

anụ ụnwegirima ibe p̄hẹ; t̄eme ẹp̄he ataa anụ nwibe p̄hẹ teke ono, ip̄he a-
n̄odu atsụ p̄hẹ l'ẹhu ono, bụ teke ndu ọhogu p̄hẹ, l'achọ ndzụ p̄hẹ e-kep̄he
p̄hẹ mgburugburu ono.

¹⁰“No iya; t̄ukpoo ite ono teke ndu ono, unu l'ep̄he swị ono ele ngu
ẹnya; ¹¹l'ị sụ p̄hẹ-a: Wakwa ip̄he, Chipfu, bụ Ọkalibe-Kak̄ota-Ike eep̄fu:
Mu a-t̄ukposhi ọha-a ȳe mkp̄ukpu-a ẹgube-a, a t̄ukposhiru ite ọ-kp̄u-ite-
a; ọp̄hu a byadu l'agbak̄obe iya ọzobaa. Ẹp̄he e-li odzu l̄e Tof̄etu; noo k̄ele
a taa h̄umaedu ẹka ọzo, aa-n̄odu elidzuru p̄hẹ. ¹²Wakwa ip̄he, Chipfu
ep̄fu baa: Nokwa ip̄he, mu e-me ẹka-a ȳe ndu bu iya n̄u. Mb̄u l̄e mu e-me
mkp̄ukpu-a l'ọ d̄u ḡe Tof̄etu. ¹³Ip̄he, b̄ukpoo ụlo, n̄o l̄e Jierúsalem̄u; ȳele
ụlo ndu eze ndu Jiuda b̄e aa-t̄urwuchaa g'a t̄urwuru ẹka-a, bụ Tof̄etu-a,
bụ ẹka ẹp̄he n̄oḡbaa l'eli ụlo akp̄o ụnw̄u-is̄ensu ọku n̄u ip̄he, bụ kp̄okpode;
t̄eme ẹp̄he n̄odu agbaru agwa m̄e gude agwa p̄hẹ.”

¹⁴T̄obudu iya bụ; Jieremaya byan̄u bya eshi l̄e Tof̄etu lwa, bụ ẹka
Chipfu shi zia ya g'ọ je ep̄fuchiru iya op̄fu-a; bya ap̄furu l'oma-unuphu
eze-ụlo Chileke bya asụ ip̄he, b̄ukpoo ndu ono l'op̄hu sụ p̄hẹ: ¹⁵“Wakwa
ip̄he, Chipfu, bụ Ọkalibe-Kak̄ota-Ike eep̄fu; mb̄u Chileke k̄e ndu Ízurelu:
Unu lek̄p̄odapho. Ip̄he, b̄ukpoo ẹjo-ip̄he ono g'ọ ha, bụ ọp̄hu mu p̄fuwaru
l'oo-me p̄hẹ ono b̄e mu abyakwa emek̄ota mkp̄ukpu-a ȳe mkp̄ukpu, n̄o-
pheru iya mgburugburu. Ọ b̄uru ip̄he, kpar̄u iya n̄u bụ l'ep̄he ngakoberu
ishi j̄ika l'ep̄he taa angab̄edu mu n̄chị l'olu.”

Jieremaya ȳe Pasho

20 ¹O be teke Pasho nwa Ima n̄umaru mp̄fuchiru Jieremaya; Pasho
bụ onye uke Chileke bya ab̄uru onye-ishi ndu-ishi eze-ụlo Chipfu;
ọ n̄umaep̄ho ip̄hemip̄he ono, Jieremaya ep̄fu ono; ²o mee; e chia Jierema-
ya, bụ onye mp̄fuchiru ono ẹchachi; bya eworu iya t̄u-chia l'ụlo-mkp̄oro,
n̄o l'aḡuga ọnu-abata eze-ụlo Chipfu ọp̄hu aza Ep̄hekerep̄he Ọnu-abata
Benjaminu. ³O be l̄e nchitab̄ohu iya; Pasho bya at̄ufuta iya l'ụlo mkp̄o-
ro ono. Jieremaya sụ iya-a: “Ẹpha, Chipfu ḡuru ngu ta ab̄ekwa Pasho. Ọ
kwa 'Nggiri, n̄o l'uzo l'ekameka'; ⁴k̄ele-a; wakwa ip̄he, Chipfu ep̄fu baa:
Mu e-me ngu g'ị ts̄ahaa onwongu ebvu; ndu yeru ngu obu g'ep̄he ha
at̄uko atsụ ngu ebvu. Ii-gude ẹnya ngu ḡedegede h̄uma teke ndu ọhogu
p̄hẹ e-gude ogu-echi egbushi p̄hẹ. Ndu Jiuda mgburugburu b̄e mu e-wo-
ru ye l'ẹka eze ndu Bábil̄onu, bụ onye a-kp̄u p̄hẹ l̄e ndzụ lash̄ia al̄i ndu
Bábil̄onu; ọzokwanu gude ogu-echi gbushia p̄hẹ. ⁵Ip̄he, b̄ukpoo ẹku ndu
mkp̄ukpu-a b̄e mu e-woru yek̄ota l'ẹka ndu ọhogu p̄hẹ; mb̄u ip̄he, b̄uko-
takpoo ip̄he, ẹp̄he seshiru akanya iya; m̄ekpoo ip̄he, b̄ukpoo ip̄he, vu
oke aswa, n̄okota l'ime iya; m̄ekpoo ip̄he, bụ ẹku, eze ndu Jiuda kpatar̄u.
Ip̄hemip̄he ono b̄e ẹp̄he a-kwak̄ota ọkwata vuta lash̄ia al̄i ndu Bábil̄onu.
⁶Ḡubedua, bụ Pasho ȳe ip̄he, bụ ndu buk̄ota l'ibe ngu b̄e aa-kp̄ukota l̄e
ndzụ laa al̄i ndu Bábil̄onu. Ọ b̄uru l'ẹka ono b̄e unu a-n̄odu nw̄shihu; l'ẹ

lia unu l'eka ono; unu lẹ ndu yeru unu obu ono, unu sūru lẹ Chileke pfuru phe, iphe, ephe pfuru ono.”

Aphụ, Jieremaya agụ

- 7 Gụbe Chipfu; i dusweru mu
 ụzo;
 mu buru onye e dusweru
 ụzo.
 I mekperu mu; ịme ọ kalẹru
 ngu.
 Mu bụwaa onye aanọduje
 eme iphe-ọchi
 mkpụrumkpuru.
 Onyemonye anọduje achị mu
 ọchi.
- 8 Tekenteke, mu epfukpọo
 opfu bẹ mu arajẹ iya
 arara l'omeliwe
 duka; ọla-l'iswi dū.
 Opfu Chipfu mewaru;
 mu buru onye aakọ ọnu;
 ịme a nọdu achị mu ọchi
 mkpụrumkpuru.
- 9 Teke mu sụkwanuru lẹ mu
 tee kubaedu iya epha;
 ọphu mu egudebaedu epha
 iya epfu opfu;
 opfu iya obu anodu mu
 l'okpoma enwu mu
 phuruphuru g'oku;
 rakuru arakuru l'ime okpu
 mu.
 Mbụ l'ike esede iya bụwaru
 mu.
 Mbụ lẹ-a; mu taa duka ike
 esede iya.
- 10 Kele mu anukwa taba taba,
 ephe adzugbaaru
 nwibe phe sụ:
 “Nggiri duka l'uzo
 l'ekameka!”
 Ephe tukoru epfu sụ: “Unu je

- edoo iphe ono, oopfu
ono!
Unu g'anyi je edoo iphe,
oome!”
Iphe, bukpo ndu mu l'ephe
eshi ònyà elekòtaepho
ènya g'èphe maru
teke èturu a-lò mu.
Èphe tuko epfu sù: “?a maru
e-dephuu iya.
Noo teke o-kalèru anyi.
Ò buru teke ono bè anyi
e-melata iya iphe-a,
oome nta-a.”
- 11 Obenu lè Chipfu nò swiru mu
eswiru g'onye eze-ojogu
swiru.
Òo ya bù lè ndu ono,
achi mu lè njo ono bè upfu
a-dù.
Ò tòo kalèduru phè;
ophu ooreduru phè
g'èphe tüberu.
Òo-buru phè iphe-iphè;
ophu a byadu azòha
ènya-òlwa phè azòha.
- 12 Gùbe Chipfu, bù
Òkalibe-Kakòta-Ike;
gùbe onye ono ahùtaje ndu
pfùberekoto ama;
tème ì nòdu avòje obu yèe
òriri;
gè mu humanu èka
iimelata phè;
kèlè oò ngu bè mu yeru
ikpe nkemu l'èka.
- 13 Unu gùa ebvu nù Chipfu!
Unu jaa Chipfu ajaja!
Kèlè o dzòtaru ndzù onye
adùdu g'ò dù iya l'èka
ndu èjo-iphe.
- 14 Gè mbòku, a nwùru mu

- bukwaru eswe,
 a turu onu!
 G'a ta gokwaru onu-oma nu
 eswe mboku ono,
 ne
 mu nwuru mu onoya!
- 15 G'onye byaru ezia nna mu ozi
 ono bukwaru onye a turu
 onu;
 mbu onye byaru asu iya:
 "A nwukwaru ngu nwa;
 o buru nwa nwoke!"
 K'ophu bu l'o numaru iya;
 ehu tsoahaa ya.
- 16 Ge nwoke ono dukwa ge
 mkpukpu,
 Chipfu mebyishiru;
 ophu o phuduru iya
 obu-imemini.
 G'o bukwaru iphe,
 oo-nodu anu l'utsu bu
 uzu-ekwa.
 O -be leswe; l'onuaha mkpu
 ugu.
- 17 Kele o to pyi-gbuduru mu
 teke mu no l'epho;
 ge ne mu buru ilu mu.
 Ephi ahawa iya ro ragbada
 jaswaroya.
- 18 ?Bunaa gunu mekpooru iphe,
 mu futaru l'epho afuta
 ophu ge mu bya bya
 ahuma iphe-ehuka yee
 nrimaphu;
 yee ge mu bya akpo-chi
 ishi ndzu mu
 l'iphe-iphere?

Chileke ajika eme iphe, Zedekaya arwo iya

21 ¹Opfu, shi l'eka Chipfu byakwa erwua Jieremaya nchi. O buru teke ono be eze, bu Zedekaya yeru Pasho nwa Malukayijia; ye-le onye uke Chileke, bu Zefanaya nwa Maseya g'ephe jepfu iya. Ephi bya

asụ iya: ²“Jiëshikwaru anyi Chipfu; kele Nebukadineza, bụ eze ndu Bábilonu l'etsokwa anyi oḡu. ?A maru; ?Chipfu e-meru anyi iphe, dụ biribiri g'o shi emeje teke ndiche k'ophu ọo-laphu azụ parụ anyi haa.”

³Tọbudu iya bụ Jieremaya yeru p̄he ọnu sụ p̄he: “Unu sụ Zedekaya lẹ-a: ⁴Wakwa iphe, oopfụ; mbụ Chipfu, bụ Chileke kẹ ndu Ízurelu baa: Iphe, mu abya ememe bụ lẹ mu e-me gẹ ngwọgu, unu gude alwu ọgu buru unu ọgu, bụ ngwọgu, unu gude etso eze ndu Bábilonu ọgu; yee ndu Bábilonu l'onwophe, bụ ndu nọ l'azụ mkpukpu nọ-phee unu mgburugburu. Mu e-mechaa chibata p̄he l'ime mkpukpu-a. ⁵Ozo bụ lẹ mbēdua l'onwomu a-nọdu etso unu ọgu. Mu a-machikpo ẹka mu; gude ọkpu ẹka mu v̄a ọvuma; gude iwe tukoshi unu oke ẹhu-eghu mu. ⁶Mu e-chitsushicha iphe, bukpuo ndu bu lẹ mkpukpu-a; nemadzụ yee anụ. Ọ buru ejo iphe-ememe e-gbushi p̄he. ⁷Wakwa iphe, Chipfu epfu baa: Teke e mechaarụ nno; mu eworu Zedekaya, bụ eze ndu Jiuda; yee ndu-ozí iya; mekpoo ndu alí-a, bụ ndu iphe-ememe ono gbuphodoru; yee ndu ọphu e gbuphodoru l'ogu-echi; mē ndu ọphu ẹgu gbuphodoru; chíru ye Nebukadineza, bụ eze ndu Bábilonu l'ẹka; yee ndu ọhogu p̄he ono, bụ ndu aachọ ndzụ p̄he ono. Lo gudekwaphọ ọgu-echi gbushia p̄he; ọphu ọo-hadu p̄he. Imemini p̄he taa dudu iya; ọphu ọ dudu onye ọphu ọophutaru.

⁸“Ozokwapho lẹ-a; g'í sụ ndu-a: Wakwa iphe, Chipfu epfu baa: Unu lekwa lẹ mu dobeakwaru unu ụzo ndzụ yee ụzo ọnwu. ⁹Iphe, bukpuo onye nọ lẹ mkpukpu-a bụ ọgu-echi bẹ ee-gude gbua ya; ẹgu egbua ndu ọphu oo-gbu; iphe-ememe egbua ndu ọphuu. Onye lufukwanuru je eworu onwiya ye l'ẹka ndu Bábilonu-a, bụ ndu nọ-pheru unu mgburugburu-a; l'a-nọdu ndzụ. Onye ono e-gude ndzụ iya gbala. ¹⁰Iphe, mu chíwaru idzu iya bụ eme g'ejo-iphe dapfu ndu mkpukpu-a; ọ tọ budu iphe-oma. Nokwa iphe, Chipfu eepfu. Mkpukpu-a bẹ ee-ye l'ẹka eze ndu Bábilonu; l'o gude ọku mebyishia ya.

¹¹“Ozo bụ lẹ-a; g'í sụ ndu ọnu-ulo onye eze ndu Jiuda: Unu n̄makwa Opfu Chipfu. ¹²Unubẹ ndu ọnu-ulo Dévidi; wakwa iphe, Chipfu epfu baa: Unu kpeje ikpe, p̄furu ọto mbọku-mbọku. Unu adzọtaje onye ana n̄fụ l'ẹka onye emekpa iya ẹhu. Ọdumeka bẹ ẹhu-eghu mu a-gbanwuhukwa ọku. Ọ buru iphe, a-kpa iya n̄ bụ ejo-ememe, unu meshiru; mbụ l'ẹhu-eghu mu ono e-nwu ọku k'ophu bụ l'o to nwedu onye a-gbanyị iya n̄. ¹³Mu n̄oru ngu lẹ n̄jọ ḡbe Jierúsalemu; mbụ ḡbe onye bu lẹ nsuda-a; mbụ ḡbe agbara mkpuma, nọ lẹ baswaa alí ẹka-a. Ọ kwa Chipfu epfu iya anụ unubẹ ndu ono, asuje: ‘?Bụ onye abya anyi eme ḡnu? ?Bụ onye adụ ike abata l'ẹka anyi bu-a?’ ¹⁴Mu a-h̄ù unu ah̄ùh̄ù g'iphe, unu meru gbaru. Ọ kwa m̄be Chipfu epfu iya. Mu a-nwuru ọku ye l'oswa unu; t̄ko iphe, nọ-pheru unu mgburugburu tsukota.”

Ikpe, e kperu eze ndu l'eme ejo-ememe

22 ¹Wakwa iphe, Chipfu epfu baa: “Je l'ibe eze ndu Jiuda je araa ozi-a arara l'ẹka ono: ²N̄makwa Opfu Chipfu; ḡbe eze ndu

Jiuda; mbụ ụ́be onye nọ l'aba-eze Dévidi; ụ́bedua l'onwongu; mę ndu-
 ozi ngu; mękpoo ndibe ngu, bụ ndu eshije l'onu-abata-a abahu. ³Wakwa
 iphe, Chipfu epfu baa: Unu kpeje ikpe, p̄furu nhamunha; unu emeje iphe,
 p̄furu ọto. Unu adzọtaje onye ana n̄fụ l'ẹka onye emekpa iya ẹhu. Unu ta
 adụkwa ewere; ọzoo omeliwe, unu e-meje ndu lwaru alwalwa; ọzoo ndu
 enwedu nna; ọzoo unwanyi, ji p̄he anọedu ndzụ. Ọphu unu anọdujeshi
 l'ẹka-a gbua ndu adudu iphe, ẹphe meru! ⁴Kẹle-a; ọ -buru l'unu jiru obu
 oyi mee iphe-a, mu s̄uru g'unu meje-a; bę eze ndu nọ l'aba-eze Dévidi;
 ẹphe lę ndu ejeru p̄he ozi; mę ndibe p̄he a-nodu agba l'ugbo-inya; mę l'eli
 inya eshi l'onu-abata ibe eze-a abata. ⁵Obenu teke ọ bụ l'unu te emedu
 iphe, mu s̄uru g'unu mee; gę mu gudekwa onwomu riaru unu angu; mbụ
 l'ibe eze-a e-mechakwaa buru ochobu. Nokwa iphe, Chipfu eepfu bụ ono.

⁶“Kẹle-a; wakwa iphe, Chipfu epfu l'opfu ẹhu ibe eze ndu Jiuda: A
 makwaru-a l'ị dụ g'alị Giladu l'ẹhu mu; ọzoo g'eli úbvú úbvú Lébanonu.
 Obenu l'ọ tọ dudu iphe, e-me gę mu te eme ngu g'ị dụ g'echięgu; mbụ gę
 mkpukpu, e te bujeduru ebubu. ⁷Mu dobewaru ndu mmebyi iche g'ẹphe
 bya emebyia ngu. G'ẹphe ha l'onye l'onye e-gudegbaa ngwoğu p̄he. Ẹphe
 abya egbutsushia ẹguru oshi sida ngu ono; bya achiru iya ye l'oku.

⁸“Ikpotọ nemadzụ, shigbaa l'oha, dụ igwerigwe l'a-ghata lę mkpu-
 kpu-a; ẹphe aji nwibe p̄he sụ: ‘?Bụ gunu meru iphe, Chipfu meru ẹgube
 iphe ọwa-a l'ẹhu oke mkpukpu-a?’ ⁹Aa-sụ p̄he l'iphe, kparu iya nụ bukwa
 l'ẹphe gwọberu ọgbandzu Chipfu, bụ Chileke p̄he; je awata ephozeru
 agwa; baahaaru iya ẹja.”

¹⁰ Unu ta arakwa ẹkwa onye eze

ono, nwuhuru nụ ono!

Ọphu unu emekwa

ẹkwa iya!

Ọ buchikwaa onye unu

a-kwa ẹkwa iya

kwashia ya ike

bụ onye ọphu a kpuru

lę ndzụ laa ẹka ọzo.

Noo kẹle ọ tọ lwabaedu;

ọphu ọohumabaedu

alị ẹka a nwuru iya ọzo.

¹¹Kẹle-a; wakwa gę Chipfu p̄furu opfu ẹhu Shalumu nwa Jiosaya, bụ
 onye nọ-chiru ọkwa nna iya; bya aburu eze, ndu Jiuda; mbụ onye ono,
 tųgbuwaru l'ẹka-a: “Ọ tọ lwabaekwa. ¹²Ọ kwa l'ẹka ono, ẹphe kpuru iya
 lę ndzụ laa ono bę ọo-nodu nwuhu. Ọ tọ humabaekwa alị ẹka-a ẹnya
 ọzo.”

¹³ Nshio onye ono, akpu

unuphu ibe eze iya l'uzo,

apfuduru-oto;
 mbu onye bu l'uzo,
 apfuduru nhamunha be
 o gude akpu ulo-eli iya;
 onye meru ndu ali iya;
 ephe nodu eje ozi ke
 mmanu;
 ophu oopfudu phe ugwo
 ozi phe.

14 O nodu epfuje su: Mu a-kwa
 unuphu ibe eze mu g'o
 paa aka.

Ya e-mee ulo-eli iya g'o du osa.
 O bya emee ya bya eyeshia
 ya windo;
 bya egude oshi sida gbaa
 ya uko;
 bya etee ya penti
 uswe-uswe gude rwaa
 ya.

15 “Bu akushi ulo oshi sida
 l'e-me g'i buru onye
 eze to?”

Nna ngu; ?to shidu eri nri;
 angu iphe,
 aangu angungu?
 O nodu ekpeje ikpe,
 pfuru nhamunha;
 bya eme iphe,
 pfuru oto.

Iphemiphe duru iya le ree.

16 Ndu eje iphe-ehuka;
 waa ndu adudu g'o
 du phe be o gbaru
 odzori;
 o duru iya le ree.

?Tobudu iphe ono bu l'onye-a
 maru onye mu bu?”

Nokwa iphe, Chipfu eepfu.

17 Obenu le gubedua be enya
 ngu;
 yee okpoma ngu bu

l'ẹka i phoberu iya
 bu l'eri urwu
 ghelegheleghele;
 yele egbu ndu adudu
 iphe, ephe meru;
 yele eme nemadzu
 iphe-kpanganga yele
 omeliwe.

18 Oo ya bu le-a; wakwa iphe, Chipfu epfu l'opfu ehu Jiehoyakimu, bu nwa Jiosaya, bya aburu eze ndu Jiuda:

A taa rakwa ekwa iya su:
 Owiwo nwune mu nwoke-e!
 Owiwo nwune mu nwanyi-e!
 A taa rakwa ekwa iya su:
 Owiwo onye nwe mu nu-e!
 Owiwo eguru onye-a!

19 Ee-li iya g'onye eli
 nkafu-igara.
 Mbụ l'oo wuruwuru be
 aa-lo iya lota
 je etuphaa l'azu mkpukpu
 Jierusalemu.

20 "Jekwa l'ubvu ubvu Lebanonu
 je echia mkpu!
 Ge ndu ali Beshanu
 numakwa olu ngu!
 Jekwa anodu l'eli ubvu ubvu
 Abarimu chia mkpu;
 kele ndu gu l'ephe
 tugbaru buru nanu
 be e gbushichaakwaru
 g'ephe ha.

21 Mu kakwaru ngu teke ono,
 i shi dobesu lo to dudu
 iphe,
 byaru eme ngu nu ono.
 I sule-a l'i tii yedu onu.
 O kpokwa g'i shi teke i bu
 okoroby meta bu ono.
 I tiki meswekwaa iphe,
 mu suru g'i mee.

22 Pherephere a-tuko ndu

echeru ngu aturu pata.
 L'a tuko ndu gu l'ephe
 tugbaru buru nanu
 kpua le ndzu.
 Noo teke iphere e-gude ngu;
 l'e woru ngu iphu kpua
 le ntụ.
 O buru iphe, kparu iya nu
 bu ejo-iphe, imegbabe.
 23 Unube ndu bu l'ubvu ubvu
 Lebanonu;
 mbu ndu kparu epfunne
 l'ulo, a kuru l'oshi-sida;
 egube ude,
 unu e-mechakwanaa
 tsua teke iphe-ehuka
 azu unu gburumu
 pfuuri;
 mbu meahaa unu ehuka ge
 nwanyi, ime eme!"

24 Wakwa iphe, Chipfu epfu baa: "Eshinu mu no ndzu ge mu no iya-a;
 be o to dukwa m'obeta gube Jiehoyakinu, nwa Jiehoyakimu, bu eze, ndu
 Jiuda buru echi-ohubama, mu gba lekutara mu; mu agbafulekwa ngu-a.
 25 Mu e-woru ngu ye l'eka ndu achọ ndzu ngu; mbu ndu itsu ebvu; mbu
 l'eka Nebukadineza, bu eze ndu Babilonu; yele eka ndu Babilonu. 26 Mu e-
 tuphakpoe ngu pho etupha; gu le ne, nwuru ngu nu; je echie unu l'ali eka
 ozo; eka abudu eka a nwuru ngu; ophu o budu eka a nwuru ne ngu. O
 buru l'eka ono be unu n'ebo a-nodu nwuhu. 27 Unu ta abyadu alaphu azu
 l'ali ono, a-nodu agu unu alwalwa ono."

28 Jiehoyakinu-a; ?o bu ite-urwa, tukpohuru nu, a jikaru ajika too? Mbu
 iphe, adudu onye o du ree? ?Bu gunu meru g'o gude a chiru yee unwegiri-
 ma ibe iya etuphashia; je eworu phe chiru ye l'ali eka ephe amadu?

29 Gube ali! Ali! Ali! Numakwa
 Opfu Chipfu!

30 Wakwa iphe, Chipfu epfu
 baa:
 "Dee nwoke-a lekwo l'o bu
 onye enwedu nwa;
 onye iphe ta aduduru le
 ree teke o no ndzu.
 Noo kele o to dudu awa
 iya ophu iphe,

byaru aduru lẹ ree.
 Ophu ọ dudu onye ophu
 byaru anodu l'aba-eze
 Dévidi.
 Mbù l'ọ tọ dudu onye
 ophu byaru aburu
 eze ndu Jiuda.”

Èkali iya ophu p̄f̄uberekoto

23 ¹Wakwa iphe, Chipfu epfu baa: “Aphù a-tsòkwaru ndu nche aturu ono, bụ ndu ophu emebyishi aturu mu bya achikashi iya achikashi l'alì mu.” ²Oo ya bụ lẹ-a; wakwa iphe, Chipfu epfu; mbụ Chileke ndu Ízurelù; iphe, oopfù anù ndu nche aturu, eche ndibe iya: “Eshinu unu chikashiru aturu mu achikashi; mbụ chì-phua ya achì-phu; ophu unu eletadu iya ẹnya; bẹ mu e-letakwanù unu ẹjo eleta; chia unu iphe ẹjo-ememe ono, unu meru ono.” Nokwa iphe, Chipfu eepfu bụ ono. ³“Oo mbedua l'onwomu e-je achikota nwa ndu phoduru nù l'unwu aturu mu ono l'iphe, bukpoò alì ẹka mu chiru phẹ jeye g'ọ ha; duphuta phẹ azù l'ẹka ẹphe a-tajẹ nri, bụ ẹka ẹphe a-nodu wata azuzu; aka igwerigwe ẹje. ⁴Mu e-ye ndu nche aturu, a-nodu eleta phẹ ẹnya. Teke ono bẹ ndzù taa guedu phẹ; ophu ọ duedu iphe, eyekwadu phẹ ebvu; ophu ọ duedu ophu aachokwadu achochò.” Nokwa iphe, Chipfu eepfu.

⁵Wakwa iphe, Chipfu epfu baa: “E -mechaa bẹ mu e-metaru Dévidi ẹkali iya ophu a-pfube ẹka ọto; mbụ onye eze, e-gude mmamiphe buru eze; ẹme l'ọ nodu ekpe ikpe, pfuru nhamunha bya eme iphe, pfuru ọto l'alì-a. ⁶O buru teke ọ bụ eze bẹ aa-dzota ndu Jiuda. Ndu Ízurelù anodu; ọ tọ dudu iphe, eme phẹ nù. Onye ono bẹ iphe, ee-ku iya bụ: ‘Chipfu, bụ apfubekoto anyi’.”

⁷Wakwa iphe, Chipfu epfu baa: “Oo ya bụ l'ọ -rwua mboku ono bẹ ndiphe taa sùbaedu: ‘Eshinu Chipfu nọ ndzù g'ọ nọ iya-a; mbụ onye dufutaru ndu Ízurelù l'alì Ijiputu.’ ⁸O bụwaru iphe, ee-pfuje bụ: ‘Eshinu Chipfu nọ ndzù g'ọ nọ iya-a; mbụ onye dufutaru oshilokpa Ízurelù l'alì ndu ishe-li waa l'iphe, bukpoò ohamoha, bụ ẹka o shi chì-phua phẹ.’ Teke ono bẹ ẹphe e-buru l'alì k'ẹka phẹ.”

Ndu epfu iphe, Chileke epfuduru

⁹A -bya l'opfu-ẹhu ndu
 mpfuchiru;
 okpoma agbawahukwa
 mu agbawahu.
 Mbù l'okpu mu l'ophu
 anmakota mu jijijijii.

- Mu ḍep̄ho g'onye m̄e at̄su;
 mb̄u g'onye m̄e t̄u-t̄suru.
 Ọ b̄uru ip̄he, kpar̄u iya n̄u
 b̄u Chip̄fu ȳe op̄fu iya,
 d̄u ns̄o.
- 10 Al̄i ẹka-a l'ophu b̄u ip̄he,
 jiru iya n̄u b̄u ndu
 eri ogori.
 Ọ b̄uru ọnu, a t̄uru meru
 g'o gude al̄i ẹka-a n̄odu
 l'aph̄u.
 Ẹka an̄u akpaj̄e nri
 l'echīegu kp̄ohu jegiri
 jegiri.
 Ndu mp̄fuchiru n̄odu
 eme ẹjo-ip̄he;
 t̄eme ẹp̄he n̄odu eme ike
 ph̄e g'ọ gb̄aduru.
- 11 Wakwa ip̄he, Chip̄fu ep̄fu:
 “Ndu mp̄fuchiru m̄e ndu-uke
 Chileke t̄ukoru b̄uru
 ndu te emedu ele Chileke.
 Mb̄u l̄e mu h̄umacharu
 ẹjo-ip̄he ọbu,
 ẹp̄he eme ọbu l'eze-ulo
 mu.
- 12 Noo g'o gude ọzo ph̄e je
 l'awata echi ẹturu.
 Aa-ch̄iru ph̄e ch̄i-phua
 l'ẹka agba ọchii.
 Ọ b̄uru ẹka ono b̄e ẹp̄he
 a-da iko.
 Mu egude ẹjo-ip̄he
 dap̄fu ph̄e teke ono,
 ee-chi ph̄e ip̄he ono.”
 Nokwa ip̄he, Chip̄fu eep̄fu
 b̄u ono.
- 13 “L'echilab̄o ndu mp̄fuchiru,
 shi l̄e Sam̄eriya b̄e mu
 h̄umaru ẹbyi-a:
 mb̄u l'ẹp̄he ep̄fuchiru Bal̄u;
 gude ẹgube ono edup̄hu

ndibe mu, bu ndu Ízurelu.

14 Tẹmanukwapho; l'echilabo
ndu mpfuchiru ke
Jierúsalemu be mu
hụmakwarupho iphe,
anyi ishi ẹdzu.

Ephe anọduje eri ogori;
tẹme ndzu phe buru
adzu ụka.

Ndu eme ẹjo-ememe
be ephe anọduje eme
g'eka ka phe eshihu
ike l'iphe, ephe eme;
k'ophu bu l'ọ to
dudu onye ophu
aghajeru ẹjo-iphe,
oome azu.

L'ehu nkemu be ephe
dukotaepho ge ndu
Sodomu;
ndu Jierúsalemu dukotae
mu pho ge ndu Gómóra.”

15 Oo ya bu le-a; wakwa iphe, Chipfu, bu Okalibe-Kakota-Ike eepfu
l'opfu ehụ ndu mpfuchiru:

“Mu e-me g'ephe ria nri,
atsọ ilu;
ephe angua mini,
e yeru iphe,
egbu egbugbu.

Noo kele oo l'eka ndu
mpfuchiru,
shi Jierúsalemu be o shi;
be eme ele Chileke
barahu dzuru ali eka-a
l'ophu.”

16 Wakwa iphe, Chipfu, bu Okalibe-Kakota-Ike eepfu: “Unu ta angajekwa
nchi l'iphe, ndu mpfuchiru epfuru unu. Ephe emejekwa g'unu chiru upfu ye
l'iphe, te emedu ememe. Ephe asuje l'ephe phuru ophulenyaa; ama l'oo iphe,
ephe ritaru l'okpoma. O too buduru iphe, shi yeba Chipfu l'onu. 17 Tekenteke be
ephe anọduje epfuru ndu kporu mu ebo l'afu su phe: 'Wakwa iphe, Chipfu eepfu
baa: Ehu a-dukwaa unu guu!' Ndu ophu bu iphe, shi l'ejo okpoma phe be ephe
anọduje eme; ndu k'ono be ephe asuje: 'O to dukwa iphe, byaru emebata unu.'”

18 Obenu lẹ-a; ?bụ onye ole pfujeru gẹ yẹ Chipfu chia idzù lanu; kẹ g'ẹphe humakwanu iphe, eme nu; ozoo numa opfu iya? ?Bụ onye ngabẹ-jeru nchi numa opfu iya? 19 Lekwa; Chipfu gudeakwa ẹhu-eghu ezi oke pherephere; mbụ ejo oke pherephere. O buru l'ishi ndu ejo-iphe bẹ ọpflu temutemu. 20 Ophu ẹhu eghubuhukwa Chipfu egbu gbiriri jasụ l'o meebe-kota iphe, dū iya l'okpoma k'ememe. Mbọku abya-a l'uzo iphu teke iphe-a l'e-dokota unu ẹnya ree.

21 “O tọ bụdu mbẹdua ziru ndu mpfuchiru-a ozi. Ephe gudele-a ozi pẹ agba phuchaphucha. Ophu mu epfukwaru opfu yeru pẹ; ẹphe nọdu epfule-a epfuchiru mu. 22 Obenu l'ome ẹphe pfujeru; mu l'ẹphe chia idzù lanu; mẹ o -buru iphe, mu pfuru bẹ ẹphe gege eje araaru ndibe mu arara; m'ẹphe emekwanaa; ẹphe aghakọbe; haa ejo uzo, ẹphe etso; yẹ ejo-eme-me, ẹphe eme.”

23 Wakwa iphe, Chipfu epfu baa: “?O dū gẹ mu buepho Chileke, nọ ntse; ọpflu mu abuedu Chileke, nọ ụzenya tọ?” 24 Wakwa iphe, Chipfu epfu baa: “?O nweru onye e-je l'eka dū k'edomi onwonye je edomia onwiya k'ọpflu bụ lẹ mu taa humadu iya tọ? ?Mu te ejiduru imigwe; bya eji eliphe l'ọpflu?” Nokwa iphe, Chipfu eepfu bụ ono. 25 “Mu numaakwaru iphe, ndu mpfuchiru ono epfu, bụ ndu egudeje ẹpha mu epfu iphe, mu epfuduru. Ephe asuje: ‘Mu rwo ru rwo! Mu rwo ru rwo!’

26 “?Bukpoo teke ole bẹ ẹgube iphe ọwa-a anọ-beru l'okpoma ndu mpfuchiru-a, te epfudu ire-lanu-a; ndu buepho ejo ọriri, bataru pẹ l'egomunggo bẹ ẹphe epfuje. 27 Ephe edobesuje lẹ nrwo ono, ẹphe ezeru nwibe pẹ ono e-me gẹ ndibe mu zohaa ẹpha mu ẹgube ono, nna pẹ oche pẹ gude abaru Balu eja zohaa ẹpha mu ono.

28 “G'onye mpfuchiru, arwo nrwo zenupho nrwo iya; obenu lẹ-a; g'onye ọpflu numaru opfu mu gude ire-lanu pfua ya; kele-a; ?bụ awe bẹ ẹswa akpe eje aturu akpuru iya?” Nokwa iphe, Chipfu eepfu. 29 Wakwa iphe, Chipfu epfu baa: Opfu, shi mu l'onu dukwa g'oku; teme o dukwapho g'ongu, etsuje mkpuma yogiri yogiri. 30 Oo ya bụ lẹ-a; Wakwa iphe, Chipfu epfu baa: “Mu nọ-chikwaru uzo ndu mpfuchiru ono, ejeje ezita opfu, nwibe pẹ pfuru bya pfua; bya asu l'oo mu pfuru iya onoya. 31 Mbụ lẹ-a; mu nọ-chikwaru uzo ndu mpfuchiru ono, asaje onu pẹ su lẹ mu suru ono.” Nokwa iphe, Chipfu eepfu. 32 Wakwa iphe, Chipfu epfu baa: “Lekwa; mu nọ-chikwaru uzo ndu ono, arwoje nrwo ẹregede ono; ndu anọduje eze nrwo obu; shi nno mee gẹ ndibe mu tsoru uka ono, ẹphe adzu ono; yẹ eku-onwonye ono phua uzo ono. Ophu o bụdu l'oo mu ziru pẹ; ọpflu o dukwa ekemu, mu turu nu pẹ. Oo ya bụ l'oo tọ dukpodaa urwu, ẹphe abaru ndu-a ililekpoo.” Nokwa iphe, Chipfu eepfu.

33 “Teke ndu ẹka-a; ozoo onye mpfuchiru; ozoo onye uke jiru ngu su ngu: ‘?I jiru Chipfu o su g'e mee gunu?’ L'isu pẹ-a: ‘G'e mee gunu bụ gunu? O suru lẹ ya a-gwo be unu! Noo iphe, Chipfu epfu bụ ono.’ 34 Teke o bukwanu

l'onye mpfuchiru; ọzoo onye uke; ọzoo onye ọzo mmanụ pfulaharu sụ lẹ ya jikwaru Chipfu; o zia iphe, ee-me; mu anụa onye ọbu aphu; yẹlẹ ndibe iya g'ẹphe ha. ³⁵Iphe, unu a-nọduje aji nwibe unu phe; aji iya unwunna unu phe bu: '?Chipfu sūhunuru agha g'a jiru iya?' Mbụ: '?Būhunuru gūnu bẹ Chipfu pfuru?' ³⁶Ọlẹ-a; unu te egudekwa ọnu unu pfua iphe, unu jiru Chipfu; ọ sụ g'e mee ọzobakpo. Kẹlẹ ọ bụwaa iphe, onyemonye pfuru onwiya bẹ oome; unu gude nno woru opfu kẹ Chileke, nọ ndzụ gha igharaphu; mbụ Chipfu, bụ Ọkalibe-Kakọta-Ike; bya aburu Chileke anyi. ³⁷Waa iphe, ii-pfujeru ndu mpfuchiru baa: '?Unu jiru Chipfu; ọ sūhunuru unu agha?' Mbụ; '?Bū gūnu bẹ Chipfu pfuru?' ³⁸A makwaru-a l'unu epfu l'unu jiru Chipfu; o zia unu iphe, e-me nū. Ọlẹ-a; wakwa iphe, Chipfu epfu baa: Iphe, unu anọduje epfu bu: 'Wakwa iphe, a jiru Chipfu; ọ sụ g'e mee'; mbụ ọ bukwaru unubẹ ndu mu sūru g'unu te epfuẹkwa nno. ³⁹Ọo ya bụ lẹ-a; mu zohafutajekwa unu; chifu unu l'iphe mu; unu lẹ mkpukpu ono, mu nuru unu lẹ nna unu oche phe ono. ⁴⁰Ujikputeru, mu e-me unu a-nokwa ojejoje; mbụ l'ọ-buru iphe-iphere, a-nọ ojejoje; ọphu a byadu azoha iya azoha."

Nkata akpuru oshi figu labo

24 ¹O be g'a kpuchaaru ndu-a lẹ ndzụ; mbụ Jiehoyakinu nwa Jieho-yakimu, bụ eze ndu Jiuda; ẹphe lẹ ndu-ishi ndu Jiuda; mēkpoo ndu emeje ọna; yee ndu akpu uzu; bẹ e shikota lẹ Jierusalemu kpua lẹ ndzụ laa alị ndu Babilonu. Ọ buru onye kpuru phe nū bụ Nebukadineza, bụ eze ndu Babilonu. O be g'a kpuchaaru phe lẹ ndzụ ono; Chipfu goshi mu nkata akpuru oshi figu labo, a sūbegbaaru l'aguga eze-ulo Chipfu. ²Nkata lanu bụ iphe, dū iya nū bụ akpuru oshi figu, dū ree shii, dūgbaa gẹ figu, charu ẹgwa. Nkata ọphuu buru iphe, dū iya nū bụ figu, dū eji shii; mbụ l'ọ dū-be eji; k'ọphu bụ l'ọ tọ dudu k'eriri. ³Noo ya bụ; Chipfu bya ajia mu su: "?Bū gūnu bẹ ị hūmaru; Jieremaya?"

Mu sū iya: "Ọ kwa akpuru oshi figu. Ndu ọphu dū ree dushikpoo ree ike; ndu ọphu dū eji dushikwanaa eji ike k'ọphu bụ l'ọ tọ dudu k'eriri."

⁴Tobudu iya bụ; mu bya anuma opfu kẹ Chipfu, sūru mu: ⁵"Wakwa iphe, Chipfu, bụ Chileke kẹ ndu Ịzurelu epfu baa: Ọ kwa g'akpuru oshi figu figu ọwa-a, dūgbaa ree-a dū; bụ gẹ ndu ono, a kpuru lẹ ndzụ l'alị ndu Jiuda dū mu ree, bụ ndu mu chifuru l'alị-a chiru je eye l'alị ndu Babilonu. ⁶Mu e-gude ẹnya mu eche phe nche g'ọ dūru phe lẹ ree. E -mechaa; mu edulatakwa phe pho ọzo l'alị ẹka-a. Teke ono bẹ mu e-me g'ẹphe paa ẹka; ọphu mu akwatsuedu phe. Mu a-dza phe g'onye dzaru oshi; ọphu mu ephefubaedu phe ephefu. ⁷Mu a-nu phe obu, ẹphe e-gude maru mu; mbụ l'ọ mu bụ Chipfu. ẹphe a-buru ndibe mu; mbedua aburu Chileke phe. Noo kẹlẹ ẹphe e-gude obu phe l'ọphu l'ọphu lwapfuta mu."

⁸Wakwa iphe, Chipfu epfu baa: "A bya lẹ k'akpuru oshi figu ono, dū eji ono; mbụ duta-beru eji; k'ọphu bụ l'e tee ridu iya eriri ono; noo gẹ

mu e-me Zedekaya, bu eze ndu Jiuda bu onoya; me ndu-ishi l'ali-eze iya; mekpoo iphe, bu ndu ono, phoduru le Jierusalemu ono; m'ephe -no l'ali eka-a; m'ephe -no l'ali ndu Ijiputu. ⁹Mu e-me phe g'ephe buru ndu ali-eze unwu-eliphe l'ophu a-nodu aso oyi. Ephe a-buru phe iphe e gude achi ochi; me iphe, e gude anma letu. Ee-gude phe agba mgbonu; gude phe ephu l'iphu l'iphe, bukpo eka mu chiru phe ye. ¹⁰Mu e-me g'e gbuu phe logu-echi; egu emee phe; ejo iphe-ememe emee phe gbiriri jasu ephe abvube l'ali-a, mu nuru phe; yele ndiche phe-a."

Ndu a kpuru le ndzu a-no iya ukporo apha eto l'apha iri

25 ¹Owaa bu opfu Chileke, o pfuru Jieremaya le ke ndu Jiuda l'ophu l'apha, kwe Jiehoyakimu, bu nwa Jiosaya apha eno, o wataru aburu eze ndu Jiuda. Apha ono bu apha mbu, Nebukadineza wataru aburu eze ndu Babilonu. ²Jieremaya, bu onye mpfuchiru Chileke numapho opfu Chileke ono; o pfuaru iya ndu Jiuda l'ophu; ephe l'iphe, bu ndu bukota le Jierusalemu. O suru phe-a: ³"E -shi k'ukporo apha l'apha eto nta; mbu e -shi l'apha, kwe Jiosaya bu nwa Amonu apha iri leto, o wataru aburu eze unube ndu Jiuda; byasu ntanu owa-a; be mu shiepho nuta Opfu Chipfu; mu nodu epfueru iya pho unu mpfuto; ophu unu angajeduru nchi. ⁴Temekpoo Chipfu bya eyekpo ndu-ozu iya ono, bu ndu mpfuchiru iya g'ephe ha n-yeto g'ephe bya epfuaru unu opfu; ophu unu angaduru nchi; teme ophu unu eyeduru onu.

⁵"Ephe pfua su: 'Unu ghakobedupho nta; g'unu ha lehu lehu; unu hadapho ejo-ememe, unu eme; mekpoo ejo-iphe, unu anwu ememe. O kwa iya bu g'unu a-nodu l'ali ono, Chipfu nuru unu; bya anu iya ndiche unu phe ono jasu l'ojeje. ⁶Unu be tsoshi agwa ndu ozo. Unu be jeshiru iya ozi; ophu unu abashiru iya eja. Unu be gudeshi iphe, unu gude eka mee gude akpatsu Chipfu iwe. O kwa iya bu le mu te emekaduru unu iphe.' ⁷Ophu unu eyeduru mu onu; unu gude iphe, unu gude eka unu mee gude akpatsu mu iwe. Unu shi egube ono mekaahaa onwunu iphe.'" Nokwa iphe, Chipfu eepfu bu ono.

⁸Oo ya bu le-a; wakwa iphe, Chipfu, bu Okalibe-Kakota-Ike eepfu baa: "Eshinu unu ta ngabeduru nchi l'opfu, mu pfuru; ⁹be mu a-chikobe ndu isheli l'ipfu l'ipfu; ye onye-ozu mu, bu Nebukadineza, bu eze ndu Babilonu. O kwa Chipfu epfu iya. Mu a-chiru phe bya g'ephe buru ndu ali-a ohogu; ye iphe, bu ndu bu iya nu; me iphe, bukpo oha, bupheru phe mgburugburu. Mu e-mebyishibe phe rengurengu kpo; mee phe; ephe aburu iphe, anyi ishi edzu; bya aburu iphe e gude eme iphe ochi; yele iphe, e gude ephu l'iphu; teme l'o buru ochobu jasu l'ojeje. ¹⁰Mu e-me g'o-phu-wuruwuru k'ehu-utso yele ete eswa ta aduhe l'echilabo phe; ophu olu nwanyi, alu ji; yele ke nwoke, alu nwanyi ophu aduedu; ophu oda ikwe nri aduedu iya; ophu oku emeedu iya jaa. ¹¹Ali eka-a l'ophu l'ophu

a-buru okorobo ochobu; tẽme ọha-a l'ophu anọdugbaa eze ndu Bábilonu l'ẹka; ụkporo apha ẹto l'apha iri. ¹²Teke ụkporo apha ẹto l'apha iri ono dzuerupho; mu anụ eze ndu Bábilonu aphụ; yẹle ọha ono l'ophu. Mbụ l'alị ndu Bábilonu l'ophu bẹ mu a-nụ aphụ ẹjo-iphẹ, ẹphe meshiru. Mu eworu iya togbọ; l'ọ buru ochobu jasụ l'ojejoje. Nokwa iphe, Chipfu eepfu. ¹³Alị ẹka ono bẹ mu e-mekọta iphemiphe, mu pfuhawaru lẹ mu e-me iya; mbụ iphemiphe, e deru l'ẹkwo, bụ iphe, Jieremaya pfuru lẹ mpfuchiru lẹ k'ọhamoha l'ophu. ¹⁴Ẹphebedua bẹ ọha, dụ igwerigwe; yẹle eze ndu parụ ẹka e-mechakwaphọ mee phẹ ohu. Mu apfua phẹ ụgwọ g'iphe, ẹphe meru gbaru; yẹle iphe, ẹphe gude ẹka phẹ meta.”

Okoro oke-ẹhu-eghu Chileke

¹⁵Wakwa iphe, Chipfu, bụ Chileke ndu Ízurelụ pfuru mu baa: “Okoro-a, bụ iphe, jiru iya nụ bụ mee k'oke-ẹhu-eghu mu-a; nafunu mu iya l'ẹka. Jenụ emee g'iphe, bụ ọha, mu e-zi g'i je alị phẹ ngụkota iya! ¹⁶Ẹphe -ngụe ya phọ; ẹphe awata akpọ garigari; wata eme ọbvụ ọbvụ; kele mu a-chịru ndu ogu-echi ye g'ẹphe buru phẹ ọgu.”

¹⁷Tọbudu iya bụ; mu bya anata Chipfu okoro ono; bya ejee ọhamoha, bụ ẹka o ziru mu je emee; ẹphe ngụkota iya; ¹⁸mbụ Jierúsalemụ; waa mkpụkpu, nọgbaa l'alị ndu Jiuda; waa ndu eze phe; waa ndu-ishi l'alị-eze iya; g'e mekọta iya g'ọ buru ochobu; yẹle iphe, anyị ishi ẹdzu; waa iphe, e-gude achị ọchi; mẹ iphe, e-gude ephu l'iphu, bụ g'ọ dụ ntanụ-a; ¹⁹waa Fero, bụ eze ndu Ijiputu; waa ndu-ozu iya; waa ndu-ishi l'alị-eze iya; waa ndu nkiya g'ẹphe ha; ²⁰waa iphe, bụ ndu ọhozo, bu l'alị Ijiputu; waa iphe, bụ eze ndu ndu Uzu; waa iphe, bụ eze ndu ndu Filisitayinu; mbụ eze, ndu mkpụkpu Ashikelonu; yẹle eze ndu mkpụkpu Gaza; waa eze ndu mkpụkpu Ẹkuronu; yẹle nwa ndu phọduru lẹ mkpụkpu Ashidodu; ²¹waa ndu Edomu; waa ndu Mówabu; waa ndu Amonu; ²²waa iphe, bụ ndu eze ndu Taya; waa iphe, bụ ndu eze ndu Sayidonu; waa iphe, bụ eze ndu ndu bu l'azụ eze-enyimu azụ iya ophuu; ²³waa ndu Dedanu; waa ndu Tema; waa ndu Buzu; waa iphe, bụ ndu bugba l'ọha, dụ ọnya; ²⁴waa iphe, bụ eze ndu ndu Arabu; waa iphe, bụ ndu eze ndu ọhozo, bụ ndu bu l'echiẹgu; ²⁵waa iphe, bụ eze ndu ndu Zimiri; waa iphe, bụ eze ndu ndu Elamu; waa iphe, bụ ndu eze ndu Midiya; ²⁶waa iphe, bụ ndu eze ndu isheli; ndu bu ntse; mẹ ndu ophu bu ọnya; mbụ ndu ono g'ẹphe hakpọo nanunanu; mbụ-a; ọ buẹpho alị-eze, nọkota l'eliphe mgburugburu. G'ẹphe ha -ngụchaa ya; eze ndu Sheshaku angukwaa ya phọ.

²⁷“Sụ-a; waa iphe, ii-pfuru phẹ baa: Wakwa iphe, Chipfu, bụ Ọkalibe-Kakọta-Ike eepfu; mbụ Chileke kẹ ndu Ízurelụ: Unu ngua iphe-a; g'ọ tsụ unu atsutsu; unu agbọo ya; unu adaa iko; unu taa gbeshibaedu agbeshi; ọ buru iphe, a-kpa iya nụ bụ lẹ mu a-chịru ndu ogu-echi yeru unu. ²⁸Ọle teke ẹphe jikaru l'ẹphe taa natadụ ngu okoro ọbu angụ iphe, nọ iya nụ;

l'iisu phe-a: Wakwa iphe, Chipfu, bu Ọkalibe-Kakọta-Ike eepfu baa: Unu ngufutajekwa iya! ²⁹Lenu! Mu gudeakwa ejo-iphe abyapfuta mkpukpu ono, eeku eyeru epha mu ono. ?Unu arị l'unu a-la g'a ta nū unu aphụ? Unu taa alakwa g'a ta nū unu aphụ; kele mu e-ku ogu-echi oku g'ọ bya egbufu iphe, bu ndu bu le mgboko-a.” Nokwa iphe, Chipfu, bu Ọkalibe-Kakọta-Ike eepfu.

³⁰Nta-a bu le-a; tuko iphe-a,
mu pfuru ngu-a pfuaru
phe; su phe le-a:

“Chipfu a-gbekwa
l'ephekerephe gbọ
uja.

Ọo-nọdukwa l'ibe iya,
du nsọ chia mkpu;
gbọoru ndu alị nkiya uja.

Ọo-nọdu ara gbagbagba
ge ndu azoshi akpuru
vayinu.

Ọ buru ndu ọo-nọdu
araru iya bu ndu bu
l'eliphe l'ophu l'ophu.

³¹Ụtsú a-da gbaa mgboko
ophorokpo;
kele opfu daru Chipfu
yele ohamoha.

Oo-kpe nemadzụ l'ophu ikpe;
woru ndu ejo-iphe haa
g'e gude ogu-echi
gbushia.”

Nokwa iphe, Chipfu eepfu.

³²Wakwa iphe, Chipfu, bu Ọkalibe-Kakọta-Ike eepfu baa: “Lenu! Ejo-iphe asakwa galagala; o -shi l'oha owa l'osoba l'ohozo. Mbụ l'oke pherephere abyakwa ezizi. Ọ buru eka oo-shi bu l'eka igwe beru alị beru.” ³³Le teke ono be ndu Chipfu phuru teteree a-tuko dabyigbaaru l'ekameka; eshi l'ishi mgboko ishi iya-a jasụ l'ishi iya ophuu. Ọ to dudu onye a-ra ekwa phe; ophu aa-pakobedu odzu phe; ophu ee-lidu phe elili. Ọ chia l'ephe a-dujegbaa ge nshị dọru l'alị.

³⁴Unube ndu eche aturu; unu raa ekwa chia mkpu! Unu rwaphua onwunu l'urwuku; unube ndu-ishi ikpoto aturu! Noo kele teke ee-gbushi unu ruwakwaru. Unu a-da iko tukposhihu g'ite-urwa, du ree. ³⁵Ndu eche aturu te enwedu eka ephe a-gbaru laa; ophu ndu-ishi ikpoto aturu enwedu eka ephe a-gbaru laa gude nahu. ³⁶Ọ kwa olu ekwa ndu eche aturu

ada ẹgube phọ; mkpu, ẹphe echi; mbu ndu-ishi ikpoto aturu; noo kele Chipfu emebyishiwa ẹka ẹphe echeje aturu phe. ³⁷Phorokotoko ẹka ono, shi daa nyonyoronyo ono be ee-me g'ọ dabyiru ke mmanu. O buru iphe, a-kpa iya nu bu ẹhu-eghu Chipfu. ³⁸Oo-paru oğba iya haa g'oduma; ali phe aburu ochobu. O buru iphe, a-kpa iya nu bu ogu-echi ndu emekpa phe ẹhu. Ozo bu iphe, a-kpa iya nu bu oke ẹhu-eghu Chipfu.

Eeme g'e gbua Jieremaya

26 ¹O be le ge Jiehoyakimu nwa Jiosaya bahuerupho l'aba-eze ndu Jiuda k'ophuu; Chipfu bya epfua opfu su: ²“Wakwa iphe, Chipfu epfu baa: Je je apfuru l'oma-unuphu eze-ulo Chipfu je epfuru yeru iphe, bukpuo ndu bu le mkpukpu, nogbaa l'ali ndu Jiuda, bu ndu abyaje abaru Chileke ẹja l'ulo Chipfu. Pfuaru phe iphemiphe, mu suru ngu g'i pfuaru phe. Te pfuphodokwaru phe iya me nanu. ³?A maru; ?ẹphe angabe nchi. Onyenonu aghakobe haa ejo-ememe, oome. Oo ya bu; mu apalia pazeta. Mu tee meedu phe ejo-iphe, mu shi doberu phe; bu iphe, kparu iya nu bu ejo-ememe, ẹphe meshiru.

⁴“Iphe, ii-pfuru phe bu le-a: O -buru l'unu taa ngabeduru iya nchi; eme iphe, mu turu ekemu iya, bu ophu mu doberu l'iphu unu; ⁵teme o -buru l'unu taa ngadu nchi l'opfu, ndu-ozu mu, bu ndu mpfuchiru epfu, bu ndu mu ziru; ẹphe byapfuta unu; ẹphe -byachaa; ẹphe abyabaa; ophu unu angaduru nchi; ⁶be mu e-mekwa ulo-a g'o du ge Shilo; mee mkpu-kpu-a l'ooburu iphe, ee-gudeje epfu l'iphu l'ohamoha, no le mgboko mgburugburu.”

⁷No iya; ndu-uke Chileke; me ndu mpfuchiru; mekpoo ndu Izurelu l'ophu numakota ẹka Jieremaya epfu iphe ono l'ulo Chipfu. ⁸Tobudu iya bu; epfughe, Jieremaya epfugheru ndu ono g'ẹphe ha iphe, Chipfu suru g'o pfua; ndu-uke ono; me ndu mpfuchiru ono; mekpoo ndu ono g'ẹphe hakota zule iya pho gburumu gude; su iya: “I nwuhujekwa! ⁹?Denu g'o gude i gude ẹpha Chipfu epfu l'ulo-a e-mechaa du ge Shilo; teme le mkpu-kpu-a e-mechaa buru ochobu, adudu onye bu iya nu?” Tobudu iya bu; ndu ono l'ophu bya azupyabe Jieremaya l'ulo Chipfu leka ono.

¹⁰O be teke ndu-ishi l'ali ndu Jiuda numaru iphe, ada nu; ẹphe shi l'unuphu ibe eze wuhu jeshia l'ulo Chipfu. ẹphe bya eje anoduchaa l'onu-abata ophuu l'ulo Chipfu. ¹¹Tobudu iya bu; ndu-uke; yee ndu mpfuchiru ono bya asu ndu-ishi ono; yee ndu Izurelu l'ophu su phe: “Nwoke-a gbakwaru k'ekpe mpfu-gbu. Noo kele unu gudekpowa nchi unu numa iphe, o gude mpfuchiru pfua le ke mkpukpu-a!”

¹²No iya; Jieremaya bya asu ndu-ishi ono g'ẹphe ha ẹphe le ndu Izurelu g'ẹphe ha: “O kwa Chipfu yeru mu ge mu bya epfua iphe, ee-me ulo-a; waa mkpukpu-a, bu iya bu iphemiphe-a, unu numaru-a. ¹³Nta-a bu; unu dozia uzo unu; yele umere unu! Unu wata eme iphe, o pfuru; mbu Chipfu,

bù Chileke unu. Ọo ya bù gẹ Chipfu apalia pazeta. O too meędu unu ẹjo-
iphe, o shi sù l'oo-me unu. ¹⁴Ọ -bùru mbędua bẹ unu elenaa lẹ mu nọ
unu l'ẹka. Iphe, unu rịkpooru l'ọ dọ ree bya apfuru nhamunha; unu mee
mu iya. ¹⁵Ọle ọ bụ; ọo ẹpho ọphu unu a-makaharu bụ lẹ-a; unu -gbua
mu; ikpe-ochi onye adudu iphe, o meru atụ-koru unu l'ishi; tų-koru l'ishi
mkpukpu-a; yẹle ishi ndu bu iya nų. Kẹle tororo iya bụ l'ọ Chipfu yeru
mu gẹ mu byapfuta unu bya epfua iphe-a g'unu numa.”

¹⁶Noo ya bụ; ndu-ishi ono yẹe ndu Ízurelu l'ophu sù ndu-uke; ẹphe lẹ
ndu mpfuchiru ono-a: “E tee kpekwa nwoke-a mpfų-gbu! O gudeakwa
ẹpha Chipfu, bụ Chileke anyi pfua opfu nų anyi.”

¹⁷Ndu bụ ọgerenya l'alì ono haru gbęshi kpřitaru bya apfuru sù ikpoto
ndu kuru l'ẹka ono-a: ¹⁸“Mayika, bụ onye Morešetetu bẹ ziru ndu Jiuda
ozi Chipfu ziru lẹ teke Hezekaya, bụ eze ndu Jiuda. O pfuru ndu Jiuda sù
phe: Wakwa iphe, Chipfu, bụ Ọkalibe-Kakọta-Ike eepfu:

“Ee-mehaa kọo ọkoro l'úbvú Zayonu kọfu g'onye akọ opfu.

Mbų lẹ mkpukpu Jierúsalemų bẹ e-mehaa bųru ikpọzu.

Eli úbvú ono, bụ ẹka eze-ulo Chileke nọ ono

e-mehaa bųru ẹka ẹgbudu zechiru.

¹⁹Hezekaya, bụ eze Jiuda; ọzoo onye ọzo kpọ l'alì ndu Jiuda; ẹphe gbu-
ru iya-a egbugbu? Ọto bų-chidaa iphe, Hezekaya meru bụ l'ọ tsuru Chipfu
ebvu; wata achọ ọzo, ya e-shi tųba iya l'ęnya? Ọo Chipfu ọto paliduru
pazeta k'ophu bụ l'ọ to meęduru phe ẹjo-iphe, o shi sù l'oo-me phe. Ọ kwa
ẹjo-iphe bẹ anyi eme onwanyi nta-a.”

²⁰O nwekwaruro onye ọzo gudejekwaphọ ẹpha Chipfu pfua mpfuchi-
ru. Onye ono bụ Uraya nwa Shemaya. ẹka a nwuru iya bụ lẹ mkpukpu
Kiryatu-Jiarimu. O pfukwarupho iphe, Chipfu suru g'ọ pfua l'opfu ẹhu
mkpukpu-a; yẹle alì ẹka-a; ẹgube-a, Jieremaya pfuru-a. ²¹O be teke eze,
bụ Jiehoyakimu; yẹe ndu-ishi Ojogu iya; waa ndu-ishi l'alì-eze iya numa-
ru opfu iya; eze meahaa gẹ ya gbua ya. Obenu lẹ Uraya numaru iya gude
ndzų-agųgu gbalaa laa alì ndu Ijiputu. ²²Eze, bụ Jiehoyakimu zile-a ẹlu-
natanu nwa Akubo; bya ahakwarupho nemadzų yeru iya; g'ọ je alì ndu
Ijiputu. ²³ẹphe je l'ẹka ono je akputa Uraya bya akpuru iya je anų eze, bụ
Jiehoyakimu, bụ onye pfuru; e gude ogu-echi gbuta nwoke ono tųa. E wo-
ru odzu iya je etuphaa etupha l'ẹka eelije ndu ęnya lwarų.

²⁴Ọle g'ọ dųhabe; Ahikamu nwa Shafanu tųru íkẹ yeru Jieremaya. Ọ
bųru iya bụ l'a ta akpuduru iya nų ndiphe g'e gbua.

Ndu Jiuda a-la l'ẹka Nebukadineza

27 ¹O be gẹ Zedekaya nwa Jiosaya bahuru l'okwa-eze ndu Jiuda
k'òphúú; Chipfu bya epfua opfu-a nų Jieremaya. ²Wakwa iphe,
Chipfu epfu baa: “Kwee agadagba yẹe odogoro; l'ì tųko iya nyabẹ onwo-
ngu lolu. ³Li zia ndu byaru Jierúsalemų ozi g'e je ezia eze ndu Edomu;

waa eze ndu Mówabu; waa eze ndu Amonu; waa ke ndu Taya waa ke ndu Sayidonu. Le zikwaa ya pho Zedekaya bu eze ndu Jiuda. ⁴Zia phe ozi g'ephe je ezia nnajiuphu phe su phe-a: Wakwa iphe, Chipfu, bu Okalibe-Kakota-Ike eepfu; mbu Chileke ndu Izurelu. Waa iphe, unu e-zi nnajiuphu unu baa: ⁵'O kwa ike-okpu mu, paru eka; yee oshi-eka mu lochiru alochi be mu gude mee mgboko-a l'ophu; bya emee nemadzu; yele anu, bu iya nu; teme o buru onye du mu ree be mu anuje iya. ⁶Nta-a bu le-a; ali unu l'ophu be mu yekotawaru leka onye-ozu mu, bu Nebukadineza, bu eze ndu Babilonu. Mu mekwarupho ge anu, bu legbudu noduchaa mu leka. ⁷Ohamoha l'ophu a-nodu iya leka; nodu iya nwa iya; waa nwanwa iya; jasu ali-eze iya adakpohu. Noo teke ohamoha, du igwerigwe mekpoo eze ndu paru eka e-me iya ohu phe.

⁸“Teke o bu lo nweru ohamoha; ozoo ali-eze, jikaru anodu Nebukadineza leka; mbu eze ndu Babilonu; ozoo l'ephe jikaru edobe olu go nyabe phe agadagba-njigba iya; mu egude ogu-echi; yee okpa nri; yee ejo iphememe nu ndu obu aphu. Mbu mee ndu ono iphe gbiriri jasu mu egude eka Nebukadineza mebyishibebe ndu obu. Nokwa iphe, Chipfu eepfu. ⁹Oo ya bu le-a; unu ta angakwaru ndu mpfuchiru unu nchi; me ndu jibya unu; me ndibe unu, akoje iphe, nrwọ bu; me ndibe unu, ndu agba eja; me ndu karu akaka, bu ndu asuje unu l'unu taa lakwa eze ndu Babilonu leka. ¹⁰Mpfuchiru, ephe epfuru unu bu uka be ephe adzushiru unu. O buru iphe, oo-me bu g'unu haa ali unu lamihukpoo alamihu. Mu e-nwufu unu enwufu; unu eje alaa l'iswi. ¹¹Obenu l'oha -woru olu doberu eze ndu Babilonu; o nyabe phe agadagba-njigba iya; ephe nodu iya leka; be mu e-kwe haa g'ephe buru l'ali k'eka phe; ako iya opfu; buru iya eburu. Nokwa iphe, Chipfu eepfu.’”

¹²Mu wokwarupho ozi ono zia Zedekaya, bu eze ndu Jiuda. Mu su iya: “Wozekwa olu doberu eze ndu Babilonu go nyabe ngu agadagba-njigba iya; nodu iya leka; yee ndibe iya; k'ophu ii-nodu ndzu. ¹³?Denu go gude gubedua gu le ndu ali ngu l'ophu je l'a-buru ndu ee-gude ogu-echi gbushia; egu egbushia phe; yele ejo iphememe, bu iphe, Chipfu pfuru le ya e-gude gbushia oha, jikaru l'ephe taa nodudu eze ndu Babilonu leka. ¹⁴Unu ta ngakwa nchi l'opfu ndu mpfuchiru, asuje unu l'unu ta abyakwa anodu eze ndu Babilonu leka; kele o kwa uka be ephe adzuru unu le mpfuchiru ono. ¹⁵Wakwa iphe, Chipfu epfu baa: 'O to bukwa mbedua ziru phe ozi ono. O to bukwa mu be ephe epfuchiru. O kwa uka be ephe adzu. O buru iya e-me; mu enwufu unu nwuru unu jeye; unu alaa l'iswi; unubedua lonwunu; unu le ndu ono, epfuru unu mpfuchiru ono.’”

¹⁶Mu bya asu ndu-uke Chileke; ephe le ndu Jiuda l'ophu le-a: “Wakwa iphe, Chipfu epfu baa: Unu ta ngakwa nchi l'opfu ndu mpfuchiru, asuje unu lo bufukwaa nwanshi nta; laatuko ngwa ono, e gwetaru l'ulo Chileke laa ali ndu Babilonu ono gwephuta azu. O kwa uka be ephe adzu le

mpfuchiru, ephe epfuru unu. ¹⁷Unu ta ngakwaru phe nchi. Unu nodu eze ndu Babilonu l'eka g'unu anodu ndzu. ?Denu g'o gude mkpukpu-a je l'aburu ikpozu? ¹⁸O -buru l'ephe bu ndu mpfuchiru; ephe nodu anumaje olu Chipfu; g'ephe rwonaa Chipfu, bu Okalibe-Kakota-Ike ge ngwa-ulo ono, e gude dozia eze-ulo Chipfu ono, bu ophu phodukwaduru nu; yee ophu phoduru l'ibe eze ndu Jiuda; yee ophu phoduru le Jierusalemu ta abuhe iphe, ee-rwuta laa ali ndu Babilonu. ¹⁹Lē-a; wakwa iphe, Chipfu, bu Okalibe-Kakota-Ike eepfu le k'itso itso eze-ulo Chileke; waa k'iphe ono, eeyeje mini, echi ririri ono; waa k'ogba-kperekpere; waa ikpoto ngwa ozo ono, phodugbaaru le mkpukpu-a, ²⁰bu ndu ophu o gwetaduru; mbu Nebukadineza, bu eze ndu Babilonu; teke o kpuru eze ndu Jiuda, bu Jiehoyakinu nwa Jiehoyakimu le ndzu shi Jierusalemu laa ali ndu Babilonu; kpupya-bekota iya ndu a maru amaru l'ali ndu Jiuda ye le Jierusalemu. ²¹Ee! Wakwa iphe, Chipfu, bu Okalibe-Kakota-Ike eepfu; mbu Chileke ke ndu Izurelu; wakwa iphe, oopfu le k'iphe ono, e gwephodoru l'ulo Chipfu ono; yee ophu phoduru l'ibe eze ndu Jiuda; yee ophu phoduru le Jierusalemu: ²²'G'ephe ha be ee-gwetachakwa laa ali ndu Babilonu. O buru l'eka ono be oo-nodu gbiriri jasu mboku, mu a-choru iya bya. Noo teke mu a-chi-phuta iya azu bya edophukwa azu l'eka-a.' ” Nokwa iphe, Chipfu eepfu.

Onye adzufe uka le mpfuchiru, bu Hananiya

28 ¹O buru l'apha ono kwapho; ge Zedekaya bahuru l'aba-eze ndu Jiuda k'ophuu; l'onwa k'ise l'ime apha k'eno; be onye mpfuchiru, bu Hananaya nwa Azuru, bu onye shi mkpukpu Gibiyonu; no l'ulo Chipfu l'iphu ndu-uke Chileke; me l'iphu oha l'ophu su mu-a: ²“Wakwa iphe, Chipfu, bu Okalibe-Kakota-Ike eepfu; mbu Chileke ndu Izurelu: Mu a-nyakashi agadagba-njigba ono, eze ndu Babilonu nyaberu unu ono. ³Lime apha labo be mu a-chi-phutakota iphe, bukpo ngwa ulo Chipfu ono azu l'eka-a; mbu ngwa ono, eze ndu Babilonu, bu Nebukadineza chitaru l'eka-a lashia ali ndu Babilonu. ⁴Ndu mu a-chi-phutakwapho azu l'eka-a bu Jiehoyakinu nwa Jiehoyakimu, bu eze ndu Jiuda; mekpoo iphe, bukota ndu a kpuru le ndzu l'ali ndu Jiuda, bu ndu laru ali ndu Babilonu; noo ke le mu a-nyakwa agadagba-njigba ono, eze ndu Babilonu nyaberu unu ono. Nokwa iphe, Chipfu eepfu.”

⁵Tobudu iya bu; onye mpfuchiru, bu Jieremaya bya eyee onu su onye mpfuchiru ono, bu Hananaya-a l'iphu ndu-uke; ye le l'iphu iphe, bukpo ndu pfuru l'ulo Chipfu; ⁶su iya: “G'o dukwa nno! Ge Chipfu mekwaa ya nno! Ge Chipfu mekwaa iphe ono, i pfuru le mpfuchiru ono; g'o chi-phutakwa ngwa ulo Chipfu azu; yee ndu a kpuru le ndzu; g'o shikwa l'ali ndu Babilonu tuko phe chi-phuta azu l'eka-a! ⁷O le g'o duhabe; ngabekwa nchi numa iphe, mu abya epfu ye ngu le nchi; ye le nchi ndu-a l'ophu. ⁸Ndu mpfuchiru, vu mu uzo; bya evuru ngu uzo; mbu ndiche; buepho iphe,

ɛphe epfuje lɛ mpfuchiru nɛ ɔha, dɛ igwerigwe; yɛɛ alɛ-eze, parɛ ɛka; bɛ l'ogu a-dɛ; yɛɛ ɔkpa-nri; waa ejo iphe-ememe. ⁹Obenu l'onye mpfuchiru, epfu opfu lɛ nchi a-dɛ doo buɛpho teke iphe, o pfuru meru g'o pfuru iya bɛ ee-kweje lɛ Chipfu ziru iya eviya.”

¹⁰Tɔbudu iya bɛ; onye mpfuchiru ono, bɛ Hananaya bya anyafɛ Jieremaya, onye mpfuchiru agadagba-njigba ono, ɔ nya ono bya eworu iya nyajia. ¹¹Hananaya bya apfuru l'iphu ɔha l'opfu sɛ: “Wakwa iphe, Chipfu epfu baa: ɔ kwa egube-a bɛ gɛ ya a-gbajifu agadagba-njigba kɛ Nebukadineza, bɛ eze ndu Babilonu l'olu ɔhamoha l'ime apha labɔ.” O pfuepho nno; Jieremaya tɛgbua.

¹²A nɔkwapho nwanshi g'onye mpfuchiru, bɛ Hananaya gbajifucharu agadagba-njigba ono, nɔ l'olu onye mpfuchiru, bɛ Jieremaya ono; Jieremaya ɔbu nɛma olu-Opfu Chipfu, sɛru iya: ¹³“Je je akaru Hananaya sɛ iya lɛ-a: Wakwa iphe, Chipfu epfu: Iphe, i gbajifuru bukwa agadagba-njigba ɔphu e meru l'oshi; ɔle iphe, mu e-gude dochia ya bɛ agadagba-njigba ɔphu e meru l'igwɛ. ¹⁴Wakwa iphe, oopfɛ; mbɛ Chipfu, bɛ Okalibe-Kakota-Ike; mbɛ Chileke kɛ ndu Izurelu: Mu e-woru agadagba-njigba ɔphu e meru l'igwɛ nyabɛ l'olu ɔhamoha-a l'opfu gude mee phɛ g'ɔ buru Nebukadineza, bɛ eze ndu Babilonu bɛ ɛphe a-nɔdu l'ɛka. Mbɛ lɛ mu e-me iya g'ɔ nɔdu elekotachaa mɛ anɛ, bu l'ɛgbudu.”

¹⁵Tɔbudu iya bɛ; onye mpfuchiru, bɛ Jieremaya sɛ Hananaya, bɛ onye mpfuchiru-a: “Ngabɛkpodapho nchi; Hananaya! ɔ tɔ bukwa Chipfu ziru ngu g'i bya; obenu l'i mewaru ndu-a; ɛphe je adakobe iphe, abɛdu eviya. ¹⁶ɔo ya bɛ lɛ-a; wakwa iphe, Chipfu epfu baa: ‘Mu abyakwa ngu ewofu l'eli mgboko-a. Apha-a gɛdegede bɛ i-nwɛhu; kɛle i pfuwaru opfu, eme g'e kwefuru Chipfu ike.’”

¹⁷O -rwuepho l'onwa k'ɛsaa l'apha ono kwaphɔ; Hananaya, bɛ onye mpfuchiru nwɛhu.

ɛkwo-ozɛ, e deru nɛ ndu a kpuru lɛ ndzɛ

29 ¹ɔwaa bɛ iphe, e deru l'ɛkwo-ozɛ, Jieremaya gbɛ lɛ Jierusalemu dee nɛ g'a nɛ ndu bɛ ɔgerenya l'ime ndu ɔphu nɔ ndzɛ l'ime ndu ono, a kpuru lɛ ndzɛ ono; l'a nɛ iya ndu bɛ uke; mɛ ndu bɛ ndu mpfuchiru; mɛ iphe, bukpo ndu ono, Nebukadineza kpuru lɛ ndzɛ shi lɛ Jierusalemu laa alɛ ndu Babilonu ono. ²Teke ono bɛ a kpukwanaru eze, bɛ Jiehoyakinu lɛ ndzɛ; yɛɛ ne iya, bɛ eze-nwanyɛ; mɛ ndu eleta ibe eze ɛnya; mɛkpoo ndu-ishi ndu Jiuda yɛɛ ndu Jierusalemu l'opfu; mɛ ndu eme ɔna; mɛ ndu akpɛ ɛzu; bɛ a kpukotawaru lɛ ndzɛ kpuru lufu lɛ Jierusalemu. ³Onye ɔ nuru ɛkwo-ozɛ ɔbu bɛ Eleyasa nwa Shafanu; yɛɛ Gemaraya nwa Hilikaya, bɛ ndu Zedekaya, bɛ eze ndu Jiuda ziru ozɛ g'e je zia eze, bɛ Nebukadineza l'alɛ ndu Babilonu. ɛkwo-ozɛ, Jieremaya deru ɔbu sɛru:

4“Wakwa iphe, Chipfu epfu baa; mbụ Ọkalibe-Kakọta-Ike; Chileke kẹ ndu Ízùrẹlu. Ndu oopfụ iya anụ bụ ndu ono, a kpuru lẹ ndzụ ono g'ephe ha; mbụ ndu ono, mu meru; e shi lẹ Jierúsalemụ kpuru phẹ laa Bábilonu ono: 5Unu kpushikwaa ọlo buru; unu akọo opfu ria iphe, o metaru. 6Unu lụshikwaa nwanị n wushia ụnwegirima; unu achotaru unwu unu nwoke nwanị alulu; unu ekee unwu unu nwanị ji; k'ophu ephebedua l'e-nwekwarupho unwegirima. Unu nọdukwa l'ẹka ono ka adụ igwerigwe; unu taa nọdukwa aka alwa alị. 7Ozo bụ lẹ-a; unu chojekwa iphe, e-me gẹ nchị dū doo lẹ mkpukpu ono, bụ ẹka a kpuru unu lẹ ndzụ laa ono. Unu pfujeru nụ Chipfu l'iswi ẹhu ndu ono; kele nchị -dụ phẹ doo; l'ọ dukwapho unu. 8Kele-a; wakwa iphe, Chipfu, bụ Ọkalibe-Kakọta-Ike eepfu; mbụ Chileke ndu Ízùrẹlu: Unu te ekwekwa gẹ ndu mpfuchiru unu; mẹ ndu agbaru unu eja; duru unu ghaa ụzo. Unu ta angajekwaru phẹ nchị lẹ nrwo, unu meru phẹ; ephe nọdu arwo. 9O kwa ụka bẹ ephe adzuru unu sụ l'ephe gude ẹpha mu epfu mpfuchiru. O tọ bukwa mu yeru phẹ. Nokwa iphe, Chipfu eepfu.”

10Wakwa iphe, Chipfu epfu baa: “A -nọephe ụkporo apha ẹto l'apha iri lẹ Bábilonu bẹ mu a-byapfuta unu bya emeeru unu iphe ono, dū ree ono, mu kweru ukwe iya ono; mbụ lẹ mu a-bya eduphuta unu azụ l'alị ẹka-a. 11Kele mu maru ọriri, mu arị l'ẹhu unu. Nokwa iphe, Chipfu eepfu. Mu arị k'eme g'ẹhu dū unu guu; ọ tọ bukwa g'ọ duru unu lẹ njo. Gẹ mu mee g'uzo iphu duru unu lẹ ree; unu enweru iphe, unu a-nọdu ele ẹnya iya. 12Teke ono bẹ unu a-rakuje mu; unu abyapfuta mu; bya epfuru nū mu; mu angaberu unu nchị. 13Teme unu achọo mu; chọta mu; mẹ ọ -buru l'unu gude obu unu l'ophu achọ mu. 14Teke ono bẹ unu a-chọ mu chọta; nokwa iphe, Chipfu epfu. Mu emee unu; unu taa bueduru ndu a kpuru lẹ ndzụ. Mbụ lẹ mu e-jeepho l'iphe, bukpo ohamoha; mekpoo ekameka ono, mu chiru unu laa ono je achị-phuta unu azụ l'ẹka ono, mu meru; a kpa unu lẹ ndzụ ono. Nokwa iphe, Chipfu eepfu.”

15Unu a-sukwaro: “Chipfu yeanaru anyi ndu mpfuchiru lẹ Bábilonu.” 16Obenu lẹ-a; wakwa iphe, Chipfu epfu baa l'opfu ẹhu onye eze ono, nọ l'aba-eze Dévidi ono; yele opfu ẹhu iphe, bukpo ndu phoduru lẹ mkpukpu-a; mbụ unwunna unu, bụ ndu ophu a kpukobeduru unu l'ephe lẹ ndzụ. 17Ee! Wakwa iphe, Chipfu bụ Ọkalibe-Kakọta-Ike eepfu baa: “Iphe, mu e-ye bukwa ogu-echi; yee okpa-nri yee ejo iphe-ememe g'ọ buru phẹ ogu. Mu emee phẹ; ephe adụ g'ejo akpuru oshi figu, duta-beru eji k'ophu bụ l'e tee ridu iya eriri. 18Mu e-gude ogu-echi; yee okpa-nri; yee ejo iphe-ememe achị phẹ oso. Mu emee phẹ; ephe aburu iphe, alị-eze nọgbaa lẹ mgboko-a a-nọdu aso oyi; mbụ ephe aburu iphe, e gude atụ onu; yee iphe, anyị ishi ẹdzu; waa iphe e gude achị ọchi; yee iphe, e gude ephu l'iphu l'ẹka ohamoha nọ, bụ ẹka mu chiru phẹ jeye. 19Noo kele ephe ta ngabeduru nchị l'opfu mu; ọ kwa Chipfu epfu iya; mbụ opfu, mu pfuru mpfuto

nụ phẹ; ọ buru ndu mu ziru iya bụ ndu-ozu mu bụ ndu mpfuchiru. Ophu unubedua, a kpuru lẹ ndzụ-a angakwarupho nchị. Nokwa iphe, Chipfu eepfu.”²⁰ Ọo ya bụ lẹ-a; unu nūmakwa Opfu Chipfu g'unu ha buru ndu a kpuru lẹ ndzụ; bụ ndu mu chitaru lẹ Jierúsalemụ chilaa Bábilonu.

²¹Wakwa iphe, Chipfu epfu baa; mbụ Ọkalibe-Kakọta-Ike, bụ Chileke kẹ ndu Ízurelu; wakwa iphe, oopfu l'opfu-ẹhu Éhabu nwa Kolaya; yee opfu-ẹhu Zedekaya nwa Maseya, bụ ndu gude ẹpha mu adzuru unu ụka lẹ mpfuchiru: “Mu e-woru phẹ ye l'ẹka Nebukadineza, bụ eze ndu Bábilonu; l'o woru phẹ gbushia l'atatiphu unu ẹka unu ele ẹnya. ²²Ọo phẹ a-kpa iphe, ndu Jiuda ono, a kpuru lẹ ndzụ ono g'ẹphe ha, bụ ndu nọ l'alí ndu Bábilonu a-wata ephu l'iphu su: ‘Gẹ Chipfu mekwaa ngu iphe, o meru Zedekaya; yee Éhabu, bụ ndu eze ndu Bábilonu huru l'ọku.’ ²³Noo kẹle ẹphe mewaru iphe-eswe l'echilabọ ndu Ízurelu. Ẹphe l'unyomu obutobu phẹ riwaru ogori; teme ẹphe gudewaa ẹpha mu dzua ụka, buchaa iphe, mu asuduru phẹ g'ẹphe mee. Iphemiphe ono bẹ mu makotaru; teme mu buru onye-ekebe iya.” Nokwa iphe, Chipfu eepfu.

Ozi, e ziru Shemaya

²⁴“Karụ Shemaya, bụ onye Nehelamu: ²⁵Wakwa iphe, Chipfu epfu; mbụ Ọkalibe-Kakọta-Ike; bya aburu Chileke ndu Ízurelu: I gude ẹpha ngu dee ẹkwo-ozu wolaaru iphe, bukpo ndu nọ lẹ Jierúsalemụ; bya anụ iya Zefanaya nwa Maseya, bụ onye uke; mekpoo iphe, bukota ndu-uke ndu ophuu g'ẹphe ha. I sụru Zefanaya-a: ²⁶‘Chipfu meakwaru ngu onye uke g'ị nọdu l'ọkwa Jiehoyada; g'ị nọdu eleta ụlo Chipfu ẹnya. O -nweru onye ọbvụ eme, kuru onwiya onye mpfuchiru; chiru iya ọkpa ye lẹ mkporo; nwua ya olu lẹ mgborígwè. ²⁷?Bụ gunu kparụ iphe, ị tí gboduru Jieremaya onye Anatotu ụja, bụ onye epfuru unu mpfuchiru? ²⁸Wakwa ozi, o ziru anyi lẹ Bábilonu baa: “Iphe ọbu a-nọkwa ọdu. Ọo ya bụ lẹ-a; unu kpushikwaa ụlo buru; unu akoo opfu ria iphe, o metaru.” ’ ”

²⁹Ọ buru iya bụ l'onye uke ono, bụ Zefanaya abya eworu ẹkwo-ozu ọaru Jieremaya, bụ onye mpfuchiru. ³⁰No iya; olu-Opfu Chipfu rwua Jieremaya nchị sụ: ³¹“Woru ozi-a zia g'o rwua lẹ nchị iphe, bụ ndu ono, a kpuru lẹ ndzụ ono g'ẹphe ha: Wakwa iphe, Chipfu epfu l'opfu ẹhu Shemaya, bụ onye Nehelamu: Eshinu Shemaya epfuru unu iphe ọ sụru lẹ mu pfuru; l'ẹbe abụ l'ọo mu ziru iya ya; be o mewaru; unu je adakobe iphe, abudu eviya. ³²Wakwa iphe, Chipfu epfu baa: Shemaya, bụ onye Nehelamu bẹ mu a-nụ aphụ; yele awa iya l'ophu; k'ophu bụ l'ọ tọ dukwa onye o nweru a-phodukwadu nụ l'echilabọ ndu-a; ophu ọo-humadu iphe-oma ono, mu e-mechaa meeru ndu ndibe ono; noo kẹle o pfuwaru iphe, e gude kwefuru mu ike.” Nokwa iphe, Chipfu eepfu.

Chileke ekwe ukwe alwalwa ndu Ízurelu

30 ¹Wakwa opfu, shi l'onu Chipfu rwua Jieremaya nchị. ²“Wakwa iphe, oopfu; mbụ Chipfu, bụ Chileke kẹ ndu Ízurelu: Tuko opfu-a,

mu pfuru nū ngu-a dekoṭa l'ekwo. ³Kele-a: wakwa iphe, Chipfu epfu baa: mboku abyakwa; teke mu e-je l'eka a kpuru ndibe mu le ndzu laa; mbu ndibe mu bu ndu Izurelu ephe le ndu Jiuda; je eduphuta phe azu; bya edophu phe azu l'ali ono, mu nuru nna phe oche go buru nkephe ono. Nokwa iphe, Chipfu eepfu.”

⁴Wakwa opfu, Chipfu pfuru pfudoru ndu Izurelu ephe le ndu Jiuda.

⁵“Wakwa iphe, Chipfu epfu
baa:

Anyi anukwa mkpu,
ephe echi;
mbu ndu ndzu agu.
Mbu l'oo n-yemebvu du;
o to budu nchi-adu-doo.

⁶Jinaa aji huma; nwoke
?o tsuje ime nwa?
?Denukwanu go gude mu
humagba unwoke l'ehu
l'ehu g'ephe chigbaaru
eka kwee l'epho ge nwanyi,
ime eme;
onyenonu wocharu iphu
gbanwube onwu onwu?

⁷Tuswekwa! Mboku ono
a-dukwa ejo eji;
k'ophu bu lo to duedu
eswe a-dubaa eji g'oo ya.
Teke ono be oshilokpa
Jiekopu e-je iphe-ehuka;
obenu lee-mechaa
dzota iya l'ime iya.

⁸“Wakwa iphe, oopfu; mbu Chipfu, bu Okalibe-Kakota-Ike: O -rwua mboku ono be mu a-nyakwo agadagba-njigba ono, no phe l'olu ono; mu abya atoshia phe egbu, e keru phe; ophu ndu ohozo emebaedu phe ohu phe. ⁹Ephe a-nodu ejeru Chipfu, bu Chileke phe ozi; yee Devidi ono, bu eze phe ono, bu onye mu e-me go futaru phe.

¹⁰“Ge ndzu ba agukwa ngu;
gube Jiekopu, bu onye-ozu mu!
Nokwa iphe, Chipfu eepfu.

G'e be yekwa ngu ebvu;
gube Izurelu;
kele-a; lekwa le-a;
mu e-shikwa l'eka du

- ɛnya dzọta ngu.
 Mu adzọta ụnwu ngu l'ali
 ẹka a kpuru phe ị
 ndzụ laa.
 Noo teke Jiékpọ a-lwa azu
 bya anọdu l'ẹhu-guu.
 Teme ọ tọ duedu iphe,
 byaru emebaa ya nụ;
 ọphu ọ dudu onye
 byaru emebaa ya g'ọ
 buru onye ndzụ agu.
- 11 Wakwa iphe, Chipfu epfu baa:
 Mu nọkwa swiru ngu eswiru;
 mu a-dzọ ngu!
 A makwaru-a ị mu tukuru
 ọhamoha emebyishibẹbe,
 bu ndu mu shi woru
 ngu ghakaa l'ime phe.
 Obenu ị mu tee
 mebyishibẹbedu ngu
 gberegedege.
 Mu a-hụ ngu ahùhù l'ụzo,
 pfuru nhamunha.
 Ọphu mu ahakwanu ngu
 phuruphuru ge mu
 ta anu ngu aphụ l'ophu
 l'ophu."
- 12 Wakwa iphe, Chipfu epfu
 baa:
 Onwo, aba ngu nụ bẹ e tee
 metakwa emeta.
 Ọphu iphe, e mekaru ngu
 akpohudu akpohu.
- 13 Ọ tọ dudu onye a-gbaru
 ngu ọdzori.
 Ọphu ọ dudu iphe ọzo,
 ee-mebaa l'ọnyá obu,
 aba ngu nụ obu.
 Ọphu ịi-kaedu mma akaka.
- 14 Iphe, bukpo ndu gu
 l'epheshi eshi ọnyà
 zohakotawaru ngu.

- Ephe ta akpaedu ngu ishi
 ililekpoo.
 Mu tsuwaru ngu iphe,
 onye ohogu etsuje
 ohogu iya.
 Mu bya echia ngu iphe,
 onye duru nemadzu
 ehuka echije iya.
 O buru iphe, kparu iya
 nu bu l'i menukaru
 ejo-iphe.
 Teme iphe-eji, i meshiru
 paa igwerigwe.
 15 ?Denu g'o gude i nodu ara
 ekwa iphe, mekaru ngu nu;
 mbu iphe, eme ngu ehuka,
 bu iphe,
 taa kpohudu akpohu?
 O kwa l'i metanukaru
 iphe-uta; teme iphe-eji,
 i meshiru paa igwerigwe;
 meru g'o gude mu mee
 ngu iphemiphe ono.
 16 Obenu l'iphe, bukpo
 ndu eripya ngu be
 ee-ripyakwa.
 Iphe, bukpo ndu ohogu
 ngu be aa-kpu le ndzu.
 Ndu kwaru iphe ngu
 l'okwata be
 aa-kwakwapho okwata.
 Ndu keru iphe ngu l'ogu
 be ee-kekwaphe iphe
 phe l'ogu.
 17 Obenu le mu e-me g'ehu du
 ngu ike;
 mee g'onya, du ngu l'ehu
 kpohu.
 Nokwa iphe, Chipfu eepfu.
 O buru iphe, kparu iya
 nu bu l'e kuru ngu
 onye a chifuru achifu;

Zayonu, aduedu onye
akpa ishi iya.

18 “Wakwa iphe, Chipfu epfu
baa:

Onu-ulo Jiékpú ono,
e shi kpua lẹ ndzu ono
bẹ mu e-dophu azu l'onodu
iya.

Mu aphuaru ẹka ẹphe bu
obu-imemini.

Mkpukpu ono bẹ aa-kpu-phu
azu l'eli ọzu iya ono.

Ibe eze ono abyakwa
anọ-chia l'eka o gbaru
g'ọ nọdu.

19 Ẹphe awata agu ebvu-ekele;
atu uzu ẹhu-utso.

Mu emee g'ẹphe kabaa igwe;
ophu ẹphe abyadu alwa
ali ali.

Mu e-me g'ẹphe buru ndu
aakwabe ubvu;
ophu ẹnya abyadu alwa phe.

20 Unwu phe bu g'ẹphe shi
du teke ndiche bu
g'ẹphe a-du.

Teme edzudzu-oha aburu
iphe, nguchaaru
anguru l'iphu mu.

Mu anua ndu eme phe ewere
aphu.

21 Onye eze phe a-buru onye
lanu l'ime ndibe phe.

Onye a-buru onye-ishi phe
aburu l'echilabo phe bẹ
oo-shi.

Mu a-kpuritaru iya;
l'obyia anodu mu ntse;
kele-a: ?bu onye suru
g'oo-dobe onwiya iche
bya bya anodu mu l'iphu?

O kwa Chipfu epfu iya.

22 Oo ya bu l'unu a-buru ndibe
mu;
mu aburu Chileke unu.”

23 Lekwa! Chipfu gudeakwa ehu-eghu ezi oke-pherephere; mbu ejo oke pherephere. O buru l'ishi ndu ejo-iphe be ophu temutemu; 24 ophu ehu eghubuhukwa Chipfu eghu gbiriri jasu l'o meebekota iphe, du iya l'okpo-ma k'ememe. Mboku abya-a l'uzo iphu teke iphe-a l'e-dokota unu enya ree.

Alwalwa ndu Izurelu

31 1 Wakwa iphe, Chipfu epfu baa: “O -rwua le teke ono; be mu a-buru Chileke k'ipfu l'ipfu ndu Izurelu l'ophu; epe aburu ndibe mu.” 2 Wakwa iphe, Chipfu epfu baa: “Ndu ono, ogu-echi gbuphodoru ono be e meru eze-iphe-oma teke epe no l'echiegu; mbu Izurelu; teke o shi achọ eka oo-nodu tuta unme 3 be Chipfu shi l'eka du enya mee g'ọ huma iya. Mu yeru ngu obu yee ngu iya k'ojeje. Mu gude n-yemobu mu kpuritaru ngu. 4 Mu a-kpu-phukwa ngu pho azu; li buru onye a kpuphuru azu; gube nwamgboko mu yee nwoke akwajeduru ono, bu gube Izurelu. Li wota nkwa ngu je etsoru ndu ehu atso wata ete ebvu. 5 Ii-wata ako opfu-vayinu l'eli ubvu ubvu Sameriya ozobaa. Ndu ako opfu a-ko iya; ria iphe, epe koru iya; 6 kele e -mechaa; l'o duru mboku, ndu eche nche a-nonya; epe echiaha mkpu l'ali ubvu ubvu ndu Ifuremu su: ‘Unu bya g'anyi je l'ubvu Zayonu; jepfu Chipfu, bu Chileke anyi!’ ”

7 Wakwa iphe, Chipfu epfu baa:

Unu ga ebvu ehu-utso nu
Jiekopu!

Unu ta uzu ehu-utso nu
onye-ishi ohamoha!

Unu raa ya arara; kwaa ya
levu su:

Jiko Chipfu; dzonaa ndu
nkengu;
mbu nwa ndu Izurelu ndu
ophu phoduru nu!

8 Lekwa; mu e-shi l'ali ndu
isheli chi-phuta phe
azu.

Mu e-jerwuchaa eka igwe
beru ali beru je
erwukoo phe.

Mu a-chitachaa me ndu atsū
ishi; me ndu eniyeni;

mẹ ndu dụ ime;
 mẹ ndu ọphu ime emewaa
 ememe.

Ọ buẹpho l'ikpoto ndu a-lwa
 nụ a-pa ẹka.

⁹ Ẹphe a-nọdu ara ẹkwa abya.
 Mbụ l'ẹphe a-nọdu arwọ mu
 arwọrwo;
 mu edu pẹ alwa.

Mu e-du pẹ dughaa nggele
 nggele;
 dua pẹ shia ọzo,
 dụ baswaa k'ọphu ọpfu
 ata akpọdu pẹ l'ọkpa.

Ọ buru iphe, kparu iya nụ bu
 lẹ mu bu nna Ízurelu;
 tẹme Ifuremu buru ọkpara
 mu.

¹⁰ “Unu nọmakwa Opfu Chipfu;
 unubẹ ọhamoha!

Unu araa ya arara gẹ ndu
 bukube eze-ẹnyimu
 l'ẹka dụ ẹnya nọma!

Lonye ono, chikashiru
 ndu Ízurelu ono
 a-chikobekwa pẹ phọ
 ọzo.

Looche unwu aturu iya
 ọbu nche g'onye eche
 aturu;

¹¹ kẹle Chipfu gbafutawaru
 Jiékọpu pfa aswa ishi iya
 l'ẹka ndu ka pẹ ọkpehu.

¹² Ẹphe a-bya bya atua ọzu
 ẹhu-utso l'úbvú Zayonu.
 Ẹphe eteru ẹswa kpua iphe,
 dụ ree, Chipfu doberu;
 mbụ ereshi-o; mẹ mẹe-o;
 mẹkpoo manụ;
 mẹ unwu aturu mẹ egbu;
 mẹkpoo ikpoto eswi.

Ẹphe a-dụ g'opfu,

- a kọru agba iya mini ree;
 ọphu ẹphe a-ṣodubaedu
 ọphu-ọphu.
- 13 Teke ono bẹ ẹnwumgboko
 a-wata ete ebvu;
 ẹhu atso phe;
 mẹ ẹnwokorobyia;
 mẹ ndu bu ọgerenya
 kwapho.
- Noo teke mu e-me g'aphu,
 ẹphe shi agụ buru phe
 ẹhu-utso.
- Mu a-dụ phe obu;
 mu agbanwee aphu,
 tsoru phe nẹ g'ọ buru phe
 ẹhu-utso.
- 14 Ndu uke bẹ mu a-nukpo iphe,
 du ree nua k'etsutsu iya.
 Teme iphe, du ree,
 mu doberu bẹ e-jikpo
 ndu nkiya ẹpho.”
- Nokwa iphe, Chipfu eepfu.

**Chipfu a-phuru ndu
 nkiya obu-imemini**

- 15 Wakwa iphe, Chipfu eepfu
 baa:
 “A numaru uzu-ekwa le
 mkpukpu Rama;
 mbu ekwa anwuhu mẹ oke
 nggumaphu.
 O buru Rechielu l'ara ekwa
 unwu iya;
 ọphu o kwedu g'e gbobuta
 iya egbobuta;
 opfu l'unwu iya bvuberu.”
- 16 Wakwa iphe, Chipfu eepfu baa:
 “Gberuma! Ba rahe ekwa!
 Huchaa enya-mini, no ngu
 l'anya;
 kele ee-mechaa bua ngu
 nggo ozi ngu;

mbù l'èphe e-shi l'alì ndu
 òhogu lwa.

Ò kwa Chipfu epfu iya.

17 Òo ya bù lè-a; unu lee ẹnya
 l'ìphu a-dùru unu ree.

Ụnwu unu l'a-lwa l'alì phe.”
 Nokwa iphe, Chipfu eepfu
 bù ono.

18 Ude, Ifuremu atsu bẹ mu
 nùmawaru; l'ò sùru:

Ì hùwaru mu ahùhù g'onye
 ahù nweswi,
 ekwedu g'a gòta iya.

A hùkwanaa mu hùta.

Dophunu mu azu gẹ mu
 alwaphuta azu;
 noo kẹle ọo ngu bù Chipfu
 bya aburu Chileke mu.

19 Mu kpaphuhucharu;
 izimanu bya alwaphuta
 mu azu.

Ọnodu, mu nọ doẹ mu phọ
 ẹnya.

Mu phuru yoo; chìru ẹka ye
 l'ìphu ụtapfu.

Iphere bya egude mu;
 mu bya aburu onye
 ẹnya lwaru;
 kẹle ọo iphe, mu meru
 teke mu bù okoro bya
 bẹ byaru eteahaa mu
 ntù l'ìphu nta-a.

20 “Sù-a; Ifuremu ?tò bụdu nwa,
 mu yeru obu;
 mbù nwa, tũbaru mu
 l'ẹnya?

A makwaru-a lẹ mu ahajeru
 epfuru iya;
 obenu lẹ mu anyatajẹle
 iya-a.

Òo ya bù lè-a; oghoroko iya
 dù mu shii;

mbụ lẹ mu aphuru iya
 obu-imemini,
 parụ ẹka.
 Nokwa iphe, Chipfu eepfu
 bụ ono.
 21 Meshia ọhubama dobegbaa
 l'oji!
 Lị kọshia obvudu obvudu
 dobegbaa!
 Lị lerwetakwa oji,
 a turu mkpoli ọnya,
 bụ oji, iishi!
 Lwadupho azu;
 gube nwamgboko mu,
 bụ Ízurelu!
 Lwadupho azu lẹ mkpukpu
 ngu ono g'ọ ha!
 22 ?Ii-ghaphekpo egube ono
 jasụ teke ole;
 gube nwada ono,
 eegudedu
 ire iya ẹka ono?
 Chipfu mewaru iphe ọphúú
 lẹ mgboko-a;
 mbụ lẹ nwanyị a-wata
 eleta nwoke ọnya.”

Iphe e-mechaa duru ndibe Chileke lẹ ree

23 Wakwa iphe, Chipfu, bụ Ọkalibe-Kakota-Ike eepfu baa; mbụ Chileke ndu Ízurelu: “Ọ sọru-a: Mu -shiepho l'ẹka a kpuru phe lẹ ndzụ duphuta phe azu; bẹ ndu nọ l'alị Jiuda; yee mkpukpu lẹ mkpukpu iya a-wata epfu opfu-a ọzo sụ:

“Gẹ Chipfu kebe ngu l'oma;
 gube ibe onye ono,
 pfuberekoto ono;
 gube úbvú, dụ nsọ!

24 Ndu Jiuda mę mkpukpu lẹ mkpukpu, nokota iya nụ l'a-tuko bukọtaru l'ẹka ono; ndu akọ opfu eburu iya; ephe lẹ ndu aghaphe aghaphe; ephe l'eghu mę aturu phe. 25 Kẹle onye ike bvuru bẹ ee-me-a g'epho ji; mu emee iphe, bukpo onye rwuhuru arwuhu g'ọ rokota ike.” 26 Mu jeberu nno bya etehu; bya awata achika ọnya. Mgbenya mu obu nọdu atso mu ntumatu.

²⁷Wakwa iphe, Chipfu epfu baa: Lekwa; mbọku abyakwa-a; teke mu e-woru mebyi-iphe, bu nemadzụ yẹ anụ woru ghakaa l'alị Ízurẹlu yẹle alị Jiuda. ²⁸Oo gẹ mu eche phẹ nche; e pheshia phẹ; nwukpọshia phẹ; e me-kpee phẹ; mebyishia phẹ; ephe laa l'iswi; nokwaphọ gẹ mu a-nọdu eche phẹ nche; aa-kpukwa phẹ; dzaphu phẹ azụ. Nokwa iphe, Chipfu eepfu.

²⁹O -rwua mbọku ono bẹ a taa sụbaedu:

Nna anyi phẹ bukwa akpuru

vayinu,

achaduru achacha bẹ

ephe riru.

O nọdu akpọ unwu phẹ

eze ihuku.

³⁰O bu-chia iphe, e-me nụ bu l'onnyemonye a-la lejo-iphe, o metaru. Onye riwaruro akpuru vayinu, achaduru achacha; eze akpowa iya rọ ihuku.

³¹Wakwa iphe, Chipfu epfu baa: Mbọku abyakwa teke mu lẹ ndu Ízurẹlu; waa ndu Jiuda a-gba ndzụ ọphúú. ³²Ono taa duedu g'ogbandzu ophu mu lẹ nna phẹ oche gbaru; teke ono, mu gude ẹka seta phẹ dufuta phẹ l'alị ndu Ijiputu; noo kele ephe mebyiru ogbandzu mu; l'ẹka bukwa mbedua bu ji, alụ phẹ nụ. Nokwa iphe, Chipfu eepfu. ³³Wakwa iphe, Chipfu epfu baa: Wakwa ụdu ogbandzu ophu mu l'ọnu-ulo Ízurẹlu a-gba: mẹ e -mechaepho teke ono. Ekemu mu bẹ mu e-woru ye phẹ l'egomunggo. O buru l'ime okpoma phẹ bẹ mu e-de iya edede. Mu a-buru Chileke phẹ; ephebedua aburu ndibe mu. ³⁴Nemadzụ tee ziedu nwibe iya iphe ozobaa; ophu nemadzụ ziedu nwune iya iphe kẹ gaasuje: Makwaru Chipfu! Kele ephe e-shiepho l'onye ẹnya kachaa alwalwa l'ime phẹ maru mu jasụ l'onye ophu kachaa shii. Noo kele mu a-guru phẹ nvụ l'ejo-iphe, ephe megba-beru. Ophu mu anyatabaedu iphe-ẹji phẹ ozobakpo. Nokwa iphe, Chipfu eepfu bu ono.

³⁵Wakwa iphe, Chipfu epfu baa:

Mbu onye ono, doberu

enyanwu sụ g'o chije

l'eswe;

bya emee g'onwu;

yẹ kpokpode chije

l'enyashi; onye ono,

bu iya akparwubeje

oke-enyimu;

akpara-mini iya ede mba;

epha iya bu Chipfu,

bu Okalibe-Kakota-Ike.

³⁶“Oo ephe m'ọ bu l'a -nonyaru; iphe-a,

mu tuburu k'ememe-a
 phuhu k'ophu mu
 hūma-buhuru iya;
 ọ b̄uru iya b̄u l'oshilokpa
 Ízurelu achihu;
 ephe taa buedu oha ẹka
 phe l'iphu mu jasuru
 asuru.”

Nokwa iphe, Chipfu eepfu
 b̄u ono.

³⁷ Wakwa iphe, Chipfu epfu baa:

“Ọo ẹpho m'ọ b̄u l'aa-tù
 imigwe imigwe l'iphe,
 aatùje iphe;
 aabya ebvua alì b̄vurwua
 ẹka a t̄oru okpa mgboko
 l'ophu;
 t̄eme mu e-gude iphe,
 oshilokpa Ízurelu
 megbab̄eru j̄ika-gbua
 phe.”

Nokwa iphe, Chipfu eepfu
 b̄u ono.

³⁸ Wakwa iphe, Chipfu epfu baa: “Mbok̄u abyakwa teke ee-mechaa
 kp̄ukwaa mk̄p̄ukpu-a doberu m̄be Chipfu eshi l'oje Hananelu jas̄u l̄e
 Onu-abata Mgbureku. ³⁹Ogologo iphe, e-gude at̄u iphe l'a-gb̄e l'ẹpho l'ẹka
 ono dabyiru ogologo jas̄u l'eli úbvú Garebu; l'obyaya ago-jia dabyiru jas̄u
 l̄e Gowa. ⁴⁰Ns̄uda ono l'ophu, b̄u ẹka e shi etuphaje odzu; aw̄ushi iya nt̄u;
 m̄kpoo ẹgu ono l'ophu, dabyiru jas̄u l̄e nggele Kidir̄onu l'uzo ẹnyanwu-
 awawa; gbiriri jas̄u l'aḡuga onu-abata Inya; g'ọ ha a-d̄ukotar̄u Chipfu ns̄o.
 Ophu a byadu ephefubaa mk̄p̄ukpu ono ephefu; ophu ee-nwukp̄oshibaedu
 iya enwukp̄oshi.”

Jieremaya az̄u alì-ẹgu

32 ¹Wakwa olu-opfu, rwuru Jieremaya nch̄i; mb̄u olu-opfu, shi l'ẹka
 Chipfu l'apha, kwe Zedekaya apha iri, ọ watar̄u ab̄uru eze ndu
 Jiuda. Ono bukwanuru apha ophu kwe Nebukadineza apha iri l'ẹsato.
²Ndu ojogu k'eze ndu Babil̄onu b̄e n̄o-pheru Jierúsalem̄u mgburugburu
 teke ono. Onye mpfuchiru ono, b̄u Jieremaya b̄uro ẹka ọ kwar̄u b̄u l'oma-
 unuphu ẹka ndu nche anoje l'ibe eze ndu Jiuda; ³k̄ele Zedekaya, b̄u eze
 ndu Jiuda t̄uru iya mk̄poro l'ẹka ono s̄u: “?B̄u gunu meru g'ọ gude ì n̄odu
 epfu mpfuchiru nkengu g'iipfu iya ono? I pfuru s̄u l̄e Chipfu s̄uru l̄e ya

abyaakwaa eworu mkpukpu-a ye l'eka eze ndu Babilonu; o jekwa l'anata iya. ⁴Lẹ Zedekaya, bu eze ndu Jiuda taa nahukwa ndu Babilonu agbala; o chikwa l'o to dudu iphe, e-me g'e te ye iya l'eka eze ndu Babilonu; yele iya epfugbaa opfu iphu l'iphu; l'o gude enya iya ebo ebo huma iya. ⁵L'oo-kpuru Zedekaya laa Babilonu bu eka oo-nodu jasu ya anua ya aphu. Lonokwa iphe, Chipfu epfu. Lẹ mu -tsoo ndu Babilonu ogo; o to dukwa iphe, mu a-lwuta iya."

⁶Tobudu iya bu; Jieremaya su: "Olu-Opfu Chipfu rwukwaru mu nchi 7su le Hanamelu nwa Shalumu, bu nwune nna mu a-byapfuta mu bya asu mu ge mu zunaa ali iya, no le mkpukpu Anatotu; kele eshinu o bu mu l'iya kachaa abubu be o bu mu be o rwuberu agbata iya. ⁸E mecha; o nwuepho ge Chipfu pfuru ono. Nwa nwune nna mu, bu Hanamelu mecha bya abyapfuta mu l'oma-unuphu eka ndu nche anoje; bya asu mu ge mu zunaa ali iya, no le mkpukpu Anatotu; l'oke ali ndu Benjiaminu. Eshinu o bu mu be o rwuberu agbata iya nworu; ge mu zu l'iya pho g'o buru nkemu. Mu maerupho l'o kwa Opfu Chipfu. ⁹O buru iya bu le mu eje azua ali obu le mkpukpu Anatotu l'eka nwa nwune nna mu, bu Hanamelu bya apfua ya okpoga iya, bu mkpola-ochaa, erwa iya du shekelu iri lesaa. ¹⁰Mu bya edeeru iya ekwo byaa ya epha mu; mee ya ohubama; ndu ekebe yekwa iya pho eka; bya eworu mkpola-ochaa ono tua l'iphe, aatuje iphe. ¹¹Mu bya eworu ekwo ono, e deru, goshiru l'ali buwaa nkemu ono; mbu mpekala iya ono, e meru ohubama ono, bu ophu e deru g'oo-no-beru me ge mu nweberu iya; bya ewotakwapho mpekala iya ophu e meduru ohubama gude. ¹²Mu bya eje achiru ekwo ono nu Baruku, bu nwa Nera-ya nwa Maseya; l'iphu nwa nwune nna mu, bu Hanamelu yele iphu ndu ekebe, bu ndu byiru eka l'ekwo ono; yele iphu ndu Jiuda l'ophu, bu ndu nogbaa l'oma-unuphu eka ndu nche anoje ono. ¹³Mu nodu l'iphu phe l'eka ono bya eworu ozi-a zia Baruku su iya: ¹⁴'Wakwa iphe, oopfu; mbu Chipfu, bu Okalibe-Kakota-Ike; mbu Chileke ndu Izurelu. O suru-a: Chita ekwo ali-a, e deru-a; me ophu e meru ohubama; yee ophu e meduru ohubama l'ekwo ono, e deru gude zua ali-a; woru iya je achiru ye l'ite-urwa k'ophu oo-no odu; ¹⁵kele-a; wakwa iphe, Chipfu bu Okalibe-Kakota-Ike, bu Chileke ndu Izurelu epfu baa: Ee-mechakwaa wata azu ulo; yee ali; yee opfu-vayinu l'ali eka-a ozo.'"

Jieremaya epfu anu Chileke

¹⁶Mu wochaaruru ekwo ono, e gude zua ali ono nuchaa Baruku nwa Nera-ya; mu bya awata epfu anu Chipfu su: ¹⁷"Gube Nnajiuphu, bu Chileke! O kwa ngu meru igwe; bya emee ali; o buru ike okpu ngu yee eka ngu, i lochiru alochi be i gude mee ya. O to dukwa iphe, tsunukaru ngu l'ehu. ¹⁸Gube onye egoshije igwerigwe nemadzū l'i yeru phe obu. Ole iiwojeru aphu ejo-iphe, ndu bu nna meru woru nwua l'utapfu ndu bu unwu phe

m'ephe anohedu. Gube oke Chileke ono, ike du ono; onye epha iya bu Chipfu, bu Okalibe-Kakota-Ike; ¹⁹iphe, i chiru idzu ememe be ha shii; teme iphe, iime ememe paa aka. I saru enya humagbua iphemiphe, nemadzu eme. I nodu ebuje onyemonye nggo g'iphe, o meru gbaru; yee iphe, o metaru. ²⁰I meru iphe-ohumalenya; yee iphe, du biribiri l'ali ndu Ijiputu; i nodu emele iya pho g'iime iya jasu ntanu-a. Iimeru iya ndu Izurelu; bya emeru iya ndiphe mgburugburu; o mee; epha ngu pfuru g'o pfukwaduru-a. ²¹I dufutaru ndibe ngu, bu ndu Izurelu l'ali ndu Ijiputu; o buru iphe-ohumalenya; yee iphe, du biribiri be i gude mee ya. O buru ike okpu ngu; yee aka ngu, i lochiru alochi; waa iphe, du ebvu be i gude mee iphemiphe ono. ²²I nuru phe ali-a, bu ophu i riburu angu l'ii-nu nna phe ochephe, bu ali, mini era-eswi yee manu-enwu jiru pyimu pyimu. ²³Ephe bya abata bya anata iya nworu; ophu ephe emeduru iphe, i suru g'ephe meje; ophu ephe etsoduru ekemu ngu; mbu l'ephe te emeduru iphe, i karu su g'ephe meje; o buru iya meru g'o gude i haa iphemiphe-a, bu ejo iphe-ehuka-a byapfuta phe.

²⁴"Lewaro ga kpuru igbulu-ogu kpuphee mkpukpu-a mgburugburu g'e gude nata iya. O buru ogu-echi; yee egu; yee ejo iphe-ememe be mewaru g'e woru mkpukpu-a nu ndu Babilonu, bu ndu etso iya ogu. Iphe, i pfuru be iilena enya lo mewaru g'i pfuru iya. ²⁵Ole o bu; a makwaru-a le mkpukpu-a be e yewaru l'eka ndu Babilonu; ole gube Nnajiuphu, bu Chipfu pfuru mu su mu-a: 'Gude mkpola-ochaa zua ali-a; l'inweru ndu ekebe le gi gude eme k'azuzu iya obu!' "

²⁶No iya; olu-Opfu Chipfu bya erwua Jieremaya nchi su: ²⁷"O kwa mu bu Chipfu bya aburu Chileke ndiphe l'ophu. ?O duru iphe, atsunukaje mu l'ehu ememe? ²⁸Oo ya bu le-a; wakwa iphe, Chipfu epfu baa: Mu abyaakwaa eworu mkpukpu-a ye l'eka ndu Babilonu; yee Nebukadineza, bu eze ndu Babilonu, bu onye a-nata iya nu. ²⁹Ndu Babilonu-a, letso mkpukpu-a ogu-a l'e-mechaa bata bya atua ya oku l'oosua ya tsufu; mbu tsukota oku l'ulo; me l'ulo, bu aka ndu nemadzu no kpatsu mu iwe; aka ephe ejeje anodu le mkpotsu akpo unwu-isensu oku anu Balu; teme ephe agbaru agwa mee gude agwa iya. ³⁰Ndu Izurelu ephe le ndu Jiuda ta adudu iphe ozo, ephe mebaaru gbahaa ejo-ememe be ephe eme l'atatiptu mu; eshinu ephe bu nwata be ephe anodujeepho akpatsu mu iwe l'iphe, ephe eme l'eka. Nokwa iphe, Chipfu eepfu.

³¹"E -shi mboke, e doberu mkpukpu ono jasu nta-a be mkpukpu-a shiepho kpatsuta mu iwe; yee oke ehueghu k'ophu bu le mu e-wofu iya l'atatiptu mu. ³²Ndu Izurelu ephe le ndu Jiuda kpatsuwaru mu iwe; o buru iphe, kparu iya nu bu ejo-ememe ono, ephe meshiru ono g'o ha; ephebedua; me ndu eze phe; mekpoo ndu-ishi phe; me ndu-uke phe; me ndu mpfuchiru phe; ndu Jiuda me ndu Jierusalemu. ³³Ephe gharu mu okpurukpu haa agharu mu iphu. A makwaru-a le mu ziru phe iphe nzito;

ọle ephẹ te eyeduru ọnu ọpẹhu ahùhù, mu ahù phẹ erwudu phẹ l'ẹhu. ³⁴Ephẹ woru ẹjo ahuma phẹ ono, bu nshi woru dobe l'ulo, e kuru epha mu; shi nno turwua ya. ³⁵Ephẹ kpua ẹka aagwajẹ iphe agwagwa doberu Balu lẹ nsuda Hinomu; g'ọ buru ẹka ephẹ a-kpoje unwegirima phẹ oku gude gwaa Molẹku; l'ebe abụ lẹ mu tujeru ekemu; mbụ l'ọ to batajekpoda-ru mu nọ l'obu k'asụ g'ẹphẹ mee ẹbyi, dọ ẹgube ono; shi nno mee gẹ Jiuda mee iphe-ẹji.”

³⁶“Iphe, unu epfu l'opfu ẹhu mkpukpu-a bu l'ọ kwa ogu-echi; yee okpanri; yee ẹjo iphe-ememe be e gudewaa eworu mkpukpu-a eye l'eka eze ndu Babilonu; obenu lẹ-a; wakwa iphe, Chipfu, bu Chileke ndu Izurelu epfu baa: ³⁷Ọ to dukwa iphe, e-me gẹ mu ta chilatachaa phẹ eshi l'iphe, bukpo ẹka mu shi chiru phẹ jeye teke ẹhu eghu mu eghu; ẹnya nọdu ata mu kpitikipiti. Mu e-duphutacha phẹ azu duru bya edobe l'eka-a g'ẹphẹ buru g'ọ to dọ iphe, e-me phẹ nọ. ³⁸Ephẹ aburu ndibe mu; mu aburu Chileke phẹ. ³⁹Mu e-me g'okpoma phẹ buru nanu; umere phẹ aburu nanu; k'ọpẹhu ephẹ a-nọdu atsụ mu ebvu g'ọ duru phẹ lẹ ree; duru unwu phẹ, e-mechaa etso phẹ l'azu. ⁴⁰Mu l'ephe a-gba ogbandzu ojeoje; ọpẹhu mu abyadu ahaba emeru phẹ iphe, dọ ree; mu akpalia phẹ g'ẹphẹ tsuje mu ebvu k'ọpẹhu ephẹ ta abyadu ahabaa mu ahaha. ⁴¹Ẹhu a-nọdu atsọ mu; mu emeeru phẹ ree. Ọpẹhu ọ dudu iphe, e-me gẹ mu ta adza phẹ adzadza l'alị ẹka-a; mbụ mu e-gudekpọ obu mu l'opẹhu mee ya.”

⁴²“Wakwa iphe, Chipfu epfu baa: Ọ kwa gẹ mu wotaru ndu-a eze iphe-ẹhuka-a bu gẹ mu a-nukota phẹ iphe, dọ ree, mu kweru phẹ ukwe iya. ⁴³Ee-mechaa zaha alị ozobaa l'alị-a, bu ẹka unu asuje: ‘Ọ buakwaa ochobu; alị, nemadzu ebudu; ọpẹhu anu ebudu iya; kele e wowaru iya yee l'eka ndu Babilonu.’ ⁴⁴Ee-mechaa gudeaha mkpola-ochaa zaha alị ozo; deaha ekwo alị; meahaa ya ohubama; ndu ekebe eyekwa iya pho ẹka; l'oke alị ndu Benjaminu-a; yele mkpukpu lẹ mkpukpu, nọ-pheru Jierusalemu mgburugburu; mekpoo l'iphe, bu mkpukpu, nọ l'alị ndu Jiuda; me l'opẹhu nogbaa l'alị ubvu ubvu; me ọpẹhu nogbaa l'alị okpa ubvu, nọ l'uzo ẹnyanwu-ariba; me ọpẹhu nọ lechiegu ndohali. Ọ buru iphe, a-kpa iya nọ bu lẹ mu e-dophu phẹ azu l'onodu phẹ; nokwa iphe, Chipfu epfu.”

Ee-mechaa dophu Jierusalemu azu l'onodu iya

33 ¹Olu-Opfu Chipfu byakwa erwua Jieremaya nchi ke mgbo ẹbo teke ono, o nokwadu l'oma-unuphu ẹka ndu nche anoje ono; su: ²“Wakwa iphe, Chipfu epfu baa; mbụ onye ono, bu iya meru mgboko; mbụ Chipfu; onye bu iya meru mgboko dobe g'oo-du; bya emee ya; o nguru anguru; o kwa Chipfu bu epha iya. ³Kua mu oku; huma lẹ mu a-za ngu ẹnu; bya akarụ ngu iphe, parụ ẹka bya adu omilomi, bu iphe, i mahakpoda; ⁴kele-a; wakwa iphe, Chipfu, bu Chileke ke ndu Izurelu epfu baa l'opfu ẹhu ulo, dugbaa lẹ mkpukpu-a; yele opfu ẹhu ulo ibe eze ndu

Jiuda, buḡbaa ọ̀lo, a kwatsushiru gude gbobuta obvudu eja, ndu ọ̀hogu kùberu; yẹe ogu-echi phe; ⁵l'ẹka aalwù ọ̀gu onye lẹ ndu Bábilọnu: Ọ kwa odzu bẹ ee-mechaa gude chi-jishia ya achi-jishi; mbù odzu ndu mu e-gude ẹhu-eghu mu; yẹe ẹnya, ata mu kpìtikpiti gbushia. Mu woharu ndu mkpùkpu-a iphu mu; ọ̀ buru iphe, kparù iya nù bụ ẹjo-iphe, ẹphe emegbabe.

⁶“Ọle g'ọ duhabe; mu e-wotaru phe ẹhu-ọdu-ike; mbù mee g'ẹphe wekorohu. Mu e-me g'ẹphe wekorohu; mee g'ẹhu dù phe guu dù ẹk'etsutsu iya; ọ̀phu ọ̀ duedu iphe, byaru eme phe nù. ⁷Mu e-dophu ndu Jiuda; mẹ ndu Ízurelu azù l'ọnodu phe; mu akpua phe; ẹphe adù g'ẹphe shi duhawa. ⁸Mu abya asashia phe ẹjo-iphe, ẹphe meru mu g'ọ ha; bya aguraru phe nvù l'ẹjo-iphe ono, ẹphe meru mu ono, bụ l'ẹphe kwefuru mu ike ono. ⁹Ọo ya bụ ẹpha mkpùkpu-a emeahaa g'ẹhu tsoo ọtso. Ọhamoha, nọkota lẹ mgboko l'ọphu, bụ ndu a-numa iphemiphe, bụ iphe, dù ree, mu a-nọdu emeru phe ajaahaa mu ajaja; kwabẹahaa mu úbvú. Ẹphe awata atsù ebvu; wata anma pyaapyaapya; kele mu e-meru ndu mkpùkpu-a iphe, dù ree; mee g'ẹhu dù phe guu.”

¹⁰Wakwa iphe, Chipfu epfu baa; “Alì ẹka-a, unu sùru l'ọ bụ ochobu, nemadzù ebudu ebudu; ọ̀phu anù ebudu iya-a; mbù ime mkpùkpu lẹ mkpùkpu Jiuda; yẹe gbororo, dabyigbaaru lẹ Jierúsalemu, bụ ẹka a gbadochawaru agbado; ọ̀phu nemadzù ebudu iya ebudu; ọ̀phu anù adùdu iya-a; bẹ ee-mechaa nùaha olu ọzobaa; ¹¹olu ẹhu-ọtso; mẹ olu ndu ete ẹswa; olu unwumboko, ala ji; mẹ k'unwoke, alù nwanỳì ọ̀phúú; yẹe olu ndu gude ngwẹja ekele abya leze-ọ̀lo Chipfu; ẹka ẹphe agù ebvu asuje:

“Kele Chipfu,
bù
Ọkalibe-Kakọta-Ike ekele;
kele Chipfu dù ree;
n-yemobu iya anoje jasù
l'ojejoje.

Ọ buru iphe, a-kpa iya nù bụ lẹ mu e-dophu alì-a azù l'ọnodu iya. Noo iphe, Chipfu epfu.”

¹²Wakwa iphe, Chipfu, bụ Ọkalibe-Kakọta-Ike eepfu: “L'alì ẹka-a, bụ ochobu; ọ̀phu nemadzù ebudu iya; ọ̀phu anù ebudu iya-a; l'iphe, bukpo mkpùkpu lẹ mkpùkpu, nọ iya nù; bẹ ẹka eeche eswi e-mechaa lwa azù bya adùkota gẹ ndu eche atùru dọbeje anù, ẹphe eche. ¹³L'iphe, bukpo mkpùkpu lẹ mkpùkpu ono, nọgbaa l'alì úbvú úbvú; mẹ ndu ọ̀phu nọ l'alì ọkpa úbvú, nọ l'uzo ẹnyanwu-arìba; yẹe ndu ọ̀phu nọ l'echiegu ndọhali; mẹ lẹ k'alì ndu Benjiaminu; mẹ l'unwu mkpùkpu lẹ mkpùkpu, nọ-phe-ru Jierúsalemu mgburugburu; yefua l'ime mkpùkpu, nọgbaa lẹ Jiuda; bẹ anù, eeche echeche e-mechajẹ awughata l'atatiphu onye a-nọdu agù iya ọ̀gu. Nokwa iphe, Chipfu eepfu.”

¹⁴Wakwa iphe, Chipfu epfu baa: “Mbọku abyakwa teke mu e-meru ndu onu-ọ̀lo Ízurelu yẹe onu-ọ̀lo Jiuda iphe, dù ree, mu kweru ukwe lẹ mu

e-meru phẹ. ¹⁵O -rwua mbọku ono bẹ mu e-me g'ẹkali-iphe, p̄f̄ubereko-to k̄pofuta l'oshilọkpa Dévidi. Ọ b̄uru yẹbedua e-me iphe, p̄f̄uru ọto yẹ iphe, d̄u nhamunha l'alì ẹka-a. ¹⁶O -rwua mbọku ono bẹ aa-dzọta ndu Jiuda; ndu Jierúsalemu eburu t̄saru ẹhu; ọ t̄ d̄udu iphe, eme phẹ n̄u. Iphe, aa-wata iya ekuku aburu: 'Chipfu, b̄u ap̄f̄ubekoto k'anyi'; ¹⁷kele-a wakwa iphe, Chipfu ep̄fu baa: Ẹko onye a-n̄odu l'aba-eze ọnu-ulo Ízurelu ta abyakwa aduru Dévidi; ¹⁸Ọphu ndu-uke, b̄u ndu Lívayi abyadu ako ọko onye a-p̄f̄uru l'ip̄hu mu mkp̄urumkpuru egweru mu ngweja-akpo-ọku; waa ngweja-nri; m̄e ngweja mmanu ọzo."

¹⁹Tobudu iya b̄u; Op̄fu Chipfu bya erwua Jieremaya n̄chì s̄u: ²⁰Wakwa iphe, Chipfu ep̄fu baa: "Ọ -b̄uru l'unu a-d̄u ike mebyia ọgbandzu, mu l'eswe ḡbaru; yẹ ọgbandzu, mu l'enyashi ḡbaru; k'ọphu b̄u l'eswe yẹ enyashi taa nw̄uedu l'orwuberu iya; ²¹a bya emebyikwapho ọgbandzu mu lẹ Dévidi, b̄u onye-ozì mu; yẹ ọgbandzu mu lẹ ndu Lívayi, b̄u ndu-uke, ejeru mu ozì; ọo ya b̄u lẹ Dévidi tee nwēdu awa, b̄u onye a-b̄uru eze n̄odu l'aba-eze iya. ²²Mu e-me awa Dévidi, b̄u onye-ozì mu; yẹ awa ndu Lívayi, b̄u ndu eje ozì l'ip̄hu mu; g'ẹphe b̄uru aḡta aḡta ḡe k̄pokpode, n̄o l'igwe; ọphu aa-t̄ukotadu phẹ l'iphe, aat̄uje ẹrwa iphe egube-a, a taa t̄ukotajedu ẹja, n̄o l'aḡuga eze-enyimu-a."

²³Tobudu iya b̄u; Op̄fu Chipfu bya erwua Jieremaya n̄chì s̄u: ²⁴"?Tii ledu iphe, ndu-a an̄oduje ep̄fu s̄u: 'Ip̄fu labo-a, Chipfu hotaru-a bẹ ọ paa-kwaru gwobe?' Ẹphe shi egube ono k̄po ndibe mu ẹbo l'afu; k'ọphu b̄u l'ẹphe ta ab̄uedu ọha ẹka phẹ l'ip̄hu phẹ. ²⁵Wakwa iphe, Chipfu ep̄fu baa: Ọme mu l'eswe yẹ enyashi ta agbaduru ndz̄u; bya at̄a ekemu doberu igwe yẹ alì; ²⁶m̄e mu ajika oshilọkpa Jiékoju; yẹ kẹ Dévidi, b̄u onye-ozì mu; ọphu mu tege ah̄otadu onye lanu, b̄u nwa iya nwoke g'ọ b̄uru ishi ndu b̄u oshilọkpa Ẹbirihamu; yele kẹ Áyizaku; yele kẹ Jiékoju; kele-a; mu e-dophu phẹ azu l'onodu phẹ bya aph̄aru phẹ obu-imemini."

Aaloru Zedekaya ẹka lẹ nchì

34 ¹Gẹ Nebukadineza, b̄u eze ndu Bábilonu; yẹ ndu ojogu iya l'ọphu; waa iphe, b̄u ọhamoha, n̄okota iya l'ẹka; t̄koru etso Jierúsalemu ọgu; yẹ mkp̄ukpu, n̄o-pheru iya mgburugburu bẹ op̄fu-a shi l'ẹka Chipfu rwua Jieremaya n̄chì. ²Wakwa iphe, op̄fu; mb̄u Chipfu, b̄u Chileke kẹ ndu Ízurelu. Ọ s̄uru-a: Jep̄fu Zedekaya, b̄u eze ndu Jiuda je asu iya-a: Wakwa iphe, Chipfu ep̄fu: Mu abyakwa eworu mkp̄ukpu-a ye l'ẹka eze ndu Bábilonu, b̄u onye a-tu iya ọku l'ootsua ya tsufu. ³Ọphu ọ dukwa iphe, e-me g'ì nahu iya g'o to gude ngu. Ọ chikwa l'ee-gude ngu kpuru nu iya. Lì gude enya ngu h̄uma eze ndu Bábilonu; unu l'iya an̄odu l'ip̄hu l'ip̄hu p̄fugbaa op̄fu; l'ì lashia alì ndu Bábilonu.

⁴"Ole ọ b̄u; n̄umakwa ukwe-iphe, Chipfu ekwe ngu; gube Zedekaya, b̄u eze ndu Jiuda. Wakwa iphe, Chipfu ep̄fu l'op̄fu ẹhu ngu; e tee gbukwa

ngu l'ogu-echi; ⁵ji-nwuhukpoo chiriri. Oo g'a kpoberu oku lia ndiche ngu phe, bu ndu ophu vuru ngu uzo buru eze; nokwapho g'ephe a-kpobe oku l'ulo-ekwa ngu gude raa ekwa ngu su: 'Owiwo; nnaji mu-e!' O kwa mbe-dua l'onwomu ekwe ukwe-ipe-a; bu iphe, Chipfu epfu."

⁶Tobudu iya bu; Jieremaya, bu onye mpfuchiru toko iphemiphe ono pfuaru Zedekaya, bu eze ndu Jiuda le Jierusalemu. ⁷Teke ono be ndu ojogu eze ndu Babilonu etsokwa ndu Jierusalemu ogu; yee mkpukpu le mkpukpu ozo, nogbaa l'alì ndu Jiuda, bu mkpukpu ndu ophu phoduru nu, du ge Lakishi; yee Azeka. O bu mkpukpu ono ephenebo bu mkpako mkpukpu, a kpu-pheru igbulo mgburugburu, phoduru nu l'alì ndu Jiuda teke ono.

Ndu bu ohu l'e-mechaa nweru onwophe

⁸Owaa bu opfu, shi l'eka Chipfu rwua Jieremaya nchi g'eze, bu Zedekaya gbachaaru ogbandzu ephe le ndu Jierusalemu l'ephe a-ra iya arara le ndu bu ohu e-nweru onwophe. ⁹Onyemonye l'a-ha ohu iya, bu onye Hiburu; me ndu ke nwoke me ke nwanyi; g'o to du onye a-gba onye Jiuda ibe iya ohu. ¹⁰Oo ya bu; ndu-ishi; mekpoo iphe, bu ndu Izurelu, bu ndu bahuru l'ogbandzu ono toko kweta l'ephe a-ha ohu phe nwoke me unwanyi; g'o to duhe onye a-buru ohu ozobaa. Ephe pfubua ya woru phe hakota. ¹¹E mechaa; izimanu lwa phe azu; ephe bya achi-phuta ndu bu ohu ono azu; mbu ndu ono, ephe shi hawa ono; bya agbaphu phe ohu azu.

¹²Tobudu iya bu; olu-opfu Chipfu bya erwua Jieremaya nchi su: ¹³Wakwa iphe, Chipfu epfu; mbu Chileke ndu Izurelu. O suru-a: "Mu le ndiche unu phe gbaru ndzu teke mu dufutaru phe l'alì ndu Ijiputu; mbu l'alì eka ephe no buru ohu. Mu pfua su: ¹⁴Iphe, bukpoo apha esaa, a-nwuta anwuta g'onnyemonye l'ime unu l'ehu l'ehu tohajekwa onye Hiburu ibe iya, e reru unu. Mbu l'o -jewaru unu ozi apha ishii; g'unu haje iya g'o la ke mmanu; ophu nna unu oche phe angaduru mu nchi; ophu ephe eyeduru mu onu. ¹⁵Izimanu lwa unu azu le mgboru nta-a; unu bya emee iphe, pfuru nhamunha lenya mu. G'unu ha l'onye l'onye bya araa ya arara su ge ndu alì unu nweru onwophe. Unu nodu l'iphu mu gbaa ndzu l'ulo-a, e kuru laaru epha mu-a. ¹⁶O be nta; unu byakwa bya aghakobe bya emewushiaha epha mu ozo. G'unu ha laphuchaa azu je achi-phuta ohu unu ke nwoke yee ke nwanyi ono azu; mbu ndu unu shi hawa g'ephe jeje eka du phe ree. Nta-a be unu gbaphuwaru phe ohu ozo.

¹⁷"Oo ya bu le-a; wakwa iphe, Chipfu epfu baa: 'Unu te emekwaru iphe, mu suru g'unu mee. Unu ta arakwaru iya arara su ge ndu alì unu nweru onwophe. Oo ya bu le-a; nta-a be mu arawa iya arara l'unu e-nweru onwunu; o kwa Chipfu epfu iya. Enweru onwunu obu bu l'ee-gude ogu-echi gbua unu; ejo iphe-ememe egbua unu; egu egbua unu. Mu e-me unu ge ndu alì-eze, nokota le mgboko l'ophu soo unu oyi. ¹⁸Onye ono,

mebyiru oḡbandzu mu ono; oḡphu o meduru iphe, e pfuru l'oḡbandzu ono, bu oḡphu eḡphe no mu l'iphu gbaa; ndu ono be mu e-me g'eḡphe du ge nwe-swi ono, a sukaharu ebo bya eshia ya echilabo ghajaa ono. ¹⁹Ndu-ishi ndu Jiuda ye ke ndu Jierusalemu; me ndu eleta ibe eze enya; me ndu bu uke; mekpoo ndu ali ono l'ophu, bu ndu ghajarū echilabo nwe-swi ono ²⁰be mu e-woru ye l'eka ndu ohogu phe, bu ndu achō ndzū phe. Odzu phe l'a-buru nri enu, eḡphe l'eli; ye anu, bu l'eliphe.

²¹“ ‘Zedekaya, bu eze ndu Jiuda; ye ndu-ishi l'ali-eze iya be mu e-ye-koṭa l'eka ndu ohogu phe, bu ndu achō ndzū phe; woru phe ye l'eka ndu oḡoḡu eze ndu Babilonu, bu ndu shi sephuwaa onwophe azu l'eka i no. ²²Wakwa iphe, Chipfu epfu baa: Mu a-tu ekemu l'onwomu; o buru mu e-duphuta phe azu le mkpukpu-a. Eḡphe e-tsoo ya oḡu; nata iya; woru oku tu ya l'ootsua tsufu. Mu emee ge mkpukpu, noḡbaa l'ali ndu Jiuda buru ochobu; o to duedu onye ebu iya ebubu.’ ”

Unwu Rekabu

35 ¹Wakwa opfu, shi Chipfu l'eka rwua Jieremaya nchi teke Jie-hoyakimu nwa Jiosaya bu eze ndu Jiuda. O sūru: ²“Jepfu ndu onu-ulo Rekabu je eduru phe bya l'eka ulo eze-ulo Chileke eka lanu. Eḡphe -bya l'ini phe mee g'eḡphe ngua.”

³Toḡbudu iya bu; mu tuḡbua je ekua Jiazanaya, bu nwa Jieremaya nwa Habazinaya; bya ekua unwune iya g'eḡphe ha; ye unwu iya g'eḡphe ha; o buḡepho ndu onu-ulo Rekabu g'eḡphe hakota. ⁴Mu bya achibata phe l'eze-ulo Chipfu; bya achiru phe bahu l'onu-ulo k'unwu Hananu nwa Igudalaya, bu onye ke Chileke. Onu-ulo k'ono no-kube onu-ulo ke ndu-ishi; bya anokoru l'eli onu-ulo Maseya nwa Shalumu, bu onye-nche onu-abata. ⁵Mu bya agbajishia mee l'ite subegbaaru ndu onu-ulo Rekabu ono; bya edoberu phe okoro; bya asu phe: “Unu pata mee ngua!”

⁶Eḡphe yeeru mu onu su mu: “Anyi ta angujekwa mee; kele nna anyi oche, bu Jionadabu nwa Rekabu bukwa iya turu anyi ekemu ono su anyi-a: 'G'unubedua mekpoo oshilokpa unu ta adukwa teke unu angujekpo mee jasū l'ojejoje! ⁷Ozo bu g'unu ta akpujekwa ulo; ophu unu akujekwa iphe akuku; ophu unu akojekwa opfu-vayinu. G'o to dukwa iphe ono, ophu unu e-nwejeru; oo eḡpho ulo, e meru l'ekwa be unu a-noḡduje ebuphe. Oo ya bu g'unu a-kaa nka l'ali ono, unu lwaru alwalwa ono.’ ⁸Anyi nodu emeḡpho iphemiphe ono, nna anyi oche, bu Jionadabu nwa Rekabu turu anyi l'ekemu ono. Oo ya bu l'anyibedua; mekpoo unyomu anyi mekpoo unwu anyi unwoke me unwanyi teke angu-swekwa mee; ⁹ophu anyi eke kpu-swee ulo k'eburu; ophu anyi akodu opfu-vayinu; ophu anyi enwedu egu; ophu anyi akudu iphe, aaku akuku. ¹⁰O kwa l'ulo, e meru l'ekwa be anyi ebujeru; teme anyi nodu anoduje emeḡpho iphemiphe ono, Jionadabu, bu nna anyi oche ziru anyi ono. ¹¹O be ge Nebukadineza, bu eze

ndu Bábilonu byaru bya asopyabe alì ẹka-a; anyi sù: ‘Unu byakwa g’anyi lashia Jierúsalemù; g’anyi nahù ndu ojogu ndu Bábilonu; yee kẹ ndu Arámu.’ Ọ kwa iya meru g’o gude ọ bọru lẹ Jierúsalemù bẹ anyi nọ.”

¹²Tọbodu iya bụ; Opfu Chipfu bya erwua Jieremaya nchị sù: ¹³Wakwa iphe, opfu; mbụ Chipfu, bụ Ọkalibe-Kakọta-Ike; mbụ Chileke kẹ ndu Ízùrẹlù: “Je je akaru ndu Jiuda; yee ndu Jierúsalemù sù phẹ-a: ?Unu tee gudedu ndu-a nwuta iphe wata eme iphe, mu sùru g’unu meje? Ọ kwa Chipfu epfu. ¹⁴Jionadabu nwa Rekabu tọru ndibe iya ekemu sù g’ẹphe ta ngujekwa mee. Ẹphe nọdu eme iphe ono, a tọru phẹ l’ekemu ono. Ọphu ẹphe angudu mee jasù ntanu-a; ọ bọru iphe, kparu iya nù bụ l’ẹphe eme g’ẹphe mee iphe, nna phẹ oche tọru phẹ l’ekemu. Obenu lẹ mbẹdua pfuwaru yeru unu; mu -pfuchaa; mu epfubaa; ọphu unu ekwedu eme iphe, mu sùru g’unu mee. ¹⁵Ndu ozi mu, bụ ndu mpfuchiru g’ẹphe ha bẹ mu yewaru g’ẹphe byapfuta unu; mu -yechaa; mu eyebaa; ẹphe bya bya asù unu-a: ‘G’unu ha l’onye l’onye hanaa ẹjo-iphe, unu eme; dozia umere unu; g’unu te tsohẹkwaru agwa; unu ba bahẹru iya ẹja. Ọo ya bụ g’unu eburu l’alì ono, mu nọru unu lẹ nna unu oche phẹ ono.’ Ọphu unu angaduru nchị; ọphu unu eyeduru mu ọnu. ¹⁶Oshilọkpa Jionadabu nwa Rekabu bẹ meakwaru iphe, nna phẹ oche tọru phẹ l’ekemu; obenu lẹ ndu-a te ekwedu eme ọphu mbẹdua sùru g’ẹphe meje.

¹⁷“Ọo ya bụ lẹ-a; wakwa iphe, oopfu; mbụ Chipfu, bụ Ọkalibe-Kakọta-Ike, bụ Chileke kẹ ndu Ízùrẹlù: Unu ngabẹkwa nchị! Iphe, bụkpoo ẹjo iphe-ẹhuka ono, mu sùru lẹ mu e-wotaru unubẹ ndu Jiuda ono bẹ mu e-wotakwaru unu; wotaru iya iphe, bụkpoo onyemonye, bu lẹ Jierúsalemù. Mu pfuru phẹ opfu; ọphu ẹphe angaduru nchị. Mu kua phẹ oku; ọphu ẹphe azaduru ẹnu.” ¹⁸Tọbodu iya bụ; Jieremaya bya asù ndu ọnu-ọlọ Rekabu: “Wakwa iphe, o pfuru; mbụ Chipfu, bụ Ọkalibe-Kakọta-Ike, bụ Chileke ndu Ízùrẹlù. Ọ sùru-a: Eshinu unu mewaru iphe, nna unu oche, bụ Jionadabu tọru unu ekemu iya; bya emekọta iphemiphe, ọ sùru g’unu meje; mbụ ọ bọerupho g’o goshiru iya unu bụ g’unu eme iya; ¹⁹bẹ bụ lẹ-a; wakwa iphe, oopfu; mbụ Chipfu, bụ Ọkalibe-Kakọta-Ike; bya abọru Chileke kẹ ndu Ízùrẹlù. Ọ sùru: Ọ tọ dukwa iphe, e-me g’awa Jionadabu nwa Rekabu te nwe onye a-nọdu ẹjeru mu ozi.”

Jiehoyakimu echie ẹkwo Jieremaya l’ọku

36 ¹Ọ be l’apha, kwe Jiehoyakimu nwa Jiosáya apha ẹno, ọ wataru abọru eze ndu Jiuda; opfu-a shi l’ẹka Chipfu rwua Jieremaya nchị: ²“Wota ẹkwo, a phuru aphuphu dee iphe, bụkpoo iphemiphe ono, mu pfuru ngu lẹ k’ẹhu ndu Ízùrẹlù; mẹ kẹ ndu Jiuda; mẹ k’ọhamoha ọzo; shikpọepho teke mu wataru ngu iya epfuru lẹ teke Jiosáya shi bọru eze byasù nta-a; deta iya. ³?A maru; ?ndu ọnu-ọlọ Jiuda -nụma iya; mbụ nụma iphe, bụkpoo ẹjo iphe-ẹhuka ono g’ọ ha, mu doberu lẹ mu e-me phẹ

ono; g'ephe ha l'onye l'onye ahaa eme ejo-iphe, ephe eme; mu aguaru phe nvu l'iphe, bukpuo iphe-eji, ephe eme.”

⁴Tobudu iya bu; Jieremaya bya ekua Baruku nwa Neraya; o bya anodu. Jieremaya wataru iya epfushiru iphemiphe ono, Chipfu pfuru iya ono; Baruku nodu edeshi iya lekwo aphuphu ono. ⁵No iya; Jieremaya su Baruku-a: “Mbedua be ephe wuchikwaru ewuchi; k'opu mu taa dudu ike abya leze-ulo Chipfu. ⁶Oo ya bu le-a; tugbukwaa je leze-ulo Chipfu leswe mboku, aaswije egu je aguaru ndiphe iphe, i deru lekwo aphuphu-a; mbu Opfu Chipfu, bu ophu mu pfuru ngu epfuru; i dee ya edede. Guaru iya ndu Jiuda l'opu, bu ndu shigbaa le mkpukpu aka ephe shigbaa abata l'ulo ono. ⁷?A maru; ?ephe a-rwo Chipfu; g'ephe ha l'onye l'onye eshi l'eme ejo-ememe ono, ephe eme ono lwaphuta azu; kele oke ehueghu Chipfu, o suru lo-tukoru l'ishi ndu-a paru aka.”

⁸Baruku nwa Neraya toko iphemiphe ono, Jieremaya onye mpfuchiru suru go mee ono mekota. O pfuru leze-ulo Chipfu toko Opfu Chipfu ono, e deru lekwo ono woru guaru phe. ⁹O be lonwa ke tete l'apha, kwe Jiehoyakimu nwa Jiosaya apha ise, o bahuru l'aba-eze ndu Jiuda; e woru eswe aa-swiru Chipfu egu raa arara l'iphe, bukpuo oha ndu bu le Jierusalemu l'opu; mekpoo ndu ophu shi le mkpukpu, nogbaa l'ali ndu Jiuda bya. ¹⁰Baruku bya eje apfuru leze-ulo Chipfu l'oma-ulo Gemaraya nwa Shafanu, bu onye edeje ekwo. Onu-ulo k'ono no l'oma ulo-eli iya, no le mgboru onu-abata Ophuu. O pfuru leka ono woru opfu Jieremaya, e deru lekwo-a woru gu; onyemonye numa-dzuru.

¹¹O be ge Mayikaya, bu nwa Gemaraya nwa Shafanu numaru Opfu Chipfu ono go ha, bu ophu e deru lekwo ono; ¹²o bya agbazeta jeshia ibe eze; bya eje abahu l'oma-ulo k'onye edeje ekwo. Iphe, bukpuo ndu-ishi g'ephe ha doru leka ono. Ndu no iya nu bu onye edeje ekwo lonwiya, bu Elishama; yee Delaya nwa Shemaya; yee Elunatanu nwa Akubo; yee Gemaraya nwa Shafanu; yee Zedekaya nwa Hananaya; yee iphe, bukpuo ndu-ishi ndu ophu g'ephe ha. ¹³Mayikaya bya eworu iphemiphe, o numaru, Baruku guru ndiphe lekwo ono koru phe. ¹⁴Iphe, bu ndu-ishi ono g'ephe ha bya ezia Jiehudi, bu nwa Netanaya nwa Shelemaya, bu nwa Kushi go je asu Baruku go gudeeshikwa ekwo aphuphu ono, o guru ndu Izurelu ono gude bya. No iya; Baruku nwa Neraya bya aparu ekwo aphuphu ono leka gude bya ejepfu phe. ¹⁵Ephe su iya: “Nodueshikwa anoo guaru iya anyi.”

No iya; Baruku bya eworu iya guaru phe. ¹⁶O be teke ephe numaru opfu ono go ha; ephe bya elegbabechaa nwibe phe enya leka ndzu agu phe. Ephe su Baruku: “Opfu-a go ha be anyi e-jekwa akooru eze.” ¹⁷Ephe bya aja Baruku su iya: “Kaeshikwaru anyi. ?Denu gi meru dekota iphemiphe-a go ha? ?Bu Jieremaya epfuru ngu iya; i nodu ede too?”

¹⁸Baruku su phe; “Ee; oo ya pfukotaru mu iphe-a go ha; mu gude mini-ekwo dee ya lekwo-a.”

¹⁹Tòbudu iya bú; ndu-ishi ono bya asù Baruku-a: “Gẹ gù lẹ Jieremaya tǔgbukwaa je edomia onwunu. Unu te emekwa g'a maru ẹka unu nọ!”

²⁰Ẹphe bya eworu ẹkwo aphuphu ono bya edobe l'ùlo kẹ Elishama, bú onye edeje ẹkwo. Ephe bya ejepfu eze l'oma-unuphu ibe iya je epfuaru iya iphemiphe. ²¹Eze bya ezia Jiehudi sù iya g'o je ewotaeshikwa ẹkwo aphuphu ọbu. Jiehudi bya tǔgbua je l'ùlo Elishama, bú onye edeje ẹkwo je ewota ẹkwo ono bya aguaru eze; yẹe ndu-ishi; ndu-ishi g'ẹphe ha pǔgbaarù l'aguga iya. ²²Teke ono bú onwa tete. Ọ búru l'obu, aanọduje l'udzumini bẹ ọ nọ; a zù-beru iya ọku l'epfu; ọ nọdu enwu taphutaphu l'ẹka ọ nọ. ²³Ọ nọdu abujeru; Jiehudi -gùepho mpekala ẹkwo ono ẹto ọzoo ẹno; eze egude mma ndu edeje ẹkwo byikata iya ye l'ọku epfu ono. O mee ya nno; jasù ẹkwo aphuphu ono kekọta ọku. ²⁴Ọphu eze; yẹe ndu ejeru iya ozi, bú ndu tǔkoru opfu ono g'ọ ha nùma ono egoshiduru lẹ ndzù agù pẹ; ọphu ẹphe alakaduru uwe pẹ. ²⁵Ẹlunatanu; yẹe Delaya; yẹe Gemaraya rwokpoo eze sù iya g'ọ tọ kposhi ẹkwo aphuphu ono ọku; ọphu o yeduru pẹ onu. ²⁶Ọ búchiaru iphe, o meru; mbù eze bú l'ọ tǔru ekemu sù gẹ Jierahumelu, bú nwa iya; yẹe Seraya nwa Azuriyelu; yẹe Shelemaya nwa Abudelu; g'ẹphe je egude Baruku, bú onye edeje ẹkwo; yẹe Jieremaya, bú onye mpfuchiru. Obenu lẹ Chipfu domiru pẹ.

²⁷Eze kpochaepho ẹkwo aphuphu ono ọku; mbù ẹkwo, e deru opfu, bú Baruku deru iya iphe, Jieremaya pfuru iya g'o dee ya; Opfu Chipfu rwua Jieremaya nchì. ²⁸Ọ sù: “Wota ẹkwo aphuphu ọzo dee iphemiphe ono, dù l'ẹkwo aphuphu kẹ mbù pọ, bú ọphu ọ kpọru ọku; mbù Jiehoyakimu, bú eze ndu Jiuda. ²⁹Ọzo bú lẹ-a; karù Jiehoyakimu, bú eze ndu Jiuda; sù iya lẹ-a: Wakwa iphe, Chipfu epfu baa: Ị kpọru ẹkwo aphuphu ono ọku sù: ‘?Bù gùnu meru g'o gude i dee ya sù l'eze ndu Bábilonu byafutaje bya emebyishia alì-a mee gẹ nemadzù yẹe anù ta adùhe iya?’ ³⁰Ọo ya bú lẹ-a; wakwa iphe, Chipfu epfu baa l'opfu ẹhu Jiehoyakimu, bú eze ndu Jiuda: O too nwekwarù onye e-shi iya l'ẹhu, a-nọdu l'aba-eze Dévidi. Odzu iya bẹ aa-togbo l'etezi; l'ọ dabyiru; anwù echia ya l'eswe; iji adaa kpua ya l'enyashi. ³¹Mu a-nù iya aphù; yẹe unwegirima iya; yẹe ndu ejeru iya ozi; kele ẹphe eme ejo-iphe. Iphe, búkpoo ejo iphe-ẹhuka ono, mu sùru lẹ mu e-me pẹ ono bẹ mu e-mekotacha pẹ; ẹphe lẹ ndu bu lẹ Jierúsalemù me ndu Jiuda. Noo kele ẹphe ta ngaduru mu nchì.”

³²Tòbudu iya bú; Jieremaya bya ewota ẹkwo aphuphu ọzo; bya eworu iya nù Baruku nwa Neraya, bú onye edeje ẹkwo. Jieremaya byakwa bya epfuaru iya iphe, oo-de iya; Baruku byakwa bya edekọta iya iphe, búkpoo iphe, shi dù l'ẹkwo aphuphu ọphuu, ọ kpọru ọku; mbù Jiehoyakimu, bú eze ndu Jiuda. E yebakwaa ya pọ ikpoto iphe ọzo, dǔgbakwapho g'ono.

Jieremaya eje mkpọro

37 ¹Zedekaya nwa Jiosáya bẹ Nebukadineza, bú eze ndu Bábilonu meru eze ndu Jiuda. Ọ búru iya bú eze nọchia ẹnya Jiehoyakinu

bụ nwa Jiehoyakimu. ²Yēbedua l'onwiya; mē ndu ejeru iya ozi; mē ndu alī ono l'ophu ta adūdu onye ngarū nchī l'opfu ono, Chipfu gbē l'ōnu Jieremaya, bụ onye mpfuchiru pfua ono.

³Eze, bụ Zedekaya bya ezia Jiehukalu nwa Shelemaya; yē onye uke, bụ Zefanaya nwa Maseya g'ēphe jepfu Jieremaya, bụ onye mpfuchiru je ezia ya ozia sū iya-a: “Pfu opfu ēhu anyi nū Chipfu, bụ Chileke anyi jikonu.”

⁴Teke ono bē Jieremaya nweru onwiya; kēle e teke atūdu iya mkpōro teke ono. ⁵Mbū lē ndu ojōgu Fero-a wufutaru l'alī ndu Ijiputu. O be gē ndu Bābilonu, bụ ndu nō-pheru Jierúsalemū mgburugburu nūmaru abya-bya ndu Ijiputu ono; ēphe wufu parū Jierúsalemū haa.

⁶Tōbudu iya bụ; Opfu Chipfu bya erwua Jieremaya, bụ onye mpfuchiru nchī sū: ⁷“Wakwa iphe, Chipfu, bụ Chileke ndu Ízurelū epfu baa: Unu karū eze ndu Jiuda, ziru unu g'unu bya akpata mu ishi: ‘Ndu ojōgu Fero-a, zefutaru bya unu eyeru ēka-a l'e-mechakwaa laa alī phe, bụ alī ndu Ijiputu. ⁸Noo teke ndu Bābilonu a-lwa azū bya etsoo mkpūkpū-a oḡu; lwūta iya l'ōgu tūa ya ōku; ōku etsufu iya.’

⁹“Wakwa iphe, Chipfu epfu baa: Unu ba nōdukwa eme onwunu eswe l'ēka unu arī sū lē ndu Bābilonu ta adūkwā iphe, e-me g'ēphe be mecha haa unu. Ephe taa hakwa unu! ¹⁰Ōme ō būkponu kē g'unu mekpekōta ndu ojōgu ndu Bābilonu l'ophu, bụ ndu etso unu oḡu; ō buerupho ndu e mekarū iphe phōduru lē mkpu, ēphe tūru; ēphe afūtale-a bya akpōo mkpūkpū-a ōku.”

¹¹Ndu Bābilonu wufuchaepho lē Jierúsalemū, bụ iphe, kparū iya nū bụ ndu ojōgu Fero, eze gbiigbii abyapfuta phe; ¹²Jieremaya gbēshi lē Jierúsalemū jeshia alī ndu Benjiaminu g'o je etsoru ndu ēka ono keta okiphe iya. ¹³O -rwuēpho ōnu-abata Benjiaminu; onye-ishi ndu nche, ēpha iya bụ Irayijia, bụ nwa Shelemaya nwa Hananaya gude iya sū l'ōogbalawa agbapfu ndu Bābilonu.

¹⁴Jieremaya sū iya: “Ō kwa ūka. Mu ta agbalakwa agbapfu ndu Bābilonu.” Ophu Irayijia angaduru iya rō nchī. Ō bụ-chia iphe, o meru bụ l'ō guderu Jieremaya kpūta iya kpūjeru ndu-ishi. ¹⁵Ēhu ghuahaa ndu-ishi ono egbu l'opfu ēhu Jieremaya. Ephe zia; e chia ya iphe woru iya tūa mkpōro l'ūlo Jionatanu, onye edeje ēkwo, bụ ēka ephe meru; ō buru ūlo mkpōro.

¹⁶E woru Jieremaya kpūru ye lē mkpōro l'obu-alī; ō nōkpoo l'ēka ono nōo ōdu. ¹⁷Tōbudu iya bụ; eze, bụ Zedekaya bya ezia; e je eduta iya dujeru iya. Ō jīa ya lē mpya sū iya:

“Ō nweru opfu, shi l'ēka Chipfu tōo?”

Jieremaya sū iya: “Ee; aa-kpūru ngu ye l'ēka eze ndu Bābilonu.”

¹⁸No iya; Jieremaya bya asūkwapho eze, bụ Zedekaya: “?Bū ḡunu bụ iphe-eji, mu meru ngu; ōzoo ndu ejeru ngu ozi; ōzoo ndu-a l'ophu, meru

g'o gude i tua mu mkporo? ¹⁹?Denu ndu mpfuchiru ngu ono, bu ndu shi epfujeru unu mpfuchiru su: 'Eze ndu Babilonu tee tsokwa ngu ogu; ophu ephe etsokwa ali-a ogu?' ²⁰Obenu le nta; nnajiuphu mu, bu eze; jiko ngabekpodapho nchi larworwo, mu arwo ngu. Mbua; te eduphukwa mu azu l'ibe Jionatanu, bu onye edeje ekwo; odumeka be mu a-nwuhukwa l'eka ono." ²¹Tobudu iya bu; eze, bu Zedekaya bya eworu ekemu tua su g'e woru Jieremaya dobe l'oma-unuphu eka ndu nche anoje; g'a nuje iya ishi buredi mboku-mboku; mbukwa udu buredi, ndu egheje buredi gheru; g'a nuje iya ya jasu buredi, no le mkpukpu abvube. O buru iya bu le woru Jieremaya dobe l'oma-unuphu eka ndu nche anoje; o nodu l'eka ono.

Echie Jieremaya l'oke iduma

38 ¹Shfataya nwa Matanu; yee Gedalaya nwa Pasho; yee Jiehukalu nwa Shelemaya; yee Pasho nwa Malukayijia numa iphe, Jieremaya anoduje epfuru ndu Jiuda l'ophu; kele osuje: ²"Wakwa iphe, Chipfu epfu baa: 'Onye no le mkpukpu-a a-lakwa l'ogu-echi; yee okpa-nri; yee ejo iphe-ememe. Obenu l'onye lapfuru ndu Babilonu a-nodu ndzu. Oo-gude ndzu iya gbalaa je anodu ndzu.' ³Temanu-a; wakwa iphe, Chipfu epfu: 'Mkpukpu-a ta adukwa iphe, e-me g'e te woru iya ye l'eka ndu ojogu eze ndu Babilonu, bu onye e-mechaa lwuta iya l'ogu.'"

⁴Tobudu iya bu; ndu-ishi bya asu eze-a: "G'e gbukwaa nwoke-a. Oomekwa g'ike bvu ndu ojogu, bu nwa ndu ophu phoduru nu le mkpukpu-a; yee ndu-a l'ophu; o buru iphe ono, oopfu anu phe ono akpa iya. Nwoke-a ta abukwa iphe, a-duru ndu-a ree be ocho; o kwa iphe, e-mebyi phe emebyi."

⁵Eze, bu Zedekaya yeeru phe onu su phe: "O nonu unu l'eka; mbedua, bu eze ta adukwa iphe, mu akposhi unu ememe."

⁶Tobudu iya bu; ephe kpata Jieremaya jeye l'oke iduma Malukayijia, bu nwa eze. Oke iduma mini ono no l'oma-unuphu eka ndu nche anoje. O buru eri be ephe turu iya seru ye l'iduma obu. Teke ono be mini ta adudu l'iduma ono. Iphe, du iya nu buru epuchi. Jieremaya buru bvubvurubvu l'epuchi ono.

⁷No iya; Ebedu-Meleku, bu onye Kushi; bya aburu onye eleta ibe eze enya numa l'e yeru Jieremaya l'oke-iduma mini. O be g'eze no anoo l'onu-abata Jierusalemu, bu Onu-abata Benjiaminu; ⁸Ebedu-Meleku shi l'ibe eze tugba jepfu eze je asu iya: ⁹"Nnajiuphu mu, bu eze; iphemiphe-a, ndu-a meru Jieremaya onye mpfuchiru-a bukwaa ejo-iphe be ephe meru. G'ephe woru iya ye l'ime oke iduma go nodu l'eka ono g'egu gbua ya; l'ebe abu le nri dukwadu le mkpukpu."

¹⁰Tobudu iya bu; eze bya atuaru Ebedu-Meleku bu onye Kushi ekemu su iya: "Duta ukporo umadzu l'umadzu iri l'eka-a g'unu l'ephe swiru je esefuta Jieremaya, onye mpfuchiru l'oke iduma ono; a -nonya o nwuhu."

¹¹No iya; Ebedu-Meḷeku bya achiṭa ndu ono; eḷphe l'iya swiṛu jeshia. O bya abahū l'ibe eze l'ulo, eedobeje iphe bya achiṭa nkiriḷa ukpo yeḷe nkiriḷa eḷkwa l'eḷka ono bya egude eri seru iya nū Jieremaya l'ime oke iduma ono. ¹²Ebedu-Meḷeku, onye Kushi bya asū Jieremaya-a: “Woru nkiriḷa ukpo yeḷe nkiriḷa eḷkwa-a deḷe l'eḷka g'ō buṛu ewu l'eḷka iṭu onwongu eri ono!” Jieremaya bya eworu iya mee nno. ¹³Eḷphe gude eri ono selita iya eli sefuta l'ime oke iduma ono. Jieremaya byakwa bya anōdu l'oma-unu-phu eḷka ndu nche anōje.

Zedekaya akpata Jieremaya ishi ozo

¹⁴Toḷbudu iya bu; eze, bu Zedekaya bya ezia; e je ekua Jieremaya, bu onye mpfuchiru. O bya; e duta iya bahū l'ōnu-abata k'eṭo, bu ophu e shi abahū l'eze-ulo Chipfu. Zedekaya bya asū iya: “Mu abyakwa ngu aḷi aḷi. Ta adukwa iphe, ii-domiru mu edomi!”

¹⁵Jieremaya sū Zedekaya-a: “Mu -yeeru ngu ōnu; ?tii gbudu mu nū? Teke mu chi-koshiru ngu idzu; o tō buḷu l'ii-yeru mu ōnu.”

¹⁶Zedekaya ribuaru Jieremaya angū lē mpya sū iya: “Eshinu Chipfu nō ndzū g'ō nō iya-a, bu onye meru anyi nōdu atū unme; mu tee gbukwa ngu; ophu mu akpukwaru ngu eye l'eḷka ndu achiḷo ndzū ngu.”

¹⁷Toḷbudu iya bu; Jieremaya bya asū Zedekaya-a: “Wakwa iphe, oopfū baa; mbū Chipfu, bu Chileke; bya abūru Okalibe-Kakōta-Ike; buṛu Chileke ndu Ízureḷu; sū-a: I -woru onwongu ye l'eḷka ndu-ishī l'alī eze ndu Bábilonu; bē ndzū ngu a-du; ophu aa-kpōdu mkpukpu-a ōku; gūbedua gū lē ndibe ngu g'unu ha anōdu ndzū. ¹⁸Obenu teke o bu l'i tii woduru onwongu eye l'eḷka ndu-ishī l'alī eze ndu Bábilonu bē ee-wokwaru mkpukpu-a ye l'eḷka ndu Bábilonu; eḷphe akpōo ya ōku; ophu gūbedua l'onwongu eshikwa phe l'eḷka anahū.”

¹⁹Eze, bu Zedekaya sū Jieremaya-a “Ndu mu atsu ebvu bukwa ndu Jiuda, bu ndu ophu wowaru onwophe ye l'eḷka ndu Bábilonu; lē ndu Bábilonu a-kpukwaru mu nū phe; eḷphe emelaha mu omeliwe.”

²⁰Jieremaya sū iya: “Eḷphe taa kpukwaru ngu eye phe l'eḷka. Oo epho g'i mee olu Chipfu, bu iya bu iphe-a, mu epfuru ngu-a. Oo ya bu l'ō dūru ngu lē ree; tēme ndzū adū ngu. ²¹Obenu teke i jikaru l'i tii woduru onwongu eye phe l'eḷka; wakwa iphe, Chipfu kpuharū goshi mu baa; ²²Iphe, bukpoō unwanyi ono, a harū l'ibe eze ndu Jiuda ono bē aa-chitahakwaa chijeru ndu-ishī l'alī eze ndu Bábilonu. Unwanyi ono epfuaharū ngu sū ngu:

“ Eḷphe dephukwaru ngu
 edephu;
 bya eworu ngu mekpee;
 mbū ndu ono, bu ònyà ngu,
 i kpōru obu yeru ono.
 Nta-a bē ōkpa mihuwaru ngu

l'ẹpuchi.

Ndu ọnyà ngu phẹ ono parụ
ngu haa gbakashihu.'

²³“Unyomu ngu g'ẹphe ha; yẹ ẹnwegirima ibe ngu bẹ aa-tụko chifuta chitaru ndu Bábilonu. Ophu gubedua l'onwongu anahukwa phẹ agbala; ọ chikwaa iphe, e-me nù bụ l'eze ndu Bábilonu e-gude ngu; tẹme ọzo bụ lẹ mkpukpu-a bẹ aa-kpọkwa ọku.”

²⁴Tọbudu iya bụ; Zedekaya bya asụ Jieremaya: “Ba adukwa onye ii-me g'ọ maru ụja mu lẹ ngu-a; ọdumeka bẹ ee-gbukwa ngu. ²⁵Ndu-ishi -nụma lẹ mu pfuru yeru ngu; ẹphe -byapfuta ngu bya asụ ngu: ‘Pfuaru anyi iphe, i pfuru eze; yẹ ọphu eze pfuru ngu. Be domikwaru iya anyi; ọdumeka bẹ anyi e-gbukwa ngu!’ ²⁶Ọo ya bụ l'ii-sụ phẹ-a l'ọ kwa arwọrwo bẹ i shi arwọ eze g'ọ to duphukwa ngu azụ l'ibe Jionatanu g'i je anọdu l'ẹka ono nwuhu.”

²⁷E mechaa; ndu-ishi ono g'ẹphe ha tuko byapfuta Jieremaya bya ajja ya. O woerupho iphe ono, eze sụru g'ọ pfuaru phẹ ono woru pfuaru phẹ. Ophu ọ duedu iphe ọzo, ẹphe epfujeba; kele ọ tọ dudu onye nūmaru ụja, ẹphe bọru.

²⁸Jieremaya nọdu l'oma-unuphu ẹka ndu nche anọje l'ẹka ono gbiriri jasụ mbọku, a lwutaru mkpukpu Jierúsalemụ l'ọgu.

Adada Jierúsalemụ

(2Ndu 25:1-7; 2Iphe 36:13-21; Jier 52:3-11)

39 ¹Tọbudu iya bụ; o be l'apha, kwe Zedekaya apha tete, ọ wataru aburu eze; l'abalị k'iri l'onwa iri; eze ndu Bábilonu, bụ Nebukadineza chita ikpoto ndu ojogu iya; ẹphe byatashia Jierúsalemụ; bya ekepheta mkpukpu ono mgburugburu. ²No iya; o rwukwaa l'abalị ke tete l'onwa k'eno l'apha, kwe Zedekaya apha iri lẹ nanu; e tsukposhia igbulọ, e gude kpụ-pee mkpukpu ono mgburugburu. ³Ọ buru iya bụ lẹ ndu-ishi l'alị eze ndu Bábilonu awubata bya adọru l'onu-abata Echilabọ lẹ mkpukpu ono. Ndu ọbu bụ: Negalu-Sareza; yẹ Samuga-Nebo; waa Sarisekimu onye bụ iya bụ ishi ndu eleta ibe eze ẹnya; yẹ Nẹgalu-Sareza, bụ iya bụ ishi ndu ejeru eze ozi; waa iphe, bukpuo ndu bụ ishi l'alị eze ndu Bábilonu.

⁴O be gẹ Zedekaya, bụ eze ndu Jiuda yẹ ndu ojogu iya l'ophu humaru phẹ; ẹphe ye ọkpa l'oso gbalaaha. Ẹphe gude ẹnyasi wufu lẹ mkpukpu ono. Ẹka ẹphe shiru gbalaa bụ l'onu oguzo ono, dū lẹ mgbaka igbulọ labọ ono, dū lẹ mgboru mgbabu eze. Ọ buru ẹka ẹphe shiru bụ ụzo nsuda Araba. ⁵Ọle ndu ojogu ndu Bábilonu chipyaberu phẹ je agbapfu Zedekaya lẹ baswaa alị, dū lẹ Jieriko. Ẹphe gude iya kpuru iya kputaru Nebukadineza, bụ eze ndu Bábilonu lẹ mkpukpu Ribula l'alị Hamatu, bụ ẹka ọ nọ nmaa ya ikpe. ⁶Ọ buru lẹ Ribula l'ẹka ono bẹ eze ndu Bábilonu nọ gbushia

unwu Zedekaya. Zedekaya nõdu ele iya ɛnya; ɔ nõdu egbushi phe. Ɔ bya kwapho bya atuko ndu a maru amaru l'alì ndu Jiuda gbushikota. ⁷Ɔ bya aswoshia Zedekaya akpuru ɛnya; bya egude ɛgbirigba, e meru l'onyirubvu tɔ ya mkporo kpɔta lashia Babilonu.

⁸Ndu Babilonu ono woru oku tɔa l'ibe eze ono; yee ɔlo ndiphe; bya enwukposhia igbulo, e gude kpɔ-pee Jierusalemu mgburugburu. ⁹Nebuzaradanu, bu onye-ishi ndu ojogu, anoduje eche eze ndu Babilonu nche; tuko nwanu phoduru nu le Jierusalemu ono; yee ndu wowaru onwophe ye leka ndu Babilonu; waa ndu ophuu; kpɔta le ndzu lashia alì ndu Babilonu. ¹⁰Ɔle Nebuzaradanu, bu onye-ishi ndu ojogu, anoduje eche eze ndu Babilonu nche ono bu ndu ɔ haru l'alì ndu Jiuda bu ndu ukpa olemole, bu ndu adudu iphe, ephe nweru. Ɔ nõdu teke ono nuchaa phe opfu-vayinu; yee alì-egu.

¹¹No iya; Nebukadineza, bu eze ndu Babilonu tɔa ekemu-a tɔ-doru Jieremaya; o buru onye ɔ turu iya nu bu Nebuzaradanu, bu onye-ishi ndu ojogu, anoduje eze ndu Babilonu nche su. ¹²“Unu dutakwa iya leta iya ɛnya. Unu ta adukwa iphe, unu e-me iya; ɔ chikwaa iphe, ɔ sukpoerupho g'unu meeru iya; unu emeeru iya ya.” ¹³Tobudu iya bu; Nebuzaradanu, bu onye-ishi ndu ojogu, anoduje eche eze ndu Babilonu nche ono; yee Nebushazubanu, bu ishi ndu eleta ibe eze ɛnya; yee Negalu-Sareza, bu ishi ndu ejeru eze ozi; yee ndu ophuu, bu ishi l'alì eze ndu Babilonu; ¹⁴bya ezia; e je eduta Jieremaya dufuta l'oma-unuphu eka ndu nche anoje. Ephe duru iya nu Gedalaya bu nwa Ahikamu nwa Shafanu; su iya g'o duru iya laa ibe iya. Ɔ buru iya bu le yee ndibe phe anodu.

¹⁵Teke pho, Jieremaya shi nõdu l'oma-unuphu eka ndu nche anoje pho be ɔ nɔmaru Opfu Chipfu, suru iya: ¹⁶“Je akaru Ebedu-Meleku; onye Kushi; su iya: Wakwa iphe, Chipfu epfu baa; mbu Okalibe-Kakota-Ike; bya aburu Chileke ke ndu Izurelu. Su-a; mu abyaakwaa emeebe iphe, mu suru le mu e-me mkpukpu-a. Mu e-meru ɔla-l'iswi nu phe; ɔ to budu upete. O -rwuepho teke ono be iphemiphe ono e-mekota l'ogobaa ngu l'iphu. ¹⁷Ɔle mu a-nafuta ngu m'o -rwua mboku ono. Nokwa iphe, Chipfu eepfu. A taa kpuduru ngu anu ndu iitsu ebvu. ¹⁸Ɔ to dukwa iphe, e-me ge mu ta adzota ngu; k'oplu bu le tee gbudu ngu l'ogu-echi; ɔ bu-chia l'ii-gude ndzu ngu gbal; kele i kporu obu yeru mu. Nokwa iphe, Chipfu eepfu bu ono.”

Teke Gedalaya bu ochi-pha ndu Izurelu
(2Ndu 25:22-26)

40 ¹Opfu-a be Jieremaya nɔmaru l'onu Chipfu ge Nebuzaradanu, bu onye-ishi ndu ojogu, anoduje eche eze ndu Babilonu nche toha-chaeru iya pho le mkpukpu Rama. Kele ɔ byaru bya ahuma Jieremaya leka a turu iya ɛgbirigba; ephe le ndu a kpuru le ndzu, shi Jierusalemu; yee alì ndu Jiuda ala alì ndu Babilonu. ²O be g'onye-ishi ndu ojogu ono

hūmaru Jieremaya; ọ sū iya: “Chipfu, bụ Chileke ngu pfukwaru lẹ ya e-me ẹka-a omeliwe-a. ³Nta-a bẹ Chipfu mewaru iphe, o pfuru. Iphemi-phe ono mekotaru; kele unu meru Chipfu iphe-ẹji; ophu unu emeduru iphe, ọ suru g'unu mee. ⁴Ole ntanụ-a bẹ mu atufuwa ngu l'egbirigba ono, nọ ngu l'ẹka ono. Tsuru mu g'anyi la alị ndu Bábilonu m'ọ buru l'ọ dū ngu ree egube ono; ọ buru mbedua l'a-nodu eleta ngu ẹnya. Teke ọ bukwanu l'ọ tọ dudu ngu ree egube ono l'ị haa abyabya. Lekwa! Alị ẹka-a l'ophu nọkwa ngu l'iphu; jejekpọephe ẹka dū ngu ree! ⁵Ole ọ -buru l'ọ dū ngu g'ị nodu l'ẹka-a; g'ị laphu azu jepfu Gedalaya, bụ nwa Ahikamu nwa Shafanu, bụ onye eze ndu Bábilonu hofutaru g'ọ buru ọchi-ọha, nọgbaa l'alị Jiuda l'ophu; je g'unu l'iya buru l'echilabọ ndu ẹka ono; teke ọdumeka; je-kpọephe eburu l'ẹka dū ngu ree.”

No iya; onye-ishi ndu ojogu, anọduje eche eze ndu Bábilonu nche ono bya anụ iya nri, eeri eriri; bya anụ iya iphe gude meeru iya ree; bya aparuiya haa; ọ lasha. ⁶Ọ buru iya bụ lẹ Jieremaya alapfushia Gedalaya nwa Ahikamu lẹ mkpukpu Mizupa; je yele iya buru l'echilabọ ndu ọzo, bụ ndu a haru l'alị ẹka ono.

⁷O be ge ndu-ishi ndu ojogu ndu Jiuda g'ephe ha; ephe lẹ ndu nke phe, bụ ndu shi nọdugbaa l'egbudu nūmaru l'eze ndu Bábilonu hofutawaru Gedalaya nwa Ahikamu g'ọ buru ọchi-ọha l'alị ono; l'ọ wowaru unwoke; me ụnwanyi; me ụnwegirima, bụ ndu kachaa akpa nri l'alị ono; mbu ndu ophu a ta akpuduru lẹ ndzu laa alị ndu Bábilonu; ye iya l'ẹka; ⁸ephe wufuta wu-pfuta Gedalaya lẹ mkpukpu Mizupa. Ndu byaru nu bụ Ishimelu nwa Netanaya; yee Jiohananu; yee Jionatanu, bụ unwu Kareya; waa Seraya nwa Tanuhumetu; waa unwu Efayi onye Netofa; yee Jiezanaya, bụ nwa onye Maka; ephe lẹ ndu nkephe. ⁹Gedalaya, bụ nwa Ahikamu nwa Shafanu bya eribuaru ephe lẹ ndu nkephe ono nte sū phe: “Unu ta tsukwa ebvu anodu ndu Bábilonu l'ẹka. Unu nọdukpọephe l'alị ono jeeru eze ndu Bábilonu ozi g'ọ duru unu lẹ ree. ¹⁰Mbedua l'onwomu a-nodu lẹ mkpukpu Mizupa nọ-chije ẹnya unu l'iphu ndu Bábilonu, bụ ndu-a, byapfutaru anyi-a; obenu l'unu a-nodu akuta mee; awo akpuru oshi onanwu; yee manu woru kwachia l'ẹka unu edobeje iya; unu eburu lẹ mkpukpu-a, unu natagbaaru-a.”

¹¹O be teke iphe, bukpo ndu Jiuda, nọ l'alị ndu Mowabu; yee ndu ophu nọ l'alị ndu Amonu; yele ndu k'alị ndu Edomu; mekpoo ndu ophu nọgbaa l'ohamoha ọzo; nūmaru l'eze ndu Bábilonu nweru nwa ndu ọ haru haa l'alị ndu Jiuda; bya eworu Gedalaya, bụ nwa Ahikamu nwa Shafanu mee onye-ishi phe; ¹²ephe tuko lwakota alị ndu Jiuda; lwapfuta Gedalaya lẹ mkpukpu Mizupa; shigbaa l'ẹka ephe shi gbachaa nanu nanu. Ephe kwatakpo kua mee kua k'etsutsu iya; bya awo akpuru oshi onanwu; woshia ya ike.

¹³Ọ buru iya bụ lẹ Jiohananu nwa Kareya; yee ndu-ishi ndu ojogu ono l'ophu, nọkwadu l'egbudu ono bya abyapfuta Gedalaya lẹ Mizupa ¹⁴bya

asụ iya: “?Ị maru-a lẹ Balisu, bụ eze ndu Amonu zikwaru Ishimelu nwa Netanaya g'ọ bya egbua ngu?” Ophu Gedalaya nwa Ahikamu ekwetaduru iphe, ephe epfu.

¹⁵ Tọbudu iya bụ; Jiohananu nwa Kareya bya ejepfu Gedalaya lẹ mpya lẹ Mizupa je asụ iya: “Gẹ mu jenu egbua Ishimelu nwa Netanaya g'ọ tọ du onye a-maru nū. ?Denu g'ọ gude e je l'aha iya g'ọ gbua ngu mee ndu Jiuda l'ophu, bụ ndu nọru ngu mgburugburu g'ephe gbakashihu; mee gẹ nwa ndu Jiuda ndu ophu phoduru nū laa l'iswi?”

¹⁶ Obenu lẹ Gedalaya nwa Ahikamu sūru Jiohananu nwa Kareya-a: “E jekwa eme iphe, dū egube ono. Iphe ono, iipfu l'opfu ẹhu Ishimelu ono ta abukwa okpobe opfu.”

41 ¹ No iya; o be l'onwa k'esa; Ishimelu, bụ nwa Netanaya nwa Elishama; mbụ onye shi l'unuphu ndu eze; bya aburu onye yi lẹ ndu-ishi, nọru l'eka eze; bya achiru umadzu iri gude byapfuta Gedalaya nwa Ahikamu lẹ mkpukpu Mizupa. Ephe wataepho eri nri l'eka ono; ² Ishimelu nwa Netanaya yee umadzu iri pho, yele ephe swi pho wu-lihu woru Gedalaya, bụ nwa Ahikamu nwa Shafanu gbua. O buru ogu-echi be ephe gude gbua onye ono, eze ndu Babilonu hotaru g'ọ nodu buru ishi l'alị ẹka ono. ³ Ishimelu tukokwapho ndu Jiuda, ephe lẹ Gedalaya nọ lẹ Mizupa; yee ndu ojogu ndu Babilonu, nọ l'eka ono gbushia.

⁴ A nọepho ujiku lanu g'e gbucharu Gedalaya; kele o tọ dukpodaro onye mawaru nū teke ono; ⁵ Ukporo umadzu eno tuko kpushia ejí-agba; bya agbajashia uwe phe; bya egbukashichaa onwophe onyá wuru bya. Eka ephe shi buru lẹ mkpukpu Shekemu; yee Shilo; waa Samériya. Ephe gude ngweja-nri; waa unwu-isensu gude abya l'ulo Chipfu. ⁶ Ishimelu nwa Netanaya bya eshi lẹ Mizupa tugbua je agba phe ndzuta; ara ekwa eje. O jepfue phe pho o sụ: “Unu byapfutakwa Gedalaya nwa Ahikamu!” ⁷ Ephe bahuepho l'ime mkpukpu ono; Ishimelu nwa Netanaya; yee ndu ephe l'iya nọ woru phe gbua chiru phe ye l'eze iduma mini. ⁸ Umadzu iri l'ime phe sụ Ishimelu-a: “Te gbukwa anyi! Anyi nweru witi; yele balị; bya enweru manụ; yee manụ-enwu, anyi domiru l'egbudu.” O parụ ephebedua haa; ophu o gbuduru phe yeru ndu ophuu. ⁹ No iya; eze iduma mini ono, o chiru odzu ndu ono, o gbushiru ye ono; bụ eze, bụ Asa turu iya g'ọ buru iphe, ya gude adzo ndu alị iya l'eka Basha, bụ eze ndu Izurelu. O buru iya be Ishimelu nwa Netanaya gude odzu ndu ono, o gbushiru ono kpojia.

¹⁰ Ishimelu bya atuko ndu nokota lẹ Mizupa kpukota lẹ ndzụ; mbụ unwada eze yee ndu ozokpo, bụ ndu phoduru nū l'eka ono, bụ ndu Nebuzaradanu, bụ onye-ishi ndu ojogu, anoduje eche eze ndu Babilonu nche; hotaru Gedalaya nwa Ahikamu g'ọ buru ishi phe. Ishimelu nwa Netanaya kpukota phe lẹ ndzụ kpuru phe ye; ephe lashia lapfushia ndu Amonu.

¹¹ O be gẹ Jiohananu nwa Kareya; yee ndu-ishi ndu ojogu g'ephe ha, bụ ndu ephe l'iya nọ; tukoru ejo-iphe ono, Ishimelu nwa Netanaya meru ono

nụmakota; ¹² ẹphe duta ndibe pẹ l'opfu jeshia etso Ishimelu nwa Netanaya oḡu. Ẹphe l'iya je edzugba lẹ mgboru oke okpuru ono, nọ lẹ mkpukpu Gibiyonu ono. ¹³ O be gẹ ndu Ishimelu chi je oḡu ono g'ẹphe ha humaru Jiohananu nwa Kareya; yee ndu-ishi ndu ojogu, ẹphe l'iya swi; ehu tsoahaa pẹ. ¹⁴ Iphe, bu ndu ono, Ishimelu chi ono, bu ndu o kpuru lẹ ndzu lẹ Mizupa ono dakobe wu-pfu Jiohananu nwa Kareya. ¹⁵ Obenu lẹ Ishimelu nwa Netanaya; yee umadzu esato l'ime ndu ono, ẹphe l'iya swi ono nahuru Jiohananu gbalaa gbapfu ndu Amonu.

Agba ala Ijiputu

¹⁶ Tobudu iya bu; Jiohananu nwa Kareya; yee ndu-ishi ndu ojogu, bu ndu ẹphe l'iya nọ; bya achita ndu ono, phoduru nu ono; mbu ndu Ojogu; me unwanyi; mekpoo unwegirima; me ndu eleta ibe-eze enya; g'ẹphe ha bu ndu Ishimelu nwa Netanaya shi kpa lẹ ndzu lẹ Mizupa g'o gbuchaaru Gedalaya nwa Ahikamu; Jiohananu tuko pẹ shi lẹ Gibiyonu chi-phuta azu. ¹⁷ Oo ya bu; ẹphe tugbukpoeppo; jasu ẹphe jerwua mkpukpu Gerutu Kimuhamu, nọ lẹ mgboru Betulehemu; eka ẹphe phoberu eje ali ndu Ijiputu; ¹⁸ g'ẹphe gude nahu ndu Babilonu. O buru ebvu be ẹphe atsụ pẹ; kele Ishimelu nwa Netanaya gburu Gedalaya nwa Ahikamu, bu onye eze ndu Babilonu hotaru mee onye-ishi l'ali ono.

42 ¹ Tobudu iya bu; ndu-ishi ndu ojogu g'ẹphe ha; mekpoo Jiohananu nwa Kareya; yee Jiezanaya nwa Hoshaya; mekpoo ndu ono g'ẹphe ha; eshi lẹ ndu ophu kachaa alwa ali jasu lẹ ndu ophu kachaa shii; tuko bya awu-pfu ² Jieremaya, bu onye mpfuchiru je asu iya: “Jiko numakpodapho arworwo, anyi arwo ngu g'i pfuru nu Chipfu, bu Chileke ngu l'opfu ehu nwa ndu-a, phoduru nu-a g'ẹphe ha. Kele-a; g'iilena; a makwaru-a l'anyi shi du igwerigwe; nta-a buwaa nwa ndu abadu ishi phoduru. ³ Pfuru nu Chipfu, bu Chileke ngu g'o karu anyi uzo, anyi e-shi; yee iphe anyi e-me.”

⁴ Jieremaya, bu onye mpfuchiru su pẹ: “Mu numakwaru iphe, unu pfuru. Mu e-pfukwaru-a nu Chipfu, bu Chileke unu, bu iphe, unu arwo. Mu -mechaa; mu akaru unu iphemiphe, Chipfu epfu; ophu o dukpodaa ophu mu emeru unu lẹ mpya.”

⁵ No iya; ẹphe su Jieremaya-a: “Ge Chipfu bukwaru onye-ekebe, epfu ire-lanu; yee onye e gude ire iya eka l'opfu ehu anyi lẹ ngu; me o -buru l'anyi te emeduru iphemiphe, Chipfu, bu Chileke ngu suru gi su anyi g'anyi mee. ⁶ O -je l'aduru anyi lẹ ree; o je l'aduru anyi eji be anyi e-me iphe, o suru g'anyi mee; mbu Chipfu, bu Chileke anyi; bya aburu onye anyi ezi ngu g'i jepfu g'oduru anyi lẹ ree m'anyi mee olu Chipfu, bu Chileke anyi.”

⁷ A nepho abali iri; olu-opfu Chipfu rwua Jieremaya lẹ nchi. ⁸ O ya ekukobe Jiohananu nwa Kareya; yee ndu-ishi ndu ojogu ono g'ẹphe ha,

bù ndu ephe l'iya nõ; mẽ ndu ẹka ono l'ophu; e -shikpọ l'onye kachaa alwa alì jasù l'onye kachaa shii. 9 O sù phẹ-a: “Wakwa iphe, Chipfu epfu baa; mbù Chileke ndu Ízurẹ̀lu, bù onye unu yeru mu sù gẹ mu je arwọ̀ru unu arwọ̀wo. O sùru-a: 10 ‘O -bùru l'unu nõ l'alì ẹka-a; ya a-kpua unu g'akpuje ọ̀lo-a; ya taa lakashìdu unu alakashì. Ya a-dza unu adzadza; ya tee phefudu unu ephetu. Kele iphe-ẹhuka, ya meru unu jee; atsùwaa iya l'ẹhu.’ 11 Wakwa iphe, Chipfu epfu baa: ‘Unu ba atsùkwa eze ndu Bábilọ̀nu ebvu, bù onye ono, unu atsù ebvu nta-a ono. Unu ba atsùkwa iya ebvu; kele mu nõkwa swiru unu eswiru; mu je l'adzọta unu; nafuta unu l'ẹka iya. 12 Mu a-phuru unu obu-imemini k'ọ̀phu imemini unu a-dù iya; l'ọ haa g'unu nõdu l'alì unu.’

13 “Obenu lẹ-a; ọ -bùru l'unu sùru l'unu taa nõdukwa l'alì-a; unu eshi ẹgube ono kwefuru Chipfu, bù Chileke unu ike. 14 Teke ọ bukwanu l'unu sùru waawaa; l'unu e-je eburu l'alì ndu Ijiputu, bù ẹka unu taa hùmadu ọ̀gu l'ẹnya; ọ̀phu unu anùmadu opu-ọ̀gu; ọ̀phu ẹgu nri agùdu unu; 15 Oo ya bù; unu nùmakwa olu-opfu Chipfu; unubẹ nwa ndu phọ̀duru nù l'alì ndu Jiuda. Wakwa iphe, oopfu baa; mbù Chipfu, bù Ọkalibe-Kakọta-Ike; bya abùru Chileke kẹ ndu Ízurẹ̀lu: ‘O -bùru l'unu pfuwaru iya hoo haa l'unu a-la Ijiputu; unu nõdu eje eburu l'ẹka ono; 16 bẹ ogu-echi ono, unu atsù ebvu ono a-gbapfutakwa unu l'ẹka ono; tẹme ọkpa-nri ono, ndzù iya agu unu ono etsoru unu lashìja alì ndu Ijiputu. O bùru l'ẹka ono bẹ unu a-nọ̀du nwùhu. 17 Mbù lẹ-a; iphe, bukpoò ndu ono, gburu iya tororo l'ẹphe a-la Ijiputu je eburu ono bukwa iphe, e-gbu phẹ nù bù ogu-echi; yẹe ọkpa-nri; waa ẹjo iphe-ememe. Ophu ọ dukwa g'ọ ka mma l'ọo onye lanù a-lwa nù; ọ̀zokwanu nahù iphe-ẹhuka, mu e-me g'ọ dapfu phẹ.’ 18 Wakwa iphe, oopfu baa; mbù Chipfu, bù Ọkalibe-Kakọta-Ike; bya abùru Chileke ndu Ízurẹ̀lu. Sù-a: ‘O kwa gẹ mu tukoshiru ndu bu lẹ Jierúsalemù oke ẹhu-eghu mu; noo gẹ mu a-tùkoshi iya unu; mẽ unu laa Ijiputu. Unu a-bùru iphe, e gude atù ọ̀nu; yẹe iphe, anyì ishi ẹdzu; waa iphe e gude achì ọchi; yele iphe, e gude ephu l'iphu; ọ̀phu unu egudebaẹdu ẹnya unu ahùma alì ẹka-a ọzo.’

19 “Unubẹ nwa ndu phọ̀duru nù l'alì ndu Jiuda; Chipfu pfuakwaru iya unu sù unu g'unu ba lakwa Ijiputu! Unu makwarù l'ọo ọkwa bẹ mu anmarù unu ntanù-a 20 l'ọ kwa emeswe bẹ unu mesweru onwunu teke unu ziru mu sù gẹ mu jepfu Chipfu, bù Chileke unu; mbù teke unu sùru mu-a gẹ mu pfuẹshiduru nù Chipfu, bù Chileke unu l'iswi ẹhu unu. Gẹ mu pfuaru unu iphemiphe, o pfuru; hùma l'unu e-mekọta iya! 21 Mu pfuakwaru iya unu ntanù-a; obenu l'unu te ekwedu eme iphe, Chipfu epfu l'ime iphe, ọ sùru gẹ mu pfuaru unu. 22 Nta-a bù lẹ-a; g'ọwa-a dokwaa unu ẹnya; ọ kwa iphe, e-mechaa gbua unu l'ẹka ono, unu eje eburu ono bù ogu-echi; yẹe ẹgu; yẹe ẹjo iphe-ememe.”

43 1 O be gẹ Jieremaya pfuchaaru ndu ono iphemiphe ono g'ọ ha, bù Opfu Chipfu, bù Chileke phẹ; mbù iphemiphe ono, Chipfu ziru

iya sù g'o pfiaru phẹ ono; ²Azariya nwa Hoshaya; yee Jiohananu nwa Kareya; yee iphe, bukpuo ndu ono g'ephe ha, bu ndu eku onwophe ono tukò sù Jieremaya-a: “Oo ùka bẹ iidzu! Chipfu, bu Chileke anyi te zikwaru ngu g'i bya asù g'anyi te ejekwa eburu lẹ Ijiputu! ³Oo Baruku nwa Neraya l'enwu ngu eye g'i pfiaru anyi iphe, a-buru anyi ogo; g'eeshi g'e woru anyi ye l'eka ndu Babilonu g'ephe gbushia anyi; ozoo kpua anyi lẹ ndzu lashia ali ndu Babilonu.”

⁴Tobudu iya bu; Jiohananu nwa Kareya; yee ndu-ishi ndu ojogu ono; mekpoo ndu ono g'ephe ha kwefu ike l'iphe, Chipfu suru g'ephe mee; l'ephe taa nodudu l'ali ndu Jiuda. ⁵O bu-chia lẹ Jiohananu nwa Kareya; yee ndu-ishi ndu ojogu ono l'ophu dutaru ndu ono, phoduru nu l'ali ndu Jiuda ono g'ephe ha; mbu ndu ono, lwaru azu bya eburu l'ali ndu Jiuda ono, shigba l'ohamoha, bu eka e shi chigbaaru phe ye. ⁶Ephe dutakwaphe iphe, bukpuo unwoke; yee unwanyi; yee unwegirima; yee unwada eze; mekpoo ndu Nebuzaradanu, bu onye-ishi ndu ojogu, anoduje eche eze ndu Babilonu nche tukoru haaru Gedalaya, bu nwa Ahikamu; buru nwanwa Shafanu; chitachaa me Jieremaya, bu onye mpfuchiru; yee Baruku nwa Neraya. ⁷No iya; ephe bahunu l'ali ndu Ijiputu; jikaghaa l'ephe tee medu iphe, Chipfu suru g'ephe mee. Ephe jekpopho jerwua mkpukpu Tahupanahesu.

⁸E rwua lẹ Tahupanahesu; olu-opfu Chipfu rwua Jieremaya nchi su: ⁹“Ge ndu Jiuda lee ngu enya; g'i haru mkpuma, ha shii pata je egude epuchi kpu-buta iya lẹ mkpoze eka eeshije abahu l'ibe eze, bu Fero lẹ Tahupanahesu. ¹⁰No iya; l'i su phe-a: ‘Wakwa iphe, oopfu baa; mbu Chipfu, bu Okalibe-Kakota-Ike, bu Chileke ndu Izurelu: Mu e-zi g'e je ekuaru mu onye-ozu mu, bu Nebukadineza, bu eze ndu Babilonu; o buru l'eli mkpuma-a bẹ oo-dobe aba-eze iya; mbu mkpuma-a, mu domiru l'eka-a; l'o bya eworu uwe agbada eze iya phushi iya l'eli. ¹¹O -bya bẹ oo-lwu-kpe ndu Ijiputu; ndu o rwuberu l'egbugbu l'o gbua phe; ndu o rwuberu l'akpu lẹ ndzu l'o kpua phe lẹ ndzu; ndu o rwuberu l'egbu l'ogu-echi; l'o gbua phe l'ogu-echi. ¹²Oo-tu oku l'ulo nshi ndu Ijiputu. Oo-kpo nshi phe ono oku; lwua nshi phe olwu lẹ ndzu. O buru egube ono, onye eche aturu agbaphu-je onwiya ekwa ono; noo g'oo-wota Ijiputu gbaphua onwiya; shi l'eka ono tugbua lashia l'ehu-guu. ¹³Oo-tsukposhi mkpuma, du nsò, nogbaa l'ulo enyanwu, no l'ali ndu Ijiputu; bya atuko ulo-nshi ndu Ijiputu l'ophu kpokota oku.’”

Ola-l'iswi, shi l'agwo nshi

44 ¹Opfu-a rwuru Jieremaya nchi l'opfu ehù ndu Jiuda g'ephe ha, bu ndu bu l'ali ndu Ijiputu, bu iya bu lẹ mkpukpu Migudolu; yele mkpukpu Tahupanahesu; waa lẹ mkpukpu Nofu; yele ali ndu Paturosu su: ²Wakwa iphe, Chipfu, bu Okalibe-Kakota-Ike eepfu baa; mbu Chileke ndu

Ízurèlu: “Unu hụmanuru-a oke ọla-l'iswi, mu meru ndu Jierúsalemu; yẹle mkpụkpu ndu Jiuda l'ophu. Nta-a bẹ ẹphe bụwaa ochobu; ọp̄hu ọ d̄d̄edu onye bu iya nū; 3 ọ buru iphe, kparū iya nū bụ ejo-iphe, ẹphe meru; shi nno kpatsu mu iwe; kele ẹphe watarū akp̄o ùnwù-isensu ọku anū agwa; bya aburu agwa ono, ẹp̄hebedua l'onwop̄he; ọzoo unub̄edua; ọzoo nna unu oche p̄he amaj̄eduru bẹ ẹphe watarū abarū eja. 4 Mu bya ezia ndu-ozimu, bụ ndu mpfuchiru; mu -zichaa; mu ezibaa; ẹphe je asū p̄he-a: ‘Ọp̄hu g'unu be meshi ejo ahuma-a, bụ iphe, mu kp̄oru ashi-a!’ 5 Ọp̄hu ẹp̄he angaduru nchi; ọp̄hu ẹp̄he eyekp̄odarunu ọnu; ọp̄hu ẹp̄he aghak̄obeduru haa eme ejo-iphe, ẹphe eme; ọp̄hu ẹp̄he ahaduru akp̄o ùnwù-isensu ọku anū agwa. 6 Ọ buru iya bụ lẹ mu eworu oke ẹhu-eghu mu w̄ua p̄he l'ishi. O nwua phurup̄huru tsoru mkpụkpu Jiuda l'ophu; bya etsoru ọnu gbororo Jierúsalemu; woru p̄he mee ochobu, bụ ikp̄ozu ono, ẹphe bụ ntanū ono.

7 “Nta bụ lẹ-a; wakwa iphe, Chipfu, bụ Chileke, bụ Ọkalibe-Kak̄ota-Ike eepfu baa; mbụ Chileke ndu Ízurèlu: ?D̄enu g'o gude unu n̄odu eme onwunu ẹgube ejo-iphe ọwa-a; kẹ g'unu mee g'unwoke ch̄ihu lẹ Jiuda; unwanyi ach̄ihu iya; m̄e ndu bụ unwegirima; m̄e ndu bụ nwaswa; g'ọ t̄o d̄uhe onye a-ph̄odu nū ililekp̄oo? 8 ?D̄enu g'o gude ọ buru iphe, unu gude ẹka unu mee bẹ unu gude akpatsu mu iwe; mbụ kẹ g'unu wata akp̄o ùnwù-isensu ọku anū agwa l'al̄i ndu Ijiputu, bụ ẹka unu byaru eburu-a? Unu e-mebyikwa onwunu; woru onwunu mee iphe, ee-gude ephu l'iphu; t̄eme ọhamoha, n̄o l'eliphe l'ophu an̄odu ach̄i unu ọchi. 9 ?Unu z̄ohawaru ejo-iphe, nna unu oche p̄he meshiru; ȳe kẹ ndu eze ndu Jiuda; ẹp̄hebedua m̄e unyomu p̄he; ȳe ejo-iphe, unub̄edua meru; m̄e unyomu unu; l'al̄i ndu Jiuda; ȳe ọma gbororo Jierúsalemu? 10 Byasukwa ntanū-a bẹ ẹp̄he teke ewozekwa onwop̄he al̄i; ọp̄hu ẹp̄he eke akwabekwa mu ùbvù; ọp̄hu ẹp̄he eke ekwekp̄odanu mee ekemu mu; ȳe iphe, mu t̄oru unu ọkpa iya; ȳe nna unu oche p̄he.

11 “Ọo ya bụ lẹ-a; wakwa iphe, Chipfu, bụ Ọkalibe-Kak̄ota-Ike eepfu baa; mbụ Chileke kẹ Ízurèlu: Mu gbuakwaru iya tororo sū lẹ mu a-buru unu ọgu; lẹ mu e-me unu ejo-iphe; mbụ lẹ mu e-me ḡe ndu Jiuda l'ophu ch̄ihu-gbua. 12 Mu e-wofu nwa ndu ono, ph̄oduru nū lẹ ndu Jiuda, bụ ndu ono, p̄fuwaru iya hoo haa l'ẹp̄he laf̄utaje Ijiputu je eburu ono. Ẹp̄he a-nw̄hushikota lẹ Ijiputu. Ọ buru ọgu-echi bẹ ee-gude gbutsushia p̄he; ọzoo ẹgu egbushia p̄he. Ẹp̄he e-shīep̄ho lẹ ndu kachaa nwansh̄i j̄asū lẹ ndu kachaa shii nw̄shihuepho l'ogu-echi ọzoo l'ẹgu ememe. Ẹp̄he a-buru iphe, e gude atū ọnu; ȳe iphe, anyi ishi ẹdzu; waa iphe e gude ach̄i ọchi; ȳe iphe, e gude ephu l'iphu. 13 Ndu ono, larū Ijiputu ono bẹ mu e-gude ọgu-echi n̄a aphū; ȳe ẹgu ememe; waa ejo iphe-ememe; ẹgube ono, mu meru ndu Jierúsalemu ono. 14 Ọp̄hu ọ d̄d̄u ndu ono, ph̄oduru nū ono, shi al̄i ndu Jiuda ono, bụ ndu ono, byaru eburu l'al̄i ndu Ijiputu ono; d̄uru ọp̄hu a-gbala nū; ọp̄hu ọ d̄d̄u onye ọp̄hu a-wa nū k'alwa azū l'al̄i ndu

Jiuda, bu ẹka agụ phẹ alwa azụ bya eburu; ọ tọ dudu onye a-lwa nū; gba-haa nwochileka ndu gbaru ọso ọgu.”

¹⁵No iya; iphe, bu ndu ono, maru ẹ nyee phẹ anọduje akpọ ùnwù-isensu ọku anụ agwa ono; ephe l'ikpoto unwanyi, pfuru l'ẹka ono; mekpoo iphe, bu ndu bukoṭa l'alì Paturọsu, nọ l'alì ndu Ijiputu; tuko su Jieremaya-a: ¹⁶“Ozi ono, i gude ẹpha Chipfu ezi anyi ono be anyi taa ngakwaru ngu nchi. ¹⁷Iphemiphe, anyi sukpooru l'anyi e-me be anyi mefutaje. Anyi a-nodu akpọ ùnwù-isensu ọku anụ eze-nwanyi igwe; anyi agbaru iya mee gude agwa iya; egube anyibedua; yee nna anyi phe; yee ndu eze anyi phe; yee ndu-ishi anyi phe shi emeje ẹ mkpukpu, nogbaa l'alì ndu Jiuda; yele oma gbororo Jierusalemu. Teke ono be anyi shinu nweru nri shii; iphe duru anyi ẹ ree; ọphu ọ dudu iphe, shi atsụ anyi l'ẹhu. ¹⁸Obenu l'eshinu anyi haru akpọ ùnwù-isensu ọku anụ eze-nwanyi igwe; bya ahaa agbaru iya mee gude agwa iya; be ọ tọ dukpoda iphe, uko iya aduduru anyi; teme ogu-echi yee okpa-nri nodu agwa anyi maa.”

¹⁹Unwanyi bya eyekwapho onu su: “Teke ono, anyi shi akpọ ùnwù-isensu ọku anụ eze-nwanyi igwe; bya agbaru iya mee gude agwa iya; ndu alu anyi ?ephe ta amadu g'anyi shi egheje akara mee ya erengete kpua ya l'ọ du g'ọ du; anyi ebvube iya agba mee gude agwa eze-nwanyi igwe ono?”

²⁰Noo ya; Jieremaya bya asu ndu ono g'ephe ha; mbu unwoke phe; me unwanyi phe; me iphe, bukpo g'ephe ha buru ndu yeru iya udu onu ono: ²¹“O -buru k'ùnwù-isensu ono, unu shi anọduje akpọ ọku l'oma mkpukpu Jiuda ono; me l'oma gbororo Jierusalemu ono; mbu unubedua; yee nna unu phe ono; ndu eze unu phe; yee ndu-ishi unu phe; yee ndu ali-a l'ophu; Chipfu ?to nyataduru iya to? ?To batajedu iya l'egomunggo to? ²²Chipfu be ejo-iphe, unu emegbabe atsukwa l'ẹhu; mekpoo ahuma ahuma ono, unu megbaberu ono. O buru iphe ono meru g'o gude ali unu buru ochobu; bya aburu ikpozu; buru iphe, e gude ephu l'iphu; k'ophu bu l'ọ tọ dudu onye bu iya ebubu; ọ du g'ọ du ntanu-a. ²³O kwa kele unu kporu ọku l'ùnwù-isensu; yele kele unu meru Chipfu iphe-eji; ọphu unu emeje-du olu Chipfu; ọphu unu etsodu ekemu iya; ọphu unu emedu omelali iya; ọphu unu emejedu iphe, ọ suru g'e meje; meru g'o gude ejo-iphe-a dafuta unu g'ọ du ntanu-a.”

Ijiputu be aa-lwu-kpe l'ogu

²⁴Toṣudu iya bu; Jieremaya bya asu ndu ono g'ephe ha: “Unu numakwa Opfu Chipfu; unube ndu Jiuda l'ophu, bu ndu nọ l'alì Ijiputu. ²⁵Wakwa iphe, o pfuru; mbu Chipfu, bu Okalibe-Kakoṭa-Ike; bya aburu Chileke ndu Izurelu; Unubedua; unu l'unyomu unu gude onu unu pfua ya epfupfu; su l'iphe, unu riburu nte ememe ono be unu mefutaje; l'unu a-nodu akpọ ùnwù-isensu ọku anụ eze-nwanyi igwe; teme l'unu a-nodu agbaru

iya m̄e. Ngwanu; unu meekwapho iphe ono g'unu riburu nte iya ono. ²⁶Ɔo ya bu l̄-a; unu n̄makwa olu-opfu Chipfu; unub̄e ndu Jiuda l'ophu, bu ndu bu l'al̄i Ijiputu. Wakwa iphe, Chipfu epfu baa: Unu lekwa; mu gu-dekwa eze ̄pha mu ono ria anḡu s̄u l'onye shi l̄e Jiuda taa gu-kubāedu mu l'̄nwa l'al̄i Ijiputu l'ophu l'ophu. L̄ephe taa s̄ubaedu: 'Eshinu Chipfu no ndz̄u g'ò n̄o iya-a'.

²⁷"Unu lekwa-a; mu egekwa phe-a ngge ̄jo-iphe; ̄ t̄o bukwa k'oma Iphe, bukpuo ndu Jiuda, n̄o l̄e Ijiputu b̄e ogu-echi a-sukwa pyaapyaa; ̄phe akpaa nri jas̄u ̄phe taa ph̄oduedu. ²⁸Ɔ buru nwa ndu ophu nahuru ogu-echi b̄e e-shi l'al̄i Ijiputu lwaphuta az̄u l'al̄i ndu Jiuda; ̄le ̄phe ta ad̄udu igwerigwe. Noo teke ndu ono, ph̄oduru l̄e Jiuda ono, bu ndu lwaru bya eburu l'al̄i ndu Ijiputu ono a-mar̄u opfu onye ophu a-pfuru nu; ?bu nkemu; t̄o nkep̄e? ²⁹Wakwa iphe, Chipfu epfu baa: Wakwa iphe, e-goshi unu l̄e mu a-h̄u unu ah̄uh̄u l̄eka-a baa. Ɔo ya e-me g'unu maru l'iphe-̄huka ono, mu s̄uru l̄e mu e-me unu ono b̄e mu e-mekota unu. ³⁰Wakwa iphe, Chipfu epfu baa: Fero, bu Hofura; mb̄u eze ndu Ijiputu b̄e mu e-wokwaru ye l̄eka ndu ohogu iya; mb̄u l̄e mu e-woru iya ye l̄eka ndu ach̄o ndz̄u iya ̄gube ono, mu woru Zedekaya, bu eze ndu Jiuda ye l̄eka Nebukadineza, bu eze ndu Babilonu ono, bu onye ohogu iya bya aburu onye ach̄o ndz̄u iya onoya."

45 ¹Wakwa iphe, onye mpfuchiru Chileke, bu Jieremaya pfuru nu Baruku nwa Neraya l'apha k'̄eno, Jiehoyakimu nwa Jiosaya bahuru l'aba-eze ndu Jiuda; ḡe Baruku dechaaru opfu, oopfu; ̄ nōdu ede iya. ²"Wakwa iphe, Chipfu, bu Chileke k̄e ndu Izurelu epfu eyeru ḡube Baruku baa. ³I pfuru s̄u: 'Nshio mu! Chipfu yekwaru nrimaphu l'iphe-̄huka mu. Mu ts̄uakwaru ude; ike bv̄u mu; ophu mu at̄utajeedu unme.' "

⁴Chipfu s̄uru-a: "Waa iphe, ii-pfuru iya baa: 'Wakwa iphe, Chipfu epfu baa: Mu a-bya enwukposhia iphe, mu shi kp̄a l'onwomu; mu abya epheshi iphe, mu shi dzaa l'onwomu l'al̄i-a mgburugburu. ⁵?Den̄u g'ii-shi bya awata ach̄oru onwongu iphe, par̄u ̄ka? Ba ch̄okwa iya nno. Kele mu e-mekwa nemadz̄u mgburugburu ̄jo-iphe. Nokwa iphe, Chipfu eepfu. Obenu l̄e ḡubedua b̄e mu a-nōduepho eleta ̄nya l̄ekameka, i jekporu. Mu a-haa ngu r̄o g'i gude ndz̄u ngu gbala.' "

Ozi ̄hu ndu Ijiputu

46 ¹Ɔwaa bu Opfu Chipfu, bu ophu rwuru onye mpfuchiru Chileke, bu Jieremaya nch̄i, bu opfu ̄hu ohamoha.

²Opfu ̄hu ndu Ijiputu: Ndu eezi ozi owa-a bu ndu ojogu Fero Neko, bu eze ndu Ijiputu, bu onye e mekperu l̄e mgboru mkp̄ukpu Kakemishi, n̄o l'aguga ̄nyimu Yufur̄etisu. Ɔ buru onye mekperu phe nu bu Nebukadineza, bu eze ndu Babilonu; l'apha, kwe Jiehoyakimu nwa Jiosaya apha ̄no, ̄ bahuru l'aba-eze ndu Jiuda.

- 3 Unu dozikwaa iphe, unu
 egudeje ezeru oḡu;
 unu dozia ndu ophu ha
 oṣa me ndu ophu ha
 nwanshii;
 unu ezefuta jeshia oḡu!
- 4 Unu kwakobe inya unu k'oḡu!
 Unu awu-koru inya-oḡu
 unu l'eli;
 unube ndu agba l'inya!
 G'onyenonu pfukwaaru l'eka
 rwuberu iya nu!
 Unu ekpuchaaru okpu-igwe!
 Unu rwachaa arwa unu
 arwacha!
 Unu atuko uwe-oḡu unu
 l'ophu yee onwunu!
- 5 ?Bu ḡunu be mu humaru?
 Ndzu aguwaa phe.
 Ephe agbawaa oso.
 Ndu ojogu phe be e
 mekpewaru.
 Ephe ye okpa l'oso gbala
 l'ebe agha enya l'azu;
 kele nggiri du l'uzo
 l'ekameka.
 Nokwa iphe, Chipfu eepfu bu
 ono.
- 6 Ndu okpa egwa ta agbakwa
 oso.
 Ophu onye du ike l'ogu
 agbalakwa.
 O kwa l'uzo isheli;
 l'uzo enyimu Yufurétisu
 be ephe vukotaru iphe daa.
- 7 ?Bu ndu ole baa, l'abya
 kulakula g'enyimu
 Nayilu; ge nggele,
 du igwerigwe, asogba
 gborogboro?
- 8 O kwa ndu Ijiputu abya
 kulakula g'enyimu

- Nayilu ono;
 ge nggele, du igwerigwe,
 asogba gborogboro.
 Ephe epfu su l'ephe
 e-tsulihu tuko mgboko
 l'ophu sopyabe.
 L'ephe e-mebyishi mkpukpu
 le mkpukpu;
 yele ndu bu iya nu.
- 9 Unube inya; unu watakwa
 eje l'iphu l'iphu!
 Unube ndu agba l'ugbo-inya;
 unu tangirihukwa g'e je!
 Ge ndu du ike l'ogu
 gbeshikwa g'e je;
 mbu unube ndu Kushi;
 yee ndu Putu,
 bu ndu chigbaa iphe,
 eegudeje ezeru ogu;
 me unube ndu Lidiya,
 bu ndu agbaje apfu!
- 10 Obenu l'eswe mboku ono bu
 Nnajiuphu nwe iya;
 mbu Chipfu,
 bu Okalibe-Kakota-Ike.
 O kwa eswe agwata ugwo iphe;
 mbu mboku, oo-gwata ndu
 achi iya le njo ugwo
 iphe.
 Oo ogu-echi a-su nemadzū
 pyaapyaa jasū l'ooji
 iya ephe;
 jasū teke oo-ngu mee
 ngu-jia ephe;
 kele oo Nnajiuphu;
 mbu Chipfu,
 bu
 Okalibe-Kakota-Ike
 agwa iphe l'ali ndu isheli;
 l'aguga enyimu Yufurétisu.
- 11 "Tugbua je l'ali ndu Giladu
 je emeta obvu etete;

- gube nwamgboko,
 yee nwoke akwajeduru,
 bu Ijiputu!
 Obenu l'igwerigwe obvu ono,
 iimegbaa ono bukwa
 ke mmanu.
 I tii wekorohukwa.
- 12 Ohamoha numawaru iphere
 ono,
 e meru kpua ngu ono.
 Ekwa unu tukowa mgboko
 l'ophu ngaa.
 Ndu du ike l'ogu tuko
 dapyabegbaa ibe phe.
 Ephe tuko daa ndatewo."
- 13 Wakwa ozi, Chipfu ziru onye mpfuchiru iya, bu Jieremaya le k'ehu
 Nebukadineza eze ndu Babilonu, abya etso ndu Ijiputu ogu.
- 14 Raa iphe-a arara l'ali ndu
 Ijiputu!
 Li chia ya le mkpu le
 mkpukpu Migudolu!
 Chikwaa ya pho le mkpu le
 mkpukpu Nofu;
 yele Tahupanahesu:
 Onyenonu pfukwaru l'eka
 rwuberu iya nu
 kwakobe;
 kele ogu-echi byawaru
 egbushi ndu no-kube
 ngu nu.
- 15 ?Bu gunu be agwa ngu,
 bu Apisu agbahunuru?
 ?Bu gunu be obobo-ena
 ngu obu aduedunu
 ike pfuru?
 Iphe, kparu iya nu bu le
 Chipfu nwutsuwaru
 iya.
- 16 Ufu duru phe ndupyabe;
 ephe dagbaa dapyabe nwibe
 phe; ephe su:
 Unu gbeshi g'anyi laphu azu

- lapfu ndu alì anyi yẹ
 ndibe anyi!
 G'anyi gbalaaru ogu-echi ndu
 eme anyi mkpawere!
- 17 Unu gùbe Fero, bụ eze ndu
 Ijiputu ẹpha ọzo.
 Unu kuje iya:
 O-pfu-epfu-emegeme.
- 18 Wakwa iphe, Eze ono epfu baa;
 mbụ onye ẹpha iya
 bụ Chipfu,
 bụ Ọkalibe-Kakọta-Ike:
 Eshinu mu nọ ndzụ gẹ mu
 nọ iya-a
 bẹ o nweru onye a-bya nụ.
 Onye ono a-dụ g'úbvú Tabọ
 l'ẹka úbvú dọru.
 Mbụ l'ọo-dụ g'úbvú Kamẹlu,
 nọ l'agụga eze-enyimu.
- 19 Kwakọkwa iphemiphe,
 ii-gude laa alì ọzo;
 unubẹ ndu bu l'alì
 ndu Ijiputu!
 Noo kẹle mkpukpu
 Nọfu bẹ e-mechakwaa
 bụru ochobu;
 l'eemebyishia ya;
 ọ tọ dudu onye eburu
 iya eburu.
- 20 "Ijiputu bụ nwada eswi,
 ama ntumatu.
 Obenu l'ijiji-onyieka
 eshije l'uzo isheli eje
 abyapfuta iya
 tekenteke.
- 21 Ndu ẹphe butaru g'ẹphe
 bya alwụaru pẹ ọgu
 bẹ dọru l'echilabọ pẹ
 g'oke-eswi,
 daru ẹpfurepfu nọdu.
 Ẹphebdua tukurawu
 dakọbe gbala;

- ọphu ẹphe adudu ike p̄furu.
 Noo kele eswe mboku
 ọla-l'iswi dapfutawaru
 phe;
 mbu teke aanu phe aphu.
 22 Ndu Ijiputu atsū kpururu
 g'agwo,
 awu awuwu awufu;
 noo kele ndu ohogu
 phe abyafuta phe
 ehuka ehuka;
 bya egude ogbunku etso
 phe ọgu ge ndu
 egbutsushi oshi.
 23 Ọswa phe l'ophu be ẹphe
 a-sūpyashichaa
 asūpyashi;
 g'ọ dūhabe ẹpfukala.
 Nokwa iphe, Chipfu eepfu.
 Ẹphe ka igube adu
 igwerigwe;
 k'ophu bu l'a taa gutadu
 phe l'ogu.
 24 Nwada Ijiputu be e mewaru
 iphe-iphere.
 Mbu l'e woru iya ye l'eka ndu
 isheli."

25 Chipfu, bu Ọkalibe-Kakota-Ike, bu Chileke ke ndu Ịzurelu suru-a:
 "Lekwa; mu abyakwa phe anu aphu; mbu Amonu, bu agwa ndu mkpukpu
 Tebesu; yee Fero; yee ndu Ijiputu; ẹphe l'agwa phe; mekpoo ndu eze phe;
 yee iphe, bukpuo ndu kpuru obu yeru Fero. 26 Mu e-woru phe ye l'eka ndu
 achọ ndzu phe; mbu l'eka Nebukadineza, bu eze ndu Babilonu; ẹphe le
 ndu-ozu iya phe. Ole o bu; e -mechaa be ee-bukwaru-a le Ijiputu ozo ge
 shi buhawaru iya." Nokwa iphe, Chipfu eepfu bu ono.

- 27 "Ta atsukwa ebvu;
 gube Jiékọpu, bu onye-ozu
 mu!
 Ọphu i nmakwa
 pyaapyaapya;
 gube Ịzurelu!
 Lekwa; mu a-dzota ngu l'ali,
 du enya;

dzọta awa ngu phẹ l'alì
 ẹka a kpuru phẹ lẹ
 ndzụ laa.
 Jiékọpu e-mechakwaa lwa
 bya eburu lẹ nchị-odoo
 t̄saru ẹhu.
 Ọphu ọ dudu onye byaru
 eyebaa ya ebvu.
 28 Ta tsukwa ebvu;
 gube Jiékọpu,
 bụ onye-ozì mu;
 kele mu nọkwa swiru ngu.
 Ọ kwa Chipfu epfu iya.
 Kele mu e-mebyishicha
 ọhamoha ono,
 mu ch̄iru unu t̄kaa
 l'echilabọ phẹ ono.
 Ọphu mu emebyishidu
 unubedua.
 Ọo ahùhù bẹ mu a-hù unu
 hùta iya unu l'ahuma.
 Ọphu mu ahakwanụ unu
 phuruphuru gẹ mu
 te echi unu ẹchachi."

Ozi, e ziru ndu Filisitayinu

47 ¹ Ọwaa bụ Opfu Chipfu, bụ ọphu rwuru Jieremaya nchị, bụ opfu
 ẹhu ndu Filisitayinu; t̄me Fero bya etsoo ndu mkpukpu Gaza
 ọgu.

² Wakwa iphe, Chipfu epfu baa:
 Lewarọ gẹ mini shi l'uzo
 isheli abya kẹ k̄lakula.
 Oo-mecha b̄uru utso,
 asọ gborogboro.
 Ọo-sọ-kputa alì l'ophu;
 yẹ iphemiphe,
 nọ iya n̄;
 sọpyabe mkpukpu;
 yẹ onyemonye,
 bu iya n̄.
 Ndu ono e-chishi mkpu.
 Mbụ l'iphe, bụ ndu bu l'alì

ono a-tụ ụzu-ẹkwa.

3 Mbụ l'ẹphe -nụmaepfo igiji
ichirupfu-ọkpa ịnya phe;
bya anuma ụzu ụgbo-inya
ndu ọhogu phe;
yẹe kwọkiri kwọkiri,
ọkpa ụgbo-inya
phe ono eme bẹ ndu
bụ nna tee leẹdu
enya l'azụ k'eyeru unwu
phe ẹka.

Eka a-tuhu phe
Iwakpalwakpa.

4 Kele mbọku rwuakwaru teke
ee-mebyishikọta ndu
Filisitayinu g'ẹphe
hakọta.

Le mee gẹ nwa ndu phoduru
nụ, bụ ndu gege eyeru
ndu mkpukpu
Taya yẹe ndu mkpukpu
Sayidonu ẹka chihu;
kele Chipfu abyakwa
emebyishi ndu
Filisitayinu;
mbụ nwa ndu phoduru nụ
le ndu alị Kafuto.

5 Ndu mkpukpu Gaza
kpushiwaru ishi aphụ.
Ndu mkpukpu Ashikelonu bẹ
a lawarụ l'iswi.
Sụ-a; unubẹ nwa ndu ophu
phoduru le ndu Anaku;
?unu e-yejashikpoo
onwunu egube-a jasụ
teke ole?

6 “Sụ-a; gube ogu-echi
Chipfu;
?bukpoo teke ole bẹ
oo-jeberu l'ikabe
tuta unme?

Kabenu mịru onwongu

yee l'obo!
 Tɔtanu unme; nɔdunu nwa
 nggujungguji!
 7 Ọle ?denukwanu g'oo-shi
 nɔdu nwadoo
 l'eka iile ɛnya lẹ Chipfu
 tɔwaru iya ekemu
 sù g'ò lwua ndu mkpukpu
 Ashikelonu;
 yee ndu bu l'aguga
 eze-ɛnyimu?
 Mbù l'onoo g'o pɔwaru
 l'oo-dù bù ono.”

Ozi ẹhu ndu Mówabu

48 ¹A -bya l'opfu ẹhu ndu Mówabu; wakwa iphe, oopfù; mbù Chi-
 pɔfu, bù Ọkalibe-Kakota-Ike; mbù Chileke ndu Ízurẹlu:

“Nshio Nebo; kele e meru iya;
 ọ buri ochobu.

Ndu Kiriyatayimu bẹ e
 meru iphe-iphere;
 bya akpua phẹ
 lẹ ndzù.

Ụlo phẹ, bù ẹka a kpushiru
 ike bẹ e meru
 iphe-iphere tɔkaa ya
 nanunanu.

²A taa jaedu ndu Mówabu
 ajaja.

Ọ buri lẹ mkpukpu
 Heshibonu bẹ a chiru
 phẹ ejo idzu sù:

‘Unu bya g'anyi mee g'oha
 ono chihu!’

Unubedua kwapho;
 unube ndu mkpukpu
 Madumenu
 bẹ ee-mechakwaa laa
 l'iswi.

Ogu-echi e-mechakwaa chia
 unu ejo oso.

³Unu ngabekpodapho

- nchì nùma mkpu,
 eechi lẹ mkpukpu
 Horonayimu;
 mkpu alì arwuhu yẹe
 oke ọla-l'iswi.
- 4 Ndu Mówabu bẹ e
 mebyishiwaru.
 Ụnwegirima iya chishiru
 mkpu ike.
- 5 Ẹphe enyi obvu awu eje l'uzo
 mkpukpu Luhiti;
 akwa ntumatu eje atugbu.
 Mbù l'uzo okpa-úbvú
 mkpukpu Horonayimu
 bẹ a numaru mkpu ekwa,
 eechi ekpu iphemiphe ono,
 larù l'iswi ono.
- 6 Unu gbalaa! Unu gbaa ọso
 ndzù unu!
 Unu je ebvuru g'irwu,
 bvuru l'echięgu!
- 7 Eshinu unu kpọru obu ye
 l'iphe, unu aduje ike mee;
 yẹe ẹku unu bẹ
 aa-kpufukwaa unubedua
 lẹ ndzù.
 Tẹme agwa unu, bu Kemoshi
 bẹ aa-kpukwapho
 lẹ ndzù; yẹle ndu-uke,
 agwajẹ iya nù;
 mẹ ndu-ishi iya.
- 8 Ee-mebyishi mkpukpu lẹ
 mkpukpu.
 Ọphu ọ dudu mkpukpu,
 byaru anahù nù
 mẹ nanù.
 Nsuda nsuda bẹ a-buru
 mkpurupyata.
 Le mebyishia ẹka dọ baswa;
 kẹle ọo ẹgube ono bẹ
 Chipfu pfuru iya.
- 9 Chibe ndu Mówabu ñkù;

- kele oo-mecha phelihi
 phefu.
 Mkpukpu le mkpukpu phe
 a-bukotachaaru
 ochobu.
 O to dudu m'onye lanu eburu
 iya nu.
- 10 Onye a turu onu be o bu;
 mbu onye gude
 eregede ejeru Chipfu
 ozi!
 A tukwaru onye ono onu,
 bu onye te egudedu
 ogu-echi iya egbu ochi!
- 11 Eshi teke o bu nwata
 be ndu Mowabu
 nokpoepho tusaru eh
 g'ohu-mee, doru l'ite.
 Ophu a wu-phedu iya
 awu-phe l'ite;
 kele e teke akpu-swee
 ndu Mowabu le ndzu
 lashia ali ozo.
 Noo g'o gude o nodu
 atsoppho g'ootso.
 Ophu ooshibuhudu
 mkpo eshibuhu.
- 12 Wakwa iphe, Chipfu epfu
 baa:
 O nwenuru-a mboku,
 abya nu, bu mboku,
 mu e-ye ndu
 awu-phe mee l'ite.
 Ephe awufuta iya l'ite ono,
 o doru ono.
 Ephe awufuta iya l'ite obu;
 woru ite ono,
 o shi du ono tsukposhia.
- 13 Noo teke iphere Kemoshi
 e-gude ndu Mowabu;
 egube ono,
 iphere Betelu guderu

- ndu Ízurelu, bu iphe,
 ephe shi dakobe ono.
- 14 ?Denu g'unu e-shi su l'okpehu
 du unu;
 l'unu bu ndu du ike l'ogu?
- 15 Ndu e-mebyishi Mówabu;
 yee mkpukpu, nogbaa
 ya nu be nowaa anono.
 Unwoke phe, kachaa
 agba mkparawa be
 ee-gbukota egbugbu.
- Nokwa iphe, oopfu;
 mbu Eze ono,
 ephe iya bu Chipfu;
 bya aburu
 Okalibe-Kakota-Ike.
- 16 Teke ndu Mówabu a-la l'iswi
 dukwaa tsokere.
 Eze iphe-ehuka a-dapfukwa
 phe egwegwa.
- 17 Unu jekwa akporu phe iphu;
 unube ndu unu l'ephe
 bukubegbaa!
 Mbu unube ndu maru ephe
 phe.
 Unu su phe-a: '?Denu go nwuru
 a gbajiru mgboro-eze,
 shihuru ike;
 teme o buru mgboro,
 ama ntumatu-a?'
- 18 Unube ndu bu le mkpukpu
 Dibonu;
 unu shinu le biribiri unu
 nyizeta
 bya anodu l'ali, du jakporo
 jakporo;
 kele onye emebyi ndu
 Mówabu byapfutaru
 unu bya egwepyaa
 mkpukpu le mkpukpu
 unu ono,
 a kpushiru ike ono.

- 19 Unu p̄fukpodarupho l'aguga
 gbororo gee ngge;
 unubē ndu mkp̄ukpu Arowa!
 Unu j̄ia unwoke, agba ọso;
 ȳe ụnwanyi,
 nahuru n̄u!
 Unu j̄ia p̄he s̄u p̄he:
 “?B̄u ḡunu meru?”
- 20 Ndu Mówabu b̄e e meakwaru
 iphe-iphere kpua;
 kele ẹp̄he dakashīhuwaru.
 Unu rwua erwubvu;
 chishia mkpu ike!
 Raa ya arara l̄e nggele Anọnu
 l̄e Mówabu b̄e e
 mebyishiwaru!
- 21 Ndu bu l̄e mbarabata b̄e ikpe
 dapfuakwaru;
 mb̄u ndu Holonu;
 ȳe ndu Jiahazu;
 waa ndu Mefahatu;
- 22 dapfu ndu Dibonu;
 ȳe ndu Nebo;
 m̄ekpoo ndu
 B̄etu-Dibulatayimu;
- 23 dapfu ndu Kiriayatayimu;
 ȳe ndu B̄etu-Gamulu;
 ȳe ndu B̄etu-Meyonu;
- 24 dapfu ndu Keriyotu;
 ȳe ndu B̄ozura;
 dapfukota mkp̄ukpu
 l̄e mkp̄ukpu ndu Mówabu
 l'ophu;
 ndu ophu bu ẹnya m̄e
 ndu ophu bu ntse.
- 25 Mpu ndu Mówabu b̄e e
 chikwash̄iakwaru.
 T̄eme e chikwoshiwa iya ẹka.”
 Nokwa iphe, Chipfu eepfu
 b̄u ono.
- 26 “Unu chegharu iya m̄ee ẹka;
 kele ọo Chipfu b̄e o koru

- ọkpa l'ishi.
 Gẹ ndu Mówabu watanu
 ebvuka egbo, ephe gboru;
 g'ephe aburu iphe,
 ee-gude agba mgbonu.
- 27 ?Tobudu ndu Ízurelu be
 unu shi egudeje agba
 mgbonu?
 ?Bu ephe le ndu-oshi shi
 nodu teke ono to;
 mekwanuru g'o gude unu
 shi atuje uka l'ishi
 ekweru iya une
 me unu -nodu epfu opfu
 ehu iya?
- 28 Unu gwobechaa mkpukpu
 unu je eburu
 l'agbara-mkpuma;
 unube ndu Mówabu!
 Unu dupho ge kparaka,
 bu lonu oga be
 ookpaje epfune iya!
- 29 Anyi numakwaru ge Mówabu
 gude ekube onwiya.
 Mbụ l'o kunukaru onwiya;
 teme o nodu etsenuka
 etsetse.
 Mbụ l'eku-onwonye obu
 mekpoo etsetse iya
 obu;
 mekpoo mkpofu-okpoma
 iya obu be paru eka."
- 30 Wakwa iphe, Chipfu epfu
 baa:
 "Mu makwaru oke ehu-eghu
 iya;
 ole o bukwanu ke
 mmanu.
 Teme ekuku, ooku onwiya
 bukwarupho iphe-mmanu.
- 31 Noo g'o gude mu nodu
 erwu erwubvu l'opfu

- ẹhu ndu Mówabu.
 Mbụ l'ọo ndu Mówabu l'ophu
 l'ophu bẹ mu echi
 mkpu iya.
 Ọ bụru ndu mkpụkpu
 Kiru-Harẹsetu bẹ mu agu
 aphụ phe.
- 32 Mu kakwa ara ẹkwa gube
 opfu-vayinu kẹ mkpụkpu
 Sibuma eme lẹ kẹ Jiaza.
 I jaru àjàjà jarwuchaa
 k'ophu ẹkali ngu rwuchaaru
 eze-enyimu;
 jerwuchaa eze-enyimu,
 nọ-kube mkpụkpu Jiaza.^a
 Ọle e mebyishiwaru iphe,
 bụkpoo akpuru ngu.
- 33 E wofuwaru ẹhu-utso yẹ eme
 emereme l'egu oshi-omi
 ndu Mówabu yẹle
 alị phe.
 Mee bẹ mu mewaru g'a ba
 kutajehe l'ẹka aakuje
 mee.
 Ọphu ọ duedu onye
 anọdujekwadu akwa
 ẹvu mẹ a -nọdu akụ iya.
 A makwaru-a l'aanọduje anụ
 olu l'ẹka ono;
 ọle ọ tọ buedu olu onye
 akwa ẹvu.
- 34 Mkpu, ẹphe echi
 ngakọtaakwaru.
 E shi lẹ Hẹshibonu chikọta
 mkpu ọbu;
 je akpaa lẹ Eleyale;
 mẹkpoo lẹ Jiahazu.
 E shi lẹ Zowa chia ya jasụ
 lẹ Horonayimu;
 waa Ẹgulatu-Shelishiya;

^a 48:32 Ọo Eze-enyimu Únú bẹ epfu opfu iya l'ẹka-a.

- noo kele mini
 tashihuchaaru je
 akpaa le ke Nimurimu.
- 35 L'alì ndu Mówabu be mu
 e-me g'a gwabuhu iphe
 l'anya eka aagwaje iphe;
 mee g'a ta akpojehe
 unwu-isensu oku nu
 agwa phe.”
 Nokwa iphe, Chipfu eepfu
 bu ono.
- 36 “Oo ya bu l'obu mu aphu
 swooswooswoo
 agu aphu ndu Mówabu
 g'onye aphu ototo;
 o nodu agu aphu ndu
 Kiru-Haresetu g'onye
 aphu ototo; kele urwu,
 ephe ritaru bvwaru.
- 37 Onyemonye kpushiwaru ishi.
 Onyemonye kpushia eji-agba.
 Onyá-mma dukota
 onyemonye l'eka.
 Onyemonye gbaphukota
 uwe-aphu l'upfu.
- 38 Mbù l'iphe, ada l'oma
 ulo-eli,
 nogbaa l'alì ndu
 Mówabu;
 me l'edupfu l'edupfu l'ophu
 ta adukwa iphe ozo,
 gbahaa uzu-ekwa;
 noo kele mu tsukposhiwaru
 ndu Mówabu g'ite,
 adudu onye o du ree.”
 Nokwa iphe, Chipfu eepfu
 bu ono.
- 39 “Waa g'a tukashiru phe
 nanunanu!
 Waa g'ephe atu uzu-ekwa
 wowoowoo!
 Waa ge ndu Mówabu gude

- iphere ghaa azu!
 Ndu Mówabu buakwaa iphe,
 e gude agba mgbonu.
 Mbù l'iphe, bukpoo ndu
 nọ phẹ ntse bẹ ọnyị
 ishi ẹdzu.”
- 40 Wakwa iphe, Chipfu epfu baa:
 “Lenu! Ugo ephekwa raa
 ephezeta l'ali.
 O woru ñkù iya jashia l'eli ali
 ndu Mówabu.
- 41 Mkpukpu, nọgbaa ya nù bẹ
 aa-lwutachaa.
 L'a natachaa phẹ ọlo,
 ẹphe edomije onwophe.
 Lẹ mbọku ono bẹ obu ndu
 Ojogu ndu Mówabu
 a-duepho g'obu nwanyi,
 ime eme.
- 42 Ndu Mówabu l'ophu bẹ
 ee-mebyishi
 kele ẹphe koru Chipfu
 okpa l'ishi.
- 43 N-yemebvu; yẹ iduma iduma;
 yẹ ọnyà nọgbakwa echeru
 unu echeru;
 unubẹ ndu Mówabu!”
 Nokwa iphe, Chipfu eepfu
 bụ ono.
- 44 “Onye nahuru n-yemebvu;
 l'oodaba l'iduma.
 Onye nyifutaru l'iduma;
 ọnyà a-nmata iya.
 Noo kele ọo iphe ono bẹ
 mu e-gude byapfuta
 Mówabu l'apha,
 aa-nọdu anụ iya aphụ.”
 Nokwa iphe, Chipfu eepfu
 bụ ono.
- 45 “Lẹ mgboru mkpukpu
 Heshibonu bẹ ndu
 agba ọso ọgu pfuru

nyegenyeye.
 Noo keḽe ọku kpufuru
 ọ Ọḽehibonu.
 Mbụ l'onwu phuruphuru ọku
 etsu l'ime mkpukpu
 Sihonu.
 Ọ buerupho l'echi ishi be
 otsu ndu Mówabu.
 Mbụ ọkpu-ishi ndu ono,
 shi anọduje aba
 hanyihanyi ono.
 46 Nshio unube ndu Mówabu!
 Ndu Kemoshi be e
 mebyishiakwaru.
 Ụnwu unu nwoke be a
 kpukwaru ọ ndzụ laa
 alị ọzo.
 Teme unwada unu phe buru
 ndu a lwutaru l'ogu laa
 alị ọzo.
 47 Ọle mu e-mechakwaa dophu
 ndu Mówabu azu l'onodu phe
 ọ mboku, du l'iphu.”
 Nokwa iphe, Chipfu eepfu
 bu ono.
 Nokwa g'ikpe, e kperu ndu
 Mówabu jeberu
 bu onoya.

Ozi ẹhu ndu Amonu

49 ¹A bya l'opfu ẹhu ndu Amonu; wakwa iphe, oopfu; mbụ Chipfu:
 ?Bụ ọ Ọzuru te enwedu
 unwegirima unwoke to?
 ?To nwedu onye e-ri iphe iya
 to?
 ?Denu g'o gude Moleku gbe
 nata alị ndu Gadu;
 ọ buru okiphe iya?
 ?Denu g'o gude ndibe iya
 buru ọ mkpukpu iya
 be ephe bugbaa?
² Ọo ya bu ọ-a; wakwa iphe,

Chipfu epfu baa:
 Mu e-mechaa mee gę ndu
 mkpukpu Raba,
 nọ l'alị ndu Amọnu numa
 mkpu ọgu.
 O -rwua mbọku ono bę Raba
 a-buru ikpọzu;
 tẹme unwu mkpukpu,
 nọ-pheru iya
 mgburugburu
 etsufukọta l'ọku.
 Noo teke ndu Ízurelu a-chifu
 ndu shi chifu phẹ nụ.
 Nokwa iphe, Chipfu eepfu bu
 ono.

3 Unu tụa ụzu-ẹkwa;
 unubę ndu Hẹshibonu;
 kele mkpukpu Eyayi bę
 e mebyishiakwaru!
 Unu chishikwaa mkpu ike;
 unubę ndu bu lẹ Raba!
 Unu yekwaa uwe-aphụ
 wata ara ẹkwa.
 Unu ekwoo gburugburu shia
 ọwa-a yẹe ọphuu
 l'ime npherenphere igbulọ
 mkpukpu unu ono;
 kele Moleku bę aa-kpukwa
 lẹ ndzụ lashia alị ọzo;
 yẹle ndu-uke,
 agwajẹ iya nụ;
 mę ndu-ishi iya.

4 ?Denu g'o gude i gude
 nsuda nsuda ngu eku
 onwongu;
 mbụ gube nwada e gudedu
 ire ngu ẹka ono;
 mbụ gube onye kpọru obu
 ye l'ẹku ngu epfu sụ:
 ?Bụ onye sụru mu eme gunu?

5 Lekwa; mu e-mechakwaa
 mee gę ndzụ-agugu

rwuta ngu.
 Ọ kwa Nnajiuphu epfu iya;
 mbụ Chipfu,
 bụ Ọkalibe-Kakọta-Ike.
 Ọ buru ndu oo-shi l'ẹka
 bụ ndu bupheru ngu
 mgburugburu.
 G'unu hakpọo l'onye l'onye
 bẹ aa-chifu achifu.
 Ọphu ọ dudu onye
 a-chi-phuta ndu
 gbalawaru nụ azụ.
 6 “Ole mu e-mechakwaa
 dophu ndu Amọnu azu
 l'onodu phe.
 Nokwa iphe, Chipfu eepfu
 bụ ono.”

Ozi ẹhu ndu Ẹdomu

7A bya l'opfu ẹhu ndu Edomu;
 wakwa iphe, oopfu;
 mbụ Chipfu,
 bụ Ọkalibe-Kakọta-Ike:
 “?Mmamiphe ta adukpoedu
 lẹ mkpukpu Temanu
 tọo?
 ?Okpobe idzu bvụwaru
 l'ẹka ndu maru eye
 ọnu l'opfu tọo?
 Mmamiphe phe ?o rehuwaru
 erehu tọo?
 8 Unubẹ ndu bu lẹ Dedanu;
 unu ghakọbe gbalaa!
 Unu gbaba je edomia
 onwunu l'ime ẹka dọ
 omilomi;
 kẹle mu gudekwa ọla-l'iswi
 abyapfuta oshilokpa
 Iso
 lẹ teke mu abya iya anụ
 aphụ-a.
 9 Ọ -buru lẹ ndu awọ akpuru

vayĩnu byapfutaru
 ngu;
 ?ɛphe ta awo-phodojedu
 nwɔphu dɔ
 nwolemole?

Ndu-oshi -bya ibe ngu
 l'enyashi;

?tɔ buedupho iphe,
 mkpa iya dɔru phɛ bɛ
 ɛphe e-wota kpoloko?

10 Obenu l'oshilokpa Iso bɛ
 mu gbabɛwaru ɔto.

Ɛka ono, ɛphe edomi edomi
 ono bɛ mu kpuhawaru
 ghebe ɔnu;
 k'ɔphu ɛphe tee
 domikɔtaedu onwophe.

Ʋnwegirima phɛ;
 mɛkpoo abubu phɛ;
 mɛkpoo obutobu phɛ;
 lakɔtaru l'iswi;
 tɛme ɛphebedua
 chihukwapho.

11 Pakwaru ɔnwu ogbee unu
 haa;
 kɛle mu e-me-a g'ɛphe
 nɔdu ndzɔ!

G'ɔnwanyi unu, ji phɛ
 nwuhuwaru chiru
 ɔpfu kwɛe l'ɛhu mu!"

12 Wakwa iphe, Chipfu epfu baa: “O -buru lɛ ndu agbaduru k'angɔ iphe, shi l'okoro ono anguchaa iphe, shi iya nɔ; ?bɔ gɔnu a-kpa g'a haa unu g'a ta nɔ unu aphɔ? A taa hakwa unu g'a ta nɔ unu aphɔ. Unu ngɔfutajekwa iphe, shi l'okoro ono; 13 kɛle-a; wakwa iphe, Chipfu epfu baa: Mu gudea-kwa onwomu ria angɔ sɔ lɛ mkpɔkpu Bɔzura e-mechaa buru ikpɔzu; bya aburu iphe, aakpɔ-yiru ukuvu. Mbɔ l'oo-buru ochobu; bya aburu iphe, eephu l'iphu. Tɛme iphe, bɔ mkpɔkpu ɔzo, nɔkota l'alɔ ndu Ɛdomu a-bɔkotaru ikpɔzu jasɔ l'ojejeje.”

14 Mu nɔmakwaru ozi,
 Chipfu ziru.

Onye-ozɔ bɛ e ziru g'ɛphe
 jepfu ohamoha sɔ

phẹ-a:

“Unu dzukọbekwa onwunu
bya etsoo phẹ ọgu!
Unu gbalihukwa jeshia ọgu!”

- 15 Kele-a; lekwa; mu mewaru;
i ha nwanshii l'echilabọ
ọhamoha;
ọphu ọ dudu iphe,
ndiphe guberu ngu.
- 16 Ọ kwa ebvu, i shi eyeje ndu
ọzo; yẹ eku-onwonye,
nọ ngu l'obu ono
dephuru ngu;
mbụ gube onye ono,
bu l'ime agbara-mkpuma
ono;
onye bu l'ẹka úbvú kakọta
l'eli.

Ọ tọ dukwa m'obeta i je
akpaa epfune ngu
l'ephekerephe
ephekerephe gẹ k'ugo;
bẹ mu e-shikwa l'ẹka ono
mekọta ngu l'i daa.

Nokwa iphe, Chipfu eepfu
bụ ono.

- 17 Ndu Edomu e-mechaa bụru
iphe,
aakpo-yiru ukuvu.
Iphe, bukpo ndu ghataru
phẹ nụ bẹ ishi anyi
edzu.

Ephe egude iya gbaahaa
mgbonu; ọ bụru iphe,
a-kpa iya nụ bụ eze
iphe-ehuka ono,
a-dapfu phẹ nụ ono.

- 18 Ọo ẹgube ono, e mebyishiru
mkpukpu Sodomu yẹ
Gomóra ono;
bya emebyishia mkpukpu
lẹ mkpukpu,

nogbaa phe le mgboru ono;
 nokwa g'ọ to dudu onye
 e-bu l'alị ndu Edomu;
 ophu o dudu onye e-me
 iya unuphu.

Nokwa iphe, Chipfu eepfu
 bu ono.

19 “Lekwa-a! O kwa g'oduma
 shi l'oswa,
 no l'aguga enyimu Jiordanu
 kwofuta;
 bya adapfu aturu,
 doru l'odu aturu,
 nri du shii bukwapho
 ge mu e-kwo
 gburumu je achifu
 ndu Edomu l'alị iya
 l'otulupfu.

?Bu onye be mu hotaru g'ọ
 buru onye mu a-tu eka
 g'o mee iphe ono?

?Bu onye du ge mu du?

?Bu onye suru mu eku ikpe?

?Bu onye bu onye eche aturu,
 a-du ike pfuru ge mu
 l'iya mee?”

20 Oo ya bu le-a; unu numakwa
 idzu,

Chipfu chiru le ya e-me
 ndu Edomu; mbu iphe,
 o chiru le ya e-me ndu
 bu le mkpukpu Temanu.

O to dukwa iphe, a-kposhi
 g'a ta kputa unwu
 aturu iya me unwu
 egbu iya kpufu;
 ndzu erwuta ndu ophu
 phoduru nu.

21 Oda, oo-da teke epe a-da
 be a-nmayichaa mgboko
 anmayi.

L'a nodu le mgboru

Eze-enyimu Uswe-uswe
 n̄umachaa olu-ekwa
 phẹ.

- 22 Lenu! Ugo ephekwa raa
 ephezeta l'ali.
 O woru ñkù iya jashia l'eli
 mkpukpu Bọzura.
 Lẹ mbọku ono bẹ obu ndu
 Ojọgu ndu Edomu
 a-dụephọ g'obu nwanyi,
 ime eme.

Ozi ẹhu Damasukosu

- 23 A -bya l'opfu ẹhu ndu
 Damasukosu;
 “Ndu Hamatu yẹe ndu Apadu
 bẹ e kpukwaru iphu
 lẹ ntụ;
 noo kẹle ẹphe n̄umawaru
 ẹjo nzi.
 Meji tofuwaru phẹ.
 Okpoma aphuwaa phẹ
 gbudugbudu
 g'eze-enyimu,
 a swongaru aswonga.
- 24 Ndu Damasukosu bẹ ẹka
 t̄ulwahuru.
 Ẹphe dakobeakwaru
 agbalawa agbala.
 Meji tofuakwaru phẹ atofu.
 Ejo iphe-ehuka gudeshiwaa
 phẹ gẹ nwanyi,
 ime eme.
- 25 ?Denu g'o gude ophu a
 gwọbeduru mkpukpu
 ono,
 a maru amaru ono?
 Mbụ mkpukpu ono,
 t̄ubaru mu l'enyanya ono?
- 26 Oo ya bụ lẹ-a; ụnwokorobyaa
 phẹ a-nodu ada p̄opoo
 l'oma gbororo.

Ndu Ojogu phe l'ophu be
ee-megbushibebe
mboku ono.

Nokwa iphe, Chipfu,
bu
Okalibe-Kakota-Ike
eepfu bu ono.

27 Mu a-tu oku l'igbulo
Damasukosu;
l'ootsukota iphe, bu ulo,
Beni-Hadadu kpuru
kpushia ike.”

Ozi ehu Keda yee Hazo

28 A -bya l'opfu ehu ndu Keda yee ali-eze ndu Hazo, bu ophu Nebuka-dineza, bu eze ndu Babilonu lwu-kperu; wakwa iphe, oopfu; mbu Chipfu, bu Okalibe-Kakota-Ike:

“Unu zelihi tsoo ndu Keda
ogu!

Unu mebyishia ndu shi
uzo enyanwu-awawa!

29 Ulo phe, bu ulo ophu e meru
lekwa;
yee eghu yee aturu phe be
aa-tuko rwuta.

Laachita ekwa phe;
yee iphemiphe,
ephe nweru enweru;
mekpoo inya-kamelu
phe.

Ndiphe echi mkpu ekpu
phe su phe:

‘Nggiri nokwa l'uzo
lekameka.’ ”

30 Wakwa iphe, Chipfu epfu
baa:

“Unu gbalakwaa agbala;
unu gbamihukwa
agbamihu!

Unu jekwa
anodugbaa l'ogba,
du omilomi;

unube ndu bu le Hazo.
 Noo kele Nebukadineza,
 bu eze ndu Babilonu
 chiakwaru idzu unu
 k'aji;
 bya epfubuwa iphe,
 oo-me unu.”

31 Wakwa iphe, Chipfu epfu baa:

“Unu zelihi tsoo oha,
 tusaru ehu ogo, bu oha,
 bu ophu adudu onye
 ephe atsụ ebvu;
 mbu oha,
 ete nweđu oguzo;
 ophu o kpobeduru
 mgborígwe;
 teme ndibe iya
 buerupho
 noduru onwophe.”

32 Inya-kamelu phe be
 aa-kwachaa l'okwata.

Le rwutakwapho ikpoto eswi
 phe l'ogu.

Iphe, bu ndu bugba l'oha,
 du enya be mu e-wojeruro
 tukaa le pherephere.

Mu eshi l'uzo m'uzo mee
 g'oke iphe-ehuka
 dapfu phe.

Nokwa iphe, Chipfu eepfu
 bu ono.

33 Mkpukpu Hazo l'e-mechaa

buru eka nkuta-oswa
 a-dojeru;
 kele oo-buru ochobu
 jasụ l'ojejeje.

O to dudu onye byaru eburu
 l'eka ono.

Mbu l'o to dudu nwoke,
 byaru akwabaa ya
 unuphu buru.”

Ozi ẹhu ndu Elamu

³⁴Wakwa Opfu Chipfu, bu ọphu rwuru Jieremaya onye mpfuchiru nchi l'opfu ẹhu ndu Elamu. Teke ọ nūmaru iya bu ẹ ntsolọhu teke Zedekaya wataru aburu eze ndu Jiuda.

³⁵Wakwa iphe, oopfu; mbu Chipfu,
bu Ọkalibe-Kakọta-Ike:
Lekwa; mu a-gbajikwa apfu
ndu Elamu,
bu iya bu ẹka ike phe
kpajiru.

³⁶Iphe, mu e-me g'ọ dapfu
ndu Elamu bu uzi
pherephere ẹno,
shigbaa ẹ mgbureku
akpaminigwe uzi ẹno.
Mu a-tuka phe;
ephe edzuru
pherephere uzi ẹno.
Ọphu ọ dukpoda ọha,
nonu bu ẹka ndu
Elamu ataa gbachadaa
oso ọgu laa.

³⁷Mu a-tukashi ndu Elamu
nanunanu l'iphu ndu
ohogu phe;
mbu l'iphu ndu achọ
ndzu phe.
Mu e-me g'ejo-iphe dapfu
phe;
mbu ẹ mu a-tu-koshi
phe oke ẹhu-eghu mu.
Ọ kwa Chipfu epfu iya.
Mu e-me g'e gude ọgu-echi
achi phe
jasu teke mu e-me g'ephe
ta aduhe.

³⁸Ẹka mu e-je ebvube aba-eze
mu bu l'alı ndu Elamu.
Mu emebyishia onye eze phe;
yẹ ndu-ishi phe.
Ọ kwa Chipfu epfu iya.

39 “Ole mu e-mechakwaa
 dophu ndu Elamu azu
 l'onodu phe l'ataphu.
 Nokwa iphe, Chipfu eepfu
 bu ono.”

Ozi ehu ndu Babilonu

50 ¹Wakwa opfu, Chipfu pfuru; o gbẹ l'ẹka Jieremaya, bu onye
 mpfuchiru pfua l'opfu ehu ndu Babilonu; yẹ alì phe.

² “Unu raa ya arara radzuru
 iya ohamoha g'a
 numa-dzuru!

Unu palia ekwa-ohubama raa
 ya g'a numa-dzuru!

Unu ba adukwa iphe,
 unu a-ha l'azu.

Ochia iphe, unu a-nodu epfu
 bu-a:

‘Ndu Babilonu be a kpukwaru
 le ndzu.

Balu be e mekwaru
 iphe-iphere.

Temē Maruduku be
 ndzu-agugu gudewaru.

Ntekpe phe be e mekwaru
 iphe-iphere.

Temē e mee; ndzu-agugu
 rwuta iphemiphe ono,
 a kpuru akpukpu ono.’

³ Oha, shi l'isheli gbeshiru g'o
 tsoo phe ugu.

Oo-me alì phe g'ọ buru
 ochobu.

Ophu o dudu onye byaru
 ebubaaru eburu l'ime
 iya;

nemadzu mekpoo anu
 a-tuko shi iya gbalaa.”

⁴ Wakwa iphe, Chipfu epfu
 baa:

“O -rwua mboku ono be ndu
 Izurelu yẹ ndu Jiuda

- a-tugbabekwa
 gude ɛnya-mini je
 achọo Chipfu,
 bu Chileke phe.
- 5 Ɛphe a-ji aji ụzo, e shi eje
 úbvú Zayonu
 woru iphu ghaa l'uzo ibiya
 ono epfugbaa su:
 Unu bya; g'anyi le Chipfu
 tugba buru nanu
 l'ogbandzu ojejeje,
 a ta abyadu azoha azoha!
- 6 Ndibe mu bu aturu,
 tuphahuru etuphahu.
 O buru ndu eche phe nu
 dusweru phe ụzo;
 bya emee phe;
 ephe tsoru oma úbvú
 aghaphe.
- Ɛphe tsoru úbvú úbvú ye
 òbvù òbvù aghaphe;
 bya azohaa eka ephe
 anoduje atuta unme.
- 7 Iphe, bukpo ndu humaru
 phe nu vuru phe
 kpatakpata.
 Ndu ohogu phe su: 'Ikpe ta
 nmakwaru anyi;
 kele ephe mesweru Chipfu,
 bu okpobe onye-nche
 phe; mbu Chipfu,
 bu onye nna phe oche
 kpuru obu yeru.'
- 8 Unu gbafukwa le Babilonu!
 Unu lufukpoephe l'ali ndu
 Babilonu alufu ophu!
 Unu dūephe ge mkpi,
 a chishiru dobe l'iphu
 ikpoto eghe ye aturu!
- 9 Noo kele-a; lekwa-a;
 mu e-jekwa akpalia
 ikpoto oha, paru eka;

- gude byapfuta Bábilonu
 ọgu.
 Ọ buru ẹka mu e-me g'ẹphe
 shi bya bu l'uzo isheli.
 Ẹphe abya edokaa onwophe
 kwaberu iya.
 Ọ buru ẹka ono be ẹphe e-shi
 bya alwuta iya.
 Ọnu-apfu phe a-du ge ke ndu
 maru agba apfu,
 bu ophu abujeru: o -gufu;
 o to o gbaduru ẹka
 alwa.
- 10 Ọo ya bu le ndu Bábilonu be
 aa-kwa l'okwata.
 Ndu a-kwa iya okwata obu
 be e-rijikpoo epho.”
 Nokwa iphe, Chipfu eepfu
 bu ono.
- 11 A makwaru-a l'unu ete eswa;
 ehu nodu atso unu;
 mbu unube ndu ono,
 vukaru okiphe mu ono.
 A makwaru-a l'unu azo kitimu
 kitimu ge nwada eswi,
 azoshi ereshi;
 teme unu nodu egbu ora
 g'okee inya.
- 12 Ọle iphere e-mechaa mee
 ne unu.
 Mbu l'onye ono, tsuru ime
 unu ono be ee-kpu iphu
 le ntụ.
 Oo-mecha buru iya be enya
 a-kacha alwalwa
 l'ohamoha.
 Mbu l'oo-buru echiegu;
 yee mbege ali-okponku;
 waa ali-eveevee.
- 13 Eshinu ehu egbu mube
 Chipfu egbu be e tee
 bubaedu iya ebubu.

Ọchia l'aa-tọgbo iya l'ọo-buru
okorobo ochobu.

Iphe, ọkpoo ndu ghataru ali
ndu Bábilonu ono be
ọo-nyị ishi ẹdzu;
ẹphe egude iya gbaahaa
mgbonu.

Ọ buru iphe, a-kpa iya
nu bu iphe ono,
e mekagbaaru iya ono.

14 Unu dokaa onwunu l'ophere
l'ophere no-pee
ndu Bábilonu
mgburugburu;
mbu unube ndu agbaje
apfu g'unu hakpo!

Unu gbaje phe iya!
Unu ba adukwa onu-apfu unu
ofhu unu a-gbaphodo
me nanu;
noo kele ọo Chipfu be
ẹphe meru iphe-ẹji!

15 Unu chi mkpu-ogu kpu iya
eka ẹbo ẹbo!
Ike buwaru iya; mkpoli,
o turu k'ogu obu
dakotawaru!

E nwukposhiwa igbulu,
no-pheru iya
mgburugburu.

Eshinu iphe-a bu emelata be
Chipfu emelata;
unu melata iya iphe,
o shi emeje!

Unu mee ya iphe,
o shi emeje ndu ozo!

16 Unu mee ge ndu akọ ofu
chihu le Bábilonu.

Ndu egbuje ereshi;
ẹphe l'iphe,
ẹphe gude egbu ereshi
l'okpa-ji achihukwapho.

Ndu ọhogu phẹ e-gude
 ogu-echi mee;
 onyenonu aghaa iphu
 gbapfushia ndibe phẹ;
 mbụ l'onymonye a-gbala
 lapfushia ndu alị iya.

- 17 “Ízurelu bụakwaa aturu,
 a chikashiru achikashi.
 Ọ buru oduma chikashiru iya.
 Kẹ mbụ, vuru iya kpatakpata
 bụ eze ndu Asiriya.
 Onye ikpazụ, tapyashiru
 ọkpu iya buru Nebukadineza,
 bụ eze ndu Bábilonu.”

18 Ọo ya bụ ẹ-a; wakwa iphe, oopfụ; mbụ Chipfu, bụ Ọkalibe-Kakọta-Ike; bya aburu Chileke kẹ ndu Ízurelu:

Ọ sọru-a: “Mu a-nụkwa eze
 ndu Bábilonu aphụ;
 yẹe ndu alị iya l'ophu;
 ẹgube ono,
 mu nuru eze ndu
 Asiriya aphụ ono.

- 19 Obenu ẹe ndu Ízurelu bẹ mu
 e-duphuta azụ ẹka ẹphe
 shi buru.

Ẹphe abyakwa anọdu l'úbvú
 Kamẹlu;
 yẹe alị Beshanu riaha
 nri ọzo.

Ẹphe anọdu l'úbvú úbvú
 Ifuremu;
 yẹe alị Giladu riaha nri;
 rijiaha ẹpho.

- 20 Wakwa iphe, Chipfu epfu baa:

O -rwua mbọku ono;
 ẹe teke ono gẹdegede
 bẹ aa-vọkpoo g'a
 maru ẹka ikpe nmaru
 Ízurelu;
 ọle ọ tọ dudu ọphu
 aa-chọ-vu.

L'avọo iphe-ẹji Jiuda nta vọo

- imo;
 ọ tọ dudu iphe, aa-vota.
 Noo kele nwa ndu ono,
 mu meru g'ephe phodu
 ono be mu a-guru nvu.”
- 21 Wakwa iphe, Chipfu epfu
 baa:
 “Unu tsoo ndu ali Meratayimu
 ọgu;
 yee ndu bu l'ali Pekodu!
 Unu chia phe oso;
 gbuwa phe egbugbu;
 mee phe g'ephe bvueberu
 mu rengurengu!
 Unu mekota iphemiphe,
 mu suru g'unu mee!
- 22 Ephu-ogu aphwakwa l'ali ono;
 mbu ephu ola-l'iswi,
 paru eka apaa.
- 23 Waa g'ongu ndu mgboko
 l'ophu gbajishihuru
 tukaa nanunanu!
 Waa ge Babilonu byawaru
 bya aburu ochobu
 l'echilabo ohamoha!
- 24 Mu gbaberu ngu onya gube
 Babilonu.
 I bya amaru; i dalahwa iya.
 A huma ngu gude ngu;
 kele ọo Chipfu be iitso opfu.
- 25 Chipfu guhaakwaru ulo-eku
 iya ghebe onu;
 bya atuko ngwogu k'oke
 ehu-eghu iya chishia;
 kele Nnajiuphu, bu Chipfu;
 bya aburu
 Okalibe-Kakota-Ike;
 nwekwaru iphe,
 ooby ememe l'ali ndu
 Babilonu.
- 26 Unu shikwa lekameka bya
 etsoo ya opfu!

- Unu gùhashia ọ̀ba-ẹ̀ku iya
ghebechaa ọ̀nu!
Unu rwukọ̀be iya kùbe l'ikpo
l'ikpo g'ẹ̀ka a kùberu
ereshi.
- Unu mee ya g'ọ̀ bvùeberu mu
rengurengu
g'ọ̀ tọ̀ dùkwa onye
a-phọ̀duru iya nù!
- 27 Unu tùko oke-eswi iya
gbushichaa!
G'a chikotaru phẹ̀ je l'ẹ̀ka
ee-gbushi phẹ̀!
Nshio phẹ̀; kẹ̀le eswe nke phẹ̀
rwuakwaru;
mbù eswe mbọ̀ku,
aa-nù phẹ̀ aphù.
- 28 Unu ngabẹ̀kpodapho nchì
nùma olu ndu agba
ọ̀so ọ̀gu,
bù ndu shi l'alì ndu
Bábilọ̀nu nahù agba
ala Zayọ̀nu eje epfu lẹ̀ Chipfu,
bù Chileke anyi gwatawaru
ùgwọ̀ iphe;
mbù ùgwọ̀ iphe,
e meru eze-ùlo iya.
- 29 Mee gẹ̀ ndu ọ̀gba-apfù dzukọ̀be
tsoo Bábilọ̀nu opfu;
mbù iphe, bụkpoo
ndu maru ese ụ̀ta kíkiki!
Unu kpọ̀be ụ̀lo-ẹ̀kwa unu
nọ̀-phẹe ya mgburugburu!
G'ọ̀ tọ̀ dùkwa mẹ̀ onye lanù,
a-nahù nù!
Unu pfùya ya ùgwọ̀ iphe,
o meru!
Unu mee ya iphe,
o meru ndu ọ̀zo;
kẹ̀le ọ̀o Chipfu bẹ̀ o koru
ọ̀kpa l'ishi;
mbù Onye nsọ̀ kẹ̀ ndu Ízurẹ̀lu.

- 30 Ọo ya ẹ̀ ẹ̀-a; ẹ̀nwokoroby
 ẹ̀hẹ a-ẹ̀du ada ẹ̀pọpọ
 l'oma gbororo.
 Ndu Ojọgu ẹ̀hẹ l'ophu ẹ̀
 ee-megbushibẹbe
 mbọku ono.
 Nokwa iphe, Chipfu eepfu
 ẹ̀ ono.”
- 31 Wakwa iphe, Chipfu eepfu baa:
 “Lekwa; mu ẹ̀akwaa ọgu
 duru ngu;
 gube nwọphu eku onwongu;
 noo kẹle eswe nke ngu
 rwuwaru;
 mbu teke aa-nu ngu
 aphu.
- 32 Onye eku onwiya ẹ̀ ẹ̀pfu
 a-du l'okpa l'ọ daa.
 Ọphu ọ dudu onye a-pali iya
 nu.
 Mu e-ye ọku ẹ̀ mkpukpu ẹ̀
 mkpukpu iya, ẹ̀ ọku,
 e-tsu tsua iphemiphe,
 no iya mgburugburu.”
- 33 Wakwa iphe, oopfu;
 mbu Chipfu,
 ẹ̀ Ọkalibe-Kakota-Ike:
 “Ndu Ẹzurelu ẹ̀ eemekwa
 ewere;
 nokwapho g'eeme
 ndu Jiuda.
 Ndu kpuru ẹ̀hẹ ẹ̀ ndzu
 gudeshia ẹ̀hẹ ike.
 Ọphu ẹ̀phe ekwedu g'ẹ̀phe
 laa.
- 34 Obenu l'onye agbafutaje ẹ̀hẹ
 nu ẹ̀ ike du.
 Iphe, ọza ẹ̀ Chipfu,
 ẹ̀ Ọkalibe-Kakota-Ike.
 Ọo-byakpoo ẹ̀huka ẹ̀huka bya
 ẹ̀hẹ agbaru ọdzeni;
 k'ophu oo-me g'a tutaaha

unme l'alì phe;
mekwanaa gẹ ndu ọphu bu
l'alì ndu Bábilọnu ta
tútajehe unme atúta.”

35 Wakwa iphe, Chipfu epfu baa:

“Ogu-echi a-bùru ọgu dọru
ndu Bábilọnu!

Mbù l'ọo-bùru ọgu dọru ndu
bu lẹ Bábilọnu;
mẹ ndu-ishi iya;
yẹe ndibe iya,
bù ndu maru iphe!

36 Ogu-echi a-bùru ọgu dọru

ndu mpfuchiru
iya epfu iphe,
mu epfuduru ono;
k'ọphu ephe a-bùkotaru ndu
eme eswe.

Ogu-echi a-bùru ọgu dọru

ndu ojọgu iya;
k'ọphu ndzù-agùgu e-rwuta
phe ọkpobe erwuta.

37 Ogu-echi a-bùru ọgu dọru

ìnya iya;
yẹe ụgbo-ìnya iya;
yẹe iphe,
bùkpoo ndu Ojogu,
byaru abyabya,
nọ iya l'ime;
k'ọphu g'ephe ha
a-bùkotaerupho
unwanyì.

Mbù-a; ogu-echi a-bùru ọgu

dọru ọlo-ẹku iya;
k'ọphu aa-kwakọta iphe
iya l'ọkwata.

38 Okpomọku a-byapfuta mini,

dù iya nù;
k'ọphu ọo-tùkoepho
tashihuchaa.

Noo kẹle ọ bù alì,

aagwọ ọbvù.

Ọbvụ ono-a bẹ ndzụ-agụgu
e-mechaa gbaghaa
iphu.

39 Ọo ya bụ l'iphe, e-mechaa
buru l'ẹka ono
a-buru anụ-ẹgbudu yẹle
achi-anmabu.

Tẹme ọ bụkwarupho l'ẹka
ono bẹ mgbashi-ujiku
e-buru.

Ọphu a byadu ebubaaru
iya eburu.

Mbụ l'e tee bubaedu iya;
e -shi l'ogbo sweru ogbo.

40 Wakwa iphe, Chipfu epfu
baa:

Ọ kwa ẹgube ono,
Chileke mebyishiru
Sodomu yẹ Gómóra;
yẹ mkpukpu,
nọ-pheru iya
mgburugburu ono
bụ g'ọ tọ dudu onye byaru
eburu l'ime iya;
ọphu ọ dudu nwoke,
byaru akwa iya unuphu
buru.

41 Unu lenu! O nweru ndu
Ojogu,
shi l'uzo isheli abya.

Mbụ l'oo oha, parụ ẹka apaa;
bya aburu eze ndu dū
igwerigwe bẹ e
jeru akpalia;
ephe shi l'ẹka igwe
beru alị beru eje abya.

42 Iphe, e gude kwaa pẹ
ngwoğu bụru apfu
yẹ arwa.

Ephe dū njo; tẹme ọphu ephe
aphuduru nemadzu
obu-imemini.

Ephe anọduje aphụ g'enyimu,
 aphụ gbudugbudu
 l'ẹka ephe agba l'eli inya
 phe eje abya.

Ephe dokaru onwophe ge
 ndu keru ọgu
 abyapfuta gube nwada
 Babilonu!

43 Eze ndu Babilonu numawaru
 ako phe; ẹka kuda iya.
 Ndzu-agugu gude iya;
 iphe meahaa ya ehuka
 ge nwanyi, ime eme.

44 Lekwa-a! O kwa g'oduma
 shi l'oswa,
 no l'aguga enyimu Jiordanu
 kwofuta;
 bya adapfu aturu,
 doru l'odu aturu,
 nri du shii bukwapfo
 ge mu e-kwo
 gburumu je achifu
 ndu Babilonu l'ali iya
 l'otulupfu.

?Bu onye be mu hotaru g'o
 buru onye mu a-tu
 ẹka g'o mee iphe ono?

?Bu onye du ge mu du?

?Bu onye suru mu eku ikpe?

?Bu onye bu onye eche aturu,
 a-du ike pfuru ge mu
 l'iya mee?

45 Oo ya bu le-a; unu numakwa
 iphe,
 Chipfu chiru le ya e-me
 Babilonu; mbu iphe,
 o chiru le ya e-me ali
 ndu Kaludiya.

O to dudu iphe, a-kposhi g'a
 ta kpata unwu aturu iya
 me unwu egbu iya
 kpufu.

Ndu ọ́phu phọ́duru nù bẹ
ndzù e-rwuta.

46 Teke aa-lwùta Bábilọ́nu bẹ
ọ́o-da too;
k'ọ́phu ọ́o-nmayichaa
mgboko anmayi.

Ọ́hamoha anụ́ma-dzuchaaru
olu-ẹ́kwa phẹ́.”

51 ¹ Wakwa iphe, Chipfu epfu baa:
“Unu lekwa; mu a-kpali
onye mmebyi
g'ọ́ bụ́ru ọ́gu dọ́ru ndu
Bábilọ́nu;
mbù ndu bu l'alì, aza 'obu
ndu wù-lihuru etso
mu opfu'.

² Mu e-zi ndu ọ́hozo g'ẹ́phe je
etsoo ndu Bábilọ́nu ọ́gu;
g'ẹ́phe je aphụ́chaa phẹ́
aphụ́cha;
mee alì phẹ́ adabyiru
iphoro.

Ẹ́phe a-nọ́du abya iya ọ́gu
ẹ́ka ẹ́bo ẹ́bo mẹ́
o -rwuẹ́pho mbọ́ku ono,
ee-mebyishi phẹ́ ono.

³ G'onye agbajẹ́ apfù te setakwa
ùta iya k'agbagba;
ọ́phu ọ́ kwakwa onwiya
ngwogu.

Unu ta aphụ́kwaru
unwokorobyia phẹ́
obu-imemini.

Unu mee ndu ojoḡu phẹ́
g'ẹ́phe bvùeberu mu
rengurengu.

⁴ Aa-nọ́du egbushi phẹ́;
ẹ́phe ada gbiigbii l'alì
ndu Bábilọ́nu.

Mbù l'aa-nọ́du emeka
phẹ́ iphe ọ́kpobe
emeka l'agụ́ga gbororo.

- 5 A makwaru-a l'alì ndu
 Ízurelu ephè lẹ ndu
 Jiuda l'ophu bu iphe,
 jiru iya nu bu
 ikpe-anmanma,
 nmaru phe l'iphu Onye Nso
 ke Ízurelu.
 Ole Chileke phe, bu Chipfu
 bya aburu
 Okalibe-Kakota-Ike
 teke agbadokwa phe.
- 6 Unu gbaa oso shi l'alì ndu
 Babilonu gbalaa!
 G'onyenonu dzoo onwiya
 ndzu!
 G'e be mebyishikwa unu opfu
 l'ephe meru iphe-eji;
 noo kele o rwuakwaru
 teke Chipfu e-melata;
 mbu teke oo-pfu phe ugwo,
 gbaru phe nu.
- 7 Babilonu shi buru okoro,
 e meru lẹ mkpola-ododo
 l'eka Chipfu.
 O gude iya mee mee tsuahaa
 ndu mgboko l'ophu.
 Ohamoha nguru mee,
 shi l'okoro ono.
 Oo ya meru g'o gude ephè
 meahaa obvu obvu
 nta-a.
- 8 Babilonu dawaru l'otulupfu
 tsukposhihu.
 Unu rashia ekwa iya ike!
 Unu kpatakwaru iya
 obvu-etete g'o mebe l'eka
 iphe eme iya ehuka.
 ?A maru l'oo-shi nno buru
 iya ewekorohu?
- 9 'Anyi gege emetakwa
 Babilonu iphe,
 eme iya nu;

ọle o to nwehẹedu
ewekọrohu.

G'anyi parụ iya haa
g'onyenonu lashia
alì iya; kele ikpe,
nmarụ iya nù rwuwaru
akpaminigwe;
mbụ l'ọ ha ephekerephe
g'ẹka urwukpu nọ.'

10 'Chipfu meakwaru;
anyi bụru ndu
pfuberekoto ọzo!

Unu bya g'anyi je l'úbvú
Zayonu je akọo iphe,
Chipfu,
bụ Chileke anyi meru!'

11 Unu rwachaa ọnu apfụ unu
arwacha!

Unu achì-lia iphe,
unu egudeje egbobuta
onwunu!

Chipfu kpaliakwaru ndu eze
ndu Midiya;
noo kele iphe,
ọ tųberu bụ g'ọ mebyia
alì ndu Bábilonu.

Chipfu a-gwata ụgwọ iphe;
ụgwọ iphe,
e meru eze-ulo iya.

12 Unu palia ẹkwa-ọhubama
gude goshi l'ogu duru
igbulọ mkpukpu Bábilonu!

Unu cheshi nche ike!
Mbụ-a unu mee gẹ ndu nche
nọdu lẹ nche!

Unu eje l'ẹgbudu je edokaa
ndu mpya-ọgu;
kele Chipfu e-mekwa iphe,
ọ tųberu; mbụ iphe,
ọ chì-buhuhawaru lẹ ya
e-me ndu bu lẹ Bábilonu.

13 Unubẹ ndu bu l'aguga

- ęnyimu;
 tẹme unu nweru ẹku shii;
 ndzụ unu bvuaakwaru!
 Mbụ l'ẹba-oghu ndzụ unu
 gbabuhuakwaru!
- 14 Chipfu, bụ
 Ọkalibe-Kakọta-Ike
 gudeakwa onwiya
 ria angụ sụ lẹ ya
 a-chiru nemadzụ ye lẹ
 mkpukpu ono;
 ẹphe eji iya kpimu;
 sweta iya g'ẹka igube
 swetaru.
 Tẹme ẹphe atụa okoo
 kpua unu.
- 15 Ọo ọkpẹhu iya bẹ o gude
 mee mgboko.
 Ọ bụru mmamiphe iya bẹ o
 gude mee mgboko;
 ọ nguru anguru;
 bya egude nkwaanya iya
 phushi akpaminigwe.
- 16 O -mee; igwe raa ọrà; mini,
 nọ l'imigwe aphua
 gbudugbudu.
 Ọ nọdu emeje g'urwukpu shi
 l'ẹka igwe beru sọru
 sọfuta.
 Teke o meru; igwe nọdu edze
 mini l'ootukwapho
 egbigwe.
 Tẹme ọ nọdu eshije l'ulo
 ẹku iya kpofuta
 pherephere.
- 17 Nemadzụ l'ophu te enwedu
 egomunggo.
 Tẹme ophu ọ dudu iphe,
 ọ maru.
 Iphere gudekọta iphe,
 bukpuo ndu akpu uzu;
 ọ bụru ntekpe,

- ẹphe kpùshiru meru
 phẹ iya;
 kele ntekpe phẹ ọbu
 bukota ughoshi.
 Ọ tọ dudu ọphu atụ unme.
 18 Ẹphe bukota iphe-mmanụ;
 iphe,
 e gude agba mgbonu.
 O -rwuepho teke aa-nụ phẹ
 aphụ; ẹphe alaa l'iyi.
 19 Onye ono, bụ okiphe oshilokpa
 Jiékọpu ono ta adukwa
 gẹ ndu k'ono;
 kele ọo ya bụ onye
 meru iphemiphe;
 mechakpoo okpa-ipfu ono,
 bụ okiphe iya ono.
 Onye ono bẹ ẹpha iya
 bụ Chipfu,
 bụ Okalibe-Kakota-Ike.
 20 Ọ kwa ngu bụ ogbunkụ,
 mu gude alwụ ọgu.
 Ọ bụ ngu bẹ mu egudeje
 chikaa ọha l'ophu.
 Ọ buru ngu bẹ mu egudeje
 mebyia alị-eze l'ophu.
 21 Ọ bụ ngu bẹ mu egudeje
 chikaa inya;
 yẹe ndu nọ phẹ l'eli.
 Mu nọdu egudeje ngu chikaa
 ugbo-inya;
 yẹe ndu agba iya nụ.
 22 Ọ bụ ngu bẹ mu egudeje
 chikaa nwoke yẹe
 nwanyị.
 Ọ buru ngu bẹ mu egudeje
 chikaa ndu bụ ogerenya;
 yẹe ndu bụ okoroɓya.
 Ọ buru ngu bẹ mu egudeje
 chikaa nwoke ọgbaga;
 yẹe nwanyị ọgbaga.
 23 Ọ buru ngu bẹ mu egudeje

chịkaa onye eche aturu;
yee aturu iya.

Ọ buru ngu be mu egudeje
chịkaa onye akọ ofu;
yee eswi, o gude akọ iya.

Ọ buru ngu be mu egudeje
chịkaa ndu achi oha;
yee ndu-ishi.

24 “Teme; ọzo bu le mu a-nduepho unu l'iphu pfa Babilonu; yee iphe, bukpo ndu bukota l'ali ndu Babilonu l'ophu ugwo iphe, epe meru l'ubvu Zayonu.” Nokwa iphe, Chipfu eepfu bu onoya.

25 Wakwa iphe, Chipfu epfu
baa:

“Lekwa; mu bukwa ogo duru
ngu;
gube ubvu ono,
anoduje emebyishi
emebyishi ono;
mbu unube ndu ono,
mebyishikotaru eliphe
l'ophu ono.

Mu a-machiru ngu eka
l'oburu ogo duru ngu.

Mu eshi le mkpakpa-onu ubvu
phu ngu phuzeta l'ali;
mee ngu l'iburu ubvu,
a kpuru oku.

26 Ophu o dudu mkpuma
aa-kwata l'ehu ngu
k'eme mkpuma,
gude ulo.

Ophu o dukwapho mkpuma,
shi iya nu,
e gude atu okpa-ulo.

Noo kele ji-dabyiru buru
okorobo-egu jasu
l'ojejeje.

Nokwa iphe, Chipfu eepfu
bu ono.

27 Unu palia ekwa-ohubama
l'ali ono!

Unu gbua opu tsoru ohamoha!

Unu dozia ohamoha g'ephe
tsoo ya oḡu.

Unu eje ekua ndu alì-eze,
nonu g'ephe tsoo ya oḡu;
ndu Araratu; waa ndu Mini;
waa ndu Ashikenazu!

Unu hōta onye-ishi-ojogu,
a-buru iya oḡu!

Unu achifuta inya ye g'o
zeru gbiigbiigbi
je g'eka igube etsu.

28 Unu dozia ohamoha g'ephe
tsoo ya oḡu;
mbu ndu eze ndu Midiya;
waa ndu achì oha phe;
waa ndu-ishi phe;
mekpoo ndu alì eka
nokota phe l'eka g'ephe
hakota.

29 Alì anma jijijiji bya echi
gburugburu; kele iphe,
Chipfu chiru k'eme
ndu Babilonu dukwa
g'ò dū.

Mbu l'oo-me alì Babilonu
l'ophu l'oburu ochobu;
k'ophu bu l'ò tò dudu
onye byaru ebubaaru
iya eburu.

30 Ndu ojogu ndu Babilonu be
hakwaru alwu oḡu
lachaa je anodu l'ulo phe,
a kpushiru ike.

Ike be bvukotawaru phe nu;
ephe duwaa g'unwanyi.
Eka ephe bu ebubu be a
tūwaru oku.

Mgboro-ígwè, o gude
gbaa upho iya be a
nyajishiwaru.

31 Onye okpa-egwa lanu
anoduje agba etso

nwibe iya;
 onye-ozí etso onye-ozí ọ́zọ́;
 búkpoerupho ndu eje ezi
 eze ndu Bábilónu
 l'a nataakwaru iya
 mkpúkpu iya l'ophu
 l'ophu.

- 32 Eka mini asókahu asókahu
 bẹ́ a kuchichaakwaru;
 bya atúfu ọ́ku l'úda l'úda,
 dúgbaa l'ẹ́ka ono.
 Ndu ojọ́gu bẹ́ mejí tọ́fuwaru.”

33 Wakwa iphe, oopfú; mbú Chipfú, bú Ọ́kalibe-Kakọ́ta-Ike; mbú Chile-ke ké ndu Ízurẹ́lu:

“Nwada Bábilónu dúkwaa
 g'alí ẹ́ka aazọ́shí ẹ́swa
 lẹ́ balí teke aazọ́ iya
 tọ́litoli.

Teke aa-kpa iya g'onye akpa
 jí rwuakwaru.”

- 34 “Nebukadineza, bú eze ndu
 Bábilónu ripyawaru
 anyi.

O mewaru; ọ́phu anyi amaẹ́du
 iphe, anyi eme.

O mewaru anyi;
 anyi búru ite iphoro.

Ọ́o g'ẹ́jo agwọ́ elweje iphe-a
 bú g'o lweru anyi
 bya egude ẹ́ku anyi ríjia
 ẹ́pho;
 bya agbẹ́ teke ono gbọ́fu
 anyi.

- 35 G'iwashí, e weru l'anụ́-ẹ́hu
 anyi tukokwaru ndu
 Bábilónu l'ẹ́hu!”

Nokwa iphe, ndu bu l'úbvú
 Zayónu epfu.

“Gẹ́ mee anyi tukokwaru
 l'ishi ndu bu l'alí ndu
 Bábilónu!”

Nokwa iphe, ndu bu lẹ́

- Jierúsalem̄u epfu.
 36 Ọo ya bụ ẹ-a; wakwa iphe,
 Chipfu epfu baa:
 “Lekwa; mu a-gbaru unu
 ọdzori; melata iphe,
 e meru unu.
 Ẹnyimu phẹ bẹ mu e-me
 g'ọ tashihu;
 bya emee ọgba mini
 phẹ g'ọ tashihuchaa.
 37 Bábilonu e-mechaa bụru
 ikpọzu;
 ẹka nkuta-ọswa bugbaa;
 waa iphe, a-nodu anyị
 ishi ẹdzu;
 tẹme l'e gudekwa iya
 phọ agba mgbonu;
 ẹka ọ tọ dudu onye bya
 eburu iya eburu ọzo.
 38 Ndibe iya g'ẹphe ha asugbaa
 ekiri g'oduma.
 Mbụ l'ẹphe asugbaa kọroro
 g'unwu oduma nshii.
 39 Obenu l'ọo teke ono,
 oonwu phẹ
 phuruphuru g'ọku ono
 bẹ mu e-shiru phẹ nri
 ọbo-iphe;
 mee mee atsuhaha phẹ;
 k'ọphu ẹphe a-chiẹpho
 ọchi kpọkiriuhuchaa
 akpọkirihi;
 kuwaruro mgbenya,
 ẹphe tee tehubaedu etehu.
 Nokwa iphe, Chipfu eepfu
 bụ ono.
 40 Mu a-kwata phẹ tụa l'alị g'unwu
 aturu, a chi eje egbushi;
 mbụ g'ikpoto ebili;
 yẹe ikpoto egbu.
 41 Lewarọ g'e gude gude ndu
 Sheshaku;

- g'e gude lwuta ndu ndiphe
l'ophu shi gude eku
onwophe.
- Ọ buakwaa iphe, anyi
ishi edzu l'echilabo
ohamoha.
- 42 Enyimu byaakwaru utso
ripyabe ali ndu
Babilonu.
- Ọ buru gborogboro, ooso be
o gude sopyabe iya.
- 43 Mkpukpu le mkpukpu,
no iya nu bukotaru
ochobu; kpohu nkụ;
buru ali evevee;
ali eka adudu onye bu
iya nu;
ophu o dudu onye eshi iya
eshishi.
- 44 Mu a-hu Balu ahuhu l'ali
ndu Babilonu.
- Mu emee ya lo gboo iphe,
o lwehawaru elwelwe.
Ohamoha taa wuedu
awu-pfu iya.
- Temme igbulo mkpukpu
Babilonu adakposhihu.
- 45 Ndibe mu; unu shikwa
l'ime iya wufuta!
Unu gbakwaa oso ndzu unu!
Unu gbalakwaaru oke
ehu-eghu Chipfu!
- 46 Ge meji ta tofukwa unu;
ophu unu atsuhukwa
ebvu;
teke unu a-wata anu ude
ogu l'ali ono;
a -tukpoo owa-a apha-a;
apha ozo l'aawata ozo;
mbu teke iwashi adu
l'ali ono;
teme onye-ishi anodu

etso onye-ishi oḡu.

47 Oo ya bu; o nweru teke
dufutaje nu,
bu teke mu a-nu nshi
ndu Babilonu aphu.
Ali phe l'ophu be ee-me
iphe-iphere.
Ndibe iya, e gburu egbugbu
adabyigbaaru adabyiru
l'ime iya.

48 Noo teke imigwe;
me eliphe l'ophu;
yee iphe, bukpo iphe,
nokota iya nu
a-tu uzu l'eka ehu atso
phe utso l'opfu ehu
ndu Babilonu;
kele ndu mmebyi,
shi l'uzo isheli abya phe
etso oḡu.”

Nokwa iphe, Chipfu eepfu
bu ono.

49 “O kwa ge ndu Babilonu
meru ndu mgboko l'ophu;
ephe daa popoo
bu ge ndu Babilonu ono
a-da popoo
ephebedua.

O buru iphe, kparu iya nu bu
g'ephe gude gbua ndu
Izurelu.

50 Unube ndu nahuru ogu-echi;
unu tugbuekwapho!
Unu be jekpokwa
anmarwube!
Unu nodukpooro uzanya
nyata Chipfu!
Unu anyatakwapo
Jierusalem!”

51 “E kpuakwaru anyi iphu
le ntụ;
kele a kowaru anyi onu.

- Teme iphere kpuchiwaa
 anyi iphu;
 noo kele ndu ohozo
 bahuru l'eka dugbaa
 nso l'ulo ke Chipfu.”
- 52 Wakwa iphe, Chipfu epfu
 baa:
 “Mboku abyanu-a, bu mboku,
 mu a-nu nshi aphu.
 O buru iphe, a-nodu ada l'ali
 iya l'ophu
 bu atsü ude, ndu e mekaru
 iphe atsü.
- 53 O to dukwa m'obetaru
 Babilonu jerwuchaa
 akpaminigwe;
 bya emee ulo, a kpushiru
 ike nkiya, du ephekerephe;
 mee ya;
 ophu aabahudu iya abahu;
 be mu e-yele-a ndu e-je
 emebyishia ya.
 Nokwa iphe, Chipfu eepfu
 bu ono.
- 54 Uzu-ekwa adakwa le
 Babilonu; uzu,
 egoshi l'e mebyishiwaru
 iphe,
 paru eka l'ali ndu
 Babilonu.
- 55 Chipfu abyawaa emebyishi
 Babilonu;
 byanyikota oke uzu ono,
 aanoduje atu l'ime
 iya ono.
 Ndu ohogu atu akpara
 g'eze-enyimu abya.
 Uzu, ephe a-nodu atu ala
 ephekerephe.
- 56 Noo kele onye mmebyi
 byawaru emebyishi
 Babilonu.

Ndu ojogu iya be a
kputachawaru le ndzu.

Te me a gbajishiwa uta
phe mkpurikpu
mkpurikpu;
kele Chipfu bu Chileke,
apfuje nemadzu
ugwo g'iphe,
o meru gbaru.

O je l'apfu iya ugwo pfu-dzua
ya ya apfu-dzu.

⁵⁷ Mu e-me ge ndu-ishi iya;
ye ndibe iya, maru iphe;
ye ndu-ishi ojogu iya;
me ndu-ishi
mkpukpu phe;
mekpoo ndu ojogu phe;
ngua mee g'o tsu
phe atsutsu.

Mgbenya atuko tushi phe;
ephe tee tetabaedu
eteta jasu l'ojejoje.”

Nokwa iphe, oopfu;
mbu onye eze ono,
bu Chipfu; bya aburu
Okalibe-Kakota-Ike ono.

⁵⁸ Wakwa iphe, oopfu;
mbu Chipfu bu
Okalibe-Kakota-Ike:
“Igbidigbi igbulu Babilonu
ono be ee-tsukposhichaa
etsukposhi.

L'a tufu oku l'ephekerephe
onu-abata iya ono.

Ndiphe eria aphu see akanya
ke mmanu.

Ohamoha abuerupho oku be
ephe e-geru ozi jasu
ike avu phe.”

⁵⁹ Wakwa ozi, onye mpfuchiru Chileke, bu Jieremaya ziru Seraya, bu nwa Neraya bya aburu nwanwa Maseya; teke ono, o jeru Babilonu ono; o buru ephe le Zedekaya swi; mbu eze ndu Jiuda teke o buwaru eze

apha ẹno. Seraya ono bu onye-ishi, bu iya achotaje ẹka ndu ije a-kwaje. ⁶⁰Jieremaya tukoepho ejo-iphe, a-nwuru Babilonu dekota l'ekwo; mbu iphemiphe ono, e dekotaru k'opfu ẹhu Babilonu ono. ⁶¹Iphe, o pfuru Seraya bu: "Teke i jerwuekwarupho Babilonu; gukwaa iphemiphe-a g'a numa-dzuru. ⁶²Iphe, ii-pfufua bu: 'Gube Chipfu; i pfuwaru su l'ii-mebyishi ẹka-a; k'opfu bu le nemadzụ tee buedu iya ebubu; ophu anu a-needu iya; l'oo-buru ochobu ojejoje!' ⁶³Teke i guchaerupho ekwo-a; l'iilibe iya mkpuma woru chie l'ime enyimu Yufuretisu. ⁶⁴Iphe ozo, ii-pfufua ye iya bu: 'Noo ge Babilonu a-tsu otsuri bu ono; ophu oo-sebaedu ozo. O buru iphe, a-kpa iya nu bu ejo-iphe, mu abya eme g'ọ dafu iya; ophu ike adubaedu ndibe iya.' "

Noo ẹka opfu Jieremaya jeberu bu onoya.

Teke Zedekaya bu eze ndu Jiuda
(2Ndu 24:18-20; 2Iphe 36:11-16)

52 ¹Zedekaya be nowaru ukporo apha l'apha lanu teke o wataru aburu eze. Iphe, o noru l'aba-eze le Jierusalemu buru apha iri le nanu. Epha ne iya bu Hamutalu nwada Jieremaya ke Libuna. ²O meru iphe, du eji l'enya Chipfu ge Jiehoyakimu meru. ³O buru ẹhu-eghu, eghu Chipfu be iphe ono gude nwua l'ehu ndu Jierusalemu; me l'ehu ndu Jiuda; jeye teke o chifuru phe l'atatiphu iya.

Zedekaya nonyaa; bya ekwefuaharu eze ndu Babilonu ike.

Adada Jierusalemu
(2Ndu 25:1-7; 2Iphe 36:13-21; Jier 39:1-10)

⁴Tobudu iya bu; o be l'apha, kwe Zedekaya apha tete, o wataru aburu eze; l'abalı k'iri l'onwa iri; eze ndu Babilonu, bu Nebukadineza chita ikpoto ndu Ojogu iya; epe byatashia Jierusalemu. Epe kepheta mkpukpu ono; bvuphee ya ose-ogu mgburugburu. ⁵Epe kepheta mkpukpu ono jeye l'apha, kwe eze, bu Zedekaya apha iri le nanu; e -shi teke o wataru abu eze. ⁶G'o rwuru abalı ke tete l'onwa ẹno be egu-ememe, du le mkpukpu ono kabaa njo; k'opfu ndu bu iya nu te nwehedu nri, epe e-ri. ⁷O rwua mboke ono; e tsukpo igbulu mkpukpu ono. O be l'enyashi iya; ndu Ojogu l'opfu tsukahı gbalaa. Eka epe shiru gbalaa bu l'onu oguzo ono, du le mgbaka igbulu labo ono, du le mgboru mgbabu eze. Teke ono be ndu ojogu ndu Babilonu kepheru mkpukpu ono mgburugburu. O buru eka epe shiru bu uto nsuda Araba. ⁸Ole ndu Ojogu ndu Babilonu chipyaberu eze, bu Zedekaya je egude iya le baswaa alı, du le Jieriko. Ndu Ojogu iya buhaa ya tsukashıhu. ⁹Epe kpua eze, bu Zedekaya le ndzu; kpuru iya kpı-pfu eze ndu Babilonu le mkpukpu Ribula, bu eka o no nmaa ya ikpe. ¹⁰O buru le Ribula l'eka ono be eze ndu Babilonu no gbushia unwu Zedekaya; Zedekaya nodu ele iya enya; o nodu egbushi phe. O

byakwapho bya atuko ndu-ishi l'alì ndu Jiuda gbushikota. ¹¹ O bya aswo-shia Zedekaya akpuru enya; bya egude egbirigba, e meru l'on'yirubvu tugbabe iya kpata lashia Babilonu; je eworu iya tua mkporo; o nodu l'eka ono jasu teke o nwuhuru. ¹² O bya erwua g'onwa ise du l'abali iri; l'apha, kwe Nebukadineza apha iri le tete, e -shi teke o wataru abu eze ndu Babilonu; Nebuzaradanu, bu onye-ishi ndu ojogu, eche Nebukadineza nche; mbu onye-ozì eze ndu Babilonu ono jeshia Jierusalemu. ¹³ O je atua oku leze-ulo Chipfu; me l'ulo-eze; me l'ulo, dukota le Jierusalemu; mbu l'ulo ndu oke amadu be o tukotaru oku. ¹⁴ Iphe, bu ndu Ojogu, onye-ishi ojogu ono, echeje eze nche chi; ephe je l'eka ono; be tsukposhiru igbulu, e gude kpupheta Jierusalemu mgburugburu. ¹⁵ Nebuzaradanu, bu onye-ishi ndu ojogu, echeje eze nche tuko iphe, bu ndu phoduru le mkpukpu ono rwukoo lashia Babilonu; ephe le ndu lapfuru eze ndu Babilonu alapfu; mekpoo ndu emeje ona, phoduru nu. ¹⁶ Onye-ishi ndu ojogu ono, bu Nebuzaradanu be ndu ophu o haru haa bu ndu ophu kachakpoo aburu ndu ukpa l'alì ono; gephe jeje ozi l'opfu-vayinu; me l'opfu.

¹⁷ Itso on'yirubvu, du leze-ulo Chipfu; me ogba-kperekpere; me iphe ono, e shi eyeje mini ono, e gude on'yirubvu kpa, du iya nu; be ndu Babilonu kupyashichaarù akupyashi; vuta on'yirubvu ono lashia ali Babilonu. ¹⁸ Ephe vutakwarupho ite; me iphe, eegudeje ekpo ntu; me iphe, apaje oghu oroku; me gbamugbamù; waa iphe, bukpo iphe, a kpuru l'on'yirubvu, eegudeje eje ozi leze-ulo Chipfu; ¹⁹ Onye-ishi ndu ojogu ono bya achitakwapho eze ochi; yee iphe, aaguje oku; yee gbamugbamù; mekpoo ite; me iphe, aapfubeje oroku; mekpoo nkweka; mbu iphemiphe, bukpo iphe, e meru le mkpola-ododo yee k'ochaa.

²⁰ On'yirubvu, lakotaru litso labo ono; me l'iphe ono, e shi eyeje mini ono; yee oke-eswi on'yirubvu iri lebo ono, shi nodu iya le mkpula ono; me l'ogba-kperekpere ono, buchaa iphe eze, bu Solomonu meshiru dobe leze-ulo Chipfu; be erwa, du iya nu be ataa tukotadu onu iya. ²¹ Itso ono be eli iya dugbaa nkwo-eka iri lesato lehu lehu. Iphe, itso ono du gbaa mgburugburu buru nkwo-eka iri lebo. E meru itso ono; uzo du iya lechi. Igbidigbi itso ono dugbaa mkpushi-eka eno eno. ²² Nchi-itso, a tu-koberu leli itso ono be eli iya du nkwo-eka ise ise. A bya egude ugbu ye le itorokuma, a kpuchaarù l'on'yirubvu; tsophee ya mgburugburu. Itso k'ebo; ye le itorokuma, akpuru dobe iya buru iphe lanu ye le ophuu. ²³ Itorokuma du ukporo eno l'iri l'ishii l'aguga iya. Mkpako itorokuma, akpuru dophee ugbu ono mgburugburu du ukporo ise.

A kpuru ndu-ishi ndu Jiuda le ndzu
(2Ndu 25:18-21)

²⁴ Noo ya; onye-ishi ndu Ojogu ono, bu ndu anoduje eche eze nche ono bya akpata Seraya, bu onye-ishi ndu-uke Chileke le ndzu; kpata

Zefanaya, bu onye-uke, etsota Sereya; me umadzu eto, echeje nche l'onu-abata eze-ulo Chipfu. ²⁵A bya abya le ndu ophu nokwadu le mkpukpu; o bya akputa onye aharu ahaha shi buru onye-ishi ndu ojogu; me umadzu esaa, shi agbazijeru eze idzu; kputa onye edejeru onye-ishi ndu ojogu ekwo, bu iya bu onye-ishi ndu egudeje ndu ali ono l'okpehu g'ephe je ogo; me ukporo umadzu eto, bu unwoke ali ono, a humaru le mkpukpu ono. ²⁶Nebuzaradanu, bu Onye-ishi ndu ojogu, anoduje eche eze nche ono tuko g'ephe ha kputa kpu-pfuta eze ndu Babilonu le mkpukpu Ribula. ²⁷O buru le Ribula l'eka ono, du l'ali Hamatu be eze ndu Babilonu no gbushia phe. Noo g'e shi kpu ndu Jiuda le ndzu l'ali phe laa ali ozo bu ono. ²⁸Wakwa umadzu ole, Nebukadineza kpu ru le ndzu lashia ali ozo. L'apha k'esaa, e -shi teke o wataru aburu eze be o chitaru ndu Jiuda unu umadzu esaa l'ukporo umadzu iri le nanu l'umadzu eto. ²⁹O rwua l'apha ophu kwe iya iri lesato, e -shi teke o wataru aburu eze; o shi le Jierusalemu chita unu umadzu labo l'ukporo umadzu l'umadzu iri l'ebo. ³⁰O be l'apha, kwe Nebukadineza ukporo apha l'apha eto, e -shi teke o wataru aburu eze; Nebuzaradanu, bu Onye-ishi ndu ojogu, anoduje eche eze nche bya achilaaru iya ndu Jiuda, du unu umadzu l'ukporo umadzu iri l'esaa l'umadzu ise. Mkpako ndu a kpu ru le ndzu buru unu umadzu iri le nanu l'ukporo umadzu iri.

A tufutaru Jiehoyakinu l'ulo-mkporo
(2Ndu 25:27-30)

³¹O buru l'apha, kwe Jiehoyakinu, bu eze ndu Jiuda ukporo apha l'apha iri l'esaa, e -shi teke a kpu ru iya le ndzu be Evilu-Merodaku, byaru aburu eze ndu Babilonu. O buru g'onwa iri l'ebo du l'ukporo abali l'abali ishi; be o tufutaru Jiehoyakinu, bu eze ndu Jiuda ono l'ulo-mkporo. ³²O pfuru opfu oma yeru Jiehoyakinu; bya edobe iya l'onodu, kakota ree eme le ke ndu eze ozo, a tukoru yele ephe kpu ru le ndzu laa ali Babilonu. ³³O buru iya bu le Jiehoyakinu eyefu uwe mkporo iya; bya awata eri nri le teburu eze gbiriri jasu go no-beru. ³⁴Mboku-mboku be eze anuje iya okpoga, oo-gudeje eme mkpa iya jeye go no-beru; mbu gbiriri jasu mboku, o nwuhuru.